



O Itulā Fa'ai'u o le Lalolagi

Su'esu'ega o le Tusi Pa'ia

Revelation Publications

O Itulā Fa'ai'u o le Lalolagi

Su'esu'ega o le Tusi Pa'ia

Su'esu'ega o le Tusi Pa'ia

O Itulā Fa'ai'u o le Lalolagi

Copyright (c) 2024 e Merlin Beerman ma Revelation Publications.

All rights reserved world-wide.

Tulaga mo le Fa'aaogāina

Pe afai e te lomia ma fa'asoa atu matā'upu ma nisi, o lou aiā lea o le a i luma o le Ali'i. Matou te fa'amalosi atu 'oe ia fa'asoa atu ma e leai se tau i lalo o nei tulaga. E mafai ona kopi ma lomia e se faiga fa'aōna pō nei e fa'asoa atu ai. E lē mafai ona suia so'o se vaega po o le fa'atau atu, ma e tataua ona i ai le lapata'iga o le aiā (copyright) e tusia i luga i so'o se lomiga.

Matā'upu na si'itia ma fa'atatauina mai tusiga ua lomia a E. G. White

Tu'ufa'atasia ma fa'atonutonuina e Merlin Beerman

Fa'aSamoaina Abbie L Watt

Fa'atonu Fa'aSamoa Florence L Voigt

Ata - Copyright (c) Bigstockphoto.com

Revelation Publications.com - Bible-Lessons.org

PublisherforGod@gmail.com

FA'ASOLOGA O LESONA

1. O le Amataga, Pogai, ma le Tāua o Valo'aga
2. O Lapata'iga, o le Te'ena, ma le Loto Momomo
3. O Perofeta Pepelo ma Keriso Pepelo
4. O Agaga Taufā'asesē ma Talitonuga a Temoni
5. O Taua, o Fa'ama'i, ma Mala e Tutupu
6. Fa'alataina ma Fa'asauāina
7. O le Ta'atele o le Solitulafono i Aso o le I'uga
8. Mea 'Inosia e Fa'atafuna'iina ai ma le Amataga o Puapuagā
9. O le Uāga Mulimuli a le Agaga Pa'ia
10. O le Alaga Leo Tele a le Agelu Muamua
11. O le Alaga a le Agelu Lona Lua
12. O le Alaga a Lona Tolu o Agelu
13. O le Fa'amaufa'aailoga a le Atua
14. O le Taimi Tele o Puapuagā ma le Amataga o Mala
15. O le Mala e Ono ma le Taufā'asesē Aupito Sili a Satani
16. O le Mala e Fitu ma le Taua o Amaketo
17. E Fa'apefea, o Fea, ma o Afea o le a Toe Afio mai ai Keriso?
18. O le Mamalu o le Toe Afio mai o Keriso ma le Lavea'iina o i Tatou
19. O Tau i a le 'Au Amiotonu

Fa'asino o Tusiga
O le Ōfo mo 'Oe



O le Amataga, Le Pogai, ma le Tāua o Valo'aga

Lesona 1

'UPU A LE FA'ATONU: E fa'aali mai e le Atua mea o lo'o i lumana'i ina ia tatou sauni, ina ia lē fa'asesēina i tatou, ma ina ia tatou sao mai le fa'atafunaga. I tausaga ua leva ona mavae, na fa'atasi ai Keriso ma Ōna so'o i luga o le Mauga o Olive, le mati'eti'e i luga a'e o Ierusalema ma fa'aali mea o le a tutupu i le fa'ai'uga o le talafa'asolopito o le lalolagi. Ia fa'apea ona tatou sauni ia fa'aofi mai 'upu moni sa Ia fa'asoa mai, ma taliga fa'aleagaga e fa'alogo ai ma mata e va'ai ai.

(1) O LE Ā LE SUAFA O LO'O FA'AILOA MAI AI O IA, LĒ PULEA LE VĀNIMONIMO, MA O LE Ā LE MEA E MAFAI ONA IA FAIA?

*"Ia outou manatunatu i mea muamua talu mai le vavau; auā o A'u o le Atua, e leai lava se tasi; o le Atua, e leai sē ma te tutusa; o lo'o fa'aali talu mai le amataga o mea e mulimuli; mai anamua fo'i o mea ua lē faia; o lo'o fai ane, E tū La'u pule, 'Ou te faia fo'i mea uma 'Ou te loto i ai." **Isaia 46:9, 10***

MAU E TAU I AI: Isaia 45:21; 44:7, 8

O Ia Lē e pulea le vāteatea, o Ia lea e silafia le fa'ai'uga mai le amataga - o Ia o lo'o tutusa pea ona fofola mai i Ōna luma mea lilo ua mavae ma mea o i lumana'i, ma o Ia o lo'o silafia le fa'ataunu'uina o Āna lava fuafuāga alofa ma fa'amanuiāga, i tua atu o fa'anoanoāga ma le pogisā ma puapuāga ua o'o mai ona o le agasala. E ui ina

"Ua si'osi'omia o ia i ao ma le pogisā; o le amiotonu ma le fa'amasinoga o lo'o tumau ai lona nofoāli'i" (Salamo 97:2). O nei mea uma o le a malamalama i ai i se aso agaga uma o lo'o nonofo i le atulaulau a le Atua, o ē e fa'amaoni ma ē lē fa'amaoni iā te Ia. "E sao lava Lana galuega; auā e tonu Ōna ala uma lava; o le Atua fa'amaoni, e le o iā te Ia se amiolētonu, o le amiotonu ma le amio sa'ō lava Ia" (Teuterenome 32:4). PP 43.

(2) O LE Ā LE FA'AI'UGA PE A FA'AILOA E LE ATUA LONA FINAGALO MA FUAUFUĀGA MO LE LUMANA'I?

Ua tautō Ieova o 'au, o lo'o fa'aapea mai, E moni, e pei ona 'Ou manatu e fa'aapea lava ona taunu'u, e pei ona A'u pule e fa'aapea lava ona fa'atumauiina;... Auā o Ieova o 'au ua pule o Ia, o ai ea sē na te fa'alēaogāina? O Lona a'ao ua fa'alooaloina atu, o ai ea sē na te fa'afo'isia?" Isaia 14:24, 27

MAU E TAU I AI: Tanielu 2:21; 4:17; Galuega 3:18

Ia tu'u pea le avanoa mo tupua ma ē o lo'o ta'u mai o latou o atua, pe mafai ona latou fa'aalia ni mea ua latou faia mo le lelei o le lalolagi. Ua latou faia se mea ia fa"alelei ai olaga o ē nonofo i le lalolagi? Ua latou aumaia i le lalolagi le amiotonu, alofa tunoa, fa'amasinoga tonu, po o le 'upu moni? O ā mea lilo mai anamua e mafai ona latou fa'aali mai? E latou te mafai ona fa'ailoa mai pe na fa'apefea ona fa'atū mai le lalolagi, pe na amata ola mai fa'apefea le tagata? Ia tu'u mai o latou tupua se'i vavalalo, pe afai latou te mafai, uiga o mea o le a o'o mai. Tu'u latou e taumafai pe mafai ona tatalaina mai le lumana'i, pe fa'apei o se tusi. E mafai e le Atua, a e latou te lē mafaia ona fai. E silafia e Ia le lumana'i fa'aapea ma mea ua mavae. E iloa e Satani e i ai le mea o le a o'o mai, peita'i o mea na te iloa o mea ia ua uma ona fa'aali mai e le Atua. E lē gata i lea e mafai ona vavalalo na o sina vaega o le ala o le a uia e tagata o lo'o i lalo o lana puleaga. A e peita'i e na o le Atua e mafai ato'atoa ona valo'ia le lumana'i. 4 BC 253.

(3) PE A VALA'AUINA PEROFETA E LE ATUA, O LE Ā LE MEA E NA TE TU'UINA I O LATOU GUTU MA O LE Ā TONU LA LATOU GALUEGA?

Ona fetalai mai lea o Ieova ia te a'u,...'Ou te fa'atūina mo i latou, o so latou uso, se perofeta e pei o 'oe; 'Ou te tu'uina atu fo'i A'u upu i lona gutu, e fai atu fo'i e ia iā te i latou o mea uma lava 'Ou te fai atu ai iā te ia".

Teuterenome 18:17, 18

MAU E TAU I AI: Teuterenome 5:5; II Samuelu 23:2; Mataio 11:9, 10

O valo'aga, o le mana lea e tautala atu ai ma le pule mai le Atua, pe o le fai ma sui o le Atua, e ta'u atu mea o le a tutupu i le lumana'i, po o le fa'ailoa o le finagalo o le Atua mo le taimi nei (Esoto 3:10, 14, 15; Teuterenome 18:15, 18; II Samuelu 23:2; Mataio 11:9, 10; II Peteru 1:21). Ua filifilia e le Atua valo'aga e 'avea ma ala e feso'ota'i ai Ia ma le tagata (Numera 12:6; Amosa 3:7). O le Tusi Pa'ia atoa o le meaalofo lea ua aumaia i tagata (II Timoteo 3:16; II Peteru 1:20, 21). E molimau le Tusi Pa'ia iā Iesu, ma e talafeagai le ta'ua o le mea alofa o valo'aga "o le mau lea iā Iesu" (Fa'aaliga 19:10; Ioane 5:39; Fa'aaliga 12:17). 6 BC 771

(4) AISEĀ E FA'AFESO'OTA'I MAI AI LE ATUA IĀ I TATOU E ALA I PEROFETA A E LĒ O LE FA'AFESĀGA'I?

A e peita'i o a outou amio leaga ua fai ia ma pupuni i le vā o outou ma lo outou Atua, o a outou agasala fo'i ua 'alo ai Ōna fofoga iā te outou." Isaia 59:2

Ua Ia fetalai mai fo'i, E te lē mafaia ona va'ai mai i O'u mata; auā e lē mafai ona va'ai mai lava se tagata iā te A'u, ma ola pea ia. Esoto 33:20

MAU E TAU I AI: Esoto 33:18-23; 24:17

A e le'i ulufale mai le agasala, sa fiafia Atamu i ana feso'ota'iga ma Lē na faia ia; peita'i talu ona vavae 'ese le tagata mai le Atua ona o le agasala, ua 'ave'ese mai le aiga tagata lenei avanoa e sili le maualuga. A e ala i le fuafuāga o le fa'aolataga, ua tatala mai ai se auala ina ia mafai ai pea lava feso'ota'iga i le vā o le lagi ma ē nonofo i le lalolagi. O lo'o fa'afeso'ota'o mai pea le Atua ma tagata e ala i Lona Agaga, ma o lo'o aumaia i le lalolagi le malamalama o le lagi, e ala mai fa'aaliga i Āna 'au'auna filifilia. AG 190

Ua fausia e le agasala se pā puipui i le vā o le tagata ma le Atua. Pe a foliga mai ua vavāmao le lagi ma le lalolagi, o lona uiga ua tatauinā e le agasala se 'ie pupuni e vavae'ese ai le tagata mai le Atua. 4 BC 309

(5) O AI O LO'O VALA'AUINA E LE ATUA E 'AVEA MA FOFOGA FETALAI E FA'ASOA ATU VALO'AGA MA LE FANAU A TAGATA, MA O AI E AUMAI AI NEI FE'AU?

"Auā e lē o le loto o tagata na tu'u mai ai le valo'aga anamua, a o tagata pa'ia o le Atua na talatalaina mai ina ua osofia mai e le Agaga Pa'ia." II Peteru 1:21

MAU E TAU I AI: Efeso 3:5; Ieremia 3:15; I Tupu 17:24; Amosa 3:7; Eperu 1:1, 2

Ua tu'uina e le Atua le sauniuniina o Āna Afioga tāua i tagata fa'atauva'a. O lenei Afioga o lo'o tu'ufa'atasia i tusi, o le Feagaiga Tuai ma le Feagaiga Fou, o le tusi ta'iala mo tagata o lo'o nonofo i le lalolagi ua pa'ū, ua tu'uina iā i latou ina ia su'esu'e ma usiusita'i i ōna fa'atonuga, ma pe a mulimuli i ai o le a leai se agaga e to'atasi e lē iloa a o aga'i atu i le lagi.

Ua fa'asino mai e le Tusi Pa'ia o le Atua le Tusitala, a e na fa'amauiina tusi i lalo e lima o tagata; ona o le tele o itu'aiga fafaūga o ōna tusiga 'ese'ese, e ta'u mai ai amioga a ē sa tusia. O 'upu moni o lo'o fa'aalia mai e "mai le Agaga o le Atua ia" (II Timoteo 3:16); peita'i o lo'o fa'aailoa mai e 'upu a tagata. Ua aumaia e le Agaga Pa'ia mai Lē e Fa'avavau le malamalama i mafaufau ma loto o Āna 'au'auna. Na Ia tu'u mai miti ma fa'aaliga, o fa'aailoga ma fa'atusa; ma o i latou na fa'aali mai i ai le mea moni, ua latou fa'aalitinoina le uiga o ia mea i le gagana a tagata. FLB 10

E o'o lava fo'i i le 'au perofeta o ē na tu'ua i ai se malamalama fa'apitoa e le Agaga Pa'ia, latou te le'i malamalama ato'atoa i le tāua o le fa'aaliga na avatu iā i latou. Na finagalo le Atua ina ia auaua'i le tu'uina mai iā i latou o le uiga o ia mea; e tu'uina mai i le vaitaimi tonu e mana'omia ai e le fanau a le Atua a'oa'oga o lo'o affi mai totonu o ia fa'aaliga. GC 344

(6) O LE Ā LE AUALA E FA'AAOGĀ SO'O E LE ATUA E FA'AALI MAI AI LE LUMANA'I?

"Ona fetalai mai ai lea o Ia, Inā fa'alologologo mai ia i A'u upu, Afai e i ai se perofeta a Ieova o iā te outou, 'Ou te fa'aailoa A'u e A'u iā te ia i le fa'aaliga, 'Ou te tautala atu iā te ia i le miti." Numera 12:6

MAU E TAU I AI: Iopu 33:14-16; Tanielu 2:28; 4:5; Ioelu 2:28

O fa'aaliga, miti ma va'aiga fa'apitoa mai le lagi e fa'amalamalama ai le mafaufau, o ala e galue ai le meaalofo a valo'aga. E fa'apea ona 'avea ai le tagata ma fofoga fetalai a le Atua (II Samuelu 23:2; Mataio 3:3; II Peteru 1:21). Ua finagalo le Atua o lenei meaalofo tāua a le Agaga e tatau ona i ai i Lana ekalesia e o'o i le taimi o le i'uga. O le fa'aailoga fo'i lenei e fa'amaonia ai le ekalesia moni a le Atua i aso tau fa'ai'ui'u. E tatau lenei mea, ona o le auala lenei e fa'aaogā e le Atua e fa'aalitino mai ai o Ia, ma tu'u mai Āna fe'au i le lalolagi talu mai le pa'ū a Atamu. 6 BC 771

(7) O LE Ā LE MEA TELĒ O LE A TUPU O LO'O TA'U MAI E LE TAMĀ I LE LAGI I VALO'AGA E TELE, INA IA TATOU SAUNIUNI I AI?

*"Afai fo'i 'Ou te alu ma sauni se mea e nonofo ai outou, 'Ou te toe sau, 'Ou te talia fo'i outou ia fa'atasi ma A'u; ina ia i ai outou i le mea 'Ou te i ai A'u. " **Ioane 14:3***

MAU E TAU I AI: Mataio 26:64; I Peteru 5:4; Fa'aaliga 22:12

E matuā ato'atoa lenei gagana! Pe a e taumafai e fuaina, o le a e iloa o nei 'upu e lē mafuatia le loloto o lona uiga. O lea o lo'o saunia i tatou e nonofo i maota o lo'o afio atu Keriso e sauni mo ē e alolofa iā te Ia. *HP 247*

(8) O LE Ā LE ATA NA FA'AAOGĀ E KERISO E FA'AMATALA ATU AI O LE A FA'ATE'IA I LATOU O Ē LĒ FA'ALOGO I VALO'AGA PE A O'O I LE TAIMI O LONA TOE AFIO MAI?

*"Afai fo'i e te lē mataāla, 'Ou te alu atu iā te oe e pei o se gaoi, e te lē iloa fo'i le itū aso 'Ou te alu atu ai iā te oe." **Fa'aaliga 3:3***

MAU E TAU I AI: Fa'aaliga 16:15; Luka 12:39, 40; I Tesalonia 5:2; II Peteru 3:10

O le lalolagi ua tumu i le fa'anununu, tumu i fa'afiafiāga fa'apaupau, o lo'o moe, moe pea i le saogalemū fa'ale-tino. O tagata ua tu'utu'u i tua le afio mai o le Ali'i. Latou te toē i lapata'iga. Ua fa'aleo le mitamitavale, "Ua tutūmau pea o mea uma talu ona fa'ato'ā faia" (II Pete. 3:4b). "E pei o aso nei fo'i a taeao; e silisili 'ese ona lelei" (Isa. 56:12). O le a atili loloto lo tatou aga'i i le naunau i fa'afiafiāga. A e na fetalai Keriso, "Fa'auta, 'Ou te alu atu pei o se gaoi" (Fa'aal. 16:15). O le itūlā lava o le a fesili ai le lalolagi ma le fa'atauemu, "O fea le folafolāga o Lona afio mai?" o le a fa'ataunu'uina ai fa'ailoga. A o latou 'alaga, "O lo'o filemū ma saogalemū," o le a o'o mai ai le fa'aumatiāga fa'afuase'i. O le tagata e manatu fa'atauemu, ma te'ena le 'upu moni; ua faia galuega masani i vaega tau tupe a e lē mulimuli i ta'iala e Āloā'ia; pe a su'esu'e le tagata a'oga i lona naunau e sa'ili le poto i mea uma vaganā le Afioa a le Atua, o le a afio mai Keriso pei o se gaoi. *DA 635*

(9) UA FA'AALI MAI E KERISO FA'AILOGA E ILOA AI UA LATA LONA TOE AFIO MAI, A E O Ā MEA FA'APITOA AU'ILI'ILI NA FETALAI MAI KERISO O LE A TATOU LĒ ILOA?

*"A o lea aso ma lea itū aso e lē iloa e se tasi, e lē iloa lava e agelu i le lagi, ua na o Lo'u Tamā lava." **Mataio 24:36***

MAU E TAU I AI: Mataio 25:13; Mareko 13:32

Aiseā ua lē tu'u mai ai e le Atua iā i tatou lenei malamalamaga? Ona e lē mafai e tatou ona fa'aaogā lenei mea pe ana Ia tu'u mai. O le tulaga o mea o le a i'u i ai mai lenei malamalamaga pe a maua e o tatou tagata, o le a matuā fa'atuai ai le galuega a le Atua mo le saunia o tagata ina ia tutū i lenā aso tele o le a o'o mai. Ia lē tatau ona fa'atuagia i tatou i matematega e uiga i taimi ma vaitausaga e le'i fa'aalia mai e le Atua. Na fetalai Iesu i Ōna 'au so'o ia "mataāla" a e lē mo se taimi ua mautinoa tonu.

O Ōna so'o e tatau ona ia ai i le tulaga o ē o lo'o fa'alogologo mo fa'atonuga a le Ta'ita'i 'au; ia latou mataāla, fa'atalitali, tatalo, ma galulue a o latou lata atu i le taimi e afio mai ai le Ali'i; peita'i e leai se tasi o le a mafai ona valo'ia le taimi tonu o le a taunu'u ai; auā "o lea aso ma lea itū aso e lē iloa e se tasi." *Ev 221*

(10) PE A TATOU VA'AIA LE FA'ATAUNU'UGA O VALO'AGA A KERISO FA'APEI ONA FA'AMATALA MAI I LE MATAIO 24, O LE Ā LE MEA O LE A TATOU ILOA E FA'ATATAU I LE AFIO MAI O LE ALI'I?

*"E fa'apea fo'i outou, pe a outou iloa ia mea uma, tou te iloa ai, ua latalata Ia, ua i faitoto'a lava." **Mataio 24:33***

MAU E TAU I AI: Mataio 24:32; Eperu 10:37; Iakopo 5:9; I Peteru 4:7

O Keriso ua uma ona tu'uina mai o fa'ailoga o Lona afio mai. Ua ia fa'ailoa mai tatou te iloa pe a lata mai o Ia, ua i le faitoto'a. DA 632 (493)

O lo'o fa'avevesiina mea uma i le lalolagi. O fa'ailoga o taimi o lo'o fa'amata'u mai. O mea o le a tutupu e muā'i lafoia ata a e le'i o'o mai. O le a tō'esea le Agaga o le Atua mai le lalolagi, ma o le a fa'asoso'o mala ona o'o mai i le sami ma le lau'ele'ele. O le a i ai afā, mafui'e, lolovai, o so'o se vasega o le fasioti tagata. O ai na te mafaia ona faitau le lumana'i? O fea le saogalemū? E leai se mautinoa i mea fa'ale-tagata po o le fa'ale-lalolagi. E fa'anatinati tagata iā i lalo o le fu'a ua latou filifilia. E mapu'itigā a o latou fa'atali ma tulimata'i fa'agaioiga a latou o ta'ita'i. E i ai i latou o lo'o fa'atalitali ma le mataāla a o galulue mo le fa'aali mai o lo latou Ali'i. O le isi vaega o le a fa'apopototo i lalo o le ta'ita'iga a le uluā'i fouvale. E to'aititi e talitonu i le loto ma agaga o lo'o i ai se malaia e 'alo 'ese ai ma se lagi e tataua ona mālō ai. DA 636 (497)

(11) O LE Ā LE MEA NA FETALAI MAI KERISO "IA 'AVEA TATOU FA'APEA," MA O LE Ā LE I'UGA PE A SU'ESU'E I VALO'AGA, MAU IĀ KERISO, MA FA'ATALITALI MO LONA TOE AFIO MAI?

"O le mea lea ia outou nofo sauni ai; auā o le itū aso tou te lē manatunatu ai e sau ai le Atali'i o le tagata."
Mataio 24:44

MAU E TAU I AI: Mataio 25:10, 13; Filipi 4:5

E lē mafai e tatou ona va'ai i le lumana'i, o le tele o taimi e tupu ai le popolevale ma le lē fiafia. Peita'i o le tasi o fa'amaoniga silisili o lo'o iā i tatou e fa'atatau i le alofa mutimutivale o le Atua, o Lona lē fa'aalia mai lea o mea e tutupu a taeao. O le lē iloa o le lumana'i o le a atili ai ona tatou mataāla ma fa'amaoni i le taimi nei. E lē mafai ona tatou va'ai i mea o lo'o tu'u mai i o tatou luma. E fa'ata'atia mai a tatou fuafuāga e pito lelei a e o nisi taimi e foliga mai ai e sesē ma e lē o se mea e faia ma le mafaufau. Tatou te manatu, "Pe ana se'i o tatou iloa lava le lumana'i!" Peita'i e finagalo le Atua ia fa'atuatua iā te Ia Lana fanau ma ia sauni e ō i le mea Na te ta'ita'iina i ai latou. Tatou te lē o iloa le taimi tonu o le a fa'aali mai ai lo tatou Ali'i i ao o le lagi, peita'i ua Ia fetalai mai e pau lo tatou saogalemū o le nofo sauni pea i taimi uma - o le tulaga lea o le mataāla ma fa'atalitali. Pe o lo'o i o tatou luma se tausaga e tasi, po o le lima, po o le sefulu fo'i, ia tatou fa'amaoni i la tatou fa'atuatua i le taimi nei. Ia faia ma le fa'amaoni a tatou tiute o aso ta'itasi, ia fa'amaoni e peiseā'i o lenei aso o la tatou aso mulimuli lea.
TMK 358

E va'ai Satani i lona taimi ua pu'upu'u. O lo'o ia fa'agaoioi ona sui uma e fa'asesē i tagata, e ta'ita'i'ese, tuatuagia ma fiafia, se'i o'o i le aso e fa'ai'u ai le taimi ma tapunia e fa'avavau le faitoto'a o le alofa tunoa. DA 636 (497)

**MANATUNATUGA MA LE TALI
(Mafai tali e sili atu i le tasi pe a tataua)**

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

Ou te _____-e pule le Atua i le atulaulau ma e silafia le fa'ai'uga ma le amataga - o Ia Lē o lo'o fofola mai i Ōna luma mea lilo uma mai anamua fa'apea mea o i lumana'i.

Ona o Lona alofa e tele na'uā mo i tatou, ou te _____ ua tu'u mai e le Atua valo'aga e ala mai Lona Agaga Pa'ia ma e ui mai 'au'auna filifilia, o ē tautala ma le pule mai iā te Ia ina ia tatou sauni ai mo le lumana'i.

Ona ua matuā sa'o lelei o le fa'ataunu'uina o valo'aga fa'ale-Tusi Pa'ia mai taimi ua mavae, ua ou _____ e mafai ona ou talitonu i le afioga a le Atua e fa'atatau i itulā fa'ai'u o le tala fa'asolopito o le lalolagi.

'Ou te _____ o lo'o ua vave lava ona tosina atu le aiga tagata i lalo o le fu'a ua latou filifilia. O a'u ou te _____ ina ia aofia i lalo o le fu'a a lo'u Ali'i ma le Fa'aola o Iesu Keriso, ma ou te tatalo ia ou sauni ona ua lata Lona toe afio mai.

MANATU	FA'AOPOOPO	TATALO MANA'OMIA



O Lapata'iga, Tete'ega, ma le Loto Momomo

Lesona 2

'UPU A LE FA'ATONU: I le taimi a e le'i o'o i le talanoāga ma le 'au so'o, sa malaga ai Keriso ina ua "ulufale i le manumalō" i Ierusalem. I lea lava itulā, o le motu o tagata sa fa'atasi ai ua alalaga "Osana" ma ua ta'u mai o Ia o le Tupu. A e na Ia silafia lava e toe na o nai aso ona latou te'ena lea o Ia ma alaga, "Inā fa'asatauro ia iā te Ia." Na Ia silafia ua lata mai lava le taimi o le toe te'ena mulimuli o Ia, ma ua matuā mafatia Lona finagalo mo Ōna tagata. Na silafia e Ia mai fofoga tau valo'aga, ina ua latou te'ena Ia o le Mesia, o le a i'u ai i lo latou fa'atafunaga fa'aletino ma fa'aleagaga. Sa matuā o'otia lava Lona finagalo i le fa'anoanoa ma le pagātia. Na tumu o Ia i le fa'avauvau mo i latou sa te'ena Ia i lea taimi, peita'i na silasila fo'i Ia i augātupulaga o i lumana'i mai, ma i latou fo'i o le a filifili e tete'e iā te Ia ma Āna lapata'iga se'ia o'o lava i le fa'ai'uga ma ua uma le taimi.

Ona o le alofa, ua tu'u mai e Keriso ni valo'aga sautualua mo fa'aailoga o mea e lua o le a tutupu, o le fa'atafunaga o Ierusalem ma Lona toe afio mai fa'alua. Tau ina ia tu'u iā i tatou e le Agaga Pa'ia taliga e fa'alogo ai ma ia tu'u atu ai loto ia usita'i ai i a'oa'oga na Ia fa'asoa mai i lenā aso i luga o le Mauga o Olive. O lo'o fa'aloloa mai pea Ōna 'a'ao e fa'asaoina i latou o ē o le a talia Lona alofa tunoa. Se'i tatou fa'alogo ia ma usiusita'i i Āna lapata'iga ina ia tatou lē o'o ai i le i'uga lava e tasi e pei o i latou na malaia ai i Ierusalem.

(1) O LE Ā LE VALO'AGA A ISAIA NA TU'U MAI E FA'ATATAU I LE TALIAINA O IESU LE KERISO, E ISARA'ELU MA LE TO'ATELE I ASO FA'AI'U O LE TALA FA'ASOLOPITO O LE LALOLAGI?

"Ua 'inosia ma tu'ulafoa'iina o Ia e tagata; o le tagata fa'anoanoa, ua masani fo'i ma le tigā; e peiseā'i ua 'alo 'ese mata iā te Ia; ua 'inosia o Ia, ma ua tatou lē manatua lava o Ia." Isaia 53:3

MAU E TAU I AI: Isaia 50:6; 49:7; Mataio 26:67, 68

O tagata na tete'e iā Keriso ua lata mai ona latou va'aia le fa'aleagaina o lo latou 'a'ai ma lo latou mālō. O lo latou mamalu o le a fa'aumatia, ma fa'asalalau e le matagi i 465 luga o le lau'ele'ele, e pei o le efuefu. A o le ā le pogai ua fa'aumatia ai Iutaia? O le Papa lea se manū e saogalemū ai pe ana fauina ai i luga lo latou fa'avae. O le agalelei o le Atua sa latou 'ino'ino i ai, na ta'u fa'atauva'aina Lana amiotonu, ma te'ena le alofa tunoa. O lo'o ua fa'atū lava e tagata latou lava ia tete'e i le Atua, ma o mea sa fuafuaina mo le fa'asaoina o i latou ua liliuina mo lo latou fa'aumatiāga. O mea uma na fuafua e le Atua mo le ola sa maua ai e i latou le oti. I le fa'asatauroina o Iesu e Iutaia sa ā'afia ai ma le fa'aumatiāga o Ierusalemā. O le mamafa mai le fa'amasasa'aina o le toto i luga o Kalevario ua goto ai i latou i le malaia mo lenei lalolagi ma le lalolagi o i lumana'i.

O le a fa'aapea i lea aso fa'ai'u pe a fa'amasinoina i latou na te'ena le alofa tunoa o le Atua. O Keriso, o lo latou papa na tausui ai, o le a foliga mai o Ia o se mauga o le tau ma sui. O le mamalu o Ōna fofoga, o le ola lea i ē amiotonu, a e o se afi mumū i ē amioleaga. Ona ua latou te'ena le alofa, ma sa 'ino'ino i le alofa tunoa, o le a fa'aumatiaina le tagata agasala. E ala i Āna a'oa'oga ma lapata'iga sa fai so'o, na fa'ailoa e Iesu le i'uga o le te'ena e Iutaia o le Ālo o le Atua. Mai i ia 'upu na Ia fetalai i augātupulaga uma o lo'o tete'e pea ma lē taliaina o Ia e 'avea mo latou Fa'aola. DA 600 (464, 465)

(2) ONA O LONA ALOFA IĀ I TATOU, O LE Ā LE MEA E LĒ O I LE FINAGALO O LE ATUA MO SO'O SE TASI O LANA FANAU UA LILIU 'ESE?

"Ua onosa'i mai lava o Ia iā i tatou, ona ua lē finagalo ia fano se tasi, a ia o'o uma lava i le salamō." II Peteru 3:9

MAU E TAU I AI: Esoto 34:6; Salamo 86:15; Isaia 30:18, 19; I Ioane 1:9

O se mea e ofo ai ona ua leva le tau'aveina e le Atua o uiga tete'e a le fanau a tagata, le onosa'i i lo latou lē usiusita'i, a e ua fa'atagaina i latou ia ola, ui ina latou tete'eina o le alofa tunoa, fai 'upu pepelo ia molimau leaga ai e fa'ataui iā te Ia. Peita'i o ala a le Atua e lē tutusa ma o tatou ala, ma o le a tatou lē ofo ai i Lona alofa fa'apalepale ma le alofa mutimutivale ma alofa'aga e lē gata, auā ua Ia tu'uina mai se fa'amaoniga o Lona uiga - e telegese Lona to'asā, e alofa mutimutivale i le afe ma afe o i latou o ē alolofa iā te Ia ma e tasi Āna poloa'iga. TDG 187

(3) O LE Ā LE ŌLEGA ALOFA NA TU'U MAI E LE ATUA IĀ ISARA'ELU, MA O LO'O TU'U MAI PEA MO I TATOU TA'ITO'ATASI I LE ASŌ, INA IA TATOU LĒ O'O AI I LE FA'AUMATIĀGA FA'ALETINO FA'APEA LE FA'ALEAGAGA?

"O lo'o o fa'aapea mai Ieova, Ō mai ia, inā tatou filifili ia, e ui lava ina pei o ofu mūmū a outou agasala, e sisina ia e pei o le kiona; e ui lava ina mūmū ia e pei o le 'ie 'ula'ula, e 'avea e pei o fulufulu mamoe." Isaia 1:18

MAU E TAU I AI: Isaia 1:19; 43:25, 26; 44:22; Mika 7:18, 19

O lo'o fa'aloloa mai pea i le aso atoa le 'a'ao o le Ali'i le Atua e ala iā Keriso ma vala'aulia ē o loo mana'omia le fesoasoani. E Na te talia tagata uma; ma e Na te talilelei tagata uma. Na te lē te'ena se tasi lava. E fa'amamaluina o Ia i le fa'amagaloina o le ta'ita'i o ē agasala. O le a Ia 'avea lē o lo'o lamatia ma fa'atigāina e le toa malosi, o le a Ia lavea'i lē ua saisaitia, e Na te fa'asao i latou mai le afi mumū. O le a Ia tu'utu'u ifo le maea auro o Lona alofa tunoa i le loloto o puapuagā ma le tulaga nofosala o le tagata, a e si'itia i luga le agaga ua fa'aleagaina e le agasala. Peita'i e tataui i le tagata ona filifili e sau ma ia 'aufa'atasi i le galuega mo le fa'asaoina o lona agaga e ala i le fa'aaogā o avanoa o lo'o tu'u iā te ia e le Atua. E lē fa'amalosia se tasi e le Atua. Ua saunia le ofu

fa'aipoipo e leai se ponā o le amiotonu o Keriso e fa'aofuina ai le tagata agasala, a e peita'i pe a te'ena e ia, ona fa'aumatia ai lava lea o ia.

O mea uma ua mavae e mafai ona tafi'esea e le toto o Keriso, o se laupepa ua fa'amamāina ma ua pa'epa'e. "O lo'o o fa'apea mai Ieova, Ō mai ia, inā tatou filifili ia, e ui lava ina pei o ofu mūmū a outou agasala, e sisina ia e pei o le kiona; e ui lava ina mūmū ia e pei o le 'ie 'ula'ula, e 'avea e pei o fulufulu mamoe" (Isaia 1:18). *TMK 235*

(4) O LE Ā LE I'UGA O ISARA'ELU ONA O LO LATOU TULAGA UA LĒ POPOLE I SE MEA MA LATOU TE'ENA AI LE FAUTUA A LE ATUA, MA O LO'O FA'APEA FO'I IĀ I TATOU I ASO TAUFUA'AI'U PE A TATOU FILIFILI I LEA LAVA AUALA?

"Na latou lē mafafai i La'u pule; ua latou 'ino 'ino i La'u a'oa'iga uma lava; O le mea lava lea latou te 'a'ai ai i le fua o a latou amio; e ma'o'ona fo'i i latou i a latou togafiti. Auā o le liliu 'ese o ē faigofie e fasiotia ai i latou; o le nofo fa'atalanoa o ē valelea e fano ai i latou." Fa'ata'oto 1:30-32

MAU E TAU I AI: Fa'ata'oto 6:23; 1:22; Isaia 5:20; Ieremia 4:14

(5) O LE Ā LE FA'AILOGA O LE ALOFA MUTIMUTIVALE NA FA'AALIA E KERISO E FA'ATATAU I LE I'UGA O TAGATA FILIFILIA A LE ATUA INA UA ULUFALE IA I LE MANUMALŌ?

"Ua latalata Ia, ua silafia e Ia le 'a'ai, ona tagi ai lea o Ia." Luka 19:41

MAU E TAU I AI: Hosea 11:8, 9; Mataio 23:37, 38

Ua fa'apea ifo le finagalo o Keriso, "'Ou te mafai fa'apefea ona tu'u atu iā te 'oe?" (Hosea 11:8). Sa Ia faia pea Isara'elu e fa'apei o se tamā alofa ma le fa'amagalo ona faia i se atali'i e lē fia fa'afetai ma lē fa'alogo. Na Ia silasila ifo ma fofoga e silafia mea uma, a e ua filifilia lava e le 'a'ai o Ierusalem lona ia lava fa'ai'uga. E tele seneturi o liliu'ese latou mai le Atua. Sa te'ena pea le alofa tunoa, sa fa'ataugā i avanoa, ma lē mana'omia avanoa na tu'u mai. Sa fa'ae'e e tagata le ao o le tauimasui, ma ina ua 'ave'esea le alofa tunoa, ua tauau ina masa'a ifo i o latou luga. Na fetalai Keriso, ma 'upu mai se finagalo momomo, "Ana e iloa, o 'oe lava i lenei lou lava aso, o mea e te manuia ai! A o lenei ua lilo iā te oe" (Luka 19:42). Ua tu'u mai nei le fa'asalaga e lē toe liliuina. *1888 Mat 915*

(6) SA FA'APEFEA ONA FA'AMATALAINA E IESU MEA LEAGA UA SAUNIA MO LE LUMANA'I O ŌNA TAGATA ONA O LO LATOU TE'ENA O IA O LE MESIA?

"Auā e o'o mai iā te 'oe ona aso e tanu ai le mea mauti'eti'e, e si'o ai iā te 'oe e i latou ua ita iā te 'oe, latou te si'o'ina lava iā te 'oe, e puipui iā te 'oe i itū uma; latou te fa'agatasi fo'i iā te 'oe ma le 'ele'ele, atoa ma lau fanau i totonu iā te 'oe; latou te lē tu'ua fo'i se ma'a i luga o le tasi ma'a i totonu iā te 'oe; auā ua lē iloa e 'oe ōna pō ua asia mai ai 'oe." Luka 19:43, 44

MAU E TAU I AI: Luka 21:20-24

Na tepa taula'i Iesu i lea va'aiga, ma o le motu o tagata ua fa'afilemūina le vāvāō, ua maofa ona o le fa'afuase'i o lea fa'aaliga matagofie. Sa fa'asaga uma mata i le Fa'aola, ma le manatu o le a va'aia i Ōna fofoga le fa'amanū o lo'o latou lagona. Peita'i, e lē o lea a e ua va'ai i le ao o le fa'anoanoa.... E le'i maligi loifofoga o Keriso ona o Ōna lava puapuagā o le a o'o mai. Ua tū mai i Ōna luma Ketesemane, ua lata mai ona ufitia lea o Ia i se pōuliuli mata'utia. O lo'o va'aia fo'i le faitoto'a o mamoe, o le ala e fa'au'i atu ai manu ma ta'ita'iina e fasia mo taulaga osi mo le selau ma le selau o tausaga. O lenei faitoto'a ua lata le taimi e tatalaina ai mo Ia, le taulaga moni, o le taulaga mo agasala a le lalolagi o lo'o fa'asino i ai nei sauniga uma. E lata ane i lea nofoāga o i ai Kalevario, le

va'aiga o Ōna mafatiāga o le a o'o mai. Peita'i, e lē ona o ia tulaga e fa'amanatu ai Lona maliu puapuagā na tutūlu ai le Fa'aola ma le ōi mafatia o Lona finagalo. O Lona finagalo mafatia e lē mo Ia lava. E lē o fa'apopoleina Lona finagalo i le manatu i Ōna lava puapuagā. O le va'aiga o Ierusalemā na tuia ai Lona finagalo - o Ierusalemā lea na te'ena le Ālo o le Atua ma manatu fa'atauva'a i Lona alofa, lea sa lē talitonu i Āna vavega ofofofia, ma ua lata ina latou 'ave'esea Lona soifua. Ua iloa o iā i lana agasala ona ua te'ena lona Fa'aola, ma lona tulaga pe ana ia talia o Ia lea e to'atasi e mafai ona fa'amālōlō i ōna manu'a. Na afio mai o Ia e laveā'i iā te ia; e fa'aapefa ona Ia tu'ua o ia? *DA 575-577 (445-446)*

(7) O Ā 'UPU ALOFA NA FETALAI ATU AI KERISO, MA LE LOTO UA MATUĀ MOMOMO LAVA, E FA'ATATAU IĀ I LATOU O Ē NA TE'ENA O IA I LENĀ TAIMI, MA LATOU FO'I E TE'ENA IA A E O LE A O'O I LONA AFIO FA'ALUA MAI?

"Ua tele lava O'u mana'o e fa'apotopoto i lau fanau, e pei o le moa ona ofaofata'i i lana toloa'i i lalo i ōna 'apa'au a e le'i mafafai outou." Mataio 23:37

MAU E TAU I AI: Ieremia 4:14; Mataio 22:3; Ioane 3:15-17; 6:37; II Peteru 3:9

O se va'aiga e matuā fa'anoanoa lava na fa'ailoa i fofoga o le Ālo o le Atua a o silasila tasi o Ia i luga o le Malumalu ma ua toe taliu atu i le 'au fa'alogologo. Ma se si'ufofoga mai le loto ua matuā tigā lava ma loifofoga pei o se vai'o'ona, na Ia fetalai atu ai, "Ierusalemā e, Ierusalemā e, o lē fasiotia perofeta, ma fetogi i ma'a i ē ua 'a'uina atu iā te 'oe; ua tele lava O'u mana'o e fa'apotopoto i lau fanau, e pei o le moa ona ofaofata'i i lana toloa'i i lalo i ōna 'apa'au a e le'i mafafai outou!" (Mataio 23:37). O le vavaega lenei sa matuā faigatā lava. I le auēga a Keriso na matuā sasa'a ifo ai le totonugalemū o le finagalo o le Atua. *LHU 337*

A o silasila ifo ma Ōna fofoga fa'avalō'aga i luga o Ierusalemā, na Ia silafia ina ua tu'u atu ia e fa'atafunaiina, o le a tu'u fo'i le lalolagi i lona malaia. O le va'aiga i le taimi o le fa'atafunaga o Ierusalemā, o le a toe va'aia fo'i i lenā aso tele ma le mata'utia o le Ali'i, peita'i o le a pito sili atu ona matuā mata'utia. *2 SM 417, 418*

(8) O Ā 'UPU MIMITAVALE NA TAUTALA ATU AI LE 'AU SO'O A O VĀ'AI IFO I LE MATAGOFIE OFOFOGIA O LE MALUMALU?

"Ua ulufafo o Ia i le malumalu, ona fai mai lea o le tasi o Ōna so'o iā te Ia, Le A'oa'o e, inā silasila ia i nei ma'a ua tetele lava, ma nei fale, ua tetele lava!" Mareko 13:1

MAU E TAU I AI: I Tupu 6:1-10; II Nofoa'igā Tupu 3, 4

O le Malumalu o le mitamitaga ma le 'oli'olisaga i loto o tagata Iutaia uma. E tusa ma le 50 tausaga a o lo'o faia pea le galuega o le fausia o ōna lotoā ma vaega 'ese'ese, fa'ato'ā mae'a i le TA 63 - e na o le 7 tausaga ona fa'atafunaiina ato'atoa lea e 'autau Roma i lalo o le ta'ita'i o Tito.

A o silasila atu Iesu i le matagofie o le malumalu, po o ā ea lava ni mafauauga loloto sa i ai i le finagalo o lē o le a te'ena! E matuā matagofie lava le va'aiga i Ōna luma, peita'i sa Ia fa'aapea ifo ma Lona finagalo fa'anoanoa, Ua 'Ou va'ai i mea uma. *DA 627 (489)*

(9) O LE Ā LE VALO'AGA E FA'ATATAU I LE MALUMALU MATAGOFIE NA TU'U ATU E KERISO E TALI AI A LATOU 'UPU E TUMU I LE MITAMITAVALE, UA LATOU OFO AI?

"A ua fetalai atu Iesu iā te i latou, Ua outou lē iloa ea nei mea uma? E moni, 'Ou te fai atu iā te outou, e lē toe ai se ma'a i luga o le tasi ma'a, a e uma ona sōloia i lalo." Mataio 24:2

MAU E TAU I AI: Mataio 24:1; 23:38; Luka 21:5, 6

Sa fa'atumulia le 'auso'o i le mata'u ma le maofa ina ua valo'ia atu e Iesu le fa'aumatiaga o le malumalu, ma sa latou fa'anaunau ina ia latou malamalama atili i le uiga o Lana fetalaiga. Ua sili atu i le fāsefulu tausaga o fa'aaluina le tamao'aiga, o le taimi ma le malosī, atoa ma le atamai fa'apitoa o le 'au tufuga ina ia fa'aleleia atili ai lona matagofie. Na sasa'aina i ai e Herota le Sili ua lē gata i le tamao'aiga o Roma a'o le 'oa fo'i a sã Iutã. E o'o lava i le emeperoa o le lalolagi na ia foa'iina atu i ai ana lava meaalofo. O le tele o ma'a tãua lanu sinasina, toetoe ina lē mafai ona fuaina o lo latou tetele, sa aumaia fa'apitoa lava mai Roma ma 'avea o se vaega o le tino o le malumalu. GC 24, 25 (8)

Sa faigatã iã i latou ona malamalama i le tãua o fetalaiga a Iesu e fa'ataua i le fa'aumatiaga o le malumalu, a e maise le feso'ota'iga ma mea o lo'o tutupu i lea taimi, e i ai le ulufale o Keriso i le manumalō, ma le fa'amamāina o le Malumalu, lea sa foliga iã i latou e sauni ai mo le amataga o le fa'avaeina o le malō fa'a-Mesia. 5 BC 496

(10) O Ā FESILI NA TU'U ATU E LE 'AU SO'O IĀ IESU, MA I NEI TAIMI FAIGATĀ UA TATOU I AI, E TO'ATELE FO'I O LO'O FA'AFESILI AI?

"Ua nofo o Ia i le Mauga o Olive, ona ò mai ai lea o le 'au so'o iā te Ia ua na o i latou, ua fa'apea mai, Ia e fetalai mai iā te i matou pe o'o afea ia mea? pe se ā fo'i le fa'ailoga o Lou maliu mai, ma le gata'aga o le lalolagi?" Mataio 24:3

MAU E TAU I AI: Mareko 13:3, 4; Luka 21:7

O se taimi ua mavae na ta'u atu ai e le Ali'i iā te i latou Lona toe afio fa'alua mai. O le mea lea na vave oso ai loa o latou manatu i lenā afio mai ina ua ta'ua e Iesu le fa'asalaga o Ieruselema.... O le alofa o Iesu i Lona 'au so'o na nātia ai iā i latou le lumana'i. Ana latou manino ato'atoa i tigā ma le maliu o le Fa'aola, atoa ma le fa'aumatiaga o lo latou 'a'ai ma le malumalu, se manū e matuā mafatia i latou i le mata'u tele. Na tu'uina atu e Keriso iā i latou se 'oto'otoga o mea tetele o le a tutupu a'o lumana'i ai le i'uga o le lalolagi. Latou te le'i malamalama ato'atoa i Āna 'upu i lea taimi. Peita'i na finagalo o Ia ina ia manino ato'atoa uiga o nei 'upu i le taimi tonu e mana'omia ai e Lana fanau a'oa'oga ua i totonu o nei fetalaiga. E uiga-lua le valo'aga na Ia fetalai atu ai. Ua lē gata ina tu'uina mai ai o se ata o le fa'atafunaga o Ieruselema, a ua valo'ia mai ai fo'i mala mata'utia o le aso tele o le i'uga. GC 25, 26 (8, 9)

MANATUNATUGA MA LE TALI (Mafai tali e sili atu i le tasi pe a tatau)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

Mai le mea sa tupu fa'avalō'aga i lenā aso i luga o le Mauga o Olive ma lona fa'ataunu'uga, ou te _____ ina ua te'ena e Iutaia lo latou fa'amoemoe e tasi. Ina ua latou te'ena Keriso, ua te'ena ai fo'i le Pogai e tasi o lo latou saogalemū ma le puipuiga. O le Papa sa tatau ona 'avea ma lo latou fa'avae, ua fai ma taula na magoto ma fa'aumatia ai latou.

Ua 'ou _____ i le alofa fa'apalepale o le Atua i le aiga tagata. Ua Ia tau'ave pea ma le onosa'i o tatou loto ma'a'a ma le fouvale. O lo'o Ia fa'ataga pea tatou ia ola lelei e ui ina o lo'o tatou fa'ataugā i Ōna uiga alofa, ma o le tele o taimi tatou te molimau pepelo e tete'e ai iā te Ia.

'Ou te _____ ona o lo'o Ia tu'u mai iā i tatou se taimi fa'ata'ita'i ma o lo'o fa'aloloa mai pea Ōna 'a'ao e ofo mai le alofa tunoa i tagata uma o ē e fia talia Lana fa'amagaloga.

'Ou te _____ ona o lenā aso i luga o le Mauga o Olive, e le'i tagi Keriso mo na o le malō o Iutaia, a e peita'i sa tagi fo'i mo ē o lo'o tete'e pea le alofa tunoa o le Atua mai augātupulaga uma o le talafa'asolopito o le lalolagi.

<u>MANATU</u>	<u>FA'AOPOOPO</u>	<u>TATALO MANA'OMIA</u>



O Perofeta Pepelo ma Keriso Pepelo

Lesona 3

'UPU A LE FA'ATONU: Talu mai Lona ulua'i afio mai, e to'atele ua ta'u mai o latou o le Keriso ua toe fo'i mai. Talu mai le "amataga o le taimi o le i'uga" (Tanielu 12:9) i le 1844, ua matuā fa'ateleina le fuainumera o nei Keriso pepelo ma perofeta pepelo. O nei mea taufa'asesē ua fa'ateleina ai mea e tutupu e ta'imua i le taimi opuapuagā. Ua saunia le tulaga o le a faia ai e temoni a latou fa'ailoga tetele ma va'aiga ofoofogia. Ua lata fo'i ona fa'aali mai Satani e ta'u mai o ia o Keriso ma o le a fa'ateteleina ai nei fa'asesēga a e fa'ai'u i le mala lona ono. Ia tatou fa'alogo i lapata'iga a Keriso ina ia lē fa'asesēina ai tatou.

(1) O LE Ā LE IGOA MA O LE Ā LE FUAFUĀGA NA LAPATA'I MAI KERISO O LE A FA'AALI MAI AI LĒ E FA'AFOLIGA?

"Ona tali atu ai lea o Iesu, ua fa'aapea atu iā te i latou, Ia outou, ne'i fa'asesēina outou e se tasi. Auā e to'atele e ō mai i Lo'u igoa, ua fa'aapea ane, O a'u nei o le Keriso; latou te fa'asesēina fo'i tagata e to'atele."

Mataio 24:4, 5

MAU E TAU I AI: Mareko 13:5, 6, 22, 23; Luka 21:8

Ua tu'u mai e Iesu, Lē na tu'u Lona soifua ina ia fa'asaoina ai i tatou, se lapata'iga e fa'atatau i mea o le a tupu i aso fa'ai'u. Sa ō ane le 'au so'o iā te Ia ma fesili e fa'atatau i le fa'ai'uga o le lalolagi. **TDG 164**

O le lapata'iga i le Mataio 24:5 e fa'apitoa i le fa'atafunaga o Ierusalema ma le pa'ū o le malō o Iutaia, a e maise o lea sa tau tosina atu i lea itu'aiga taufa'asesē. I ōna pō o le 'au aposetolo sa to'atele ai mesia pepelo. A e mulimuli ane, i fuai'upu 23-27, i le gagana moni, na fetalai ai le Ali'i e fa'ataui i fa'asesēga o le a tupu a e le'i o'o i Lona toe afio mai fa'alua. 5 BC 497

(2) E FA'AOPPOPO ATU I KERISO SESĒ, O AI NISI O LO'O LAPATA'I MAI KERISO O LE A Ō A'E I ASO FA'AI'U MA E MO LE Ā LE POGAI?

"E tutū mai fo'i perofeta pepelo e to'atele, latou te fa'asesē fo'i i tagata e to'atele." Mataio 24:11

MAU E TAU I AI: Mataio 7:15; Galuega 20:30

I nei aso faigatā e lē tatau ona tatou talia mea e ta'u mai e tagata fa'apea o le 'upu moni. Pe a fa'apea mai a'oa'o a le Ali'i o la latou feau e mai le Atua, e tatau ona fa'afesiligia ma le fa'aeteete, E fa'apefea ona tatou iloa o le 'upu moni lenei? Na fetalai Iesu iā i tatou, o le a "tutū mai fo'i perofeta pepelo e to'atele, latou te fa'asesē fo'i i tagata e to'atele" (Mataio 24:11). 2 SM 99

O le perofeta moni o le a tautala mo le Atua. E fa'apea le perofeta pepelo ona tautala e fa'afoliga mai o lo'o tautala mo le Atua, a e o le mea moni e tautala ia na o 'upu mai manatu sesē ma lona ia lava agaga leaga (Isaia 30:10; Ieremia 14:13-15; 23:16, 17, 21, 25, 30-32, 38; 29:8, 9; Esekielu 13:2, 3, 10, 11). O perofeta pepelo o latou ia e ta'u mai e mafai e tagata ona ulufale i totonu e ala mai le faitoto'a lautele ma le auala laulelei. O latou o le "'au gaoi," pau le latou fuafuāga o le gaoi, fasioti, ma fa'aumatia (Ioane 10:7-10). 5 BC 357

(3) O LE Ā LE MEA O LO'O FAUTUA MA LE TUSI PA'IA E TATAU ONA TATOU FAIA INA IA PUPIUI AI MAI LE TAUF'AASESĒ A PEROFETA PEPELO?

"Le 'au pele e, 'aia tou te fa'alogi i agaga uma lava, a ia outou tofotofa i agaga pe mai le Atua i latou; auā e to'atele perofeta pepelo ua ō atu i le lalolagi." I Ioane 4:1

MAU E TAU I AI: Teuterenome 13:1-5; Ieremia 29:8, 9

Mai lenei 'upu o lo'o ta'u mai ai e tatau iā i tatou ona filigā e su'esu'e le Tusi Pa'ia ina ia tatou iloa pe o le ā le mea tonu e fa'ataui i le tulafono ma le molimau. E leai se isi mea e tatou te saogalemū ai. Ua fetalai Iesu, "Ia outou ma perofeta pepelo, o ē ō mai iā te outou i ofu fa'amamoe, a o totonu o luko fe'ai lava i latou" (Mataio 7:15). 2 SM 99

Ua lapata'i mai Keriso ina ia tatou fa'aeteete ona o perofeta pepelo ia o le a ō mai iā i tatou i Lona suafa, ma ta'u mai o latou o Keriso. Pe afai e te tū i le tulaga lea e fa'apea ai e lē tāua ona malamalama i le Tusi Pa'ia mo 'oe lava, o le a e i le tulaga faigatā e ta'ita'iina 'ese ai 'oe e ia talitonuga. FW 55, 56

(4) O LE Ā LE ULUA'I TOFOTOFOGA FA'ALE-TUSI PA'IA MA E SILI LE TĀUA INA IA ILOA MAUTINOAI LE FA'AMAONIGA O LE PEROFETA?

"Inā sa'ili ia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou." Isaia 8:20

MAU E TAU I AI: Mataio 7:15-23; Esekielu 33:33; Ioane 16:13, 14; I Ioane 4:1-3; Teuterenome 13:1-4; 18:21; Numera 12:6; 23:20; 24:16; Galuega 9:3; 10:9, 11; Ieremia 1:9; 23:16; 28:9; II Korinito 12:4; Tanielu 10:8-18; II Samuelu 23:2; I Korinito 13:1, 2

Ia lē fa'asesēina tatou; e tu'u mai e le Afioga a le Atua iā i tatou le tofotofoga ina ia tatou iloa po o le ā le 'upu moni. Ua fa'a'apea mai le perofeta, "Inā sa'ili ia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou" (Isaia 8:20). 2 SM 99

O le taufa'asesē mulimuli a Satani o le a faia ina ia leai se tāua o le molimau a le Agaga o le Atua. "A leai se fa'aliga, e fa'asalalauina le nu'u" (Fa'ata'oto 29:18). O le a galue fa'amaoni Satani i ala 'ese'ese ma itu'aiga sui 'ese'ese ina ia fa'avaivai ai le talitonuga a tagata o le Atua i le molimau moni. Na te aumaia miti ma manatu e fa'afoliga, ina ia ta'ita'i sesē ma fa'afenumia'i le sesē ma le mea moni, ona 'ino'ino lea o tagata ma o le a latou fa'atatauina mea uma e ta'ua o miti, o se mea e mamao'ese le uiga ma e lē moni ato'atoa; peita'i o agaga e fa'amaoni, pe a fa'atusatusa le sesē ma le mea moni, o le a mafai ai ona iloa le 'ese'esega i le vā o ia mea. FLB 296

(5) O LE Ā LE FAUTUA A LE TUSI PA'IA INA IA TATOU SU'ESU'EINA OLAGA O PEROFETA MA TA'ITA'I FA'ALEAGAGA, O LE A FA'AALI MAI AI PE O LATOU E MAI LE ATUA?

"Ia outou ma perofeta pepelo, o ē ō mai iā te outou i ofu fa'amamoe, a o totonu o lukō fe'ai lava i latou. Tou te iloa i latou i o latou fua. Pe tau mai ea tagata se fuifui vine mai le la'au tuitui, po o mati mai le la'au talatala? E fa'a'apea fo'i la'au lelei ta'itasi ma fua mai i fua lelei; a o le la'au leaga e fua mai i fua leaga." Mataio 7:15-17

MAU E TAU I AI: Luka 6:43; Salamo 92:12-14; Mataio 3:10

O a'oa'o o le mea sesē o le a tula'i mai e tosina outou mai le auala lauitiiti ma le faitoto'a vā apiapi. Ia fa'aeteete iā i latou, ona e ui ina fa'alilo i latou i ofu mamoe, a o totonu o lukō fe'ai lava latou. Na tu'u mai e Iesu le ala e mafai ai ona iloa le 'ese'esega o a'oa'o pepelo mai ē moni. Na Ia fetalai, "Tou te iloa i latou i o latou fua. Pe tau mai ea tagata se fuifui vine mai le la'au tuitui, po o mati mai le la'au talatala? (Mataio 7:16).

E lē o fa'atonu mai ia fa'amaonia i latou i a latou gagana mālīe ma tulaga mauualuluga, a e iloiloīna i latou i le Afioga a le Atua. "Inā sa'ili ia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou" (Isaia 8:20). Ma "Lo'ū atali'i e, soia e te fa'alogō i le a'oa'o atu e fa'asesē ai i 'upu e poto ai" (Fa'ata'oto 19:27). O le ā le fe'au o lo'o aumai e nei a'oa'o? E ta'ita'i ai 'oe ia āva ma mata'u i le Atua? E ta'ita'i ai ea 'oe ia e fa'atinoina lou alofā mo Ia e ala i lou fa'amaoni i Āna poloā'iga? Pe afai e lē lagona e tagata le mamafa o le tulafono tau le amio; afai latou te manatu māmā i fa'atonuga a le Atua; pe a latou fa'aleaga se tasi lava o Āna poloā'iga, ma latou a'oa'o ai tagata, o le a leai so latou tāua i le silafaga a le lagi (Mataio 5:19; Iakopo 2:10). Tatou te iloa e leai se fa'avae o a latou matā'upu. O lo'o latou faia le galuega sa amataina e le ali'i o le pogisā, o le fili lea o le Atua. MB 145 (62)

(6) O LE Ā LE FA'ATUSA O LE A FA'AAOGĀ E SATANI E FA'AALI MAI AI O IA O LE FA'AFOLIGA E AUPITO SILI?

"E lē se mea fo'i lea e ofo ai, auā o Satani lava, ua liua o ia e ia ma agelu o le malamalama." II Korinito 11:14

MAU E TAU I AI: Kalatia 1:8; Fa'aaliga 12:9

O tagata uma ua filifili e i lalo o le fu'a a Keriso, e mana'omia ia nofo mataāla pea a o tau i le taua o le olaga. O lo'o taumafai Satani e fa'aauau pea le taua se'i o'o i le fa'ai'uga. O le a sau ia e pei o se agelu o le malamalama, e fai mai o ia lava le Keriso, ma o le a ia tau fa'asesē le lalolagi. Peita'i o le a fa'apu'upu'uina lenei manumalo. E leai se afā po o se mea fa'alavelave o le a mafai ona tau fa'agsoioiins i latou o lo'o tutū mautū i luga o fa'avae o le 'upu moni. O le a mafai ona tumau i latou i lenei taimi o le a fulitua ai le tele o le lalolagi. 6 BC 1106

(7) O Ā MEA E LUA NA LAPATA'I MAI KERISO IA 'AUA NE'I TATOU FAIA PE A TATOU FA'ALOGO UA Ō MAI KERISO PEPELO?

"Afai e fai ane se tasi iā te outou i ia ōna pō, Fa'auta, o i'inei le Keriso, po o i'ilā; 'aua tou te fa'alogi i ai.... O lea, afai latou te fai mai ai iā te outou, Fa'auta, o i le vao ia; 'aua tou te ō atu i ai; fa'auta, o i se afeafe ia; 'aua tou te fa'alogi i ai." Mataio 24:23, 26

MAU E TAU I AI: Luka 21:8; 17:23; Mareko 13:21-23

O nei ua fetalai lo tatou Ali'i i le gagana tu'usa'o e fa'ataua i Lona afio fa'alua mai, ma la tu'u mai lapata'iga i fa'alavelave e muamua mai i Lona fa'aali mai i le lalolagi. "Afai e fai ane se tasi iā te outou i ia ona po, 'Fa'auta, o i'inei le Keriso, po'o i'ilā; 'aua tou te fa'alogi i ai.' Auā e tutū mai keriso pepelo, ma perofeta pepelo, latou te faia fo'i fa'aailoga tetele ma vavega, ina ia fa'asesē i ē ua filifilia lava, pe a mafai ai."

O se tasi o fa'aailoga o le fa'aumatiāga o Ierusalem, sa ta'u mai e Keriso, "E tutū mai fo'i perofeta pepelo e to'atele, latou te fa'asesē fo'i i tagata e to'atele" (Mata. 24:11). Sa tutū a'e perofeta pepelo, sa fa'asesē i tagata, ma ta'ita'iina tagata e to'atele i le vaotu'ufua. O le 'au fai togafiti fa'ataulaitu ma tagata vavalo, fa'apea e iā i latou mana fai vavega, sa latou fa'atosina tagata iā i latou i mauga tu'ufua. Peita'i o lea valo'aga sa ta'u mai e fa'ataua fo'i i aso o le i'uga. O lea fa'aailoga sa tu'uina mai o se fa'aailoga o le afio fa'alua mai. E o'o mai lava i le taimi nei o lo'o fa'aalia e keriso pepelo ma perofeta pepelo ni fa'aailoga ma mea ofoofogia e tau fa'asesē ai Ōna so'o. E tatou te lē fa'alogoina ea le vala'au, "Fa'auta, o lo'o i le vao ia?" E lē o gasolosolo ea le to'atele i le vaotu'ufua, ma le fa'amoemoe e maua ai Keriso?

Ma e lē to'atele ea o fa'apotopoto ma ta'utino mai o lo'o feso'ota'i ma agaga o ē ua oti a e o lo'o lagona ai le vala'au, "Fa'auta, o i se afeafe ia?" O lenei le fa'aupuga ua tu'uina mai e i latou e tapua'i i agaga o tagata ua oti. A e o le ā le fetalaiga a Keriso? "'Aua tou te fa'alogi i ai. Auā e pei ona 'emo mai o le uila i sasa'e, ma malamalama atu i sisifo, e fa'apea fo'i ona sau o le Atali'i o le tagata." DA 631 (492)

(8) O Ā AUALA TAUFUA'ASESĒ O LE A FA'AAOGĀ E SATANI MA NEI KERISO PEPELO MA PEROFETA PEPELO?

"Auā e tutū mai Keriso pepelo, ma perofeta pepelo, latou te faia fo'i fa'aailoga tetele ma vavega, ina ia fa'asesē ai i ē ua filifilia lava, pe afai e mafai ai." Mataio 24:24

MAU E TAU I AI: II Tesalonia 2:9; Fa'aaliga 19:20; II Korinito 11:13, 14

O lo'o sauni le fili e fa'asesē le lalolagi atoa e ala i lona mana e galuea'iina ai vavega. O le a taumafai o ia e sau fa'afoliga pei o agelu o le malamalama, ia fa'afoliga pei o Iesu Keriso. A o i ai pea lona malosia, o le a ia faia pea lava vavega. Ua ta'u mai e le Tusi Pa'ia, "Ua ia fa'asesē fo'i i ē ua nonofo i le lalolagi ona o ia fa'aailoga ua tu'uina atu iā te ia na te faia" (Fa'aaliga 13:14), a e lē na o mea o lo'o ia faia fa'afoliga. O lo'o aumaia e le Tusi Pa'ia isi mea e sili atu i lo'o mea fa'afoliga.

Peita'i e i ai le tuā'oi e gata mai ai le mea e lē mafai ona sopo'ia e Satani, ma o lea o le a ia taumafai e fa'aaogā le taufa'asesē ma galue ai a e ua leai se mana e toe fai ai lea galuega. I aso fa'ai'u o le a fa'aali mai ia i se tulaga o le a talitonu ai tagata o ia o keriso ua afio fa'alua mai i le lalolagi. O le a liua o ia e 'avea ma agelu o le malamalama. O le a fa'aali mai o ia o Iesu Keriso, e na te faia vavega ofoofogia; ma o le a ifo tagata e tapua'i iā te ia fa'apei o Iesu Keriso. O le a fa'atonuina tatou e tapua'i i leni tagata, lea o le a fa'amamaluina e le lalolagi atoa e fa'apea o ia Keriso. Mar 207

(9) PE A FAIA E NEI AGAGA LEAGA FA'AILOGA MA MEA OFOFOGIA, O AI TONU O LO'O FAIA NEI MEA E ALA IĀ I LATOU?

"Auā o agaga ia o temoni e fai fa'aailoga, ua latou ō atu i tupu o le lalolagi ma le atu laulau uma, e fa'apotopoto iā te i latou i le taua i le aso tele o le Atua e ōna le malosia uma lava." Fa'aaliga 16:14

MAU E TAU I AI: Fa'aaliga 12:9; I Timoteo 4:1

E lē mana'omia ia fa'asesēina i tatou. O le a i ai va'aiga ofoofogia i se taimi ua lata mai lava, o le a fa'aalia mai ai le so'otaga ma Satani. O lo'o ta'u mai e le Afioga a le Atua o le a faia vavega e Satani. O le a ia aumaia fa'ama'i i tagata, ona fa'afuase'i lea ona to'eseina mai iā i latou lona mana fa'asatani, ma fa'apea mai ua fa'amalōlō i latou. *Mar 209*

Ia e pi'imau iā Iesu Keriso. Ia mautū mea e te talitonu i ai; ia ta'ita'iina 'oe e 'upu moni a le Afioga a le Atua ina ia e fa'amaoni ai e faia ma lou loto, agaga, mafau, ma le malosi atoa Lona finagalo. Ia mautū lou fa'atuatua i luga o le 'upu, "Ua fa'apea mai le Ali'i." Ia pau lava lau tali atu, "Auā ua tusia." *Ev 361*

(10) O LE Ā LE TULAGA O LE A TOE AFIO MAI AI KERISO, MA O LE TAUFĀ'ASESĒ LEA E TASI O LE A LĒ MAFĀI ONA FA'ATA'ITA'I PEPELO E SATANI?

"Ona iloa ai lea i le lagi o le fa'aailoga o le Atali'i o le tagata; ona taufaitagitu 'i ai lea o itū aiga uma o le lalolagi; latou te iloa atu fo'i le Atali'i o le tagata ua sau i ao o le lagi ma le mana ma le mamalu tele." Mataio 24:30

MAU E TAU I AI: Mataio 24:31; Tanielu 7:13; Fa'aaliga 1:7

O le a lē fa'atagaina e le Atua Satani ina ia sau i ao o le lagi e pei o le afio mai o Keriso. Ua tu'uina mai e le Fa'aola lapata'iga i Ōna tagata e fa'ata'u i lenei itū, ma sa ia valo'ia manino mai mea o le a iloa tonu ai Lona afio mai. "Auā e tutū mai Keriso pepelo, ma perofeta pepelo, latou te faia fo'i galuega tetele ma vavega ina ia fa'asesē ai i ē ua filifilia lava. Afai latou te fai mai iā te outou, Fa'auta, o i le vao ia, 'Aua tou te fa'alogi i ai. Auā e pei ona 'emo mai o le uila i sasa'e, ma malamalama atu i sisifo, e fa'apea fo'i ona sau o le Atali'i o le tagata" (Mataio 24:24-27, 31; 25:31; Faaaliga 1:7; I Tesalonia 4:16, 17). E lē mafai e Satani ona fai sana mea fa'afoliga i lenei va'aiga. O le a va'aia ma molimauina le afio mai o Keriso e le lalolagi atoa. *GC 625 (522)*

(11) O AI NA LAPATA'I MAI IESU, PE A MAFĀI, O LE A FA'ASESĒINA E NEI SUI FA'ASATANI?

"Auā e tutū mai Keriso pepelo, ma perofeta pepelo, latou te faia fo'i fa'aailoga tetele ma vavega, ina ia fa'asesē ai i ē ua filifilia lava, pe afai e mafai ai." Mataio 24:24

MAU E TAU I AI: I Ioane 2:18, 26; Mareko 13:22

Ua o'o mai le taimi o le a fa'aalia ai le mana fai vavega a le taufa'asesē sili. Ma o le a fa'ateleina le fa'asesēina i mea e tu'inaanu i ai, o le a fenumia'i ai, ma pe a mafai, o le a ta'ita'i sesē ai le 'au filifilia. O lo'o galue malosi i le lalolagi Kerisiano le ali'i o le pogisā ma āna agelu e tosina mai i latou o ē ta'uta'u le suafa o Keriso ina ia tutū i lalo o le fu'a o le pōuliuli, ia fa'asagatau ma i latou o lo'o tausi le poloa'iga a le Atua, ma le fa'atuatua iā Iesu (Fa'aaliga 14:12). *Mar 204*

Ua sau Satani e galue ma le malosi o le amioleaga ma le taufa'asesē iā i latou ua fa'amalaiaina. O lona mamalu fa'asatani e galue ai vavega i le va'aiga a perofeta pepelo, le va'aiga a tagata, e ta'u mai ai o ia lea o le Keriso moni. E tu'u e Satani lona mana iā i latou o ē o lo'o fesoasoani i āna taufa'asesē; o le mea lea o ē ta'u mai o lo'o iā ii latou le mana o le Atua o le a mafai ona iloa manino pe a fa'amaonia e le tulafono a le Atua. Ua fetalai mai le Ali'i, o le a latou fa'asesē le 'au filifilia, pe a o se mea e mafai. O ofu fa'amamoe e foliga mai o le mea moni; o le luko e pau le mea e mafai ona iloa manino ai pe a tatou ō i lalo o le tulaga maoa'e a le Atua, ma o le a maua atu ai o i latou ia o ē e soli tulafono a le Atua. *FW 45*

(12) O LE A FA'APEFEA ONA TATOU 'AU'AUNA I LE ALI'I (F. 14), MA O LE Ā LE MEA E TATAU ONA TATOU FILIFILIA (F. 15) INA IA TATOU LĒ PA'U'Ū AI I LALO O LE FA'ASESĒ A SATANI?

"O lenei, ia outou matata'u iā Ieova, ma 'au'auna iā te Ia ma le loto sa'o ma le fa'amaoni;...Inā filifili ia o outou i le aso nei, po o ai tou te 'au'auna i ai. " Iosua 24:14, 15

MAU E TAU I AI: I Samuelu 12:24; Efeso 4:15; III Ioane 1:3; I Korinito 13:6

E tatou te mana'omia le 'upu moni i mea uma, ma e tatau ona tatou sa'ili i ai fa'apei o se 'oa ua natia. O lo'o tu'u mai pea i o tatou itū uma fa'atusa, ma o lo'o filifili ai tagata e talitonu i mea sesē a e lē o le 'upu moni, ona pe a taliaina le mea moni, o le uiga o le a 'afia ai le satauro. E tatau ona tete'e 'oe lava ia; ia fa'asatauroina lou lava tagata manatu fa'apito. O le mea lea e tu'u atu ai e Satani iā i latou se auala faigofie e ala i le fa'aleagaina o le tulafono a le Atua.

Pe a fa'atagaina e le Atua le tagata ia faia le mea e mana'o ia i ai, o le itūla lava lea e sili ona pogisā o lona olaga. O se mea e matuā leaga lava pe a tu'u sa'oloto le tamaitiiti fa'alologatā e faia lona lava loto, ma fa'amalumalu ai e ao pogisā o le fa'amasinoga a le Atua.

O le a fa'afeagai le fanau a le Atua i se taua mata'utia ma le fili o agaga, ma o le a matuā malosi a o tau lata atu i le fa'ai'uiga o lenei fete'ena'iga. Peita'i o le a fesoasoani le Ali'i iā i latou o ē o le a tutū e puipui i Lana 'upu moni. FW 45, 46

**MANATUNATUGA MA LE TALI
(Mafai tali e sili atu i le tasi pe a tatau)**

A = Talitonu ma Talia	O = Lagona le lē Malie
B = Lagona le Fenumia'i	P = Ua Fa'amalamalamaina a'u
C = Naunau ia Malamalama Lelei	Q = Lagona se Lu'iga
D = Lē Tāua	R = Ua fa'ate'ia a'u
E = Lagona le Mamafa tele	S = Lagona le Mata'u
F = Ou te Fa'afetai	T = Lotomalie
G = Lagona le Lototele	U = Lē Talia
H = Ua 'ou To'amalie	V = Tatalo
I = Lagona le Loto Popole	W = Naunau ia Fa'aaogā i Lo'u Olaga
J = Ua 'ou Fiafia	X = Ia Fa'asoa atu i isi
K = Lagona le lē Fiafia	Y = Ma'imau pe ana ou lē iloa
L = Ua 'ou Ofo	Z = Se isi mea
M = Lagona le Filemū	
N = Ua o'otia ai a'u	

Ou te _____, e pei o ōna pō o Keriso, o le a ō mai keriso ma perofeta pepelo i aso fa'ai'u, o le a tasi le latou fuafuāga - o le fa'asesēina ma le fa'aumatiāga o a'u.

Ua 'ou _____ ona e lē tatau ona ou talia so'o se mea e ta'u mai fa'apea o le 'upu moni, a e ia tatau ona 'ou tofotofa i agaga ia mautinoa ai e ō gatasi ato'atoa ma le tulafono ma molimau a le Atua o i LANA Afioga.

'Ou te _____ e alofa tele le Atua iā te a'u ua Ia tu'u mai Lona Agaga ma Lana Afioga ina ia lē fa'asesēina ai a'u.

'Ou te _____ mai le Tusi Pa'ia o le a sau Satani e fa'afoliga mai pei o Keriso. Ua ta'u manino mai e le Tusi Pa'ia o le a afio mai Keriso e pei ona afio a'e Ia i le lagi - i ao o le lagi, ma 'ou te filifili e fa'alogi i le lapata'iga ia 'ou lē alu e va'ai ia pe lē molimauina āna vavega taufa'asesē.



O Agaga Taufa'asesē ma Matā'upu a Temoni

Lesona 4

(1) I ASO FA'AI'U, O Ā MEA O LE A TAUMAFAI SUI O SATANI E AUMAI FA'ALILO I TOTONU O TULAGA 'ESE'ESE O TAGATA O LE ATUA?

Sa i ai fo'i i le nu'u o perofeta pepelo, e pei ona i ai iā te outou, o a'oa'o pepelo, latou te fa'atupuina fa'alilolilo o vaevaega e fano ai...." **II Peteru 2:1**

MAU E TAU I AI: II Timoteo 3L13; 2:16, 17

E tatau i le Kerisiano ona "mauā'a ma fa'avae" i le 'upu moni, ia mafai ai e ia ona tumau malosi ma tete'e i fa'aosoosoga a le fili. aai tatau ona fa'afouina pea lona malosi, ma ia u'umau i le 'upu moni a le Tusi Pa'ia. O le a aumai pea tala fa'afa'atusa 'ese'ese uma e fa'asesē ai le tagata talitonu ia fa'aliliu 'ese mai le Atua, peita'i ia tepa a'e le va'ai, fa'atuatua i le Atua, ma tumau i le 'upu moni.

O lo'o ua fa'ateleina nei tafa'asesēga a Satani, ma o i latou e liliu'ese mai le ala o le 'upu moni, o le a lē iloa lo latou auala. Pe a leai se mea e taula i ai, o le a fa'atāfea solo mai lea sesē i lea sesē, o le a felafoa'i e matagi o talitonuga 'ese. Ua sau Satani i lona malosi mata'utia. O le a fa'asesē le to'atele e ala i ana vavega. Peita'i e manino 'upu o le Afoga a le Atua. Ia fa'atū mautū ōu vae i luga o le tulaga o le 'upu moni e fa'avavau. Ia tete'e vavega uma o mea sesē, e ui ina foliga mai o le mea moni. *Ev 361, 362*

(2) O Ā POGAI O NEI FA'ATUATUĀGA TAUFĀ'ALEAGA MA TALITONUGA SESĒ?

"A o lo'o ta 'utino mai e le Agaga, e ō 'ese nisi i le fa'atuatua i tausaga amulī, latou te fa'alogo i agaga e fa'asesē ma matā'upu a temoni." I Timoteo 4:1

MAU E TAU I AI: I Timoteo 4:2; Fa'aaliga 16:14; II Peteru 3:17

O le a fa'ateleina le fuainumera o fa'ausoga ma o le a fa'amalosia latou a o lata atu i le taimi o le i'uga. O nei fa'apotopotoga o le a fausia mea e tete'e i le 'upu moni, ma fa'avae ni vaega fou o tagata e ta'u mai o latou e talitonu i le 'upu moni a e o le a fa'atino mai o latou lava manatu e fa'afoliga. O le a fa'ateleina ē o le a fulitua. "E ō 'ese nisi i le fa'atuatua i tausaga amulī, latou te fa'alogo i agaga e fa'asesē ma matā'upu a temoni" (I Timoteo 4:1). O le a fa'apotopoto tama'ita'i ma taulele'a e tete'e i le Ali'i le Atua o le lagi, a o lo'o tautulemoa le ekalesia ma lē o iloa ai lea tulaga. O lo'o matuā mana'omia tatalo fa'atauānau, mana'omia se taumafaiga fa'amaoni mai ē o lo'o ta'u mai o latou o so'o moni. *Ev 363*

(3) O LE TASI O "TALITONUGA FA'ATEMONI" E PITO SILI LE TAUFĀ'ASESĒ I NEI ASO O LE I'UGA, O LE TALITONUGA LEA FA'ANEI ŌNA PŌ E FA'ATATAU I LE FESO'OTA'IGA A LE AGAGA O LE TAGATA UA OTI MA TAGATA OLA. O LE Ā LE FA'ATATAU A LE ATUA E UIGA I NEI GAOIOIGA?

"Aua ne'i iloa iā te 'oe se tasi na te fa'aui ane lona atali'i po o lona afafine i le afi, o sē fai togafiti fa'ataulāitu, o sē i'ite i ao o le lagi, po o sē sa'ili fa'ailoga, po o sē taulāitu, po o sē 'apele, po o sē fesili atu i aitu, po o sē ua i ai le aitu vavalu, po o sē sa'ili atu i ē ua oti. Auā e 'inosia e Ieova o i latou uma o ē faia na mea; e tulia fo'i i latou e Ieova lou Atua ai ou luma ona o nā mea e 'inosia." Teuterenome 18:10-12

MAU E TAU I AI: Levitiko 19:31; Efeso 5:11, 12; II Tupu 17:17; I Korinito 10:21

O le talitonuga lea ua fai mai e toe ō mai agaga o ē ua oti e fesoasoani i ē o ola, o le talitonuga lea ua tutupu mai ai le tele o a'oa'oga sesē fa'aōnapōnei ua fa'apea mai e mafai ona faia ni feso'ota'iga i le vā o tagata ola ma ē ua oti. Afai e moni ua fa'atasi nei ē ua oti ma le Atua ma le 'au agelu pa'ia, afai ua latou maua se poto e sili atu i lo le poto na latou maua i le lalolagi, aiseā ua latou lē toe fo'i mai ai i le lalolagi e a'oa'o mai i ē o ola? Afai e moni le talitonuga ua a'oa'oina e le tele o faife'au fa'apea o lo o fa'aopeopea agaga o ē ua oti i luga a'e o a latou uō ma aiga i le lalolagi, aiseā ua lē tāutala mai ai nei agaga i o latou aiga ma a latou uō e lapata'i mai ai e uiga i ni mea leaga o le a tutupu mai, pe ō mai fo'i ma ni fe'au o le fa'amafanafanaga mo o latou 'aiga i le taimi o lo latou fa'anoanoa? O se faitoto'a tāua lenei ua fa'aogāina e Satani e ui mai ai ana mea taufa'asesē ina ia fa'ataunu'uina ai ana fuafuāga. Ua 'avea o ana avefe'au agelu ua pa'u'ū; o i latou ia ua ō mai ma fa'apea mai ua latou aumaia ni fe'au mai le lalolagi o agaga. A'o fai le pepelo a Satani fa'apea ua feso'ota'i nei tagata ola ma o latou aiga ua maliliu, ua fa'apenā ona faifaimalie mai pea le pulea e Satani o o latou mafaufau. *GC 551, 552 (461)*

(4) O LE Ā LE PEPELO A SATANI E FA'ATATAU I LE OTI UA FA'AVAE AI LE TALITONUGA MATA'UTIA FA'AŌNAPŌNEI E UIGA I LE TULAGA OLA PEA O LE AGAGA?

"Ona fai mai lea o le gata i le fafine, Lua te lē oti lava." Kenese 3:4

MAU E TAU I AI: Kenese 2:17; Ioane 8:44; Roma 6:23; 2:7; Esekielu 18:20

O le talitonuga fa'aōnapōnei e fa'atatau i le agaga e ola pea ma isi tapua'iga i fa'atusa ma sauniga fa'ataulāitu o aso anamua, - o latou uma e tū i luga o le feso'ota'iga ma agaga o ē ua oti - e fa'avae uma i luga o le ulua'i pepelo lea na fa'asesēina ai Eva i Etena: "Lua te lē oti lava; auā ua silafia e le Atua, o le aso lua te a'ai ai, e pupula ai o oulua mata; ona 'avea ai lea o oulua e pei ni atua" (Kenese 3:4, 5). E fa'apea lava ona fa'aalualu pea lea pepelo ma e tutusa lava mai le amataga, ona e fa'apei o le pepelo mai le tamā o pepelo uma. *PP 686*

Ua tatou taunu'u mai i faigatā o aso o fa'ai'u, ma o le to'atele o le a "ō 'ese nisi i le fa'atuatua i tausaga amulī, latou te fa'alogo i agaga e fa'asesē ma matā'upu a temoni" (I Timoteo 4:1). Ia fa'ateete fa'ataua i au mea e faitau ma pe na fa'a'apefa ona e fa'alogo i mea. 'Aua lava ona e fa'alatalata i matā'upu e aofia ai agaga ola pea o ē ua oti. O lo'o fa'atali pea Satani e savali i luga o tagata uma o ē ua mafai ona ia fa'asesē e ala i lona mana fa'atosina. A aga'i loa latou e tau sa'ili'ili i ia manatunatuga, o le a fa'aaogā loa e Satani lona mana e fa'aliliu'ese ai latou mai le mea tonu. 2 MCP 718

(5) E FIA SE MEA O LE A ILOA E LE TAGATA UA OTI FA'APEI ONA TA'U MAI E LE TUSI PA'IA?

"Auā o ē ua ola, ua latou iloa e oti i latou; a o ē ua oti, latou te lē iloa se mea; ua leai fo'i se toe totogi iā te i latou; auā ua fa'agalagaloina i latou. O lo latou alofa fo'i, ma lo latou ita, ma lo latou mataū'a, ua mavae lava ia; ua lē toe aiā i latou e fa'avavau i mea uma ua faia i lalo o le lā." Failauga 9:5, 6

MAU E TAU I AI: Failauga 9:10; Salamo 146:4; 6:5

E mana'omia i lenei taimi le malamalamaga tonu o le 'upu "O le ā le mea ua ta'u mai i le Tusi Pa'ia" e fa'ataua i le tulaga o ē ua oti. Ua ta'u mai i le afioga a le Atua e lē iloa se mea e tagata ua oti, o lo latou ita ma le alofa fo'i ua mavae atu lea. E tataua ona tatou ō au i le 'upu moni o valo'aga mo la tatou pulega.

Se'iloga e atamai i tatou i le Tusi Pa'ia, ia 'aia ne'i fa'asesēina i tatou pe a fa'aaogāina e Satani lona mana fai-vavega i le lalolagi ma tatou fa'apea ai o gaoioiga ia a le Atua; auā ua ta'u mai e le Afioga a le Atua, pe a mafai, o le a fa'asesēina ai fo'i ma le 'au filifilia. Vaganā ua maua'a ma mautū i tatou i le 'upu moni, o le a tafi'esea i tatou e mailei taufa'asesē a Satani. E tataua ona tatou taofimau i a tatou Tusi Pa'ia. Pe a mafai e Satani ona fa'atalitonu 'oe o lo'o i ai mea e lē tonu i le afioga a le Atua, o le a sauni loa ia e mailei lou agaga. O le a leai sa tatou ta'utinoga mautū, leai se mea e mautinoa, i le taimi lava e mana'omia ia tatou iloa manino ai pe o le ā tonu le 'upu moni. Ev 249

(6) O FEA E Ō I AI MA O LO'O I AI PEA Ē UA MALILIU SE'IA O'O INA VALA'AUINA I LATOU E LE ALI'I E TUTŪ A'E?

"Ua ta'ape le ao ua mavae atu, e fa'apea lē ua alu ifo i le tu'ugamau, e lē toe alu a'e o ia. E lē toe fo'i mai o ia i lona fale, e lē toe iloa o ia i le mea sa i ai o ia." Iopu 7:9, 10

MAU E TAU I AI: Galuega 2:29, 34; Failauga 3:20; Salamo 104:29

O le a'oa'oga sesē e fa'ataua i le fa'asalaga e fa'avavau, ua fanau mai ai fo'i ma se isi a'oa'oga sesē - o le a'oa'oga lea ua fai mai e lagona ma iloa mea e i latou ua feoti. E tutusa lava ia a'oa'oga sesē ona e lē o ni a'oa'oga e fa'avaeina i luga o le Tusi Pa'ia. Fai mai lenei a'oa'oga sesē o lo o i le lagi ē ua oti, ma ua latou va'ava'ai mai ai i mea uma o lo o tutupu i le lalolagi, a e maise lava olaga o tagata ua pele iā i latou, tagata ua latou tu'ua i lalo nei. Peita'i, e fa'a'apefa ona maua se fiafia o ē ua oti pe afai latou te iloa fa'alavelave uma ma puapuagā o ē o ola? E fa'a'apefa ona maua so latou fiafia pe afai o lo o latou molimauina agasala uma o lo o faia e tagata ua pele iā i latou? E fa'a'apefa ona maua so latou fiafia pe afai latou te va'ava'ai mai o oi ō latou tagata i le tigā ma le mafatia, ma puapuagā, ma fa'amoemoe ua lē taulau i lalo nei? E fa'a'apefa ona maua so latou fiafia i le manuia i le lagi pe afai o lo o latou fa'aoepeopea lava pea i luga a'e o lo latou tagata i le lalolagi? Fai mai le a'oa'oga sesē lava lenei, e tu'ua loa e le mānava le tino o le tagata amioleaga, ona o'o atu loa lea o lona agaga i le afi i seoli. Se talitonuga ina 'ā fa'aoso 'ino'ino! Talofa i le tigā ma le mafatia e o'o iā i latou o ē vā'ai ua oti a latou uō a e le'i sauniuni, ma ulu atu ai a latou uō i se mea o le a latou oi ai ma tigāina e fa'avavau! E i ai nisi ua i'u i le valea o latou mafaufau ona o lo latou manatunatu i lenei mala mata'utia. GC 545 (455)

(7) A O FETALAI KERISO E FA'ATATAU I LANA UŌ O LASALO, O LE Ā LE FA'ATUSATUSAGA NA IA FA'AAOGĀ E FA'AMATALA ATU AI LE TULAGA O I LATOU UA MALILIU?

"Ua fetalai atu ia 'upu, a e mulimuli ane ua fa'apea atu o Ia iā te i latou. O lo'o moe la tatou uō o Lasalo; a e 'Ou te alu e fafagu iā te ia. Ona fa'apea mai lea o Ōna so'o. Le Ali'i e, afai o moe ia, e ola. Ua fetalai Iesu i lona oti, a ua latou masalo ua fetalai o Ia i le ta'oto ma moe. Ona ta'utino atu lea e Iesu iā te i latou. Ua oti Lasalo."
Ioane 11:11-14

MAU E TAU I AI: Salamo 13:3; 17:15; Mataio 27:52; Tanielu 12:2; Iopu 14:12

O fa'atusatusaga nei e fa'amalamalamaina ai le fa'aaogā o le moe pei o le fa'atusa e fa'amatala ai le oti: (1) O le moe o le tulaga lea pe a lē o toe iloa se mea. "O ē ua oti, latou te lē iloa se mea" (Failauga 9:5). (2) O le moe o le malōlō mai galuega uma o le olaga. "E leai se galuega, po o se mafaufau, po o se iloa, po o se poto i le tu'ugamau" (Failauga 9:10). (3) A moe o le a lē toe mafai ona mafaufau malamalama" (Salamo 146:4). (4) E moe pea le tagata se'iloga e fafaguina. "E ta'oto fo'i le tagata a e lē toe tula'i, se'ia mavae le lagi" (Iopu 14:12). (5) E lē mafai se feso'ota'iga i galuega a ē o lo'o ala ma lē o moe. "Ua lē toe aiā i latou e fa'avavau i mea uma ua faia i lalo o le lā" (Failauga 9:6). (6) O le moe e to'esea ai galuega a lagona o le tagata. "O lo latou alofa fo'i, ma lo latou ita, ma lo latou mataū'a, ua mavae lava ia" (V. 6). (7) O le moe o le mea e tupu ma o le mea e masani ai tagata uma. "O ē ua ola, ua latou iloa e oti i latou" (V. 5). (8) E lē toe vi'ia le Atua e le tagata pe a moe. "E lē vivi'i atu iā Ioa ē ua oti" (Salamo 115:17). Ma "E lē vivi'i atu le tu'ugamau iā te 'Oe" (Isaia 38:18). 5 BC 1013

(8) PE A TOE AFIO MAI KERISO, O LE A FA'ALOGOINA LE 'ALAGA, MA O LE A LŪLŪINA LE LAGI ATOA E LE PŪ A LE ATUA, O LE Ā LE MEA O LE A TUPU IĀ I LATOU O LO'O "MOMOE IĀ IESU"?

"Auā e afio ifo mai le lagi le Ali'i lava, ma le 'alaga, ma le leo o le agelu sili, ma le pū a le Atua; e muamua fo'i ona toe tutū mai o ē ua oti o iā Keriso; ona fa'afuase'i lea ona 'aveina a'e o i tatou o ē ola ma totoe, fa'atasi ma i latou i ao, ina ia fetaia'i ma le Ali'i i le vā nimonimo; ona tatou fa'atasi pea lava lea ma le Ali'i."
I Tesalonia 4:16, 17

MAU E TAU I AI: I Tesalonia 4:14, 15; Isaia 26:19; Mataio 24:31; I Korinito 15:12-23

Ua fetalai Iesu i lona oti, a ua latou masalo ua fetalai Ia i le ta'oto ma moe" (F. 12, 13). Na fetalai Iesu e fa'atusaina le oti o le moe i Lana fanau; auā o ē fa'amaoni o lo'o malu iā Keriso, a oti i latou, e momoe se'i fa'alogoina le pū mulimuli i Lona afio mai. DA 527 (411)

(9) PE ATOE AFIO MAI KERISO, O LE Ā LE MEA O LE A IA TU'U IĀ I LATOU UMA, Ē O LO'O OLA MA Ē UA MALILIU "IA TUSA MA LANA UA FAI"?

"Fa'auta fo'i, 'Ou te vave alu atu; ua iā te A'u fo'i le tau'i 'Ou te tau'i ta'itasi atu ia tusa ma lana ua fai."
Fa'aaliga 22:12

MAU E TAU I AI: Mataio 16:27; Roma 2:6, 7; Tanielu 12:2

E leai se mau e tasi i le Tusi Pa'ia ua ta'u mai ai fa'apea e ō le 'au amiotonu i le lagi i le taimi e feoti ai, a'o le 'au amioleaga i lo latou fa'asalaga pe a latou oti. E leai se tala fa'apea ua tu'uina mai e le 'au pateriaka ma le 'au perofeta iā i tatou. E leai fo'i sina fa'amatalaga na faia e Iesu ma Lana 'au aposetolo e ta'u mai ai lenei mea. Ua manino le tala a le Tusi Pa'ia - e lē ō sa'o tagata i le lagi pe a feoti. Fai mai le Tusi Pa'ia o lo'o momoe i latou se'ia o'o i le aso o le toe tū (I Tesalonia 4:14; Iopu 14: 10- 12). O le aso lava e motu ai le maea ario, ma ta'e ai le ipu auro (Failauga 12:6), o le aso fo'i lea e fa'aumatia ai manatunatuga uma o le tagata. O ē ō ifo i le tu'ugamau, o lo'o i ai i latou i le mea ta'aligoligoa. Latou te lē toe iloa se mea o faia i lalo o le lā (Iopu 14:21).

Ua mālōlō ai i inā le 'au amiotonu mai a latou avega mamafa. Pe umi pe pu'upu'u la latou fa'atalitali i le tu'ugamau, ua na o se minute lava iā i latou. Latou te momoe i le tu'ugamau se'ia o'o ina fagua i latou i le leo o le pū a le Atua, ma latou ō atu ai loa i le manuia e fa'avavau. Auā e ilia le pū a le Atua, "e toe tutū mai fo'i ē ua oti ma le ola pea ... Pe a ofu fo'i lenei tino i'uvale i le tino ola pea, a ofu fo'i lenei tino oti i le tino lē oti lava, ona taunu'u ai lea o le 'upu ua tusia, Ua fa'aumatia le oti i lē manumalō" (I Korinito 15:52-54). A'o fa'apenā ona latou ala mai nai la latou moe, ua latou ta'itasi ma manatunatu po o fea tonu na latou momoe ai. O le toe mea lava na latou manatua o le tigā o le oti; o le mea mulimuli lava na latou manatunatu i ai o lo latou ō ifo lea i lalo o le pule a le tu'ugamau. Lenei la ua latou tutū a'e nai le tu'ugamau. O lo latou ulua'i manatu ua fa'aioa mai lea i le alaga manumalō ua fa'apea mai: "Le oti e, o fea o i ai lou tui? Le tu'ugamau e, o fea o i ai lou manumalō?" (I Korinito 15:55). GC 549, 550 (458, 459)

(10) PE A TAUMAFAI TAGATA E FA'AFESO'OTA'I Ē UA MALILIU, O AI O LO'O FAIA NEI "FA'AIOLOGA" MA TAU FESO'OTA'I MA I LATOU?

"Auā o agaga ia o temoni e fai fa'aiooga, ua latou ō atu i tupu o le lalolagi ma le atu laulau uma,..." Fa'aaliga 16:14

MAU E TAU I AI: II Tesalonia 2:9; II Korinito 2:11; Levitiko 19:31

O "agaga e masani ai" e lē o agaga o tagata ua oti, a e o agelu leaga, o 'avefea'u ia a Satani. O ifoga tupua fa'aanamua, lea ua tatou va'ai i ai, e aofia ai le tapua'iga i ē ua feoti ma feso'ota'iga fa'afoliga ma i latou, ua ta'ua mai i le Tusi Pa'ia o tapua'iga ia e faia i le temoni.

Ua lapata'i mai Paulo i ōna uso ia tete'e le faia, i so'o se tulaga, le ifo i tupua e pei o a latou tuā'oi. Fai mai, "O mea ua fāsia e nu'u 'ese, ua fāsia e i latou mo temoni, a e lē o le Atua; 'ou te lē loto fo'i ina ia outou mafuta fa'atasi ma temoni" (I Korinito 10:20). Ona a o latou tapua'i i tagata ua oti o lo'o tapua'i lea i temoni.

E fa'avae lava le tapua'iga fa'aonapōnei i agaga o ē ua oti, o lea ua toe fa'afouina se itū'aiga fa'ataulaitu ma le tapua'i i temoni lea na fa'asā e le Atua i aso anamua. Sa valo'ia i le Tusi Pa'ia ina ua fa'apea mai, "E ō 'ese nisi i le fa'atuatua i tausaga amulī, latou te fa'alogi o agaga e fa'asesē ma matā'upu a temoni" (I Timoteo 4:1).

Ua fa'asino mai e Paulo i lana tusi lona lua i le 'au Tesalonia, le fa;apitoa o le galuega a Satani e fa'atatau i le tapua'i i agaga o ē ua oti, e fa'apea o le mea e tupu i le afio fa'alua mai o Keriso. Ua ia ta'u mai e uiga i le afio mai o Keriso, "e pei o le galuega a Satani, i le mana uma, ma fa'aiooga, ma vavega pepelo" (II Tesalonia 2:9). PP 685, 686

(11) I NEI TAIMI UA MATUĀ MATA'UTIA TAUFĀ'ASESĒGA MA UA LĒ MAFĀI ONA TATOU TALITONU I MEA O LO'O TATOU VA'AI MA FA'ALOGO I AI, O LE Ā LE POGAI O LE 'UPU MONI MA E FIA LE UMI O LE A MAFĀI AI ONA TUMAUPĒA?

"E moni lava Lau afioga talu le amataga; e fa'avavau fo'i Āu fa'amasinoga tonu uma lava." Salamo 119:160

MAU E TAU I AI: Isaia 8:20; 40:8; II Timoteo 3:16; Fa'ata'oto 30:5

Ua matuā leaga lava le tulaga o mea i lo tatou lalolagi. Ua sauni le agelu o le alofa e fa'amoe ōna 'apa'au ma tula'i loa e toe fo'i i le lagi. Ua amata ona to'esea e le Ali'i le mana o lo'o taofimau ai le lalolagi, ma ua sa'ili Satani e fa'agaoioi fa'avae o talitonuga 'ese'ese e ta'ita'iina ai tagata ina ia i lalo o a'oa'oga a lē e taufa'asesē, o lē galue e ta'ita'i sesē i le amiolētonu le fanau lē usiusita'i. O lo'o fa'apotopoto nei tagata o le lalolagi i lalo o le ta'ita'iga a le ali'i o le pogisā, a e peita'i o le amataga lava lenei o le fa'ai'uga. 8 T 49

E nā o i latou lava na su'esu'e ma le ma'elegā i le Tusi Pa'ia ma latou fiafia i le 'upu moni, na o i latou ia o le a puipuia mai lenei fa'asesēga tele. O i latou ia o le a latou iloagofie foliga a Satani i totonu o ana mea taufa'asesē. O le molimau a le Tusi Pa'ia o le a latou iloa ai le ese'esega o le mea moni ma le mea taufa'asesē. O le a o'o mai le tofotofoga i tagata uma. O tofotofoga nei o le a iloa ai le Kerisiano moni. Fa'amata ua mausalī nei le fa'avae o le fanau a le Atua i luga o Lana afioga, ina ia lē fa'asesēina ai i latou i vavega o le a latou vā'ai ma fa'alogo i ai ma tagotago fo'i i ai o latou lima? Fa'amata o le a latou pi'imaui pea i le Tusi Pa'ia, na o le Tusi Pa'ia lava? O le a taumafai malosi Satani ina ia lē maua se taimi e fai ai sa latou sauniuniga mo lenā aso tele. O le a fa'atulaga lelei e Satani mea tutupu ina ia lavelavea ai i latou i mea e tāua i le lalolagi, ina ia latou tau'aveina ni avega mamafa o tiute ma meafai o lenei olaga, ina ia fa'apenā ona latou pisi i lea mea ma lea mea, ona o'o mai ai lea o le aso o le tofotofoga iā i Latou, ua pei o le sau o se gaoi. GC 625,626 (519, 520)

MANATUNATUGA MA LE TALI (Mafai tali e sili atu i le tasi pe a tatau)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū
N = Ua o'otia ai a'u

O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imaui pe ana ou lē iloa
Z = Se isi mea

'Ou te _____ o lo'o taumafai Satani ma āna 'au e aumai fa'alilolilo talitonuga sesē i totonu o fa'apotopotoga a tagata o le Atua ma e fuafua ai mo lo latou fa'aumatiāga.

Ua 'ou _____ o pogai o nei a'oa'oga sesē o Satani ma ōna agaga taufa'asesē ma e pau le auala saogalemū o le fai lea o le 'upu moni mai le Afioga a le Atua ma fa'avae o ou talitonuga.

'Ou te _____ o le a'oa'oga e fa'atatau i agaga e ola pea o le pepelo lea e uiga i le mafai ona fa'afeso'ota'i e tagata ola ē ua oti. E _____ ona e fa'aaogā e Satani lenei mea e taumafai ai e vavae'ese a'u ma le 'upu moni.

'Ou te _____ ona o lo'o a'oa'o mai le Tusi Pa'ia e lē toe lagona pe iloa se mea pe a oti le tagata. O le a latou toe tutū a'e mai le "moe" i Lona afio fa'alua mai ma o le a maua ai o latou tau.

MANATU

FA'AOPPOPO

TATALO MANA'OMIA



O Taua, Fa'ama'i, ma Mala e Tutupu

Lesona 5

'UPU A LE FA'ATONU: E tāua ona iloa le tala fa'asolopito mai le selau tausaga ua mavae atu nei, le tala o fa'ama'i ua va'aia, o mala tutupu, ma le tele o toto masa'a ona o taua, ua tele atu i lo o le ōno afe (6,000) tausaga ua mavae atu o le tala fa'asolopito o le lalolagi. O toto masa'a mai taua tele o le lalolagi, o taua talu mai ia taua, ma taua o lo'o alu pea mai itū 'ese'ese o le lalolagi o lo'o fa'atumuina ai tusi o la tatou tala fa'asolopito.

(1) O LE Ā LE VALO'AGA A KERISO E FA'ATATAU I VĀ FEĀLOA'I O MALŌ MA PULE'AGA FA'ALELALOLAGI E FAI MA FA'AILOGA UA LATA LONA AFIO MAI?

"E fa'alogo outou i taua ma tala o taua; ia outou, ne'i tou atuatuva'e; auā e ao ona taunu'u o nei mea uma, a e le'i o'o i le gata'aga. Auā e si'i le taua e le tasi nu'u i le tasi nu'u, ma le tasi malō i le tasi malō." Mataio 24:6, 7

MAU E TAU I AI: Luka 21:9; Ieremia 8:15; Esekielu 7:25-27

E tataua ona matuā tāua le taimi nei i mea ola uma. O ta'ita'i ma pule o malō, o tagata o lo'o nofoia tulaga maualuluga ma le pule, o tagata a'oa'oina uma mai vasega 'ese'ese, o lo'o aga'i pea le va'ai i mea o lo'o tutupu i aso uma. O lo'o va'ava'ai pea i le femēmēa'i ma le fevesia'i i le vā o malō. Ua latou va'aia le mata'utia o le tulaga ua o'o i ai mea uma i le lalolagi, ma ua latou iloa e i ai se mea tele ma e mautinoa le mata'utia ua lata ona tupu, o lea ua latalata ona o'o mai se malaia ofoofogia i le lalolagi. *Mar 174*

O lo'o fa'ataunu'uina valo'aga. O se tala fa'asolopito e matuā 'ese o lo'o fa'amauina i tusi o le lagi. Ua fa'avevesi mea uma i lo tatou lalolagi. E maua pea tala i taua; ua faitaga'i malō, ma ua o'o i le taimi e fa'amasinoina ai ē ua maliliu. O lo'o fesuia'i mea e tutupu ina ia vave ona o'o mai le aso o le Atua. E toe pu'upu'u lava si taimi o lo'o totoe. Peita'i, e ui ina o lo'o femēmēa'i malō, a e leai se taua tele o lo'o tupu mai. O le taimi nei o lo'o taofiofi pea matagi e fā se'i fa'ailogaina 'au'auna a le Atua i o latou muāulu. Ona fa'apotopoto lea o 'au uma a le lalolagi mo le taua tele mulimuli. 6 T 14

(2) PE A FA'ALOGOINA FA'AFITAŪLI FA'ALEMALŌ MA TAU, O LE Ā LE MEA NA FETALAI MAI KERISO IA 'AUA NE'I FAIA E ŌNA TAGATA?

"Pe a outou fa'alogo i taua ma fouvalega, 'aua tou te atuatuvalet; auā e ao ina mua'i taunu'u mai o ia mea, a e lē o'o loa mai le gata'aga." Luka 21:9

MAU E TAU I AI: Ieremia 25:32; Fa'aaliga 3:10

Ua lata ona tutupu a'e fa'afitauli i vā o malō - o fa'alētonu ia e lē uma se'i afio mai Iesu. E mana'omia ina ia tatou tūlala'i fa'atasi, ia galulue mo Ia Lē ua saunia Lona nofoāli'i i le lagi ma Lona malō e pulea mea uma. E lē tu'ulafoa'iina e le Atua Ōna tagata, ma e maua lo tatou malosi pe a tatou lē tu'ulafoa'i o Ia. Mar 174

O le a fa'atū a'e e le Ali'i mo i tatou se fua e tete'e i le fili. E tatau ona tatou talitonu o le Atua la tatou fesoasoani, ia tatou lē fefefe ai, ia tatou lē ōfo pe maofa ai; auā tatou te iloa sa fa'atasi lava pea le Atua o Isara'elu ma Ōna tagata mai le amataga lava - mai le amataga o lenei lalolagi, sa fa'atasi pea le Atua ma Lana fanau usiusita'i. E tatau ona tatou fa'aalia e tatou te fa'alagolago ato'atoa i le Atua, ma ia fa'aalitino i le lalolagi e mafai ona tatou fa'atuatua iā te Ia ona e tatou te talitonu iā te Ia. TDG 114

(3) I LE TAIMI O LE I'UGA A O LO'O FETE'ENA'I PEA MALŌ, O AI O LE A FA'ASAGATAU I AI SATANI MA AISEĀ?

"Ua ita fo'i le tarako i le fafine, ona alu atu ai lea o ia e tau le taua ma i latou ua totoe o lana fanau, o ē ua tausi i poloa'iga a le Atua, ma ua taofi le mau iā Iesu Keriso." Fa'aaliga 12:17

MAU E TAU I AI: Fa'aaliga 14:12; 13:7; 11:7; Ieremia 6:2; Mika 4:10

Ona o le tulafono na fetalai mai le si'ufofoga o le Atua e lē sa'o, ua tu'u'eseina se vaega fa'apitoa, o le fa'a'upuga lea ua tu'uina mai nei e Satani. O lana tau fa'asesē tele mulimuli lea o le a ia aumai i le lalolagi. Na te lē mana'omia le osofa'ia o le tulafono 'atoa; afai na te mafai ona ta'ita'i tagata ia fa'agalo se poloa'iga e tasi, ua 'ausia lana fuafuāga. "Auā o sē tausi le tulafono uma, a e agasala i se mea e tasi, ua nofo sala ia i mea uma" (Iak. 2:10). I le loto malie e soli le tulafono e tasi, ua aumaia ai tagata i lalo o le pule a Satani. I le suia o le tulafono a tagata mo le tulafono a le Atua, o le a sa'ili ai Satani e pulea le lalolagi. O lo'o valo'ia lenei galuega i valo'aga. O le mālōsi o le pule tete'e a le sui o Satani, ua fa'ailoa mai ai, "Na te faia 'upu i le Silisili 'Ese, ma fa'aumatia le 'au pa'ia a le Silisili 'Ese, e manatu o ia e fa'aliliu i tausaga ma tulafono, e tu'uina atu fo'i i latou i lana pule" (Tani. 7:25).

E mautinoa o le a fa'atūina e tagata a latou lava tulafono e fete'ena'i ma tulafono a le Atua. O le a latou sa'ili e una'i fa'amalosi le loto fuatia ifo o nisi; ma i lo latou ma'elegā e fa'amalosia nei tulafono, o le a latou fa'asauā i o latou uso a tagata.

O le taua e tete'e i le tulafono a le Atua, lea na amataina i le lagi, o le a fa'aauau se'ia o'o i le taimi o le i'uga. O le a tofotofoina tagata uma. O le usita'i po'o le lē usita'i o le fesili lea e fai i ai le fa'ai'uga a le lalolagi 'atoa. O le a vala'auina tagata uma e filifili i le tulafono a le Atua po o tulafono a tagata. O inā o le a tusia ai le laina e vaelua ai. E na o le lua lava vasega. O amio ua uma ona atina'e; ma o le a fa'aalia uma pe ua latou filifilia le itū o le fa'amaoni po o le itū o le fouvale. DA 763 (600-601)

(4) O LE Ā LE POGAI O LE "LOTOA TELE" O SATANI MA UA FA'ATELEINA AI ĀNA TAUMAFAGA E FA'ASESĒ MA FA'AUMATIA TAGATA O LE ATUA?

"O le mea lea ia outou oli'oli ai, le lagi e atoa ma ē ua nonofo ai. O i talofa iā te outou o ē nonofo i le fanua ma le sami, auā ua alu ifo iā te outou le ti'apolo ua lotoa tele, auā ua na iloa ua sa'asa'a ona pō." Fa'aaliga 12:12

MAU E TAU I AI: I Peteru 5:8; Luka 21:34-36; Eperu 10:25

Sa amata i le lagi le galuega a Satani o le tautu'ua'i. Ina ua pa'ū le tagata, sa fa'aauau loa lana galuega i le lalolagi ma o le a faifai pea lana galuega fa'apitoa a o tatou tau lata atu i le fa'ai'uga o le tala fa'asolopito o le lalolagi. A o ia va'ai atu ua pu'upu'u lona taimi, o le a ia galue atili ma le ma'elegā e tau fa'asesē ma fa'aumatia. E tupu tele lona ita pe a va'ai atu i tagata o le lalolagi, o ē e ui ina vaivai ma agasala, a e āva i le tulafono a le Atua. O lea ua ia taumafai malosi ai ia latou lē usita'i i le Atua. E fiafia ia i le manatu o latou e lē aogā, ma e tele āna togafiti ua saunia mo so'o se agaga e fa'amailei ai ma vavae'ese ai ma le Atua. O lo'o sa'ili ia e tu'ua'i ma ta'usalaina le Atua ma latou uma o lo'o taumafai e tau'ave Āna fuafuāga i lenei lalolagi ma le alofa mutimutivale, fa'apalepale, ma le fa'amagaloga. COL 167 (60.3)

(5) O Ā ITŪ'AIGA MALA FA'APITO A E TOLU NA LAPATA'I MAI KERISO O FA'AIOGA FO'I IA O LONA AFIO MAI?

"Ona o'o mai ai lea o oge, ma fa'ama'i, ma mafui'e i lea mea ma lea mea." Mataio 24:7

MAU E TAU I AI: Luka 21:11; Mareko 13:8; Iopu 5:20-22

O lo'o tatou va'ai ma fa'alogo pea i le fevesia'i ma le femēmēa'i, mativa ma le ōge, i mafui'e ma lolovai; i mea mata'utia o le a faia e tagata; o mea e faia ona o le tu'inaanau a e lē o fa'aaogāina le mafaufau. O le to'asā o le Atua ua i luga o tagata o le lalolagi, o ē ua fai le amioleaga fa'apei o tagata o Sotoma ma Komora. E afe ma afe ola ma mea totino ua fa'aumatia e afi ma lolovai, o faula'iga o mea e maua mai le sauāina o ē matitiva. Ua lata ona fa'apu'upu'uina e le Ali'i Lana galuega ma fa'agata ai loa le agasala. E, pe ana mafai ona tosina mafaufau o ē o lo'o ta'u o tagata o le Atua, ina ua iloa se va'aiga mai ē fai amioleaga i nei aso o le i'uga. E pei o ōna pō o Noa, o le a fa'apea fo'i pe a o'o ina fa'aali mai le Atali'i o le tagata.

O le a to'esea e le Ali'i Āna puipuiga mai le lalolagi, ma o le a lata ona o'o mai le oti ma le fa'aumatiāga, fa'ateteleina le amioleaga, ma o le fa'asauā ma le amioleaga o le a galuea'iina i luga o ē mau'oa sa fa'aaogā lo latou tulaga e tete'e ai i ē matitiva. O i latou e leai se puipuiga a le Atua o le a lē maua se saogalemū mai so'o se tulaga po o se sulufaga. O lo'o a'oa'oina tagata 'ese'ese e fa'aaogā le malosi fa'alemafaufau e galue ai a'upega malolosi e mafai ona fa'amanu'a ma fasioti. 8 T 49, 50

O lo'o tatou fa'alogo nei i tala o mafui'e mata'utia, o afi, o afā, o mala mai le sami ma le fogā'ele'ele, o fa'ama'i ma ōge. Mata o le ā le mamafa o nei fa'aailoga iā te 'oe? E na o le amataga lenei o mea o le a tutupu o lo'o fa'amatalaina mai e Ioane e ala i fa'aaliga o le aso o le Atua. O le 'alaga mata'utia tele a le motu o tagata ua o'o mai i taliga o Ioane. "Ua o'o mai le aso tele o Lona to'asā, o ai fo'i se na te mafaia ona tū atu?" (Fa'aaliga 6:17). Sa tumu le aposetolo i le mata'u ma ua lē mautonu. TMGW 444

(6) O LE AMATAGA O LE Ā LE MEA E TUPU NA FETALAI MAI KERISO O LE A FA'ATETELEINA AI TAUA, FA'AMA'I, MA MALA?

"O nā mea uma o le amataga ia o puapuagā." Mataio 24:8

MAU E TAU I AI: Roma 8:22; Salamo 48:6; Ioane 16:21

Uso e, e lē o le taimi lenei e fa'anoanoa ma fa'avaivai ai, leai se taimi e tu'u gaua'i atu ai i le masalosalo ma le lē talitonu. O Keriso e lē o so tatou Fa'aola o lo'o i totonu o le tu'ugamau fou a Iosefa, ua tapunia e se papa tele, ma o lo'o fa'amauiina e le fa'amaufa'ailoga Roma. E iā i tatou le Fa'aola ua toe tū. O Ia o le Tupu, Ali'i o 'au e tele; o lo'o afio i le vā o kerupi ma o lo'o Ia puipui pea Ōna tagata e ui lava i fa'afitauli ma vāvāo o malō. O Ia Lē e pule i le atulaulau, o lo tatou Fa'aola lava lea. E Na te fuaina tofotofoga uma, ma o lo'o Ia silasila ifo i le afi mumū e tatau ona tofotofoina ai agaga uma. Pe a fa'ato'ilaloina 'olomalua uma o tupu, pe a tu'ia loto o fili o le Atua e le 'aū o Lona to'asā, a e o Ōna tagata o lo'o mautū la latou talitonuga e saogalemū pea i Ōna 'a'ao. O le a pulea e i latou o latou lava agaga ma le onosa'i. *RH Jan. 11, 1887*

(7) A O TATOU TAUNU'U I TAIMI FA'AI'U O LE LALOLAGI, O LE Ā LE FOLAFOLAGA E MAFAI ONA TAPA I AI Ē O LO'O SA'ILI LE ALI'I?

"Na te lavea'iina 'oe i le ōge ia lē oti ai, na te lavea'iina fo'i 'oe i le pelu i le taua." Iopu 5:20

MAU E TAU I AI: Salamo 33:18, 19; 34:9, 10; Mataio 6:31-34

I le fete'ena'iga tele mulimuli o le finauga ma Satani, o i latou o lo'o fa'amaoni i le Atua o le a va'ava'ai o 'ave'esea mea fa'ale-lalolagi uma e fa'alagolago i ai mo le tausiga o i latou. Ona o lo latou lē solia o le Tulafono a le Atua ina ia usita'i ai i pulega a mālō fa'ale-lalolagi, o le a fa'asāina i latou ia 'aua le toe fefa'ataua'i. E mulimuli ane o le a faia se tulafono e fasiotia ai i latou. (Va'ai i le Fa'aal. 13:11-17). A e peita'i o i latou e usiusita'i ua tu'uina i ai le folafolaga, "E mau lava o ia i le mea maualuga, o 'olo papa o lona malu lea; e foā'iina iā te ia ana mea e 'ai, e tumau pea iā te ia le vai" (Isa. 33:16). O lenei folafolaga o le a ola ai le fanau a le Atua. Pe a fa'aleagaina le lau'ele'ele i le oge, e fafagaina lava i latou. "E lē mamā i latou i le aso vale; e ma'o'ona fo'i i latou i ona pō e i ai le oge" (Sala. 37:19). *DA 121,122 (76-77)*

E pei o le tamaitiiti, e te maua i aso ta'itasi mea e tatau mo mana'oga o le aso. O aso uma ia e tatalo, "Ia foa'i mai iā te i matou mea e 'ai e tatau ma le aso." 'Aua e atuatuva'e pe afai e lē lava mo taeao. Ua iā te 'oe le mautinoāga o lea folafolaga, "Ia e fa'atuatua iā Ieova, ma e faia amio lelei; ia e nofo i le nu'u, ma tausisi i le fa'amaoni." Ma fa'apea mai Tavita, "Ua 'ou toea'ina a'u nei, sa a'u taule'ale'a; a 'ou te le'i iloa se tagata amiotonu na lafoa'iina, po o ana fanau ua 'aiisi i latou" (Salamo 37:3, 25). O le Atua na 'auina oreva e fafaga Elia i le Ālia o Kirita e aofia uma lava tagata ta'ito'atasi e fa'amaoni o Lana fanau. *MB 110 (47-48)*

(8) O LE Ā LE TALI A TAGATA FA'ALELALOLAGI A O LATOU VA'AIA MALA MATA'UTIA O LO'O SI'OMIA I LATOU?

"E oti fo'i tagata i le matata'u ma le fa'atalitali i mea e o'o mai i le lalolagi; auā e lūlūina 'au a le lagi." Luka 21:26

MAU E TAU I AI: Teuternome 28:65-67; Isaia 65:14; I Peteru 5:7

O lo'o tutupu pea mala mata'utia i lea vaiaso ma lea vaiaso, a e o le ā le uiga o nei mea? O lo'o fa'alasososo'o lava ona tupu nei malaia. Ua fa'afia ona tatou fa'alogu pea i mafui'e ma afā, o mea ua fa'aumatia e afi ma lolovai, o ola ma mea totino ua to'esea ma fa'aleagaina! O mala ia e fa'apea o lo'o fa'afuase'i mai se malosi e lē taupulea, a e peita'i e va'aia i nei mala fuafuāga a le Atua. O le tasi lea o ala o lo'o Ia sa'ili e fafaguina ai taulele'a ma tama'ita'i ia lagona le faigata ua latou i ai nei.

Ua sili nei le latalata o le afio mai o Keriso i lo le taimi na fa'ato'ā tatou talitonu ai. Ua lata le fa'ai'uga o le finauga tele. Ua i le lalolagi fa'amasinoga a le Atua. O lo'o latou 'alagaina le lapata'iga: "O le mea lea ia outou nofo sauni ai; auā o le itu aso tou te lē manatunatu ai e sau ai le Atali'i o le tagata" (Mataio 24:44). *8 T 252*

Ua lata ona mavae'ese atu lea o le lalolagi. I nei ona pō ua matuā tele le fa'aumatiāga o 'olua fa'alelalolagi. Ua i ai "mafui'e i lea mea ma lea mea" (Mataio 24:7), o faigatā ma fa'alētonu ua va'aia i so'o se mea. Peita'i o lo tatou avanoa lenā e sauni ai e 'avea ma tagata o le aiga fa'alelagi, o le fanau a le Tupu o le lagi. *ML 342*

(9) A O FA'ATE'IA LE OLA FA'ALEAGAGA ONA O MEA MATA'UTIA O LO'O TUTUPU O ASO O LE I'UGA, O LE Ā LE ALA O LE A TATAU AI ONA TATOU LILIU I LE ATUA MA LE FA'AFETAI, A E LĒ MO LO 'OE LAVA LELEI?

"Vivi'i atu outou iā Ieova; auā e lelei lava o Ia; auā e fa'avavau lava Lona alofa." I Nofoa'iga Tupu 16:34

MAU E TAU I AI: I Nofoa'iga Tupu 29:11-13; Salamo 9:1, 2; 36:5-10

Ona ua pu'upu'u le taimi e to'atele o le a u'una'iina e sa'ili le amiotonu ma ia fai Keriso ma la tatou uō. E lē tatau ona faia lea ma ala mo a tatou fuafuāga, auā e fa'apei ai lea ua faia ona o le loto fa'apito. E tatau ea ona tu'u mai i o tatou luma mea mata'utia o le aso o le Atua ina ia 'avea ma ala o le a tatou faia ai mea e tonu ona o le fefe? Ia lē tatau ona faia fa'apea.

E lalelei Iesu; e tumu o Ia i le alofa, tigāalofa, ma le alofa mutimutivale. E finagalo o Ia e fai ma a tatou uō, e tatou te savavali fa'atasi ma Ia i so'o se ala faigatā o le olaga. Ua Ia fetalai mai iā i tatou, O A'u o le Ali'i lou Atua; ia e savali ma A'u ona 'Ou fa'amalamalamaina lea o lou auala. O lo'o ōfo mai Iesu, le Mamalu o le Lagi, e si'itia a'e ia mafuta ma Ia i latou o ē ō mai iā te Ia ma avega, o latou vaivaiga, ma mea e popole ai. E 'avea i latou ma Āna fanau, ma e tu'u iā i latou se sulimoni e sili atu le aogā i lo o malō a tupu, se paleali'i mamalu e aupito tāua i lo o mea uma na fa'apale ai tupu maualuluga fa'alelalolagi. *LHU 98*

(10) O LE Ā LE FOLAFOLAGA E MAFAI ONA TATOU TAPA I AI PE A LOFIA LE LALOLAGI I MALA MA FA'AMA'I I ASO FA'AI'U?

"'Ou te fa'apea atu iā Ieova, 'O lo'u malu o Ia ma lo'u 'olo; o lo'u Atua 'ou te fa'atuatua iā te Ia.' Auā o Ia na te lavea'iina 'oe i le mailai a lē fai manu, ma le fa'ama'i e oti ai." Salamo 91:2, 3

MAU E TAU I AI: Salamo 91:4-16; Esekielu 12:16

"E to lauapi le agelu a Ieova e siosiomia ai e o matatau ia te ia, e laveai foi o ia ia te i latou" (Salamo 34:7). Ua fa'atonuina e le Atua Āna agelu e fa'asao Ōna tagata filifilia mai mala, ia puipua i latou mai "le fa'ama'i e feālua'i i le pogisā" ma "le mala e fano ai i le aoatea" (Salamo 91:6). O lo'o talanoa pea agelu ma tagata fa'apei ona talatalanoa le tagata ma lana uō, ma e ta'ita'i pea i latou i mea e saogalemū ai. Latou te aumaia 'upu e fa'amalosi ai le agaga ua fa'avaivai o ē fa'amaoni, ma latou tau'ave o latou mafau'au i luga a'e o mea o le lalolagi ma ia latou iloa ma va'ai, e ala i le fa'atuatua, la'e'i papa'e, o paleali'i, o laula'au o le manumalō lea o le a maua e i latou pe a latou si'osi'omia le nofoāli'i pupula. *AA 153*

**O'U MANATUNATUGA MA TALI
(Mafai tali e sili atu i le tasi pe a tatau)**

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele

H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū
N = Ua o'otia ai a'u

O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia

V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imaui pe ana ou lē iloa
Z = Se isi mea

A o o'u va'ai solo atu 'ou te _____ ona o fa'ailoga na tu'u mai e Keriso ma o lo'o fa'ateleina. 'Ou te _____ o lo'o fa'aumatiaina le lalolagi e fa'ama'i ma mala o lo'o tutupu nei.

'Ou te _____ o faigatā i vā o malō ua tupu ai taua ma tala o lo'o logo ai taua. Ua 'ou _____ o lo'o taofiofi e le Atua matagi e fā o le taua tele mulimuli ina ia tu'u iā te a'u le taimi e iloa ai ma sauni mo mea o le a o'o mai.

'Ou te _____ ua aumaia e le Atua nei valo'aga ma pe a o'o ina tele le mata'u i loto o tagata, a e o a'u _____ ona o le a 'ou lē fefe pe a 'ou va'ai atu ua taunu'u nei mea.

A o pagātia tele le lalolagi i ōna taimi fa'ai'u, 'ou te _____ o a'u o se tasi o "fanau" a le fafine - o ē o lo'o fa'amaoni e tausi poloa'iga uma a le Atua.

'Ou te _____ o le a 'ou fa'amaoni e fa'asoa atu le tala lelei ma lapata'i isi e fa'atatau i mea o le a o'o mai, e ala lea i le mana o le Agaga Pa'ia.

MANATU

FA'APOPO

TATALO MANA'OMIA



Fa'alataina ma Sauāina

Lesona 6

(1) O LE Ā LE LAPATA'IGA NA TU'U MAI E KERISO, LEA SA TOE FA'ALEOINA E PAULO INA UA IA FA'AMATALA MEA O LE A FA'APUAPUAGĀTIAINA AI I LATOU E MULIMULI IĀ KERISO?

"O i latou uma fo'i o ē loto ina nonofo ma le amio Atua iā Keriso Iesu, e sauāina i latou." II Timoteo 3:12

MAU E TAU I AI: Ioane 16:33; Roma 8:17; Mataio 23:34; Luka 21:12

Talu ona ulu mai le agasala o lo'o i ai pea le "feitaga'i" i le vā o Keriso ma Satani, i le vā o le malō o le lagi ma le malō o lenei lalolagi, ma le vā o ē au'auna i le Atua ma i latou o ē au'auna iā Satani (Kenese 3:15; Fa'aaliga 12:7-17). O lenei fete'ena'iga o le a alu pea se'ia o'o ina fa'apea mai, "O malō o le lalolagi ua 'avea mo lo tatou Ali'i ma Lona Keriso" (Fa'aaliga 11:15; Tanielu 2:44; 7:27).

Ua lapata'i mai Paulo i ē talitonu "o puapuagā e tele e tatau ona tatou sao atu ai i le malō o le Atua" (Galuega 14:22). E iloa e tagatānu'u o le malō fa'alelagi atonu o le a i ai puapuagā i lenei lalolagi (Ioane 16:33), ona o a latou uiga, manatu lelei, o fa'anaunauga, ma amio e fai ma molimau e tete'e ai i le leaga o le lalolagi o nei ōna pō (I Ioane 3:12). Sa sauāina Iesu, le Tupu, e fili o le malō fa'alelagi, ma atonu o le a latou fa'asauā i Ōna tagata fa'amaoni (Ioane 15:20). "O i latou uma fo'i o ē loto ina nonofo ma le amio Atua iā Keriso Iesu, e sauāina i latou" (II Timoteo 3:12). 5 BC 328

(2) E PEI ONA FETALAI AI KERISO, O LE Ā LE ITU'AIGA FAIGA O LE A O'O I ŌNA SO'O MONI?

"A o le'i o'o nei mea, latou te pupu'e ma fa'asauā iā te outou, e tu'uina atu iā te outou i sunako ma fale puipui."
Luka 21:12

MAU E TAU I AI: Luka 21:16-19; Mataio 10:17, 18; Mareko 13:9, 10

I lenā aso mata'utia, o i latou uma o ē au'auna ma le fa'amaoni i le Atua o le a mana'omia ia lototele, tū malosi, ma ia iloa mautinoa le Atua ma Lana afioga; auā o i latou o ē fa'amaoni i le Atua o le a sauāina, e faitioina a latou fuafuāga, o le a fa'auigasesē a latou taumafaiga sili, ma o le a ta'uleagaina o latou igoa. O le a galue Satani ma lona malosi taufa'asesē e tosina le loto ma fa'anenefu le mafaufau, e suia le leaga ia foliga mai e lelei, ma le lelei i le leaga. O le tele o le malosi ma le mamā o le fa'atuatua o tagata o le Atua, ma le maumaututū o le fa'anaunau e usita'i iā te Ia, o le a malosi fo'i le taumafaiga a Satani e fa'avevesi i latou o ē ui ina ta'u mai e amiotonu, a e o le a solipala le tulafono a le Atua. O le a mana'omia le talitonu ia mautū, o le fuafuāga o le olaga ia matuā malosi lava, ina ia u'umau le i fa'atuatua o le a tu'uina i le 'au pa'ia. AA 431

(3) E MO LE Ā LE FUAFUĀGA NA FETALAI MAI IESU O LE A FA'ATAGAINA AI LENEI ITŪ'AIGA SAUĀGA?

"... latou te ta'ita'iina atu outou i tupu ma ali'i ona o Lo'u igoa. E o'o ia mea iā te outou e fai ma molimau."
Luka 21:12, 13

MAU E TAU I AI: Salamo 119:46; Mataio 24:14; II Timoteo 1:8; Fa'aaliga 12:17; 20:4

E lē o toe mamao le taimi ona vala'auina ai lea o tagata o le Atua e tu'u a latou molimau i luma o ta'ita'i o le lalolagi. E lē to'atele o iloa le tele vavave o lo'o tatou savavali atu ai aga'i i le mala mata'utia o lo tatou tala fa'asolopito....E leai se taimi avanoa mo le fa'alialiavale, mo mea fa'atauva'a, mo le fa'aaogāina o le mafaufau i mea e lē tāua.

O le a fa'alogu tupu, o ta'ita'i, ma tagata tāua e uiga iā te outou e ala i tala mai o outou fili, ma o le a fa'auigasesē lo outou fa'atuatua ma a outou amioga. Peita'i o le a i ai le avanoa mo ē ua ta'u sesē e tula'i ai i luma o latou sa aumaia moliaga pepelo ma tali atu mo latou lava. O le a i ai le avanoa e latou te aumai ai le malamalama i luma o ē o lo'o ta'ua o tagata tāua o le lalolagi, ma afai sa e su'esu'e i le Tusi Pa'ia, afai ua e sauni e tali so'o se tasi e fesili mai e fa'ataui i le fa'amoemoe o lo'o iā te 'oe ma le agaga fa'amaulalo ma le mata'u, o le a lē masalosalo ōu fili e uiga i lou atamai.

I le fa'ai'uga o le galuega tele o le a tatou feagai ai ma fa'afitauli e tatou te lē iloa se faiga i ai, peita'i ia tatou manatua o lo'o galulue mana tetele e tolu o le lagi, o lo'o i le foeuli le 'a'ao fa'aleatua, ma o le a fa'ataunu'uina e le Atua Āna fuafuāga. Mar 252

(4) PE A O'O INA FESILIGIA E TA'ITA'I FA'ALEAGAGA MA PULE O MALŌ, O LE Ā LE MEA NA FOLAFOLA E LE ALI'I O LE A IA TU'U I O TATOU GUTU INA IA LĒ MAFAI AI E O TATOU FILI ONA TETE'E MA FAITIO I AI?

"O lenei, ia tu'u i o outou loto, tou te lē mua'i mafaufau i se 'upu tou te tali atu ai. Auā 'Ou te avatu mo outou le 'upu ma le poto, e leai so latou o ē finau mai iā te outou na te mafaia ona tali mai, pe tete'e mai iā te outou."
Luka 21:14, 15

MAU E TAU I AI: Ieremia 1:9; Fa'ata'oto 2:6; Efeso 6:19

O sauāga o le a fa'asalalauina ai le malamalama. O 'au'auna a Keriso o le a molia i luma o ali'i sili o le lalolagi, atonu o le a pau lenei o le avanoa e fa'alogo ai i le tala lelei. O le 'upu moni na tu'uina sesē i nei tagata. Na latou fa'alogo i moliaga sesē e fa'ataui i le fa'atuatua o so'o o Keriso. O le tele o taimi e pau le 'auala latou te iloa ai le mea moni, o molimau ia a i latou o lo'o molia ona o lo latou fa'atuatua. DA 354 (271)

O le a tu'u e le Ali'i o Iesu i Ōna so'o se gagana ma le poto e lē mafai e o latou fili ona fa'afitia pe tete'eina. O i latou o le a lē mafai ona fa'ato'ilalo e mea fa'afoliga fa'asatani o le a fai ma molimau e ofo ai tagata 'ao'aoina. O le a sau mai laugutu o ē lē a'oa'oina se mana ma le poto e fai ai ma talanoāga mo le 'upu moni. O le a liua se to'atele ona o la latou molimau. Mar 252

(5) MA LOTO FUATIA IFO UA FA'AMŪINA, O Ā MEA E TOLU O LE A FAIA E LE TO'ATELE O LO'O TA'U PEPELO MAI O SO'O LATOU O KERISO, MA O LE A SILI ONA FA'ASAUĀ I TAGATA E FA'AMAONI I LE ATUA?

"A o lo'o ta'utino mai e le Agaga, e ō 'ese nisi i le fa'atuatua i tausaga amulī, latou te fa'alogo i agaga e fa'asesē ma matā'upu a temoni; ona o le pepelo o tagata tala pepelo, o ē ua fa'amūina o latou lava loto fuatia ifo i le u'amea a'asa." I Timoteo 4:1, 2

MAU E TAU I AI: Galuega 20:30; I Timoteo 1:19; II Timoteo 4:3, 4; I Ioane 2:19

O ē fa'alata le 'upu moni o fa'asauā sili ia o i latou lava. O le to'atele o lo'o ta'ua o Kerisiano e fa'ailoa mai o i latou o le mea moni. e olaola lelei, peita'i e lē sauāina i latou mo le 'upu moni ona o lo'o ta'u mai fa'apea. Pe a o'o mai le aso e soloia ai le tulafono a le Atua, ma o le a fa'amamāina le ekalesia e ala i le afi o tofotofoga e tofotofoga ai tagata uma o le lalolagi, o le to'atele o ē ta'u mai o le mea moni o le a usiusita'i latou i agaga tau fa'asesē, ma o le a liliuina ia fa'alata mea moni pa'ia. O le a fai ma ē aupito sauā. "E tupu mai fo'i iā te outou lava tagata e tautala mai i mea fa'api'opi'o, e fetoso 'ese ai le 'au so'o ia mulimuli iā i latou" (Galuega 20:30); ma e to'atele o le a fa'alogo i agaga tau fa'asesē. 6 BC 1065

(6) O AI O LE A I LE VAEGA O Ē O LE A TOSINA E SATANI IA 'INO'INO MAI, PE FA'ALATA, PE FASIOTI FO'I IĀ I TATOU?

"E tu'uina atu fo'i outou e mātua, ma uso, ma aiga, ma uō; o isi fo'i o outou e fasiotia e i latou. E 'inosia fo'i outou e tagata uma ona o Lo'u igoa." Luka 21:16, 17

MAU E TAU I AI: Mataio 24:10; 10:21, 22; Mika 7:5, 6; Mareko 13:12

E matuā 'o'ona tele le faifili o tagata i le tala lelei, e tusa lava po o ni aiga fealofani, e i'u lava ina mālepelepe. O so'o o Keriso o le a toe fa'alata lava e o'o i le oti e tagata o o latou lava aiga. Na fetalai mai Iesu, "E 'inosia outou e tagata uma ona o Lo'u igoa; a o lē tumau se'ia o'o i le i'uga, e fa'aolaina lea" (Mare. 13:13). A e peita'i na fa'atonu atu Iesu iā i latou ia 'aia ne'i so'ona tu'uina i latou i tulaga e sauāina ai. O Iesu na masani ona Ia tu'ua le nu'u o lo'o galue ai, a e maliu i se isi nu'u, ina ia sao ai mai iā i latou o lo'o sa'ili e fasioti iā te Ia. Ina ua te'ena o Ia e Nasareta, ma tagata o Lona lava nu'u na taumafai e fasioti o Ia, ona maliu lea i Kapanaumi, ma o inā na maofa ai tagata i Āna a'oa'oga, "Auā o Lana fetalaiuga ua i ai le pule" (Luk. 4:32). O le mea lea e lē tataui i Āna 'au'auna ona loto vaivai i sauāga, a ia sa'ili se tasi nofoāga e mafai ona galulue ai mo le fa'aolaina o agaga. DA 355 (271, 272)

(7) O AI E LĒ MAFAI ONA TATOU TALIAINA PE AFAI TATOU TE LĒ TUMAU FA'AMAONI E UI INA SAUĀINA TATOU E I LATOU E AUPITO PELE IĀ I TATOU I LE LALOLAGI?

"O lē ua tele lona alofa i lona tamā po o lona tinā, a e itiiti iā te A'u, e lē aogā lea iā te A'u; o lē ua tele fo'i lona alofa i lona atali'i po o lona afafine, a e itiiti iā te A'u, e lē aogā fo'i lea iā te A'u." Mataio 10:37

MAU E TAU I AI: II Korinito 5:14, 15; Filipi 3:8; Teuternome 13:6-8; Luka 14:26, 27

"I sauāga uma, e matuā sili lava le faigāta o le fe'ese'esea'iga i totonu o le aiga, o le 'a'afiāga o le vā fealoa'i o uō pele fa'alelalolagi. Peita'i ua fa'ailoa mai e Iesu, "O lē ua tele lona alofa i lona tamā po o lona tinā, a e itiiti iā te A'u, e lē aogā lea iā te A'u; o lē ua tele fo'i lona alofa i lona atali'i po o lona afafine, a e itiiti iā te A'u, e lē aogā iā te A'u. O sē lē 'ave lona satauro ma mulimuli mai iā te A'u, e lē aogā fo'i lea iā te A'u" (Mata. 10:37, 38). *DA 357 (275)*

O le a tatou iloa e tatau ona tatou tu'u fa'amatala atu lima uma vaganā ai 'a'ao o Iesu Keriso. O le a taupepeloina tatou e uō, ma o le a latou fa'alata tatou. E o'o lava i aiga pe a fa'asesēina e le fili, o le a manatu o lo'o latou faia le finagalo o le Atua i le tete'eina o tatou ma taumafai e tu'u tatou i se tulaga faigatā, e fa'anaunau ia te'ena la tatou fa'atuatūaga. Peita'i ia tatou fa'atuatua pea e tumau o tatou lima i 'a'ao o Keriso e ui i puapuagā ma taimi pogisā. *Mar 197*

(8) O Ā FA'AMANUIĀGA E MAFAI ONA TATOU TAPA I AI PE A MANA'OMIA IA TATOU SOSOLA MAI SAUĀGA FA'AMOMOMO LOTO MAI AIGA MA UŌ ONA O LE SUAFA O KERISO?

"Ai se tasi ua ia tu'ua o fale, po o uso, po o tuafāfine, po o le tamā, po o le tinā, po o le avā, po o le fanau, p o fanua ona o Lo'u igoa, e maua e ia e ta'isautuaselau, e fai fo'i mona tofi le ola fa'avavau." Mataio 19:29

MAU E TAU I AI: Mareko 10:29, 30; Luka 18:29, 30

E mautinoa o lo'o fetalai Iesu i le gagana fa'afa'atusa. E tusa o se tausaga ma le afa ua mavae nei, na silafia e Iesu o i latou e fai le finagalo o Lona Tamā i le lagi, o "Lona tinā" ma le "tuafafine" ma le "uso" (va'ai i le Mataio 12:40-50) lava lea. O le "sautuaselau" e maua e le Kerisiano e aofia ai le oli'olisaga i le mafutaga fa'a-Kerisiano ma le mautinoa e matuā malie i lana 'au'aunaga mo le Atua. Ua fa'apea Paulo "e leai sina mea o iā te i matou, a o lo'o iā te i matou mea uma" (II Korinito 6:10). *5 BC 460*

E lē tatau ona ta'ita'iina se tagata o lo'o iloa va'ai i le malamalama, ona o le alofa mo aiga ma uō; o le a ia te'ena ai le malamalama, ma lē fa'amamaluina ai le Atua le Tamā ma Iesu Keriso, Lona Alo pele e to'atasi. O le a fa'aaogā e tagata so'o se 'alofaga mo le lē usiusita'i, e pei o le to'atele i ōna pō o Keriso, sa latou filifili ai e lelei ma tagata a e lē o le lelei ma le Atua. Pe a filifili e se tasi le to'alua po o le fanau, tamā po o le tinā, e fa'amuumua i lo Keriso, o lea filifiliga o le a maitaulia e fa'avavau ma le mamafa atoa o le avega o le a tau'ave.

O le tele o le lelei o le tagata, i lalo o le puleaga a le Agaga o le Atua, o le tele lea o le taumafaiga a le fili e fa'amalieina lona lotoleaga ma le mataū'a e ala i le sauāina o ē fa'amaoni. Peita'i o le lagi atoa o lo'o i le itū a Keriso, a e lē o i le fili. E fa'amamaluina i latou o ē alolofa i le Atua ma e loto ia fa'asoa ma Keriso i Ōna mafatiāga. *UL 40*

(9) O LE Ā LE ITU'AIGA OLAGA FA'ALELALOLAGI O LE A TATOU FIA SUIA MA LE OLA E FA'AVAVAU, INA IA FA'ASAO AI I TATOU LAVA PE ONA UA FA'AMALOSI MAI LE AIGA?

"Auā ai sē fia fa'asaogalemūina lona ola, e māumau ai iā te ia; a o lē fa'amāumau lona ola ona o A'u, e maua ai e ia." Mataio 16:25

MAU E TAU I AI: Mataio 6:24; 10:38, 39; 5:11; I Korinito 2:9

O le 'upu "ola" (Mataio 10:38) e tele ona fa'aliliuina i le 'upu "agaga" (Mareko 8:36, 37). O le tagata e galue ia fa'asao ma tausi lona ola fa'aletino iinei o le a lē iloa lona "agaga" po o le ola e fa'avavau. O lē e loto ia tu'u atu ia 'au'auna ai mo le Atua i lenei lalolagi, o le a fa'asao lona "agaga" ma ola fiafia ai e fa'avavau i le lalolagi fou. O le mea lea "o le tulafono o le ola e tu'u atu fa'ataulaga, o le tulafono lava o le ola e fa'asaoina;" a e "o le tulafono o le manatu fa'apito mo le tagata lava, o le tulafono lea o le ola e fa'amalaiaina."

O le tagata ua sauni e tia'i'ese mea uma e tāua iā te ia i lenei olaga ma o lo'o tū fa'alavelave i lona tupua'e fa'aleagaga, o le a iloa mulimuli ane na te le'i to'esea se mea aogā, a e ua ia maua 'oloa moni (Va'ai i le Filipi 3"8-10). E fa'apea mai le lalolagi o le mea valea ma e maumau le ola a lē e fa'afiti ia lava ma lē e tu'u ia fa'ataulaga, e pei o le tamaitiiti e fa'apea mai e maumau le lafoina o saito lelei i le 'ele'ele. Peita'i o le a fa'aali mai e le lalolagi o i lumana'i o ē e fa'amaoni i le lalolagi o le taimi nei o tagata valea, a e o le fanau a le Atua e popoto i latou. O le lē iloa ma le fa'aumatiāga o le "agaga" o lo'o fa'amatalaina i le Mataio 10:28. 5 BC 1022, 1023

(10) O LE Ā LE TAU I O LE A TU'U IĀ I LATOU O Ē TUMAU LE FA'ATUATUA E LAVATIA AI SAUĀGA MA LE 'INO'INO MAI ONA O LO'O LATOU TU'U FA'AMUAMUA LE ATUA MA 'AVEA O IA O LE PULE AOAQ?

"E 'inosia fo'i outou e tagata uma ona o Lo'u igoa; a o lē tumau se'ia o'o atu i le gata'aga, e fa'aolaina o ia."
Mataio 10:28

MAU E TAU I AI: Mareko 8:35, 36; Ioane 12:25

O le tagata e pa'ū 'ese mai le tautu'uga a e le'i taunu'u, e lē mafai ona ia maua le fa'aailoga. E mana'omia ia ulufale ma nofomau le tagata i le tautu'uga ina ia fa'ato'ā mafai ona manumalō ai. E lē lava ona amata i le ala fa'aKerisiano, a e ia tumau ai se'ia "o'o atu lava i le aso o Iesu Keriso" (Filipi 1:6). E tataua iā i tatou ona "matuā fa'asaga" (Va'ai i le Luka 9:51) o tatou foliga i le fa'ai'uga o le gasologa na fa'ailogaina mo i tatou e le Atua, fa'apei ona faia e Iesu, "o Lē na te ta'ita'iina ma Lē na te fa'aato'atoaina le fa'atuatua" (Eperu 12:2). 5 BC 378

(11) O LE A FA'APEFEA ONA MAFAI E TAGATA O LE ATUA ONA TUMAU I LE FA'ATUATUA MA MANUMALŌ PEA I LALO O NEI TULAGA FAIGATĀ?

"A ua latou manumalō iā te ia ona o le toto o le Tama'i Mamoe, ma le 'upu a la latou mau, ua latou lē fa'apelepeleina fo'i lo latou ola ua o'o i le oti." **Fa'aaliga 12:11**

MAU E TAU I AI: Ioane 15:5; Fa'aaliga 2:26; 3:5, 11, 12, 21

O le 'au so'o e le'i iā i latou le loto tele ma le mālōsi o le mafaufau sa i ai i maturo se'ia o'o ina ua latou mana'omia lea tulaga. Ona fa'ataunu'uina lea o le folafolāga a le Fa'aola. A o molimau atu Peteru ma Ioane i luma o le Fono Faitulafono, o tagata "ua latou ofo ai; ua latou iloa fo'i o i la'ua sa latou fa'atasi ma Iesu" (Galuega 4:13). O le molimau tusia e fa'atatau iā Setefano, "Ua pulato'a iā te ia i latou uma ua nonofo i le fonu, ua iloa e i latou ōna mata, ua peiseā'i o foliga o se agelu." O tagata "ua lē mafaia fo'i e i latou ona tete'e atu i le poto ma le Agaga ua na tautala ai" (Galuega 6:15, 10). O Paulo, ina ua ia tusia le tala o lona fa'amasinoga i luma o Kaisara, sa fa'apea mai, "O la'u ulua'i fa'atonu atu e le'i fa'atasi mai ai se tasi iā te a'u, a ua lafoa'i mai e tagata uma lava iā te a'u....A e peita'i sa iā te a'u le Ali'i, ma na fa'amalosia mai iā te a'u; ina ia fa'a'ato'atoaina e a'u le tala'iga, ina ia fa'alogologo i ai o nu'u uma lava; ua laveā'iina fo'i a'u ai le gutu o le leona" (II Timoteo 4:16, 17). DA 354 (272)

(12) PE A TOFOTOFOINA I LALO O NEI TULAGA E MATUĀ MATA'UTIA LE FAIGATĀ, O LE Ā LE MEA UA FA'ATONU MAI IA 'AUA NE'I TATOU FAIA, MA O LE Ā LE TAU I O LE A TU'U MAI E LE ALI'I I Ē FA'AMAONI?

"'Aua lava e te fefe i mea o le a e tigā ai. Fa'auta, o le a tu'uina atu ni o outou e le ti'apolo i le fale puipui, ina ia tofotofoina ai outou; e pō agafulu fo'i e puapuagātia ai outou. Ia e fa'amaoni se'ia o'o i le oti, ona 'Ou avatu ai lea iā te 'oe o le pale o le ola." **Fa'aaliga 2:10**

MAU E TAU I AI: Galuega 21:13; Tanielu 3:16-18; Mataio 10:28

O le tagata sa ta'u mai o ia o le "uso ma lē ua fa'atasi ma outou i le puapuagā" (Fa'aaliga 1:9), lea na fa'aali i ai e Keriso i Lana ekalesia mea e tatau ona fa'apuapuagātiaina ai ona o Lona suafoa. A o tepa taula'i o ia aga'i i luma i augātupulaga e tele o le pogisā ma talitonuga e lē fa'auta'ia, sa va'aia e le tamā matua i lona tulaga aunua se motu o tagata e to'atele o lo'o mafatia e o'o lava i le oti ona o lo latou fa'amaoni i le 'upu moni. Peita'i sa ia va'aia fo'i Lē na tausi i Āna molimau i tausaga ua mavae, o le a Ia lē tu'ulafo'i i Ōna so'o mai augātupulaga uma a o sauāina ina ia tatau ona fa'ataunu'u ia mea a e le'i fa'ai'uina le taimi. Ua fetalai mai le Ali'i, "'Aua lava e te fefe i mea o le a e tigā ai. Fa'auta, o le a tu'uina atu ni o outou e le ti'apolo i le fale puipui, ina ia tofotofoina ai outou; e po agafulu fo'i e puapuagātia ai outou. Ia e fa'amaoni se'ia o'o i le oti, ona 'Ou avatu ai lea iā te 'oe o le pale o le ola" (Fa'aaliga 2:10).

Mo le "au fa'amaoni uma sa taumafai e tete'e le fili, na fa'alogoina e Ioane folafolaga na tu'uina mo i latou: "O lē manumalō, 'Ou te avatua iā te ia e 'ai i le la'au o le ola o i totonu o le parataiso o le Atua" (Fa'aaliga 2:7). Ma "O lē manumalō, e fa'a'ofuina o ia i 'ofu sisina; 'Ou te lē sōloi'esea fo'i lona igoa i le tusi o le ola, a e 'Ou te ta'u atu lona igoa i luma o Lo'u Tamā, ma luma o Āna agelu.... O lē manumalō 'Ou te avatua iā te ia ma te nonofo fa'atasi ma A'u i Lo'u nofoāli'i, e pei o A'u fo'i ona 'Ou manumalō, ua ma nonofo fo'i fa'atasi ma Lo'u Tamā i Lona nofoāli'i" (Fa'aaliga 3:5, 21). AA 588

O'U MANATUNATUGA MA TALI (Mafai tali e sili atu i le tasi pe a tatau)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū
N = Ua o'otia ai a'u

O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

Ona o le fete'ena'iga i le vā o le lelei ma le leaga, ou te _____ o le a sauāina le 'au amiotonu fa'apei ona o'o iā Keriso.

Ua 'ou _____ ona i taimi fa'ai'u o le lalolagi, atonu o le a vala'auina i tatou e molimau mo la tatou fa'atuatuāga i luma o ali'i ma ta'ita'i ma o le a fa'aaogāina e le Atua lena faiga e ta'ita'iina mai ai le to'atele mo Lona malō.

'Ou te _____ ua folafola mai le Ali'i e Na te tu'u iā i tatou 'upu ma le lototele e tautala ai pe a o'o i le taimi e tatau ai.

'Ou te _____ o lo'o lapata'i mai le Tusi Pa'ia atonu o le a sauāina i tatou mai ē ua ta'u mai o Kerisiano a e fa'apea fo'i ma i latou o ē latalata mai iā i tatou - o uō pele lava ma aiga.

Ua 'ou _____ o le a mafuta le Atua ma a'u ina ia tumau lo'u fa'atuatua tusa pe o le ā le tau fa'alalolagi ma o le a maua i se aso le pale o le ola, o le a lē toe i ai ni sauāga a e o le a fa'atasi ma le Ali'i e fa'avavau.



O le Ta'atele o le Solitulafono i Aso Fa'ai'u

Lesona 7

(1) O Ā TA'IALA E LUA NA TALA'OTO'OTO MAI E KERISO I POLOĀ'IGA E SEFULU, O FA'AVAE IA O LE UIGA O LE ATUA MA LONA MALŌ E FA'AVAVAU?

"Ona fetalai atu ai lea o Iesu iā te ia, E te alofa atu i le Ali'i lou Atua ma lou loto atoa, ma lou agaga atoa, ma lou manatu atoa. O le poloa'iga muamua lenā ma le sili. E fa'apenā fo'i lona lua, E te alofa atu i lē lua te tuā'oi, ia pei o 'oe lava iā te 'oe.'" Mataio 22:37-39

MAU E TAU I AI: Teuterenome 11:22; Ioane 13:34, 35; 15:12, 17

O tulafono muamua e fā e fa'atonu atu ai le tagata i lona tiute e fa'atatau i lona alofa ia ato'atoa mo le Atua, a e o le ono mulimuli e fa'atatau i le alofa mo o tatou tuā'oi fa'apei o 'oe lava iā te 'oe. Mata e to'afia o lo'o latou faia lea mea ma le fa'amaoni ma le loto atoa?

E toe itiiti lava se taimi ona afio mai lea o le Ali'i, a o tatou faia ea le tiute e pogai mai le amiotonu? O le alofa o le fa'avae lea o le amioatua. E leai se tagata e alofa i le Atua, tusa pe o le ā lona tulaga, vaganā e iā te ia le alofa e lē fa'apito mo lona uso. Pe a tatou alolofa i le Atua ona sa muā'i alofa o Ia iā i tatou, o le a tatou alolofa fo'i i tagata uma na maliu ai Keriso. O le a lē mafai ona tatou tu'u atu se agaga o lo'o aga'i i le malaia ma o lo'o mana'omia se fesoasoani, a e lē o i ai se lapata'iga, lē o faia i ai se galuega, ma e le'i i ai se tausiga.

E tatau ona i ai muamua le alofa i le loto a e le'i mafai ona amata ona tausī tulafono a le Atua, e ala i le malosi ma le alofa tunoa o Keriso (Roma 8:3, 4). E lē mafai ona usiusita'i a e leai se alofa auā o le a leai se aogā. Peita'i e i ai le alofa o le a fa'aaga'i ai e le tagata lona olaga ia ō gatasi ma le finagalo o le Atua, fa'apei ona tu'u mai i Āna poloā'iga (Va'ai i le Ioane 14:15; 15:10). 5 BC 484

(2) O LE Ā LE FA'ANAUNAUGA A LE ALI'I MA LE FOLAFOLAGA E FAIA I TOTONU IĀ I TATOU INA IA FA'ATINOINA AI LO TATOU ALOFA IĀ TE IA MA ISI?

*"Ou te tu'uina La'u tulafono i totonu iā te i latou, ma 'Ou tusi ai i o latou loto; e fai fo'i A'u mo latou Atua, o i latou fo'i e fai Mo'u nu'u." **Jeremia 31:33***

MAU E TAU I AI: Eperu 10:16, 17; Teuternome 30:6

O le tulafono lava na i luga o papama'a o lea o lo'o tusia i totonu o le loto e ala mai le Agaga Pa'ia. Pe lē o lou tau fa'avae o lou lava amiotonu a ia tatou talia le amiotonu o Keriso. Ua tineia a tatou agasala e Lona toto pa'ia, ma ua taliaina Lona usiusita'i mo i tatou. O lea o le loto ua fa'afouina e le Agaga Pa'ia o le a fua mai ai "fua o le Agaga" (Kalatia 5:22, 23). E ala mai le alofa tunoa o Keriso o le a tatou ola ma tausī le tulafono a le Atua ua tusia i o tatou loto. Ona ua iā i tatou le Agaga o Keriso, o le a tatou savavali fo'i e fa'apei o Ia.

E lua mea sesē ia puipuia mai ai le fanau a le Atua - a e maise i latou o ē fa'ato'ā fou ona talitonu i Lona alofa tunoa. O le muamua o le va'ai lea i āu lava galuega, ma talitonu i so'o se mea e mafai ona e faia, ina ia aumaia ai 'oe ia ō gatasi ma le Atua. Pe a taumafai e fa'apa'iaina 'oe e ala i au lava galuega e tausī ai le tulafono, o se mea lea e lē mafai ona faia.

O le isi mea ma o se sesē faigatā, o le talitonuga lea ua fa'sa'oloto e Keriso le tagata mai le tausiga o le tulafono a le Atua; e na o le fa'atuatua e mana'omia ona 'avea lea 'oe ma soa o le alofa tunoa o Keriso, e lē tāua a tatou galuega mo lo tatou fa'aolataga. Pe afai ua tusia le tulafono i le loto, o le a lē fausia ea le olaga i luga o le tulafono? E lē o fa'sa'oloto le tagata ia lē usiusita'i, a e na o le fa'atuatua o le a mafai ai ona tatou fai ma soa o le alofa tunoa o Keriso, ma e mafai ai lea ona tatou usiusita'i. AG 137

(3) PE A UA TUSIA LE TULAFONO A LE ATUA I O TATOU LOTO, O LE A FA'APEFEA ONA FA'ATINOINA MA LE FIAFIA LO TATOU ALOFA MO IA MA FA'AILOA ATU AI I LE LALOLAGI?

*"Afai tou te alofa mai iā te A'u, ia outou tausī mai i A'u poloā'iga." **Ioane 14:15***

*"O le mea lea e iloa ai e tagata uma lava o O'u so'o outou, pe afai ua outou fealofani." **Ioane 13:35***

MAU E TAU I AI: I Ioane 2:3-5; 4:20-21; Ioane 14:23, 24; I Peteru 1:22, 23

E lua vaega ua i ai le fa'amaoniga i le vā i fuai'upu o le "Tausī A'u poloā'iga" ma le faitauga "o le a e tausī i A'u poloā'iga." O le faitauina fa'a-Eleni e tu'u mai ai le veape i le taimi o i lumana'i, ma e fa'aliliuina fa'afa'atonuga, e pei ona tu'u mai i le Mataio 22:37, 39. Pe a fa'aliliuina fa'apea, o le a i ai sina 'ese'esega i ia faitauga. Peita'i o le fa'aaogāina o 'upu "o le a e tausī" e tu'u mai ai le manatu fa'apea o le usiusita'i o le taunu'uga lea o le alofa. O le fuai'upu mai le Ioane 14:23 e fa'aali manino mai ai ma fa'amaonia ai lenei manatu. 5 BC 1036, 1037

A e se'i fa'auta mai, o le uiga tonu o le usiusita'i, ua lē na ona ia maua ai o se uiga fa'afoliga o le ō gatasi ma le finagalo o le Atua; a e peita'i o lona 'a'ano moni, o le fia 'au'auna atu lea iā te Ia mai le alofa fa'amaoni ua pogai mai i le ta'ele o le loto. O le tulafono a le Atua, o le fa'aaliga lava lea o Lona uiga moni; o le feaofa'iga lava lea o le matā'upu silisili o le alofa, ma o lea fo'i ua 'avea ai ma fa'avae o Lana faigā malō i le lagi, atoa fo'i ma le lalolagi. Pe afai ua fa'afouina o tatou loto i le fa'atusa o le Atua, ma ua totōina le alofa fa'alelagi i le agaga o le tagata, po ua lē tatau ea la ona fa'ataunu'uina ai ma galuega o le tulafono i lona olaga? Pe afai ua fa'avae tonuina

i le loto le matā'upu silisili o le alofa, ma ua fa'afouina le tagata i foliga o le Atua, Lē na faia o ia, ona fa'ataunu'uina lea iā te ia o le folafolaga fa'ale feagaiga fou, “Ou te tu'uina atu A'u tulafono i o latou loto, ma 'Ou tusi ai i o latou mafaufau” (Eperu 10:16). I le pe afai ua tusia le tulafono i le loto, po o le a lē foliga fa'apea ai 'ea ma le olaga o lea tagata? O le usiusita'i—o lona uiga moni, o le 'au'auna atu lea ma le pipi'i atu i le Atua ma le alofa—o le fa'ailoga moni lava lea o lē ua tatau ona 'avea ma so'o. SC 59, 60 (67)

(4) E FIA LE UMI O LE A AOGĀ AI PEA TA'IALA PA'IA O LE TULAFONO A LE ATUA MA ĀNA FA'AMASINOGA AMIOTONU?

"E magumagu le mutia, e to'ulu le fuga; a o le afioga a lo tatou Atua, e tumau lea e fa'avavau." Isaia 40:8

MAU E TAU I AI: Salamo 119:160; Mataio 24:35; Malaki 3:6

Ua fai mai le to'atele o a'oa'o fa'aleagaga, ua fa'asa'oloto e Keriso i tatou mai le tulafono, e ala i Lona maliu; peita'i e lē i ai uma tagata i lenei talitonuga....O lel uiga moni o le tulafono a le Atua e lē mafai ona suia. O le fa'aaliga moni lava lea o le finagalo ma le uiga o Lē na tusia. O le Atua o le alofa, ma o Lana tulafono o le alofa lea. O Ōna fa'avae tetele e lua o le alofa i le Atua ma le tagata. "O le alofa o le ato'atoa lea o le tulafono" (Roma 13:10). O le uiga o le Atua o le amiotonu ma le 'upu moni, ma o lea le uiga moni o le tulafono. Ua fa'apea mai le faipese, "O le mea moni fo'i lau tulafono" (Salamo 119:142), ma "ua tonu Āu poloā'iga uma lava" (Salamo 119:172). Ua fai mai le aposetolo o Paulo, "E pa'ia lava le tulafono, ma le poloā'iga e pa'ia, e tonu, ma ua lelei" (Roma 7:12). O lenei le tulafono, o le fa'aaliga mai o le finagalo ma le agaga o le Atua, e tatau lava ona mautū e pei o Lē na tusia. RC 62

(5) E FA'APEFEA ONA FA'AMATALAINA E LE TUSI PA'IA LE AGASALA?

"O i latou uma lava o ē fai le agasala, ua latou soli fo'i i tulafono; o le agasala o le solitulafono lava lea." I Ioane 3:4

MAU E TAU I AI: Roma 3:23; 6:23; Iakopo 4:17; I Samuelu 15:24

E pau le fa'amatalaga o lo'o maua i le Tusi Pa'ia mo le agasala e fa'apea "o le agasala o le solitulafono lava lea" (I Ioane 3:4). Ua fa'apea mai le Afioga a le Atua, "Auā ua agasala tagata uma lava, ma ua lē o'o i le vi'iga mai le Atua" (Roma 3:23). Ma "E leai sē ua amio lelei, ua leai lava se tasi" (Roma 3:12). E to'atele o lo'o fa'asesēina e fa'ataui i le tulaga o latou loto. E latou te lē iloa o le uiga moni o le loto o le tafa'asesē lea ma e matuā leaga lava. Ua ta'ata'ia i latou e lo latou lava amiotonu, ma ua fa'amalieina i le manatu ua atofaina le tulaga e tataui ona 'ausia ai le uiga moni fa'aletagata; peita'i e matuā pa'ū mauualalo pe a lē 'ausia le tulaga fa'alelagi, ma e lē mafai e latou ona fa'ataunu'u mana'oga o le finagalo o le Atua. 1 SM 320

O le agasala o le solia lea o le tulafono a le Atua, ma o le totogi o le agasala o le oti lea. Se manū e leai se fevaevaea'iga i le lagi po o le lalolagi pe ana lē ulufale mai le agasala. O le lē usiusita'i i le tulafono a le Atua na aumaia le malaia ua aofia ai mea ola uma na Ia faia. Ai seā ua lē faia ai e tagata se leleiga i le Atua? SL 76 (28)

(6) O LE Ā LE MEA O LE A TATOU FA'AALITINOINA E FA'ATATAU I LE ALI'I PE A TATOU SOLI ĀNA TULAFONO, E PEI ONA TA'U MAI E MOSE?

"Ia outou ave le tusi o lenei tulafono, ma tu'u ai i le itū o le atola'au o le feagaiga a Ieova lo outou Atua, ina ia i ai ē fai ma molimau ia te 'oe. Auā ua 'ou iloa lou fouvale, ma lou ua ma'a'a; fa'auta, o lo'o fouvale outou iā Ieova, o lo'o o tatou ola fa'atasi i le aso nei; e lē atili ai ea pe a 'ou oti?" Teuterenome 31:26, 27

MAU E TAU I AI: Salamo 64:2; Fa'ata'oto 17:11; Eperu 3:15; I Samuelu 15:23

E amata le galuega e fultua ai i se fouvalega lilo o le loto e tete'e i tulaga o le tulafono a le Atua. O naunauta'iga lē pa'ia, o mana'oga e lē tau ma le tulafono, o le a teuloto ma fa'amalieina, ma le lē talitonu ma le pogisā o le a vavae'ese ai le agaga mai le Atua. Pe afai e tatou te lē fa'ato'ilaloina ia mealeaga, o le a fa'aapea ona latou manumalō ai iā i tatou. *OHC 347*

E matuā tāua le usita'i i le tulafono, e lē na o mo lo tatou fa'aolataga, a e mo lo tatou fiafia ma le fiafia o isi e feso'ota'i ma i tatou. "Ua tele le filemū o ē naunau i Lau tulafono; e leai fo'i se mea e tausuai ai i latou" (Salamo 119:165), ua fai mai ai le Afioga Pa'ia. Peita'i o le a fa'aali e le tagata ola pu'upu'u i isi lenei tulafono pa'ia, e fa'amaoni, ma e lelei, lenei tulafono o le sa'olotoga na tu'u mai e Lē na faia mea uma ma fa'atatauina le tulafono i mana'oga a le tagata, o lenei ua fai ma 'avega e lē mafai e se tagata ona amoina. O le tagata agasala lava e manatu o le tulafono o se 'avega fa'atigā; e lē mafai ona iloa e le tagata solitulafono le matagofie o i ai i ōna ta'iala. Auā o le mafaufau i la le tino "e lē usiusita'i i le tulafono a le Atua, e lē mafai fo'i i ai" (Roma 8:7). *1 SM 218*

(7) O LE Ā LE MEA NA LAPATA'I MAI KERISO O LE A TA'ATELE I ASO FA'AI'U E FAI MA FA'AILOGA UA LATALATA LONA AFIO MAI, MA O LE Ā LE MEA O LE A I'U I AI?

"E ma'alili fo'i loto o tagata e to'atele, ona ua tupu tele o le amio leaga." Mataio 24:12

MAU E TAU I AI: Mataio 7:23; II Korinito 6:14; Eperu 1:9

I nei aso o le i'uga, ina o le a fa'ateteleina le agasala, ma o le a i'u ina liu malūlū le alofa o le to'atele, a e o le a i ai pea tagata o le Atua e fa'amamaluina Lona suafoa, ma o le a tula'i mai e a'oa'i le 'au amiolētonu. O le a 'avea i latou o "tagata fa'apitoa," o ē o le a fa'amaoni pea i le tulafono a le Atua a o sa'ili le lalolagi e fa'alēaogā ōna fa'atonuga; ma pe a galue le mana fa'aliua o le Atua e ala i Āna 'au'auna, o le a sauni 'au o le pogisā e tau tete'e iā i latou....O le a i ai pea se fete'ena'iga mai le taimi e tatou te taumafai ai e 'au'auna i le Atua o le lagi, se'ia o'o ina o le a lavea'iina i tatou mai lenei lalolagi amioleaga. E leai se saogalemū mai lenei taua. *AG 333*

E tatau ona tatou sa'ili ia fa'amalosia lo tatou fa'atuatua. Ia lē fa'aititia lo tatou fa'atuatua ma le alofa i le Atua ona o le agasala o lo'o ta'atele po o le fa'avaivaiina o la tatou talitonu i Āna folafolaga, ina ne'i o'o mai se afā mata'utia o fa'aosoosoga ma tafia'ese ai mai le fa'avae moni. O lo'o iā i tatou se galuega te;le e tatau ona faia, ma e tatou te mana'omia se fa'atuatua e sili le malosi....E ala i le so'otaga ma le Atua, o le a fa'amalosia ai lo tatou fa'atuatua, ma o le a fa'amaonia ua tatou manumalō mai le tofotofoina o lo tatou fa'atuatua. *HP 107*

(8) O Ā MEA E SEFULU IVA O LE A FA'ATINO MAI AI LE SOLIGA O TULAFONO LEA O LE A FA'ATELEINA I ASO FA'AI'U?

"A e ia e iloa e 'oe lenei mea, o ōna aso e gata ai e o'o mai ai aso faigatā; auā e 'avea tagata ma ē alolofa i latou iā i latou, o ē manana'o i tupe, o ē loto vi'i, o ē fa'amaualuga, o ē 'upu leaga, o ē lē fa'alogo i mātua, o ē lē fa'afetai, o ē amio leaga, o ē lē loto'aiga, o ē tu'umavaega, o ē fa'atuā'upua, o ē lē taofi mana'o o le tino, o ē fa'asauā, o ē lē alolofa i tagata amio lelei, o ē fa'alata, o ē so'ona fai, o ē ua fa'afefeteina, o ē ua tele le mana'o i mea fa'afiafia a e leai se mana'o i le Atua; o ē ua peiseā'i ua amio Atua, a o le mana ua i lea mea ua latou te'ena; ia e 'alo 'ese lava i tagata fa'apenā." II Timoteo 3:1-5

MAU E TAU I AI: Roma 1:20-32

Peita'i ua fa'alēaogāina fa'apefea ea le tulafono! Se'i taga'i i le lalolagi o nei ōna pō o lo'o fouvale e tete'e i le Atua. O le mea moni lenei i le tupulaga o i luma, ua tumu i le lē fia fa'afetai, fa'atāua aganu'u, lē fa'amaoni, mimitavale, ma le fultua i le 'upu moni. Ua lē amana'ia le Tusi Pa'ia ma ua ino'ino i le 'upu moni. Ua silasila Iesu a o te'ena Lana tulafono, manatu fa'atauva'a i Lona alofa tunoa, sauāina Āna 'ave fe'au. O lo'o Ia fetalai mai ma Lona alofa mutimutivale, a e ua lē taliaina; na Ia tu'u mai lapata'iga, peita'i sa lē fia fa'alogo i ai. O otoā o le agaga ua suia ma 'avea ma nofoāga o mea e lē pa'ia. Ua fa'apeleina le manatu fa'apito, loto vale, mimitavale, ma

le mataū'a....Ua faitioina ē talitonu ma fa'aleoina le 'upu moni. O lo'o fa'ateteleina le ino'ino i le tulafono ma mea tonu, a e ua fa'aalia ai le solipalaina o poloā'iga a le Atua. *LHU 141*

(9) PE A SO'OFA'ATASI LE MALŌ MA PULE FA'ALELOTU E FAI TULAFONO INA IA FA'AMALOSIA AI LE TAUSIGA O MASANIGA FA'ALE TALITONUGA A E LĒ O LE POLOĀ'IGA A LE ATUA, O LE A FA'APEFEA ONA TALI ATU Ē FA'AMAONI I LE ATUA, PEI O LANA 'AU APOSETOLO MUAMUA?

"Ona tali atu lea o Peteru ma le 'au aposetolo ua fa'apea atu, E tusa ona sili o lo matou 'ana'ana i le Atua i lo matou 'ana'ana i tagata." Galuega 5:29

MAU E TAU I AI: Galuega 4:19; Kolose 2:8; Mataio 15:3; Mareko 7:9

E tatau ona tatou fa'amautū lenei ta'iala i ōna pō nei. I lenei taua mulimuli ua tu'u mai ia mau i o tatou lima le fu'a o le 'upu moni ma le sa'olotoga fa'aleagaga, lea sa u'umau e i latou na amataina le ekalesia o le tala lelei ma na ala mai ai i le 'au molimau a le Atua mai augātupulaga ua mavae atu. O le tausiga o lenei meaalofo e pito tāua ua tu'uina iā i latou ua fa'amanuiaina e le Atua ma le malamalamaga o Lana Afioga.

O lenei Afioga o le a tatou maua o le pule aoao lea. Ia tatou iloa o le faigāmalō fa'aletagata o se pule na filifilia mai le lagi, ma a'oa'o i ai o le usiusita'i o se tiute pa'ia lea, i totonu o le puipuiga fa'aletulafono. Peita'i a fete'ena'i ōna uiga ma le finagalo o le Atua, e tatau ona tatou usita'i i le Atua a e lē o tagata. E tatau ona fa'amaoni i le Afioga a le Atua i luga a'e o tulafono fa'aletagata. Ia lē tu'u'esea le "Auā ua fetalai mai le Ali'i" a e aumai "ua fa'apea mai le ekalesia" po o le "ua fai mai le malō." Ia si'itia le paleali'i o Keriso i luga a'e o pale o ta'ita'i fa'alelalolagi.

Ia tatou lē fa'atu'i'ese i pule fa'alemalō. Ia filifili lelei a tatou 'upu e tautala atu ai pe tusia ina ne'i fa'apea ua foliga mai o lo'o tatou tete'e i le tulafono ma le meatonu. Ia tatou lē tautala pe fai se mea o le a tapunia fa'alētatau ai le ala. Ia tatou ō atu i le suafa o Keriso, ia ta'u atu le 'upu moni ua tu'u mai iā i tatou. Pe a lē fa'atagaina tatou ia faia lenei galuega, ia tatou fa'apea atu, e pei o le 'au aposetolo, "Pe tonu i luma o le Atua, ona ma fa'alogi iā te outou, a e ma te lē fa'alogi i le Atua, inā filifili ia outou. Auā ma te lē mafaia ona lē tautala i mea ua ma va'ai i ai ma fa'alogi i ai" (Galuega 4:19, 20). AA 68, 69

(10) SA FA'APEFEA ONA FA'AMATALAINA E KERISO LE TULAGA O LE LALOLAGI I TAIMI FA'AI'UI'U O LONA TALA FA'ASOLOPITO?

"A e pei o ōna pō o Noa, e fa'apea fo'i pe a sau le Atali'i o le tagata. Auā e pei ona faia i ōna pō a o le'i o'o le lolo, ua latou 'a'ai ma inu, ua latou fai avā fo'i ma fa'aavāga, ua o'o lava i le aso na ulu atu ai Noa i le va'a." Mataio 24:37, 38

MAU E TAU I AI: Luka 17:26-28; II Peteru 3:3-7

O lo'o fa'aalia mai e le Tusi Pa'ia o le a matuā tosina mafaufau o tagata i tu'inaanau fa'alelalolagi, i mea fa'afiafia ma le mana'o i tupe. O le a fa'atauasoina i latou i mea moni e fa'avavau. Ua fetalai Keriso, "E pei o ona pō o Noa, e fa'apea fo'i pe a sau le Atali'i o le tagata. Auā e pei ona faia i ona pō a o le'i o'o le lolo, ua latou 'a'ai ma inu, ua latou fai avā fo'i ma fa'aavāga, ua o'o lava i le aso na ulu atu ai Noa i le va'a, na lē iloa fo'i e i latou ina se'ia o'o le lolo, ma 'ave'esea i latou uma; e fa'apea fo'i pe a sau le Atali'i o le tagata" (Mataio 24:37-39).

E fa'apea fo'i i ōna pō nei. Ua fetaufetulia'i tagata e su'e le 'oa ma le olaga manatu fa'apito e pei e lē o i ai se Atua, leai se lagi, ma leai se ola e fa'avavau i tua atu o lenei olaga. Sa tu'u se lapata'iga e fa'atatau i le lolo i aso o Noa, ina ia fa'ate'ia ai tagata mai lo latou amioleaga ma vala'au iā i latou ia salamō. E fa'apea le fe'au i le lata o le afio mai o Keriso, o lo'o fa'amoemoe ia fafagu ai tagata mai le tosina atu i mea fa'alelalolagi. O le

fa'amoemoe ina ia fafaguina le fa'alogoga o le tagata i mea moni e fa'avavau, ma ia lagona le vala'au alofa i le la'o'ai a le Ali'i. COL 228 (89)

(11) I ASO MULIMULI O LE LALOLAGI, O Ā UIGA E LUA E FA'AALI MAI AI O TULAFONO A LE ATUA O LE A ILOGA AI SO'O FA'AMAONI A LE ATUA, E FA'AALI MAI AI O LO'O AOGĀ PEA ĀNA POLOĀ'IGA, MA O LE A TUPU TELE AI LE ITA O LE TI'ĀPOLO?

"Ua ita fo'i le tarako i le fafine, ona alu atu ai lea o ia e tau le taua ma i latou ua totoe o lana fanau, o ē ua tausi i poloa'iga a le Atua, ma ua taofi le mau iā Iesu Keriso." **Fa'aaliga 12:17**

MAU E TAU I AI: Fa'aaliga 14:12; 1:2, 9; Ioane 14:15, 21; 15:10; I Ioane 2:4-6

I nei ōna pō, e pei o aso o Elia, ua tusia manino le laina i le vā o tagata o le Atua e tausia Āna poloā'iga ma i latou o ē ifo i tupua 'ese. Sa 'alaga Elia, "Pe tou te fa'alētonu i manatu e lua se'ia afea? Afai o Ieova o le Atua ia, ia outou mulimuli atu iā te Ia; a e afai o Pa'ala, ia outou mulimuli atu iā te ia" (I Tupu 18:21). Ma o le fe'au lenei mo le taimi nei, "Ua pa'ū, ua pa'ū Papelonía le 'a'ai tele, ua 'avea fo'i o ia ma mea e nofo ai temoni, ma mea e puipui ai agaga leaga uma, o le mea fo'i e puipui ai manu felelei uma e leaga ma le 'inosia; auā ua feinu nu'u uma i le uaina o le to'asā i lana faita'aga, ua faita'aga fo'i ma ia tupu o le lalolagi, o le faula'iga o ana mea fa'afiafia ua tamaō'aiga ai ē ua fa'atau 'oa o i le lalolagi. Ua 'ou fa'alogoga fo'i i le tasi leo mai le lagi, ua fa'apea mai, Lo'u nu'u e, ia outou ō 'ese iā te ia, ina ne'i fa'atasia outou i ana agasala, ina ne'i tofusua fo'i outou i ona mala; auā ua pa'i atu ana agasala i le lagi, ua manatua fo'i e le Atua ana amioleaga" (Fa'aaliga 18:2-5).

O lo'o fa'asao e le Atua se atulaulau o Lana 'au filifilia o le a fa'asusuluina mai le malamalama i le mea o lo'o pogisā, e fa'aali manino mai i le lalolagi ua fulitua le mana fa'aliua o le usiusita'i i Lana tulafono. I le taimi nei o lo'o va'aia i latou i atunu'u uma, i gagana ma tagata 'ese'ese; ma i le itulā ua matuā loloto lava le tulaga o le fulitua, ina ua taumafai malosi Satani ia mafua iā i latou nei, "o tagata uma, o tagata nu'u atoa ma ali'i, o ē mau'oa ma ē matitiva, o ē sa'oloto ma ē pologa" (Fa'aaliga 13:16), ia latou maua le fa'ailoga ona o lo'o fa'amaoni e tausi le aso malōlō sesē, a lē o lea o le fa'asalaga o le oti, a e o ē fa'atuatua moni, e "'avea outou ma ē ua lē mata'uleagaina, ma ē ua sao le amio, o le fanau a le Atua, e lē ponā," o le a "pupula fa'apei o mea e fa'amalamalama a'i le lalolagi" (Filipi 2:15). O le tetele o le pogisā, o le malosi fo'i lea o le a susulu atu ai lo latou malamalama. PK 187, 188

(12) O LE Ā LE "MAU IĀ IESU" LEA E FA'AMAONIA AI LE I AI PEA O VALO'AGA MONI I ASO O LE I'UGA?

"Ona 'ou fa'apa'ū atu lea i luma o ōna vae e ifo iā te ia; a ua fai mai o ia iā te a'u, Ia 'oe, 'aia lava; o a'u o lou uso a 'au'auna, o so lou 'au uso fo'i ua i ai le mau iā Iesu; ia e ifo i le Atua; auā o le agaga o le valo'aga o le mau lea iā Iesu." **Fa'aaliga 19:10**

MAU E TAU I AI: Fa'aaliga 12:17

O le ta'utinoga o Iesu Keriso. Po o "le molimau o Iesu Keriso." O le vaega'upu lenei i le fa'a-Eleni e mafai ona malamalama i ai o le "ta'utinoga" (po o le "molimau") sa tau'ave e Kerisiano e fa'atatau iā Iesu, ma na amata lava iā Iesu ma na fa'aalia i Lana e Lana ekalesia e ala i perofeta. O le fa'atusatusaina i le vā o le Fa'aaliga 12:17 ma le 19:10 e manino ai le fa'aliliuga mulimuli. O lea la, e fa'amatalaina le "mau iā Iesu" o le "agaga o valo'aga," o lona uiga o lo'o molimau Iesu i le ekalesia e ala i le fa'aaogāina o valo'aga. 7 BC 812

O'U MANATUNATUGA MA TALI
(Mafai tali e sili atu i le tasi pe a tatau)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū
N = Ua o'otia ai a'u

O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

'Ou te _____ o poloā'iga e sefulu o se fa'amatalaga aogā lea i le uiga o le alofa o le Atua ma le alofa i o'u uso ā tagata; ma ua 'ou _____ o fa'avae ia o le uiga o le Atua ma Lona malō.

'Ou te _____ ona o poloā'iga e sefulu o fa'avae o le uiga moni o le Atua, o lea e tumau ai e fa'avavau ma o le a lē mafai ona suia.

Ua 'ou _____ e lē mafai i lo'u lava malosia pe mafai ona fai po o le fa'aalia o le alofa a ala i le tausia o poloā'iga. E pau le ala e mafai ai o le mana o le Agaga Pa'ia. 'Ou te _____ o le a tusia e le Ali'i i lo'u loto ona 'ou maua lea le fiafia e fa'aātaina ai Lona mamalu.

'Ou te _____ o le solitulafono - fouvalega e tete'e i tulafono a le Atua, o le a fa'ateleina i aso fa'ai'u, ma o le tasi lea o le mau fa'aailoga ua lata le afio mai o Keriso. Ua 'ou _____ o nei mea ua fa'ateleina i le lalolagi o lo'o si'omia ai a'u.

'Ou te _____ o le tofotofoga mulimuli o tagata moni o le Atua i aso fa'ai'u o le a fa'amaoni pea lea i poloā'iga uma e sefulu a le Atua. 'Ou te _____ e tusa pe o le ā le tulaga o sauāga, a e ala i Lona Agaga, o le a tumau pea lo'u fa'amaoni i le Atua, e tusa po o le ā le tau.

MANATU

FA'APOPOO

TATALO MANA'OMIA



O le Mea 'Inosia o le Fa'atafunaga ma le Amataga o Puapuagā

Lesona 8

'UPU A LE FA'ATONU: I le taimi o "Le Mea 'Inosia o le Fa'atafunaga ma le Amataga o Puapuagā," o fa'aailoga uma sa talanoaina i lesona muamua, o lea ua fa'ateteleina ma le femēmēa'i. Ua tu'u mai se vala'au, ua amata ona tō'esea e le Atua Lona mana puipui ma fa'atagaina loa le pa'u'ū ifo o fa'asalaga o le fa'atafunaga i luga o itū 'ese'ese o le lalolagi. O ta'ita'i faigāmalō ua tumu i le mana'o tele ma le fia pule, latou te fai fa'avavave mea e latou te fuafua ma mafaufau i ai. E ala mai ia gaoioiga, o le a latou pulea tagata e to'atele i mea tau faigānu'u, mafutaga lautele, le fa'atautaina o 'oloa, ma mea fa'aleagaga e ala i le fa'amalosia o tulafono e fa'apitoa mo i latou lava.

O le a toe so'ofa'atasi le "Tinā" o ekalesia ma nu'u, malō, ma pule o le lalolagi atoa. O lana fuafua ia toe so'ofa'atasi pule taulemalō o le lalolagima lana pule fa'alelotu - o le so'otaga lea sa motusia i le fa'ai'uga o tausaga o le pogisā ina ua ia maua le "foa a mate" i lona ulu. E toe fa'afo'isia le pule fa'alemalō ina ua gaua'i tupu, o ali'i, ma isi ta'ita'i o le lalolagi i ana fuafuāga. O ana pule fa'alelotu e toe fa'afo'isia ina ua fa'ai'uina le "tete'e" a le lalolagi Porotesano ma toe fa'alelei ma le tinā o ekalesia. O lenei fa'agaoioiga e toe fausia le pule fa'ale-ekalesia a le Pope ma le pule fa'alemalō i le lalolagi o le fa'amalōlōina lea o lona manu'a. O lea lava taimi, o le a fa'ataunu'uina ai le valo'aga o le Fa'aaliga 13:3 a o mulimuli le lalolagi i le manu fe'ai, le "tinā o fafine talitane" a e ta'ita'i ai le "ali'i o le malaia" (II Tesalonia 2:3).

O tigā ua fa'ateteleina o le lalolagi o le a amataina se mea mata'utia tele o le a tupu. A o fa'ateteleina pea le amioleaga ma mala o le lalolagi, o le a iloa fo'i e le to'atele o tagata ekalesia ua tō'esea e le Atua Lona mana puipui ma o lo'o fa'atagaina ia pa'ū mai Āna fa'asalaga. O le to'atele o nei Kerisiano o le a lē iloa o ia mea ua o'o mai ona ua solia le poloā'iga e fā a le Atua, ma o le a ūna'i malosi a latou ta'ita'i fa'alemalō ina ia faia tulafono e

fa'amalosia ai le tausiga o le Ulua'i Aso e pei ona fa'atonu mai e le Pope. Latou te manatu o le a fa'amalieina le Atua pe a fa'amalosia lenei tapuā'iga ma la 'ave'esea ai mala ua o'o mai.

O le tulafono e fa'amalosia ai tapuā'iga e lona lua o mea ua ta'ua i le valo'aga o "le mea 'inosia e fa'atafuna'ina ai" sa lapata'i ai Keriso i le Mataio 24. O le "mea 'inosia" o le taumafaiga lea e sui le aso tapua'i o lo'o i le poloā'iga e fā o lo'o i le tulafono pa'ia a le Atua mo se aso e lē pa'ia - o le Sapati aso fitu mo le aso muamua o le vaiaso. O sauāga mai lenei tulafono o le a alualu pea e pei ona ta'ua i le Fa'aaliga 13:11-18, ma e o'o ai i le taumafaiga e "fa'atafuna'ina" le tulafono a le Atua fa'apea ma tagata o le Atua.

I nai tausaga ua mavae atu, atonu sa masalosalo se tasi e lē sa'o le Tusi Pa'ia i le valo'aga e fa'atatau i le fa'amalosia o le tulafono e lē mafai ai fefa'ataua'iga (Fa'aaliga 13:17). A o le taimi nei ua fa'aaogā ai tupe tau masini fa'aōna pō nei, o le mea moni lava lea.

(1) PE A SO'OFA'ATAASI LE EKALEZIA UA FULITUA MA MALŌ O LE LALOLAGI, MA LATOU TA'U MAI IA "FILEMŪ MA SAOGALEMŪ" MAI NEI FA'AFITĀULI O LO'O VEVESI AI LE LALOLAGI ATOA, O LE Ā LE MEA O LE A O'O MAI I LE LALOLAGI E PEI O TIGĀ O LE FAFINE O LE A FANAU?

"O lo'o filemū, ua lē afāina, ona o'o lea iā te i latou o le fano fa'afuase'i, fa'apei o le fa'atigā o le fafine to a fanau mai, latou te lē sosola ai lava. " I Tesalonia 5:3

O lo'o fa'avavave ona fa'ataunu'uina valo'aga. E tatau ona tele 'upu e fa'amatala mai ai nei matā'upu e matuā tāua lava. Ua lata mai lava le aso o le a fa'amau ai e fa'avavau le i'uga o agaga uma ta'ito'atasi. O le aso lenei o le Ali'i ua lata mai lava. O lo'o fa'alogoina fo'i le 'alaga a leoleo pepelo, "O lo'o lelei mea uma;" peita'i ua latalata mai lava le aso o le Atua. O ōna la'asaga e matuā filemū lava ua lē mafai ona fafaguina le lalolagi mai le tulaga moe gase o lo'o i ai. A o 'alaga leoleo o le nu'u, "O lo'o filemū, ua lē afāina, ona o'o lea iā te i latou o le fano fa'afuase'i,... latou te lē sosola ai lava" (I Tesalonia 5:3); "Auā e pei o se mailei ona o'o mai ai i ē nonofo uma lava i le fogā'ele'ele uma" (Luka 21:35). O le a maua atu lē e fiafia i tu'inanau ma le tagata agasala e pei o se gaoi i le pō. Pe a o foliga mai o lo'o saogalemū mea uma, ma ua momoe ma malōlō tagata uma, o le a ulufale mai le tagata e gaoi i le tulua o pō ma fa'avavave ona 'ave mea na sau e gaoi. Ona ua tuai ona vavaoina o lenei mea leaga, a e ua iloa ai e i ai se faitoto'a po o fa'amalama sa le'i saogalemū. "O lenei, ia outou nofo sauni; auā o le itu aso tou te lē manatunatu ai, e sau ai le Atali'i o le tagata" (Luka 12:40). FE 335

Ua tatou o'o mai i le vaegātaimi na valo'ia mai i totonu o nei tusi. O le taimi o le i'uga ua o'o mai, o fa'aaliga a perofeta ua tatalaina, ma o a latou lapata'iga e fa'asino atu ai i tatou i le afio mai i le mamalu o lo tatou Ali'i, ua lata mai lea. DA 235 (166)

(2) O Ā MEA NA LAPATA'I MAI AI LE ATUA IĀ NOA, LOTA, MA KERISIANO I IERUSALEMA, MA E FA'APEA FO'I ŌNA SO'O I LE TAIMI O LE I'UGA?

"O le fa'atuatua na fausia ai e Noa le va'a ina ua mata'u, e ola ai lona aiga, ina ua a'oa'o'ina e le Atua i mea e le'i va'aia i ia ona pō, na la fa'asalaina ai le lalolagi, ua na maua ai fo'i le amiotonu, o le amiotonu lea e i le fa'atuatua." Eperu 11:7

MAU E TAU I AI: Tanielu 2:21, 22; Teuternome 29:29; Salamo 25:14, 15

O i latou e talitonu i Lana fe'au mo lo latou taimi, ma o lo'o fa'agaoioi lo latou fa'atuatua, i le usita'i i Āna poloa'iga, o le a fa'asaoina mai fa'amasinoga e pa'ū i luga o ē lē fa'alogoma lē talitonu. O le 'upu na o'o iā Noa, "Inā ūlu atu ia o 'oe 'atoa ma lou aiga uma i le va'a; auā ua 'Ou iloa 'oe o lē amiotonu i O'u luma" (Kenese 7:1). Na usita'i Noa ma na fa'asaoina. Sa o'o mai le fe'au iā Lota, "Inā tutū ia, ina outou ō 'ese i lenei mea, auā o le a fa'aumatia e Ieova lenei 'a'ai" (Kenese 19:14). Na tu'uina e Lota iā i lalo o le puipuiga a 'ave fe'au mai le lagi, ma sa fa'asaoina ai. Sa fa'apea fo'i ona tu'uina i le 'au so'o o Keriso lapata'iga i le fa'aumatiāga o Ieruselema. O

i latou na tulimata'i i fa'ailoga o le malaia o le a o'o mai, ma sosola 'ese mai le 'a'ai, sa saogālemū mai le fa'atafunaga. O lenei ua tu'u mai iā i tatou le lapata'iga o le afio fa'alua mai o Keriso ma le fa'aumatiāga o le a pa'ū i luga o le lalolagi. O i latou e fa'alogo ma usiusita'i i le lapata'iga o le a fa'asaoina. DA 634 (495)

(3) E PEI ONA I AI I TAUSAGA O LE POGISĀ MA O LE A FA'APEA FO'I I LE TAIMI O LE I'UGA, O AI O LE A SO'OFATASI MA LE POPE INA IA TOE MAUA AI E IA LE PULE FA'ALEMALŌ MA LE PULE AOAOA FA'ALELALOLAGI E FA'AMALOSIA AI LE "UAINA O LANA FAITA'AGA" I LUGA O TAGATA UMA?

"Ua faita'aga ma ia o tupu o le lalolagi, ua onā fo'i ē o nonofo i le lalolagi i le uaina o lana faita'aga."
Fa'aaliga 17:2

O tupu o le lalolagi, o pule ia fa'alemalō, e tu'u a latou puleaga ma ālaga'oa i lima o le "fafine talitane" (Fa'aaliga 17:5) ma o le auala lea e na te fa'aaogā ai lenei pule e sauāina ai tagata uma o le Atua (Fa'aaliga 13:15) ma pulea ai "ē o lo'o nonofo i le lalolagi." O nei "tupu o le lalolagi" o ōna soa ia i soligatulafono. O le so'otaga i le vā o o Kerisiano ua fultua ma pule fa'alemalō o le lalolagi ua fa'aaogā e Satani e so'ofa'atasi ai le lalolagi atoa i lalo o lana ta'ita'iga.

O le faita'aga o le fa'ailoga lea o le so'otaga i le vā o le ekalesia ma le lalolagi po o le ekalesia ma le malō. E tataua ona fa'aipoipo le ekalesia i le Ali'i, peita'i a ia sa'ili e fa'alagolago i le malō, ua ia tu'u'ese lana tane fa'aletulafono. E ala i lana so'otaga fou, ua tu'u atu loa ia i faita'aga fa'aleagaga.

Pe a mulimuli le ekalesia i ōna ta'ita'i, o le a fa'asesēina loa le lalolagi atoa e 'aufa'atasi ma matā'upu a le "fafine talitane" (Fa'aaliga 17:1). "Ua onā" (F. 2), lona uiga, ua fa'aleagaina le mafaufau ma lagona tataua fa'aleagaga. Ia fa'atusatusa tusi nei: Ieremia 51:7; II Tesalonia 2:9, 10; Fa'aaliga 13:3, 4, 7, 18; 14:8; 18:3; 19:20. 7 BC 850

(4) O LE Ā LE 'UPU NA FA'AAOGĀ E LE PEROFETA O TANIELU E FA'AMATALA AI LE FA'ALEAGAINA I LE LUMANA'I O LE MALUMALU PA'IA A LE ATUA O I IERUSALEMA?

"O 'au fo'i latou te 'au ma ia, latou te fa'aleagaina le malumalu e malu ai, latou te 'ave'eseina fo'i le taulaga fai so'o, ma tu'uina ai le mea 'inosia e fa'atafunaina ai." **Tanielu 11:31**

O tupua ma isi uma fa'ailoga fa'apaupau e ta'ua e Iutaia o "mea 'inosia" (I Tupu 11:5, 7; II Tupu 23:13) po o se mea e leaga i le va'ai fa'aleagaga (Esoto 8:26; Kenese 43:32; 46:34). Sa ta'u mai e Luka, "A iloa e outou ua si'osi'omia Ierusalemā i 'au o le taua, ia outou iloa i lea aso ua latalata ona fa'atafunaina" (Luka 21:20). O le mea na tupu sa valo'ia, o le fa'atafunaina o Ierusalemā e 'au tau a Roma i le T.A. 70, le taimi lea na fa'atutūina ai i totonu o le lotoā o le malumalu fa'ailoga a Roma fa'apaupau. Ina ua fa'ato'ilalo le fouvalega a Iutaia i le tausaga T.A. 135, sa fa'atūina e Roma se malumalu i la latou atua o Jupiter i le tulaga o le malumalu Iutaia, ma sa fa'asāina tagata Iutaia ona toe fo'i i le 'a'ai o Ierusalemā auā o le fa'asalaga o le oti. 5 BC 499

O le fa'atafunaiina o Ierusalemā o le fa'atusa o le fa'atafunaga mulimuli o le a maofa ai le lalolagi. O valo'aga na mai se vaega o le fa'ataunu'uina o le fa'ato'ilaloina o Ierusalemā e i ai le uiga e fetau tonu i ōna aso e gata ai. O lo'o tatou tutū nei i le faitoto'a o mea e tetele ma le uiga 'ese. E i ai mea o le a tutupu e mana'omia ai fa'ai'uga e faia ma le fa'autauta o lo'o i o tatou luma, e le'i molimauina muamua e le lalolagi. A e suāmalie iā i tatou, e pei o le ulua'i 'au so'o, ona o'o mai o le mautinoāga e pulea mea uma e le malō o le Atua. O le fa'asologa o mea e tutupu i le lumana'i o lo'o i 'a'ao o Lē na faia i tatou. O le Tupu o le lagi e i ai le i'uga o malō, fa'apea ma mea e fa'ataua i Lana ekalesia, e i Lana lava pule. MB 120 (52)

(5) O LE Ā LE 'UPU NA TOE FA'AAOGĀ E IESU A E LUA ŌNA FA'ATATAU I LE SOLIA O LANA POLOĀ'IGA I LE TAIMI O LE I'UGA?

"Pe a iloa fo'i e outou le mea e 'inosia e fa'atafuna'ina a'i, na fai mai ai e le perofeta o Tanielu, ua tū i le mea pa'ia, (inā mafaufau ia o lē faitau;)" Mataio 24:15

MAU E TAU I AI: Tanielu 11:31; 8:24; Esekielu 7:20-26

A'o sosolo atu pea le finauga tele ma 'a'afia ai ma isi mata'upu fa'alelotu, ma ua ta'ita'ia atu ai manatu o tagata i le soliga o le tulafono a le Atua, ua fa'apenā loa ona amata fa'agaioiga a Satani. Ua feita 'au'auna a Satani ona o le malosi ma le mana ua folafolaina ai le fe'au a lona tolu o agelu. Ua tu'u atoa le malosi o le 'aufailotu latou te tapunipuni uma ai avanoa e ono susulu mai ai le malamalama i luga o a latou lafu mamoe. O le a fa'aalu lo latou malosi ma lo latou poto e taofia ai le talanoaina o nei mata'upu uigā. O le a tu'ufa'atasia le ekalesia pope ma ekalesia Porotesano i lo latou fa'atalosagaina o le lima malosi o le malō e fa'amamaluina ai a latou poloa'iga. A'o fa'asolosolo ina malosi le una'iga o le fa'amamaluina o le Aso Sā, o le a fa'amalosia loa le tulafono i ē ua tausia poloa'iga a le Atua. O le a fa'amata'uina i latou i sala tupe ma le falepuipui; o le a ofoina atu ni tulaga-tofi lelei ma ni tau i ina ia tosina 'ese ai i latou mai lo latou talitonuga. Peita'i na o le tasi la latou tali: "Fa'aali mai lo matou sesē mai le afioga a le Atua," le tali lava lea na fa'aaogāina e Luteru ina ua o'o o ia i se tulaga fa'apea. O ē o le a avatua i luma o fa'amasinoga o le a latou avatua ni tali lelei e fa'amaonia ai le 'upu moni; o a latou tali o le a ta'ita'ia ai nisi latou te talia ma tausia poloa'iga uma a le Atua. O le a fa'apenā ona o'o atu le malamalama i ē semanū latou te lē fa'alogi i nei 'upu moni. DA 607 (505)

(6) PE A FA'AMALOSIA LE TULAFONO FA'ALEMALŌ INA IA TAPUA'I I LE ULUA'I ASO, MA O LE A LAFO 'UPU TAU FA'AFEFE MAI LE "FA'ATUSA" O LE PULE TAU LE MANU FE'AI A E O LE A LĒ MAFAI ONA SUIA AI Ē FA'AMAONI I LE ATUA, O LE Ā LE MUĀ'I FA'ASALAGA O LE A FA'AAOGĀINA?

"Ina ia lē mafaia ona fa'atau mai pe fa'atau atu e se tasi, tau lava o ē ua i ai le fa'aailoga, po o le igoa o le manu fe'ai, po o le faitau aofa'i o lona igoa." Fa'aaliga 13:17

MAU E TAU I AI: Fa'aaliga 13:16

Ua lata mai le taimi o le a lē toe mafai ai ona toe fefa'ataua'i i so'o se tau. O le a i ai le tulafono e fa'asā ai so'o se tagata ona fefa'ataua'i vaganā i latou e i ai le fa'aailoga o le manu fe'ai (Va'ai i le lesona 12).

I le finauga tele mulimuli ma Satani o i latou o ē fa'amaoni i le Atua o le a va'ai i mea uma fa'alelalolagi sa fa'amoemoe i ai o le a to'esea mai iā i latou. Ona o le latou tete'e ia usiusita'i i pule fa'alelalolagi a e soli ai Lana tulafono, o le a lē mafai ai e latou ona fefa'ataua'i.

O pule fa'a-ekalesia, o lo'o feso'ota'i i le lagi e ala i talitonuga ma o lo'o ta'u mai e iā i latou uiga o se tama'i mamoe, o le a fa'aali mai iā latou gaoioiga e iā i latou le loto o le tarako ma o lo'o pulea ma fa'atonuina e Satani. O lo'o sau le taimi o le a lagona ai e tagata o le Atua le lima fa'asauā ona e latou te tausī ma fa'amamaluina le aso fitu. Mar 183

O ē usitai i le afioga a le Atua o le a fa'asalaina e peisea'i ua latou faia se fouvalega. O le a fa'apenā ona sauā mātua i a latou fanau po o le pule fo'i i a latou 'au'auna. O le a tutuli 'ese e mātua a latou fanau mai o latou aiga. O le a taunu'u ai 'upu a Paulo ua fa'apea mai: "O i latou uma fo'i o ē ola amioatua iā Keriso Iesu, e sauāina i latou" (II Timoteo 3:12). O le a fa'apenā ona sauāina i latou ua tete'e i le fa'amamaluina o le sapatī Aso Sā. O nisi o i latou o le a lafo i falepuipui, o nisi o le a fa'a'au'u, o nisi fo'i o le a fai ma pologa. Atonu e fa'apea mai le poto fa'aletagata e lē mafai ona tutupu ni mea fa'apea i aso o le malamalama. Peita'i e 'ave'esea loa le Agaga o le Atua mai tagata ma o'o atu ai i latou i lalo ifo o le pule a Satani, e 'ese mea o le a tutupu mai. E 'ese le sauā o le loto o le tagata pe a 'ave'esea ai le alofa ma le mata'u i le Atua. GC 608 (506)

(7) O LE Ā LE LAPATA'IGA NA TU'U ATU E KERISO I KERISIANO IUTAIA MA I LATOU I ASO O LE I'UGA, INA IA LĒ FA'AUMATIAINA AI PE A O'O MAI LE MEA 'INOSIA E FA'ATAFUNA'INA AI?

"O ē o i Iutaia i ia ona pō, ia latou sosola i mauga." Mataio 24:16

MAU E TAU I AI: Mataio 24:17-20; Luka 21:21; Eperu 11:7; Ieremia 61:1

E lē o toe mamao le taimi, e pei o le 'au so'o anamua, o le a tatou tau sa'ili ai se lafitaga i nofoāga lafuā ma e tū to'atasi i le vaomatua. Ina ua si'omia Ierusalemā e 'au tau a Roma o le fa'ailoga lea i Kerisiano Iutaia e sosola mai le 'a'ai, e fa'apea pe a toe fa'afo'i le pule i lo tataou malō e fa'amalosia ai le tulafono e tapua'i i le sapati a le pope, ma o le a fai ma lapata'iga iā i tatou. O le taimi lava lea oa tu'ua ai 'a'ai tetele, ma sauni ai e ō 'ese mai nu'u laiti mo nofoāga ma lafitaga i mea tu'ufua o atu mauga. *Mar 180*

(8) O LE Ā LE MEA O LE A TUPU IĀ I LATOU E LĒ FA'ALOGO I LAPATA'IGA FA'AVALO'AGA A LE ATUA?

"Oi talofa i fafine ua totō, atoa fo'i ma ē failele i ia lava aso; auā e o'o le puapuagā tele i le nu'u, ma le to'asā i le nu'u nei." Luka 21:23

MAU E TAU I AI: Fa'aaliga 6:15, 16; 14:9-11; Eperu 10:26-29

E lē o toe umi le taimi se'ia o'o ina pā mai le afā ma osofa'ia ai le lalolagi o lo'o moegase pea i le agasala....Pe a o'o ina felafoā'ina le lalolagi e pei o se tagata onā, pe a lūlūina le lagi, ma ua o'o mai le aso tele o le Ali'i, o ai ea o le a mafai ona tula'i pea? E tasi le mea o le a latou va'aia ma le fefe a o latou taumafai e sosola a e o le a lē mafai. "Fa'auta, o lo'o afio mai o Ia ma ao, e iloa atu fo'i o Ia e mata o tagata uma" (Fa'aaliga 1:7). O le a alalaga le 'au lē fa'asaoia i 'upu fetu'u i o latou atua: "Mauga ma papa, Mafuli mai ia iā te i matou, ma tanuma'i i matou ai le silafaga a Lē ti'eti'e i le nofoāli'i" (Fa'aaliga 6:16).

(9) PE A O'O MAI SAUĀGA MA PUAPUAGĀ MAI LE FA'ATAFUNA'INA E PEI ONA VALO'IA E KERISO, O LE Ā LE MEA NA FA'ATONU IA LĒ FAIA E I LATOU UA 'AVEA LE ALI'I MA LO LATOU PAPA?

"'Aua le fefefe outou; 'aua fo'i le matata'u; pe na A'u lē fa'ailoa atu ea iā te 'oe anamua, ma A'u ta'uina atu iā te 'oe? o A'u molimau lava outou; pe i ai ea se Atua, ua na o A'u lava? Ua leai lava se papa, 'Ou te lē iloa se tasi." Isaia 44:8

MAU E TAU I AI: Isaia 41:10; Fa'ata'oto 3:25, 26; Salamo 91

O lo'o leoleoina i tatou e agelu a le Atua. I lenei lalolagi e afe ma afe 'avefe'au fa'alelagi na 'auina mai e taofi Satani ia lē manumalō iā i latou o lo'o tete'e e savavali i le ala o le leaga. Ma o ia agelu o lo'o puipuia le fanau a le Atua o i le lalolagi, o lo'o feso'ota'i pea ma le Tamā i le lagi. Na fetalai Keriso, "Ia outou, ne'i tou fa'alēaogāina se tasi o i latou nei e fa'atauva'a; auā 'Ou te fai atu iā te outou, o a latou agelu i le lagi e lē aunoa ona latou va'ava'ai i fofoga o Lo'u Tamā o i le lagi" (Mataio 18:10). *HP 99*

E moni o le a sauāina ma puapuagātia le fanau a le Atua; peita'i e ui lava o le a fa'aogea i latou, o le a lē fano ai i latou. O Lē na tausia Elia i le vao, o Ia lava lea o le a tausia fo'i Lana fanau. E o'o atu le oti i le 'au amioleaga ona o lo latou fia'a'ai; peita'i o le a tausia e agelu le fanau a le Atua ma foa'i mai mea latou te manana'o ai. Fai mai le folafolaga ua faia i le tagata amiotonu: "E foa'iina iā te ia ana mea e 'ai, e tumau pea iā te ia le vai" (Isaia 33:15, 16). *GC 629 (522)*

(10) PE A MANA'OMIA IA SOSOLA LE 'AU AMIOTONU I MAUGA INA IA SAOGALEMŪ AI, O Ā MEA FAIGOFIE TAULETINO UA FOLAFOLA MAI IĀ I LATOU?

"E mau lava o ia i le mea maualuga, o 'olo papa o lona malu lea; e foa'iina iā te ia ana mea e 'ai, e tumau pea iā te ia le vai." Isaia 33:16

MAU E TAU I AI: Isaia 33:15; 41:17, 18; Salamo 34:8-10; Luka 12:29-31

A o mafatia le 'au amioleaga i le ōge ma fa'ama'i, o le a puipuia e agelu tagata amiotonu ma aumaia mea e latou te mana'omia. Mo ia lē e "savali i le amiotonu" (Isaia 33:15) ua tu'u mai i ai le folafolaga, "e foa'iina iā te ia ana mea e 'ai, e tumau pea iā te ia le vai" (F. 16). Ma " O ē ua tigāina ma ē matitiva o lo'o latou sa'ili i se vai, a ua leai; ua matūtū o latou laulaufaiva i le fia inu; o A'u o Ieova, 'Ou te tali atu iā te i latou, o A'u o le Atua o Isara'elu, 'Ou te lē tu'ulafoa'iina i latou" (Isaia 41:17).

I le fete'ena'iga tele mulimuli o le finauga ma Satani, o i latou o lo'o fa'amaoni i le Atua o le a va'ava'ai o 'ave'esea mea fa'ale-lalolagi uma e fa'alagolago i ai mo le tausiga o i latou. Ona o lo latou lē solia o le Tulafono a le Atua ina ia usita'i ai i pulega a mālō fa'ale-lalolagi, o le a fa'asāina i latou ia 'aia le toe fefa'ataua'i. E mulimuli ane o le a faia se tulafono e fasiotia ai i latou. (Va'ai i le Fa'aaliga 13:11-17). A e peita'i o i latou e usiusita'i ua tu'uina i ai le folafolaga, "E mau lava o ia i le mea maualuga, o 'olo papa o lona malu lea; e foa'iina iā te ia ana mea e 'ai, e tumau pea iā te ia le vai" (Isaia 33:16). O lenei folafolaga o le a ola ai le fanau a le Atua. DA 121-122 (76-77)

(11) O LE Ā LE PUIPUIGA E TAULE TINO NA FOLAFOLA MAI E MAFAI ONA TAPA I AI LE 'AU FA'AMAONI PE A O'O INA FA'ATAUNU'U LE MEA 'INOSIA O LE A FA'ATAFUNA'IINA AI?

"E tō lauapi le agelu a Ieova e si'osi'omia ai ē o matata'u iā te Ia, e lavea'i fo'i o Ia iā te i latou." Salamo 34:7

MAU E TAU I AI: Salamo 71:3-5; 91:1-16; Fa'aaliga 9:4

Ua ta'u mai e Josephus, le tusitala o tala fa'asolopito mai lea taimi, e sili atu i le milione tagata na feoti i le taimi ma ina ua uma ona si'omia ma fa'atafunai'ina le 'a'ai, ma e sili atu i le 97 afe sa 'ave fa'atagataotaua. Peita'i ina ua si'itia 'ese le tanu'aga fa'ata'amilo o Ierusalem a Roma, o le taimi lava lea na sosola'ese ai Kerisiano mai le 'a'ai, ma ua ta'u mai e le'i i ai se ola e tasi na lē iloa. O le 'a'ai o Pella, i atumauga i sasa'e o le Ioritana ma e tusa e sefulu fitu maila i sisifo o le vai o Kalilaia, o le nofoāga lea sa latou sulufa'i i ai. 5 BC 499

Ma'imaui pe ana tatou iloa le vā latalata o le lagi i le lalolagi! Ona e lē o iloa e le fanau a tagata, a o lo'o fa'atasi pea ma i latou agelu o le malamalama, ma o lo'o 'auina mai 'avefea'u fa'alelagi e galulue mo ē o le a 'avea ma sulii o le fa'aolataga.

E leoleoina agaga ola uma e le molimau lē leoa mai le lagi, o lo'o sa'ili pea e tosina mai latou iā Keriso. E lē tu'ulafoa'iina e agelu ē o lo'o taumafai le fili e fa'aosooso ma fa'aumatia ai o latou agaga pe a fa'atagaina e fai fa'apea. Afai e i ai se fa'amoemoe, se'ia o'o lava ina latou te'ena le Agaga Pa'ia, o le a puipuia pea tagata e 'avefe'au a le lagi. OHC 23

**O'U MANATUNATUGA MA TALI
(Mafai tali e sili atu i le tasi pe a tataui)**

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua

E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole

J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū
N = Ua o'otia ai a'u

O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u

S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imaui pe ana ou lē iloa
Z = Se isi mea

""Ou te _____ o lo'o fa'ataunu'uina valo'aga ma ua lata mai lava le aso o le Ali'i. Ina ua o'o mai fa'ama'i mata'utia ma mala ua fa'ateteleina, 'ou te fa'alogoina ai le 'alaga "filemū ma saogalemū" a e ua manino mai lava o lo'o tatou aga'i i le fa'aumatiāga.

I mea uma o lo'o tutupu i nei aso ma i o tatou si'osi'omaga, 'ou te _____ o lo'o aga'i i se tu'ufa'atasiga o mea fa'aleagaga ma mea fa'alelalolagi.

Ua 'ou _____ o lo'o taumafai lava Satani e so'ofa'atasi pule fa'alemalō o le lalolagi i lalo o le fu'a o le "tagata o le malaia," o ia lea e foliga mai e amio Atua a e ua te'ena le mana. O lo'o ia taumafai e tu'ufa'atasi le lalolagi i lalo o lana ta'ita'iga ma ia pule aoao.

'Ou te _____ o le uiga o lenei fuafuāga o le fa'asesē lea o tagata ia soli le poloa'iga e tasi o lo'o fetalai le Atua e "Manatua" e ta'utino atu ai ma fa'amamalu ai Ia.

Ua 'ou _____ ua sauni nei e fa'amalosia le tulafono mo le tapua'iga sesē, ma o le a o'o mai ai le fa'amalosiina o le mea ua tusia i le Tusi Pa'ia o le "mea 'inosia o le fa'atafuna'iina."

'Ou te _____ o lo'o fa'aalia le alofa o le Atua mo a'u i nei valo'aga ina ia 'ou sauni ai pe a o'o mai sauāga ma fa'ateteleina le fa'afele i le oti.

Ua 'ou _____ e ala i le alofa tunoa o Keriso ma lo'u alofa mo Ia, o le a tumau lo'u fa'amaoni i Āna poloa'iga uma. Ua 'ou _____ e 'ave ma se tasi o ē avatu i le lalolagi le molimau fa'amaoni o Iesu.

MANATU

FA'AOPOOPO

TATALO MANA'OMIA



O le Uāga Mulimuli o le Agaga Pa'ia

Lesona 9

'UPU A LE FA'ATONU: O le "mea 'inosia o le fa'atafuna'ina" o le vala'au fafagu i le ekalesia o lo'o momoe e fa'atusa i taupou o le fa'ata'oto o le fa'aipoipoga i le Mataio 25. O i latou ua sauniuni o latou loto, e sa'ili le Ali'i, ma ole atu mo le Agaga Pa'ia, o le a ala mai. O le a liligi atu e le Ali'i Lona Agaga Pa'ia i se mea tāua o le a tupu e ta'ua i le Tusi Pa'ia o le "uāga mulimuli." E ta'ua fa'apea i Fe'au a Agelu e To'atolu i le Fa'aaliga 14, o le a so'o ai le lalolagi atoa i se auala e fa'alauteleina ma le "leo tele" o le Fa'aaliga 18.

E lē finagalo le Atua ia fano e o'o lava i se tagata e to'atasi o Lana fanau, o lea o le tala lelei ma le 'upu moni e fa'atatau i Lana tulafono o le a o'o i le lalolagi atoa. O tagata ta'ito'atasi o le a mafai ona fai se fa'ai'uga malamalama e tapua'i fa'amaoni i le Atua, pe o le pule a le manu fe'ai. O iinei o le a amata ai le "Taimi o Puapuagā," o lea o le a su'esu'eina i se lesona o lumana'i ma fa'alautele atili ai i nisi o autū o le a fa'ailoa atu.

(1) O LE Ā LE MEA E TU'UINA MAI E LE ATUA INA IA MAUA AI LE MALOSI MA E FA'ATUSAINA I LE LILIGIINA O LONA AGAGA MA LE SELESELEINA O AGAGA I TAIMI MULIMULI O LE LALOLAGI?

"Ona 'Ou foa'iina atu lea o le ua i lo outou nu'u i ona tausaga, o le uāga muamua ma le uāga mulimuli, e te fa'apotopoto ai fo'i lau saito, ma lau uaina, ma lau suāu'u." **Teuterenome 11:14**

MAU E TAU I AI: Levitiko 26:4; Jeremia 5:24; Ioelu 2:23

O le uāga muamua. O le uāga i le tau e to'ulu ai lau oo la'au, i le taimi e totō ai fatu o le tau malūlū, ina ia totogo a'e le fatu ma tu'uina atu ai se amataga lelei a o le'i o'o mai le tau malūlū. E to'ulu ifo i le masina lona valu i le fa'ai'uiga o le taimi e to'ulu ai lau o la'au i la tatou taimi (Esera 10:9, 13). I se lau'ele'ele e fa'alagolago i le timu, o le fatu e lē totogo se'i vaganā ua pa'ū ifo le uāga i lona lava tau (Levitiko 26:4).

O le uāga mulimuli. O le uāga lea e totō ifo a o lumana'i le seleselega, o masina o Mati ma Aperila iā tatou, ma e matua lelei ai. I le taimi o le i'uiga, pe a fa'aumaina le galuega a le Atua i le lalolagi, o taumafaiga ua tu'uina atu i le 'au talitonu ua fa'apa'iaina i lalo o le ta'ita'iga a le Agaga Pa'ia, o le a aofia ai ma fa'amanuiāga fa'apitoa.

I lalo ifo o le fa'atusa o le uāga muamua ma le uāga mulimuli, e pa'ū ifo i laufanua o nu'u o le itū i Sasa'e i taimi o le lūlūga ma le seleselega, sa valo'ia e perofeta Eperu le tu'uina o le alofa tunoa fa'aleagaga i luga o le ekalesia a le Atua. O le liligi ifo o le Agaga i aso o le 'au aposetolo o le amataga o le ulua'i pō o le uāga muamua, ma sa mamalu le fa'ai'uiga. O le taimi o le i'uiga, o le fa'atasi ai o le Agaga ma 'au fa'atasi ai ma le ekalesia moni, o le uāga mulimuli lenā. 1 BC 990

(2) E PEI ONA IA TU'UINA I LE ULUA'I EKALESIA, O LE Ā LE MEA O LE A TU'UINA MAI E LE ATUA I ASO E GATA AI INA IA MAFAI ONA 'AVEA TATOU O MOLIMAU AOGĀ E TU'UINA ATU LE "ALAGA LEO TELE" O LE TALA LELEI I TULU'IGA O LE LALOLAGI?

"A e maua e outou le mana, pe a afio ifo le Agaga Pa'ia i luga iā te outou; e fai fo'i outou ma molimau iā te A'u i Ierusalem ma Iutaia uma lava, ma Samaria, e o'o lava i le tulu'iga o le lalolagi." **Galuega 1:8**

MAU E TAU I AI: Galuega 6:8; Luka 10:19; Mika 3:8; Sakaria 4:6

Mo le tau'aveina o Lana galuega, e le'i filifilia e Keriso le a'oa'oga po o le gagana e fa'aaogāina e tagata a'oa'oina o Iutaia po o le malosi o Roma. Na Ia malaga fa'atafa 'ese mai a'oa'o Iutaia fa'afiaamionu, o le Matai Galue na filifili tagata loto maulalo, e le'i a'oa'oina i le poto maoa'e, e tala'i 'upu moni e fa'agae'etia ai le lalolagi.... Ina ia mafai ona manuia ai le latou galuega pe a tu'uina iā i latou le mana o le Agaga Pa'ia. E lē o le malosi po o le poto o le tagata e fa'asalalauina ai le tala lelei, a e o le mana o le Atua. CS 25

E ao ina tatou tatalo fa'atauānau mo le afio ifo o le Agaga Pa'ia e pei ona tatalo le 'au so'o i le aso Penetekoso. Afai na latou mana'omia le mana o le Agaga i lenā taimi, e sili atu fo'i ona tatou mana'omia i le asō. O itu'aiga a'oa'oga sesē, talitonuga e tete'e i le Tusi Pa'ia, ma le tafa'asesē ua ta'ita'i sesēina mafaufau o tagata; ma afai e aunoa ma le fesoasoani a le Agaga Pa'ia, o ā tatou taumafaiga e fa'ailoa atu le 'upu moni a le Atua, o le a lē manuia. HP 334

O le taimi lenā, a o aga'i ina tapunia le galuega o le fa'aolataga, o le a o'o mai loa faigatā i le lalolagi, ma o le a ita malō, peita'i o lo'o taofiofi pea ina ia 'aue ne'i taofia le galuega a le agelu lona tolu. O le taimi lea o le "uāga mulimuli," po o le toe fa'afouina ma luma o le Ali'i, o le a o'o mai ina ia tu'uina atu le malosi i le leo tele o le agelu lona tolu, ma saunia ai le 'au pa'ia e tutū atu i le taimi o le liligiina ifo ai o mala mulimuli e fitu. EW 85

(3) O LE Ā LE ASO O LE TALA FA'ASOLOPITO O LE EKALESIA KERISIANO NA FA'AILOGAINA AI LE MALOSI O LE FA'ATINOINA O LE UĀGA MUAMUA?

"Ua o'o atu fo'i i le aso Penetekoso, sa i ai i latou uma lava i le mea e tasi ma le loto gatasi. Ona fa'afuase'i mai lea o le atali'i mai le lagi, peiseā'i o le matagi ua agi tele mai, ua tumu uma ai le fale sa latou nonofo ai. Ua iloa fo'i e i latou o laulaufaiva peiseā'i o le afi ua vaevaeina, ua nofo i o latou luga ta'ito'atasi. Ua fa'atutumuina fo'i i latou uma i le Agaga Pa'ia, ua afua ai ona tautala i gagana 'ese'ese, pei ona foa'iina mai e le Agaga o le gagana iā te i latou." **Galuega 2:1-4**

MAU E TAU I AI: Galuega 2:41; 20:16

O le a foliga lenei galuega i le mea na tupu i le Aso Penetekoso. Na pa'ū mai le “uāga muamua” i le taimi o le liligiina ifo o le Agaga Pa'ia i le tau amataga o le galuega o le tala lelei, ina ia totogo a'e ai le fatu saito lelei. O le a fa'apenā fo'i ona pa'ū mai o le “uāga mulimuli” ina ia matua ai le saito ma saunia ai mo le seleselega. “E afio mai fo'i o Ia iā te i tatou e pei o le ūa, e pei o le timu mulimuli ma le timu muamua i le 'ele'ele” (Hosea 6:3). “O outou fo'i o le fanau a Siona e, ia outou fiafia ma 'oli'oli iā Ieova lo outou Atua, auā ua Ia foa'iina fa'atatau mai iā te outou le uāga muamua, Na te fa'atotoina ifo fo'i le ūa mo outou, o le uāga muamua atoa ma le uāga mulimuli” (Ioelu 2:23). “O ona aso e gata ai, o lo o fa'apea mai le Atua, e i'u ina 'Ou liligi ifo ai Lo'u agaga i luga o tagata uma lava” (Galuega 2:17).

O le a sili atu le malosi o le uāga mulimuli i luga o le galuega o le tala lelei nai lo le uāga muamua. O valo'aga ia na fa'ataunu'uina ina ua fa'atotoina ifo le uāga muamua i le tau amataga o le tala lelei, o valo'aga lava fo'i ia o le a toe fa'ataunu'uina i le uāga mulimuli i le fa'ai'uga o le tala lelei. Ua fa'aigoa e Peteru lenei mea o tausaga e fa'afouina ai po o tausaga e filemū ai. “O lenei, inā salamō ia outou ma outou liliu, ina ia soloi'esea a outou agasala ina ia o'o mai ai o tausaga e filemū ai mai luma o le Ali'i, ina ia 'auina mai fo'i e Ia Lē na mua'i tala'iina iā te outou, o Iesu Keriso lea” (Galuega 3:19, 20). GC 611-612 (511-512)

(4) O LE Ā LA TATOU VAEGA I LE GAOIOIGA O FA'ALILIUGA INA IA MAFAI ONA TATOU MAUA LE TOE "FA'AFΟΥINA" A LE AGAGA MAI LE ALI'I?

"O lenei, inā salamō ia outou ma outou liliu, ina ia soloi'esea a outou agasala, ina ia o'o mai ai o tausaga e filemū ai mai luma o le Ali'i." **Galuega 3:19**

MAU E TAU I AI: Galuega 2:38, 39; Mataio 4:17; Luka 24:47

O le tiute e ao ina matuā fa'atāuaina e fa'ae'e i luga o ē ua latou iloa le 'upu moni, o ā latou galuega uma ia fetau lelei mo lo latou fa'atuatūaga, ma o latou olaga ia fa'amamāina ma fa'apa'iaina, ma ia mafai ona saunia mo le galuega tele lea e tatau ona vave faia i aso nei o le fa'aumaina o le fe'au. E leai so latou taimi po o se malosi e fa'aalu i le naunau i le fa'amalieina o tu'inanau. O 'upu e ao na o'o mai iā i tatou i le taimi nei e tatau ona fa'amalosia ma una'ia ma le pulunaunau. "O lenei, inā salamō ia outou ma outou liliu, ina ia soloi'esea a outou agasala, ina ia o'o mai ai o tausaga e filemū ai mai luma o le Ali'i" (Galuega 3:19). E to'atele i latou e lē o lava le itū fa'aleagaga, ma se'i vaganā ua liua ato'atoa, o le a mautinoa le lē iloa. Pe mata ea e lē mamafa iā te 'oe lou tū ai i lenā tulaga lē mautinoa? 9T 154, 155

Ia ta'ito'atasi ma su'esu'e ifo ia lava pe ua i ai o ia i le fa'atuatua. Ia salamō tagata uma o le Atua ma ia liua, ina ia soloi'esea a latou agasala pe a o'o mai le taimi o le fa'afouga i le fa'atasi ai o le Ali'i. Ia latou mautinoa le mea sa latou sē 'ese ai mai le auala na fa'ailogaina e le Atua, o lea ua lē fa'amamāina ai o latou agaga e ala i le gaua'i i Āna fautuāga. 8 T 103

(5) O AI E TU'UINA I AI E LE ATUA LE AGAGA PA'IA?

"O Āna molimau fo'i i ia mea o i matou, atoa fo'i ma le Agaga Pa'ia, Lē ua foa'iina atu e le Atua i ē 'ana'ana iā te Ia." **Galuega 5:32**

MAU E TAU I AI: Galuega 5:29; Roma 6:16; I Peteru 1:2

O le folafolaga a le Agaga Pa'ia e lē fa'atapula'aina mo se vaega taimi po o se vaega tagata. Na folafola e Keriso o le mana o Lona Agaga o le fa'atasi ma ē mulimuli iā te Ia e o'o mai lava i le taimi nei. O Lē fa'amafanafana na 'auina iā te i latou uma o ē tu'uina atu ato'atoa i latou i le Ali'i ma Lana galuega. CS 250

E ao ina tatou tatalo e pei o le 'au aposetolo ina ua liligi ifo le Agaga Pa'ia i luga iā i latou. Tatou te mana'omia se papatisoga a le Agaga o le Atua. E tatou te lē saogalemū i se itulā e tasi a o tatou pa'ū 'ese mai le tu'uina atu o le usiusita'i i le Afioga a le Atua. FE 537

(6) E FA'AOPOOPO I LE SALAMŌ FA'AMAONI MA LE USIUSITA'I, O LE Ā SE VAEGA LONA TOLU E MATUĀ TĀUA I LE SAUNIUNIGA E TALIAINA LE UĀGA MULIMULI O LE AGAGA?

"Ole atu ia outou iā Ieova, ina ia ua i ōna pō o le uāga mulimuli; e faia e Ieova uila, ma foa'iina atu timuga tetele iā te i latou, o mutia o le fanua iā te i latou uma." **Sakaria 10:1**

MAU E TAU I AI: Iakopo 5:16; Ioelu 2:23; Mataio 7:7, 8

Ua fa'aalia mai e Paulo i inei le maualuga e mafai ona tatou o'o i ai e ala i le fa'atuatua i folafolaga a lo tatou Tamā fa'alelagi pe a tatou faia Lona finagalo. Ua matala mai iā i tatou le faitoto'a i le nofoāli'i o le Silisili 'Ese e ala i le amiotonu ma le maliu o Keriso. E pei lava ona lē taofia e le Atua Lona Ālo e to'atasi, a ua foa'iina mai o Ia e Ia mo i tatou, ua fa'apenā fo'i ona finagalo o Ia ina ia foa'ifuaina mai mea uma mo i tatou (Roma 8:32). Na tu'uina atu e le Tamā le ato'atoa o Lona Agaga i Lona Ālo. E mafai fo'i ona tatou maua le ato'atoa o le Agaga o le Atua. Na fetalai mai Iesu: "Afai e iloa e tagata leaga pei o outou ona avatu o mea lelei mo a outou fanau, e lē sili ea ona foa'iina mai e lo outou Tamā o i le lagi le Agaga Pa'ia i ē ole atu iā te Ia?" (Luka 11:13)- "So'o se mea tou te ole atu ai i Lo'u igoa, 'Ou te faia mo outou" (Ioane 14:14). Ma "Ia outou ole atu ona outou maua ai lea, ina ia ato'atoa ai lo outou 'oli'oli" (Ioane 16:24). GC 477 (398)

O ulua'i so'o sa latou ō atu ma tala'i le 'upu. Na latou fa'aalia Keriso i o latou olaga. Ma sa galue le Ali'i fa'atasi ma i latou, "ua fa'amaonia le 'upu i fa'ailoga na mulimuli ane ai" (Mare. 16:20). O nei so'o sa matuā saunia i latou mo la latou galuega. A o lumana'i ai le aso Penetekoso sa potopoto fa'atasi i latou, ma tu'u 'ese mea uma sa fe'ese'esea'i ai. Sa loto gatasi i latou. Sa latou talitonu i le folafolāga a Keriso o le a foa'i mai le fa'amanuiāga, ma na latou tatalo ma le fa'atuatua. Latou te le'i tatalo mo se manuia na'o i latou lava; o le avega mamafa sa i a i latou o le fa'aolaina lea o agaga. O le tala lelei sa tataua ona 'aveina atu i tulū'iga o le lalolagi, ma ua latou fa'ailoa atu ai le foa'iina mai o le mana sa folafolaina e Keriso. O lea na liligi ifo ai le Agaga Pa'ia, ma e afa ma afe na liua ai i le aso e tasi.

E fa'apea fo'i aso nei. Ia lē na o mānatunatuga o tagata, a ia tala'iina le Afioa a le Atua. Ia 'ave 'ese e tagata Kerisiano o latou fe-'ese'esea'iga, ma tu'u atu i latou i le Atua mo le lavea'iina o ē ua lē iloa. Ia latou ōle atu i le fa'atuatua mo le fa'amanuiāga, ona foa'i mai lea. O le liligiina ifo o le Agaga Pa'ia i aso o le 'au aposetolo o le "uāga muamua lea," ma sa matuā matagofie le i'uga. A e peita'i o le "uāga mulimuli" o le a sili atu ona fa'ateleina (Ioelu 2:23). DA 827 (650)

(7) O LE Ā LE MEA E TAOFIA MAI IĀ I LATOU O Ē FOUVALE I LE MULILUA FA'ALEAGAGA E TETE'E I LE ATUA E ALA I LE TU'UINA O TUPUA O LENEI LALOLAGI I LUGA A'E O IA?

"O le mea lea ua taofia ai le timu, ua leai fo'i ni timuga mulimuli; a ua iā te oe le muāūlu o le fafine talitane, e lē mafaia ona fa'amāina o oe." **Ieremia 3:3**

MAU E TAU I AI: Ieremia 14:22; 5:3; 6:15; Isaia 5:6; Amosa 4:7

E tele ma 'ese'ese tupua tatou te fiafia i ai; o tupua e fa'asili i le mafaufau ma fa'ama'a'a ai le loto, e o'o ina lē fa'atāuaina sa'o ai mea e tataua ona fa'amua. Oi ma'imaui pe ana tatou lagona i o tatou loto lesona na tu'uina iā Isara'elu anamua ma suia ai o tatou olaga ina ia tatou liliu ato'atoa ai mai tupua, ina ia 'au'auna i le Atua soifua. ST August 18, 1881

E lē mafai i le tagata ona alofa i le Atua ma lona loto atoa a e o lo'o i ai isi atua e fa'amua i le Ali'i. O le alofa e fa'asilia le Atua e lē na ona ta'uta'u o Lona mana e silisili 'ese, ma tu'uina atu taulaga e fa'ataunu'uina se itu'aiga tapuā'iga fa'atulagaina iā te Ia, peita'i o le loto o lo'o maua le fiafia e au'auna i tupua. O le alofa fa'apito, alofa i le lalolagi, po o le alofa i isi mea na foafoaina, o le ifo i tupua lenā i le silafaga a le Atua, ma e vavae'ese

ai le alofa mai iā te Ia. E mana'omia e le Atua le mea e sili mai le loto ma le alofa e aupito pa'ia, ma o le a Ia talia e na o le mea e sili. E tatau ona fa'asilia Lana pule i le mafaufau ma le loto. 3 SP 52

(8) O LE Ā LE MEA O LO'O FA'ATALITALI MAI AI MA LE ONOSA'I LO TATOU TAMĀ FA'ALELAGI, INA IA MAFAI ONA IA LILIGI MAI LE UĀGA MULIMULI I O TATOU LUGA?

"O lenei, le 'au uso e, onosa'i ia se'ia o'o i le afio mai o le Ali'i. Fa'auta, e fa'atali lē galue fanua i le fua aogā o le 'ele'ele, e fa'atalitali i ai, se'ia maua le uāga muamua ma lē mulimuli." Iakopo 5:7

MAU E TAU I AI: Iakopo 5:8; Luka 8:15; Kalatia 5:22, 23; 5:5

Ua mavae le taimi a e leai se suiga na aumaia i le folafolaga fa'amavae a Keriso i le 'auina mai o le Agaga Pa'ia e fai ma Ōna sui. E lē fa'apea o ni mea fa'asā i le vaega a le Atua ua taofia ai tamāo'aiga o Lona alofa tunoa ia 'aua ne'i tafe mai i le lalolagi i tagata. Afai o le fa'ataunu'uina o le folafolaga e lē va'aia e pei o na tatau ai, a e ona o le lē o fiafia e taliaina le folafolaga e pei ona tatau ai. Pe ana fai na latou loto atu uma, o le a fa'atumuina uma i latou i le Agaga. So'o se mea o le a lē mana'omia tele ai le Agaga Pa'ia, e va'aia ai le oge fa'aleagaga, pōuliuli fa'aleagaga, le pa'ū i le itū fa'aleagaga ma le oti. So'o se taimi e fa'atāua ai i le mafaufau mea e lē tāua, o le mana fa'aleagaga e mana'omia mo le tuputupu a'e ma le manuia o le ekalesia, ma o lea e aumaia fa'atasi ai isi manuia, o le a lē maua, e ui ina tele naunau mea ua ofoina mai.

Talu ai o le ala lea tatou te maua ai le mana, ai se ā tatou te lē fia 'a'ai ma fia inu ai i le mea alofa a le Agaga? Ai se ā tatou te lē talanoa i ai, tatalo, ma lauga fa'atatau i ai? O le Ali'i e sili atu Lona finagalo malie e tu'uina Lona Agaga Pa'ia iā i tatou ē 'au'auna iā te Ia, i lo mātua e tu'uina mea alofa lelei mo a latou fanau. Ina ia maua le papatisoga a le Agaga i aso ta'itasi, e ao i le tagata faigaluega ona tu'u atu i le Atua lana olega. AA 50, 51

Se'i vaganā o tagat o le ekalesia a le Atua e i ai le feso'ota'iga ola i le asō ma le Puna o le ola fa'aleagaga, o le a lē sauni i latou mo le taimi o le seleselega. Vaganā latou te tausi ma teuteu a latou lamepa ma fa'amumū pea, o le a latou lē maua le alofa tunoa fa'aopoopo i taimi o mana'oga fa'apitoa. AA 55

(9) O LE Ā LE MEA UA FINAGALO MALIE MA NAUNAU LE ALI'I E FAIA, E ALA I ŌNA SO'O UA FA'ATUMULIA E LE AGAGA, PE A MATUA LE SELESELEGA?

"A afu le saito, ona selesele loa lea, auā ua o'o i ōna pō e selesele ai." Mareko 4:29

MAU E TAU I AI: Fa'aaliga 14:14-16; Ioelu 3:13, 14

O le fe'au a le agelu lona tolu ua fa'ateleina le leo tele o le alaga, ma e lē tatau ona e lagona fa'apea 'ou te sa'oloto ma fa'atamala i le tiute o aso nei, ma manatu māmā e i ai se taimi i le lumana'i o outou o le a maua ai fa'amanuiāga maoa'e, a e le'i i ai se taumafaiga i la outou vaega i se fa'afouga matagofie o le a tupu.... O le aso nei e ao ina fa'amamāina lau mea teumea, ina ia saunia mo le sau fa'aleagaga, ia saunia mo le uāga mulimuli; auā o le a o'o mai lava le uāga mulimuli; ma o le fa'amanuiāga a le Atua o le a fa'atumuina ai agaga uma ta'ito'atasi ua fa'amamāina mai mea leaga uma. O le tatou galuega lea e faia i le asō, o le tu'uina atu lea o o tatou agaga iā Keriso, ina ia saunia mo le taimi o le fa'afouga mai le silafaga a le Ali'i - ia fetau lelei ai mo le papatisoga a le Atua.

Ia lē o le ola i le fa'amoemoe mo se taimi fa'apitoa o le a o'o mai ai le vevesi, e ao ina tatou atamamai e fa'aleleia avanoa o le taimi nei, o le faia lea o mea e tatau ona fai ina ia fa'aolaina ai agaga. Ia lē o le fa'aaluina o le malosi o o tatou mafaufau i le tau matemate e fa'atatau i le taimi ma tau ua uma ona tu'uina e le Ali'i i Lana Ia lava pule, ma taofia mai tagata, a e ao ina tatou tu'uina atu i tatou lava i le pulega a le Agaga Pa'ia, ia faia tiute i le taimi nei, ia avatu le areto o le ola, ia lē filogia i manatu o tagata, i agaga o le a fano mo le 'upu moni a le Atua. Ev 701, 702

(10) O LE Ā LE "FUA" O LO'O NAUNAU LE TAMĀ E TU'UINA I TOTONU IĀ I TATOU INA IA MAFAI ONA TATOU MAUA AI LE UĀGA MULIMULI MA TU'UINA ATU AI LE TALA LELEI I LE LALOLAGI?

"A o le fua o le Agaga o le alofa, o le oli'oli, o le filemū, o le onosa'i, o le mataalofa, o le agalelei, o le fa'amaoni, o le agamalū, ma le lē gaoiā; e lē fa'atulafonoina mea fa'apenā. Afai ua tatou ola i le Agaga, ia tatou savavali fo'i i le Agaga." **Kalatia 5:22, 23, 25**

MAU E TAU I AI: Salamo 1:3; 92:14; Ioane 15:5

Ua fetalai Keriso: E vi'ia Lo'u Tamā i lenei mea, pe a outou fua tele mai; ona fai ai lea outou Mo'u so'o" (Ioane 15:8). O le Atua ua tu'uina iā i tatou le malosi o le tino ma le mafaufau ma tu'uina mai fo'i taleni ina ia mafai ona tatou fa'aaogāina mo Ia. Ua tu'uina i tagata ta'ito'atasi lana galuega - e lē na o le galuega lana ia lava fa'ato'aga saito ma sana, a e o le fa'anaunauga sili, o le fa'aauauina lea o le galuega mo le lavea'iina o agaga. *8 T 246*

O i latou uma e fa'apa'iaina o latou ola, tino, ma agaga mo le Atua o le a fou pea ona talia o le liligiina ifo o le mālōsi o le tino ma le mafaufau. E lē uma 'oa o le lagi e latou te maua i taimi e ōle atu ai. E avatu e Keriso iā i latou le mālōsi o Lona lava agaga, o le ola o Lona lava soifua. O le Agaga Pa'ia e tu'uina atu Lona mana aupito i maoa'e e galue i loto ma mafaufau. O le alofa tunoa o le Atua e fa'alauteleina ma fa'atupuina lo latou iloa, ma o le 'ato'atoa o Lona uiga pa'ia e ulufale mai e fesoasoani i le galuega o le lavea'iina o agaga. E ala i le galulue fa'atasi ma Keriso, o i latou e 'ato'atoa uma iā te Ia, ma e ui i o latou vaivaiga fa'ale-tagata, e mafai e i latou ona faia galuega a le Silisili 'Ese. *DA 827 (650)*

Atonu ua tatou maua se vaega o le Agaga o le Atua, a e ala i le tatalo ma le fa'atuatua, e ao ina tatou fa'aauau pea le sa'ili atili le Agaga. E tataua lava ona fa'amuta a tatou taumafaiga. Afai tatou te lē aga'i i luma, afai o o tatou uiga e lē tu'uina tatou e i tatou lava ia maua uma le uāga muamua ma le uāga mulimuli, o le a lē iloa o tatou agaga, ma o le a ta'atia mai i o tatou lava faitoto'a la tatou tiute tau'ave. *LDE 187*

(11) PE A MAUA LOA E 'AVE FE'AU A LE ATUA LE UĀGA MULIMULI, O LE Ā LE MEA O LE A TUPU I LE LALOLAGI ATOA?

"Ua mavae ia mea, ona 'ou iloa atu lea o le agelu o lo'o alu ifo i le lagi, ua iā te ia le pule sili; ua malamalama fo'i le lalolagi i lona pupula." **Fa'aaliga 18:1**

MAU E TAU I AI: Isaia 60:1-3; Mataio 5:14-16

Ua latalata mai le i'uga o mea uma. O lo'o gaoioi le Atua i mafaufau o i latou uma o lo'o avanoa e talia le musumusuga a Lona Agaga Pa'ia. O lo'o Ia auina atu a tatou 'avefe'au ina ia tatou tu'uina atu le lapata'iga i so'o se nofoāga. O lo'o tofotofoina le fa'amaoni o Āna ekalesia ma lo latou loto atu e tu'uina ma le usiusita'i i le ta'ita'iga a le Agaga.

O le a tupu tele le poto. O le a va'aia le fetaufetulia'i o 'avefe'au a le lagi, e latou te sa'ili auala uma e mafai ona lapata'i ai tagata e fa'atatau i le fa'amasinoga o le a o'o mai, ma tala'i atu le tala lelei o le fa'aolataga e ala i lo tatou Ali'i o Iesu Keriso. O le a si'itia maua luga le tapula'a o le amiotonu. O lo'o gaoioi le Agaga o le Atua i loto o tagata, ma o ē tali atu i Lana musumusuga o le a 'avea ma malamalama i le lalolagi. O le a va'aia i latou i so'o se mea o lo'o ō atu e fa'a'iloa i isi le malamalama ua latou maua e pei ona maua fo'i e i latou ina ua mavae le afio ifo o le Agaga Pa'ia i le aso Penetekoso. Ma a o latou fa'asusulu atu lo latou malamalama, latou te maua atili le mana o le Agaga Pa'ia. E fa'amalamalamaina le lalolagi i le mamalu o le Atua.

O lenei fe'au o le a tapunia i le mana ma le malosi e sili mamao atu i lo o le 'alaga i le tulua o le pō. O 'au'auna a le Atua, na latou maua le mana mai lugā, o latou foliga ua fa'apupulaina, ma fa'amalamalamaina e le fa'apa'iaina, e ō atu ma tala'i le fe'au mai le lagi. *ML 63*

(12) E FA'APEFEA ONA FA'AMATALAINA E LENEI FUAI'UPU LE FOLAFOLAGA UA FA'ATUMULIA E LE AGAGA PA'IA, FE'AU O LAPATA'IGA MULIMULI?

"Ua matuā 'alaga fo'i o ia ma le leo tele, ua fa'apea ane, Ua pa'ū, ua pa'ū Papelonía le 'a'ai tele, ua 'avea fo'i o ia ma mea e nofo ai temoni, ma mea e puipui ai agaga leaga uma, o le mea fo'i e puipui ai manu felelei uma e leaga ma le 'inosia." Fa'aaliga 18:2

MAU E TAU I AI: Fa'aaliga 14:7, 9

Ua latalata ona fa'ataunu'uina o valo'aga o le Fa'aaliga 18. A o folafolaina le fe'au a le agelu lona tolu, "o le tasi agelu" o le a "alu ifo mai le lagi, ua iā te ia le pule sili, ua malamalama fo'i le lalolagi i lona pupula" (Fa'aaliga 18:1). O le a matuā fa'amanuiaina e le Agaga o le Atua tagata ua fa'apa'iaina e fai ma mea faigaluega, o ali'i, tama'ita'i, ma le fanau o le a alalaga i vi'iga ma molimau, e fa'atumuina le lalolagi i le iloa o le Atua, ma Lona mamalu silisili 'ese, e pei o le suāvai o lo'o ufitia ai le sami.

O i latou o ē na taofimau le amataga o lo latou fa'atuatua e o'o i le i'uga, o le a matuā ala mai i le taimi o le fa'asalalauina ma le malosi le fe'au a le agelu lona tolu. I le taimi o le 'alaga leo tele, o le ekalesia, ma le fesoasoani a le Ali'i fa'aeaina, o le a fa'asalalauina ai le fe'au o le fa'aolataga ina ia fa'ateleina ai le malamalama e fa'asalalau i 'a'ai ma nu'u. O le lalolagi o le a fa'atumulua i le malamalama o le fa'aolataga. O le a fa'ateleina le fa'afouga a le Agaga o le Atua e fa'apaleina ai ma le manuia galuega a vaega 'ese'ese, o le a susulu atu ma va'aia ai le malamalama o le 'upu moni mo ōna pō nei i so'o se mea. *RH Oct. 10, 1904*

O'U MANATUNATUGA MA TALI (Mafai tali e sili atu i le tasi pe a tatau)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

'Ou te _____ o le fa'atusa o le uāga mulimuli ma le uāga o le Agaga e pei ona tupu i le ulua'i ekalesia, ma le ala na tupu ai i le ekalesia moni a le Atua i taimi mulimuli o le tala fa'asolopito o le lalolagi.

Ua 'ou _____ e na o le mana e maua mai le Agaga Pa'ia e fa'a'aupegaina ai le tagata e fa'asoa atu le malamalama o le tala lelei i nisi, ma 'ou te naunau ia fa'apea fo'i i lo'u olaga.

'Ou te _____ o Keriso e Na te fa'aaogā ē loto maulalo ma e fa'aagava'a i latou e ta'u atu le tala lelei.

'Ou te _____, e ala i le Agaga o le Atua, na galue le ulua'i ekalesia ma na fulifaō ai le lalolagi atoa, ma o le a toe tupu fo'i i aso o le i'uga.

'Ou te _____ o le a 'ave'ese e le Ali'i, e ala i Lona Agaga, tupua mai lo'u olaga ma tu'u i totonu iā te a'u se loto fou ua liua ato'atoa.

Ua 'ou _____ 'ou te mafai ona 'ou faia galuega e i o'u luma mai lea aso ma lea aso.

'Ou te _____ o le a 'ou i ai fa'atasi ma i latou o ē ua fa'atumuina i le uāga mulimuli e 'alalaga ma le leo tele i le taimi fa'ai'u o le lalolagi.

<u>MANATU</u>	<u>FA'AOPOOPO</u>	<u>TATALO MANA'OMIA</u>



Lapata'iga a le Agelu Muamua Fa'amamaluina le Atua ma le Fa'amasinoga ua Lata Mai

Lesona 10

'UPU A LE FA'ATONU: Ua ta'u mai iā i tatou i le Mataio 24:14 o le a fa'asalalauina le tala lelei i le lalolagi atoa, ona o'o mai ai lea o le i'uga. O le ā le fe'au e matuā tāua lava ma e tatau ona 'avea i le lalolagi atoa? O ia fe'au e matuā tāua tele lava o lo'o tu'u mai i le Fa'aaliga 14:6-13. O nei olēga alofa mulimuli a le Atua i Lana fanau i le lalolagi o se taumafaiga e puipuia ai tatou mai taufa'asesēga ma le fa'aumatiāga e fa'avavau. Ua ta'u mai i le Fa'aaliga 18:2, o nei fe'au o le a ō atu e pei o se "alaga leo tele" i le lalolagi atoa. E fa'anaunau le Atua ia fa'asao le fanau uma a le tagata mai le fa'aumatiāga (II Peteru 3:9). I lenei lesona o le a tatou va'aia ai pe sa fa'aapefea ona amataina le finauga tele i le vā o le lelei ma le leaga, o lo'o fa'aauau pea lava, ma o le a fa'ai'uina i le matā'upu e fa'atatau i le tapuā'iga.

O le a e taliaina ea Lana lapata'iga ma filifili e fa'amaoni iā te Ia? O le a e sauni mo Lona toe afio mai? O le a 'avea 'oe ma se tasi o Āna "Agelu" e 'ave Lana fe'au o le alofa ma le lapata'iga i le lalolagi?

O le ulua'i 'upu sa fa'aaogā mo le "agelu" o le uiga o le 'avefe'au. O le 'avefe'au, a e maise se "agelu" e fa'atatau fo'i i se faiffe'au: - agelu, 'avefe'au (Strong's Concordance).

(1) O LE Ā LE FE'AU O LE MALŌ O LE ATUA NA FETALAI AI KERISO O LE A LAUGAINA I LE LALOLAGI ATOA INA O LE A LATALATA LONA TOE AFIO MAI?

"E tala'iina atu fo'i lenei tala lelei o le malō i le atu laulau uma, e fai ma molimau i nu'u uma; ona o'o mai ai lea o le gata'aga." Mataio 24:14

MAU E TAU I AI: Kolose 1:23; Mareko 16:15; Fa'aaliga 14:6

Ua tatou va'aia lea lapata'iga i le Fa'aaliga 14. Ua tu'uina mai i le Fa'aaliga se fe'au sautuatuolu, se fe'au ua folafolaina e agelu, ma e soso'o mai lava lea fe'au ma le afio mai o le Atali'i o le tagata Na te seleina le saito o le lalolagi. GC 311 (263.2)

Ua fa'ailoa mai o agelu o lo'o felelei i le atulaulau, o lo'o 'alagaina i le lalolagi se fe'au o lapata'iga, ma e fa'ataau mo tagata e nonofo i le lalolagi, i aso mulimuli o le tala fa'asolopito o le lalolagi. E lē o fa'alogoina e se isi leo o nei agelu, auā o fa'ailoga lava ia o tagata o le Atua o lo'o galulue fa'atasi ma 'avefe'au o le lagi.

O tagata totoa a le Atua o tagata ua tataua ona liua. O le fa'ai'uga o lenei fe'au o le fa'aliliuina ma le fa'apa'iaina o agaga. E tataua iā i tatou ona lagona le mana o le Agaga o le Atua i lenei gaioiga. O se fe'au e manino ma e matagofie. O lona uiga e matuā tāua lava i lē e taliaina, ma e tataua ona 'alagaina ma le leo tele lenei fe'au. E tataua ona iā i tatou se fa'atuatua e moni ma e fa'amaoni o le a alu atu ai e fa'asalalau lenei fe'au se'ia o'o ina tapunia le taimi. 9 T 154

(2) O AI E TATAU ONA TA'U I AI NEI FE'AU O LE TALA LELEI A AGELU E TO'ATOLU?

"Na a'u iloa fo'i le tasi agelu ua lele i le taulotoa'iga o le lagi, ua iā te ia le tala lelei e fa'avavau e folafola atu i ē nonofo i le lalolagi i atu nu'u uma, ma itū 'aiga, ma gagana 'ese'ese, ma nu'u." Fa'aaliga 14:6

MAU E TAU I AI: Mataio 28:19, 20

O le fe'au o le tala lelei na tala'i e le 'au so'o o Keriso, sa fa'ailoa mai ai Lona mua'i afio mai i le lalolagi. Sa aumaia i tagata le tala lelei o le fa'aolataga e maua mai le fa'atuatua iā te Ia, ma sa fa'asino i le lumana'i i Lona afio fa'alua mai i le mamalu e togiola i Ōna tagata; ma na fa'atū mai i luma o tagata le fa'amoemoe, e ala i le fa'atuatua ma le usiusita'i, e tofusia ai i le tofi o le malamalama ma le 'au pa'ia. O lenei fe'au ua tu'uina i tagata i ōna pō nei, ma o lo'o sautualua mai ai le fa'aaliga ua lata mai lava le afio fa'alua mai o Keriso. Ua fa'ataunu'uina fa'ailoga na tu'u mai lava e Ia e fa'ataau i Lona afio mai, ma e ala i le a'oa'o atu o le Afioa a le Atua e tatou te iloa ai ua i faitoto'a le Ali'i. COL 226 (86.2)

O lenei galuega e matuā telē lava i lo'o le mea e manatu i ai le to'atele.... "O lenei, ia outou ō atu e fai nu'u uma lava ma so'o" (Mataio 28:19). O lenei galuega e tataua ona tatou su'esu'e lelei i ai ina ia fa'afaigofieina ai. O lenei fe'au o se molimau. Pe a talia e loto e fa'amaoni, o le a mautinoa ai o se togafiti aogā mo agasala ma fa'anoanoāga uma o le lalolagi. E leai se tulaga o le tau, o le mativa, o le lē iloa, po o le fa'ailoga tagata o le a mafai ona 'ave'esea pe fa'aititia ai le aogā mo mea e mana'omia e le aigātagata. MS, Sept 20, 1906

(3) O LE Ā LE MEA A LUSIFELO, UA TA'U NEI O SATANI, SA TAUMAFAI E FAI I LE LAGI NA AMATAINA AI LE FINAUGA I LE VĀ O LE LELEI MA LE LEAGA?

"O 'oe fo'i sa e fa'apea ifo i lou loto, 'Ou te alu a'e i le lagi, 'ou te si'itia i luga lo'u nofoāli'i ia sili i fetū a le Atua, 'ou te nofo fo'i i le mauga o le fa'apopotoga i le itū i matū." Isaia 14:13

MAU E TAU I AI: Esekielu 28:12-15; Isaia 47:10

O le naunau e fa'aeaina e le tagata ia lava, sa mafua ai ona pa'ū o Lusifelo. A o le'i pa'ū, o ia o le agelu sa aupito sili le matagofie ma le atamai i agelu uma o le lagi. Sa ia tu'uloto le mimitavale ona o le mamalu sa fa'ae'e e le Atua i ōna luga, peita'i na ia sa'ili pea ia atili sili atu le mamalu mo ia lava.

Sa manatu Lusifelo ia tutusa ia ma le Atua i le tulaga, le pule, ma le mamalu, a e lē i Lona uiga. Sa ia naunau ia maua e ia le fa'aaloaloga e tu'u atu i le Atua e le 'au agelu. O ia e na o se mea ola sa foafoaina, a e na ia sa'ili ia maua le mamalu e na o Lē na faia mea uma e tatau i ai. Sa ia sa'ili e tulaga muamua ia maua le alofa ma le fa'aaloalo a le 'au agelu, a e lē sa'ili ia fa'asili le Atua i nei mea uma. 4 BC 171

(4) O LE Ā LE FA'AILOGA E LE'I TATAU A E MAUTINOĀ E FA'AMAONI MA LE MATUĀ GAUA'I ATU NA SA'ILI SATANI IA NA MAUA MAI, E LĒ NA O MEAOLA UMA NA FOAFOAINA, A E ATOA FO'I MA KERISO?

"Ona fai mai lea o ia iā te Ia, 'Ou te avatua nei mea uma iā te 'Oe, pe afai e te fa'apa'ū ma ifo mai iā te a'u."
Mataio 4:9

MAU E TAU I AI: Luka 4:7, 8; Esekielu 28:2

Sa fa'apea atu Satani iā Keriso, "Fa'apa'ū ma ifo mai iā te a'u" (Mataio 4:9). I atunu'u o i Sasa'e i aso nei lava, o le fa'apa'ū faō i lalo o le fa'aailoga o le gauā'i ato'atoa ma le fa'amaoni. O lenei fuafuāga fa'ati'apolo - fa'apea o le Atua ua fa'aliutino tagata e tatau ona ifo i le ti'apolo - o se faifaiga ua sili le mata'utia. O lenei matā'upu tele ma le malosi o le fuafuāga lē pa'ia ua foliga e fa'aailoa mai ai le maualuga o le poto fa'ati'apolo. 5 BC 315

I puapuagā ua lata ona o'o mai, o le a vala'auina tagata uma o le lalolagi ia faia sa latou filifiliga, e pei o taulele'a Eperu e to'atolu i aso anamua, i le vā o le tapuā'i i le Atua moni po o atua pepelo (Tanielu 3). O le fe'au a le agelu muamua e fa'ata'oto mai ina ia saunia tagata e fai le filifiliga tonu ma ia tutūmau pe a o'o i le taimi o puapuagā. 7 BC 828

(5) I TAIMI FA'AI'U O LE LALOLAGI PE A 'ALAGAINA LE FE'AU A LE ULUĀ'I AGELU, O LE Ā LE MEA MUAMUA E VALA'AUINA LE LALOLAGI ATOA IA FAIA?

"Ua fa'apea atu ma le leo tele, Ia 'outou matata'u i le Atua, ma avatu iā te Ia le vi'iga, auā ua o'o mai le itū aso o Lana fa'amasinoga; ma ia outou ifo i Lē na faia le lagi, ma le fanua, ma le sami, atoa ma puna o vai."
Fa'aaliga 14:7

MAU E TAU I AI: Fa'ata'oto 14:26, 27; 3:7, 8; 16:6

O le mata'u. O le 'upu Eleni "ia fefe," "ia āva pe fa'aaloalo." O lenei 'upu e lē o fa'aaogāina iinei ia lagona le fefe i le Atua, peita'i ia sau iā te Ia ma le āva ma le migao. E ta'u atu ai le manatu e fa'amaoni ato'atoa i le Atua, e tu'u atu atoa 'oe i Lona finagalo. O le fe'au ia mata'u i le Atua e tāua a e maise i le taimi ua ta'u mai i le 'alaga a lenei agelu, ona o tagata o lo'o ifo i atua o mea fai fa'aletino ma tu'inaanau ma isi uma mea e tele e faia e o latou lima. O le mamalu. Iinei o lea 'upu e fa'asino lava i le "mamalu," "vi'iga," ma le "aloha'ia." (Fa'atusatusa le Salamo 115:1; Isaia 42:12; II Peteru 3:18; Iuta 1:25). 7 BC 827

(6) I LE VAEGA LONA LUA O LENEI OLĒGA SAUTUA FĀ, O LE Ā LE MEA O LO'O VALA'AUINA I TATOU IA TU'U ATU I LE ATUA?

"Ua fa'apea atu ma le leo tele, Ia 'outou matata'u i le Atua, ma avatu iā te Ia le vi'iga, auā ua o'o mai le itū aso o Lana fa'amasinoga; ma ia outou ifo i Lē na faia le lagi, ma le fanua, ma le sami, atoa ma puna o vai."
Fa'aaliga 14:7

MAU E TAU I AI: Salamo 29:2; Esoto 33:18, 19; I Korinito 10:31

O lo'o tatou ola i le taimi o le fa'ata'ita'iga. O i latou o ē ua i tu'ugamau ua uma ona tofotofoina ma iloiloins, e va'ai pe latou te iloa lo latou tiute e 'au'auna i le Atua. Ia tatau ona tatou naunau e fa'amamaluina le Atua, e 'avea o la tatou fuafuāga lea ia aupito sili ona malosi i o tatou olaga. E tatau ona ta'ita'iina i tatou ia matuā taumafai e

fa'aleleia avanoa ua tu'uina mai, e fa'aaogā tonu 'oa a le Ali'i. E tatau ona ta'ita'iina ai tatou ia tausi lelei le fai'ai, o ivi, ma musela o le tino i le tulaga o le soifua malōlōina, e fesoasoani pea ia tumau le malosi tauletino ma le manino o le mafaufau e 'avea ai o 'au'auna fa'amaoni. Ia tu'u i tua le fai manatu fa'apito; afai e tu'u i ai se avanoa, o le a fa'anefu le mafaufau, fa'ama'a ai le loto, ma fa'avaivai ai le malosi e fai ai mea tonu.

I so'o se mea, ia fa'ailoa atu i ē o si'omia 'oe o lo'o e fa'amamaluina le Atua. Ia e tu'u i tua le tagata; ia fa'aali atu le Atua e na o Ia le fa'amoemoe o le aigā tagata. E tatau ona fa'aui le atina'eina o le amio i le Papa e fa'avavau, o Iesu Keriso lea; o le a fa'apea ona tumau lelei ai e ui i timuga ma le afā. *LHU 366*

(7) O LE Ā LE GAOIOIGA LONA TOLU O LO'O VALA'AUINA I TATOU IA AVATU I LE ATUA AUĀ O IA LĒ NA FAIA MEA UMA?

"Ua fa'apea atu ma le leo tele, Ia 'outou matata'u i le Atua, ma avatu iā te Ia le vi'iga, auā ua o'o mai le itū aso o Lana fa'amasinoga; ma ia outou ifo i Lē na faia le lagi, ma le fanua, ma le sami, atoa ma puna o vai."

Fa'aaliga 14:7

MAU E TAU I AI: Ne'emaia 9:5, 6; Salamo 86:8-10; 96:5-9; Galuega 4:24

O le tapuā'i i le Atua e fa'avae i luga o le 'upu moni, o Ia Lē na faia mea uma ma o isi meaola uma e ola latou ona o Ia. Ma so'o se mea i le Tusi Pa'ia, e ta'u mai ai e ā Ia le āva ma le tapuā'iga, i luga a'e o atua a ē fa'apaupau, e tu'u mai ai le fa'amaoniga o Lona mana foafoa. "Auā o atua uma o nu'u o tupua lava ia; a o Ieova, na Ia faia le lagi" (Salamo 96:5). "O lenei, po o ai ea tou te fa'atusa i ai A'u? po o ai fo'i ma te tutusa? ua fetalai mai ai Lē Pa'ia. Se'i tetepa a'e i luga, ma outou va'ai, po o ai ea ua na faia nei mea?" (Isaia 40:25, 26). Ma "Auā o lo'o fa'apea ona fetalai mai o Ieova, o Lē na faia le lagi; o Ia lava o le Atua; o le Tufuga o Lē na faia le lalolagi;... o A'u o Ieova, a e leai se tasi" (Isaia 45:18). *LHU 51*

(8) O LE Ā LE ITULĀ UA O'O MAI E TATAU AI ONA TATOU FA'AVAVAVE MA LAPATA'I LE LALOLAGI INA IA SAUNIUNI?

"Ua fa'apea atu ma le leo tele, Ia 'outou matata'u i le Atua, ma avatu iā te Ia le vi'iga, auā ua o'o mai le itū aso o Lana fa'amasinoga; ma ia outou ifo i Lē na faia le lagi, ma le fanua, ma le sami, atoa ma puna o vai."

Fa'aaliga 14:7

MAU E TAU I AI: Failauga 12:13, 14; Fa'aaliga 18:10; 11:18

O lea lapata'iga sautuatuolu, ua fuafuaina ina ia saunia ai tagata o le lalolagi mo le toe afio mai o le Ali'i. "Ua o'o mai le itūaso o Lana fa'amasinoga." O lenei 'alaga e fa'asino tonu i le toe galuega a Keriso i le malumalu i le lagi mo le fa'aolataga o tagata. Ua fa'ailoa mai ai se fe'au e ao ona 'alagaina se'ia o'o i le taimi e mae'a ai le galuega fa'afautua a le Fa'aola, ma afio mai ai loa o Ia i le lalolagi Na te avatua Ōna tagata ina ia fa'atasi ma Ia. E fa'aauauina le galuega o le fa'amasinoga se'ia o'o ina ua faia fa'ai'uga o tagata ta'ito'atasi uma, o ē o ola fa'apea ma ē ua oti. E fa'apenā ona fa'aauauina o le fa'amasinoga se'ia o'o i le tapunia o le alofa tunoa mo tagata. Ua poloa'iina tagata ina ia latou matata'u i le Atua ma avatu iā te Ia le vi'iga, ma ia ifo i Lē na faia le lagi, ma le fanua, ma le sami, atoa ma puna o vai, ina ia sauniunia ai i latou e tutū atu i le fa'amasinoga. O le taliaina o nei fe'au e maua ai le i'uga lea ua fa'a'upu mai fa'apea: "O le mea lenei ua i ai ē ua tausi i poloa'iga a le Atua, ma le fa'atuatua iā Iesu". E ao ona tausia e tagata le tulafono ina ia latou sauni ai mo le fa'amasinoga. O le tulafono o le a 'avea ma fua lē sesē e fa'amasinoina ai tagata uma *GC 435-436 (363)*

(9) I LANA FA'AMATALAGA O LE VA'AIGA O LE FA'AMASINOGA, O LE Ā LE MEA NA TA'U MAI E TANIELU O LE A TATALAINA E FILIFILI AI LE I'UGA O TAGATA TA'ITO'ATASI UMA?

"Na 'ou va'ava'ai ina se'ia tu'u mai o nofoāli'i, ua ti'eti'e mai fo'i Lē ua mai anamuā Ōna aso, ua sinasina Lona 'ofu e pei o le kiona, ma Ōna lauao e pei o le fulufulu mamoe e lelei; o Lona nofoāli'i o le afi mumū ia, ua se afi ua mū Āna mea e ta'avalevale a'i. Ua tafe mai le afi ua alu atu nai Ōna luma, ua afe ni afe o ē 'au'auna iā te Ia, e mano ni mano o ē laulaututū i Ōna luma; ua nofoia le fa'amasinoga, ma ua fofola tusi." **Tanielu 7:9, 10**

MAU E TAU I AI: Fa'aaliga 20:11, 12; Malaki 3:16-18

Na fa'apenā ona fa'ailoa mai i le perofeta i le fa'aaliga le aso tele o le fa'amasinoga - le aso o le a fa'aalia ai amioga ma olaga o tagata i luma o le Fa'amasino o le lalolagi, ma o le a maua ai e le tagata lona tau'i e tusa ai ma āna mea ua fai. O Lē e mai anamuā Ōna aso, o le Atua lea le Tamā. GC 479 (401)

O le a folasia i luma o le Atua le olaga atoa o tagata ta'ito'atasi, ma ua tusia ai le fa'amaoni po o le lē fa'amaoni. Ua tofu le igoa i tusi a le lagi ma fa'amaumauga ua tusia ai. Ua tusia ai e aunoa ma se sesē o 'upu leaga uma, o mea fa'apito uma na fai, o tiute uma ua lē faia, o agasala lilo uma, atoa ma mea tau'afasesē uma. Ua tusia ai e le agelu tusitusi lapata'iga uma ma a'oa'iga fa'alelagi na fa'atamala i ai, o taimi uma na fa'ama'imaui, o avanoa uma na lē fa'aāogāina, o uiga uma o le tagata na tosina atu ai nisi i le lelei po o le leaga, atoa ma i'uga lelei po o i'uga leaga fo'i na tutupu mai ai - ua tusia uma nei mea e le agelu.

O le fua po o le tapula'a o le a fua i ai olaga o tagata uma i le fa'amasinoga, o le tulafono lea a le Atua. Fai mai 'upu a le poto: "Ia e mata'u i le Atua, ma e 'ana'ana i Āna poloa'iga; auā o mea ia e tataui i tagata uma. Auā e fa'amasinoina e le Atua galuega uma" (Failauga 12:13, 14). Fai mai le āpoāpoa'iga a Iakopo: "Ia fa'apea ona outou tautala, ia fa'apea fo'i ona outou faia, pei o ē o le a fa'amasinoina i le tulafono o le sa'olotoga" (Iakopo 2:12). GC 482 (403)

(10) PE A TATOU LAPATA'IA LE LALOLAGI E FA'ATATAU I LE FA'AMASINO O LE A O'O MAI, O AI E MAFAI ONA TATOU TA'U ATU O LE A FAUTUA MO I LATOU, MA O LE Ā LE MEA NA IA FAIA E TOTOGI AI LE TAU MO A LATOU AGASALA?

"Si a'u fanau e, 'ou te tusi atu nei mea iā te outou, ina ne'i agasala outou; pe afai fo'i e agasala se tasi, o iā te i tatou le fautua i luma o le Tamā, o Iesu Keriso lea, o lē amiotonu. O le togiola fo'i o Ia mo a tatou agasala, e lē gata fo'i i a tatou, a e atoa fo'i ma agasala a le lalolagi uma lava." **I Ioane 2:1, 2**

MAU E TAU I AI: I Timoteo 2:5; Romans 8:34; Eperu 9:24

O le a tū atu Iesu e fautua mo i latou i luma o le Atua. "Afai fo'i e agasala se tasi, ua i ai la tatou fautua i luma o le Tamā, o Iesu Keriso lea, o Lē amiotonu" (I Ioane 2:1). "Auā e le'i ulu atu Keriso i se malumalu na faia e tagata, o se fa'atusa o le malumalu moni, a'o le lagi lava; ina ia tū ai o Ia i luma o le Atua mo i tatou" (Eperu 9:24). Ma "O le mea lea ua mafai ai ona fa'aolaina e Ia i latou uma o ē ō atu i le Atua e ala iā te Ia, auā ua soifua pea o Ia e fautua mo i latou" (Eperu 7:25). GC 482 (403.5)

(11) O AI E MAFAI ONA MAUA LE ALOFA TUNOA O LO'O ŌFO MAIE LE ATUA LE TAMĀ MA LONA ĀLO?

"Auā ua fa'apea lava ona alofa mai o le Atua i le lalolagi, ua Ia au mai ai Lona Atali'i e to'atasi, ina ia lē fano se tasi e fa'atuatua iā te Ia, a ia maua e ia le ola e fa'avavau. Auā e le'i 'auina mai e le Atua Lona Atali'i i le lalolagi ina ia fa'asala i le lalolagi, a ia fa'aolaina le lalolagi iā te Ia." **Ioane 3:16, 17**

MAU E TAU I AI: II Korinito 5:19; Roma 5:8-11; I Ioane 4:9, 10

O le ato'atoa o le fuafuāga o le fa'aolataga o lo'o ta'u mai i nei 'upu tāua: "Auā ua fa'apea lava ona alofa mai o le Atua i le lalolagi, ua Ia au mai ai Lona Atali'i e to'atasi, ina ia lē fano se tasi e fa'atuatua iā te Ia, a ia maua e ia le ola e fa'avavau" (Ioane 3:16). Sa tau'ave e Keriso le fa'asalaga o agasala a le lalolagi ina ia tu'uina Lona

amiotonu i tagata agasala, ma e ala i le salamō ma le fa'atuatua, ia mafai ai ona 'avea i latou e fa'apei o Ia i le pa'ia o le amio. Ua fa'apea mai o Ia, "'Ou te tau'ave le sala o agasala a lenā tagata. Ia 'Ou 'avea le fa'asalaga, ma ia tū le tagata agasala ua salamō i Ōu luma, ua leai se agasala." O le taimi lava e talitonu ai le tagata agasala iā Keriso, o le a tula'i lea tagata agasala a e ua lē ta'usalaina i le silafaga a le Atua; auā ua fai ma ia le amiotonu o Keriso, lona uiga o le usiusita'i e atoa o Keriso ua tu'uina iā te ia. Peita'i e ao iā te ia ona galulue fa'atasi ma le mana fa'alelagi, e tu'u lana taumafaiga fa'aletagata e fa'ato'ilalo ai agasala, ma ia tū ma le ato'atoa iā Keriso. *FE* 429

E fusimau le aigā tagata atoa e le alofa o le Atua, peita'i e manuia ai na o i latou e taliina (Ioane 1:12). E mana'omia ia tali mai le alofa e mafai ai ona galue ato'atoa. Peita'i o le mea e matuā tāua, e fusimau e le alofa o le Atua ē te'ena mai fa'apea ma i latou e taliaina. E lē mafai e i latou ua lēiloa ona molia le Atua fa'apea ua lē alofa iā i latou. Pe a fa'apea ua filifili e le Atua tagata o le a lē iloa e tusa po o le ā se latou filifiliga i lea mea, o le fa'apea lea o Ia e ino'ino iā i latou. O le a ta'ua Ia o sē e lē fa'amaoni ma o le a tu'uā'ia lo latou i'uga i Ōna luga. *5 BC* 929

(12) E FA'APEFEA LE MAFAI ONA TATOU TALIAINA LE FA'AMAGALOGA O LO'O ŌFO MAI E KERISO MO I TATOU, MA IA FA'AMAMĀINA AI MAI AGASALA UMA MA FA'ASA'OLOTO AI MAI LE TA'USALAINA?

"A e afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava." I Ioane 1:9

MAU E TAU I AI: Salamo 51:1-12; Fa'ata'oto 28:13; Galuega 26:20

O le a sau Satani iā te 'oe ma fa'apea mai o 'oe o le tagata agasala. Peita'i ia 'aia ne'i fa'atagaina ia e fa'atumu lou mafaufau i le manatu fa'apea, ona o 'oe e agasala, ua tu'u 'ese 'oe e le Atua. Ia e fai atu iā te ia, "E moni, o a'u o se tagata agasala, ma o lea le pogai ou te mana'omia ai se Fa'aola." 'Ou te mana'omia le fa'amagaloga ma le fa'asa'olotoga, ma ua fetalai Keriso, pe a 'ou sau iā te Ia o le a 'ou lē malaia. I Lana tusi mo a'u, ua fa'apea mai ai, "A e afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava" (I Ioane 1:9).

O le taimi lava e te u'umau ai folafolaga a le Atua, e ala i le fa'atuatua ma le fa'apea atu, O a'u le mamoe na lē iloa ua afio mai Iesu e laveā'i, o le a tu'u se ola fou iā te 'oe, ma o le a e maua le malosi e te'ena ai lē e fa'asooso mai. Peita'i e lē aumaia e se lagona le fa'atuatua e u'umau ai i folafolaga. "O lenei, e tupu le fa'atuatua i le taugologolo atu, o le taugologolo atu fo'i o i le Afioga a le Atua lea" (Roma 10:17). Ia e lē va'ai i se suiga tele e o'o mai; e lē tatau ona e fa'amoemoe i se lagona ofoofogia o le a tupu mai.

Ia talitonu i fetalaiaga a le Atua, ua fa'apea mai ai, o Ia e alofa iā te a'u: na Ia tu'u Lona soifua mo a'u; ma o le a Ia fa'asaoia a'u....Ia tepa 'ese lau va'ai mai iā te 'oe lava, a e tepa iā Iesu. Ia e fusi iā te Ia o lou Fa'aola. Soia le ōi ona o lou tulaga maulalo. Ia tepa iā Iesu, o Lē Na te ta'ita'iina ma Lē na te fa'aato'atoaina lou fa'atuatua (Eperu 12:2), o le a fa'alototele 'oe ma le fa'amoemoe ma o le a va'aia le fa'aolataga a le Atua. Pe a e lagona ua tofotofoina 'oe ia fa'anoanoa, fa'amalosi e fai vi'iga i le Atua. "Ia outou oli'oli i le Ali'i 'aia le aunoa" (Filipi 4:4). E tatau ea ona fai vi'iga iā te Ia? Ia a'oa'o ōu laugutu e tautala fa'atatau i Lona mamalu ma vivi'i i Lona suafa.

O le asō o lo'o fetalai mai le Ali'i iā te 'oe, "'Aua e te fa'avaivai, a e tu'u mai āu 'avega i O'u luga. E lē mafai ona e tau'ave au 'oe lava agasala. O le a 'Ou aveina uma au agasala....Pe a talitonu atoa iā te A'u, o le a e lē mativa i so'o se mea lelei".... E le'i i ai lava se agaga e fa'atuatua iā Iesu ua tu'ua ina ia fa'aumatiaina. Ua fetalai le Ali'i, "O A'u, o A'u lava lē sōloi'esea āu solitulafono, ona o A'u lava; o āu agasala fo'i 'Ou te lē manatua ia" (Isaia 43:25). *HP* 116

O'U MANATUNATUGA MA TALI
(Mafai tali e sili atu i le tasi pe a tatau)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

Ua 'ou _____ o lo'o fa'aali mai i le Fa'aaliga taimi mulimuli o le tala fa'asolopito o le lalolagi, se fe'au e tolu vaega e tatau ona o'o i tulul'iga o le lalolagi. O le muamua o le vala'au ia tapuā'i i le Atua ma avatu le mamalu iā te Ia o Lē na faia i tatou, ma ua o'o mai le itūla o Lana fa'amasinoga.

'Ou te _____ o lo'o a'oa'o mai le Tusi Pa'ia sa amataina i le lagi e Lusifelo le finauga tele e fa'atatau i le tapuā'iga, o lo'o fa'aauau pea e fa'atatau i le tapuā'iga, ma o le a fa'ai'uina pe o ai o le a tatou tapuā'i i ai.

'Ou te _____ o Iesu lo'u Fa'aola na afio mai e totogiina le tau mo a'u agasala, o le a 'avea Ia ma a'u Fautua i le fa'amasinoga. O lo'o iā te a'u le filemū ona 'ou te iloa a 'ou savali pea ma Ia e leai se mea o le a 'ou fefe ai.

'Ou te alofa i lo'u Ali'i ma _____ o a'u o se tasi o 'avefe'au a le Atua ua fa'atumulia i le Agaga Pa'ia ma ua tu'u mai i ai le avanoa ia 'alaga ai ma le leo tele e ta'u atu nei fe'au mulimuli o le 'upu moni i le lalolagi.

MANATU

FA'AOPOOPO

TATALO MANA'OMIA



Lapata'iga a le Agelu Lona Lua Ua Pa'ū Papelonia

Lesona 11

'UPU A LE FA'ATONU: I lenei lesona o le a tatou iloa ai "Papelonia le 'a'ai tele," o le "Tinā o Fafine talitane," e fa'apea fo'i o le "Manu fe'ai" i le Fa'aaliga 14:9. Ua fa'aalia mai e le Atua ia mea ina ia lē fa'atasi atu ma faia le faita'aga o āna talitonuga sesē. O nei 'upu moni e fa'ataatai iā Papelonia sa ta'u atu ma le leo tele e le 'au toe fuata'iina o ekalesia Porotesano uma se'ia o'o mai i le seneturi ua te'a atu nei. Ona e le'i fa'amamafaina nei 'upu moni i ni augātupulaga ua mavae atu, ua fa'apea ona fai ma mea ua ōfo ma fa'ate'ia ai le to'atele ina ua latou iloa lenei matā'upu.

E matuā tāua ona fa'amamafaina e i ai le to'atele o i latou o i ekalesia ua fulitua o le a fa'aolaina. O i latou ia o ē matata'u ma alolofa i le Atua a e ua fa'asesēina. E lē o ē mulimuli i ai, peita'i o le fai 'upu faifai o ōna ta'ita'i ma ua latou tausī ōna talitonuga sesē ma sauniga, o lo'o 'inosia e le Atua.

I lenei lesona o le a tatou a'oa'oina ai le tala lelei o le alofa o le Atua mo Lana fanau uma i le lalolagi ma o lo'o Ia vala'au i ē o lo'o tatala ma le fa'amaoni loto mo le 'upu moni. E naunau o Ia ina ia latou ō i fafo mai so'otaga ma ekalesia ua fulitua, ina ia lē fa'amalaiaina i latou fa'aleagaga ma i'u ina 'auai i le fa'aumatiāga fa'aletino.

(1) O LE Ā LE MEA NA FAIA E LE ATUA I GAGANA A TAGATA I LE 'OLO O PAPELU, MA FAIA AI LE 'UPU "PAPELONIA" MA FA'AILOGA O LE AMIOLĒTONU MA LE FENUMIĀ'I?

"O le mea lea ua igoa ai ia o Papelu; auā na fa'a'ese'eseina i lea mea e Ieova o le gagana a le lalolagi uma; na fa'ata'ape'ape fo'i e Ieova iā te i latou ai lea mea i le lalolagi uma." Kenese 11:9

MAU E TAU I AI: Kenese 10:5

Sa taumafai malosi tagata o Papelu e fausia se malō e lē tatau ona fa'alagolago i le Atua... o la latou fa'alapotopotoga sa fa'avae i le fouvale; o se malō e fausia ia si'itia ai e le tagata ia lava, peita'i o le a lē pulea e le Atua pe fa'amamaluina ai o Ia. Pe ana fa'atagaina lenei so'ofa'atasiga, se manū o le a fa'ate'a'ese le amiotonu e se mana mata'utia, - ma o le a leai se filemū, fiafia, ma le saogalemū - mai le lalolagi. Mo poloā'iga fa'alelagi, e "pa'ia ma tonu ma lelei" (Roma 7:12), o le a taumafai tagata e suia tulafono ia feagai ma fuafuāga o a latou lava manatu fa'apito ma loto fa'asauā.

Sa fa'ai'uina fuafuāga fa'atogafiti a ē sa fausia Papelu i le masiasi ma le to'ilalo. Na fai le mea fa'amanatu mo lo latou mimitavale ma le mea e fa'amanatu ai lo latou vālea. Peita'i o lo'o tulimata'i pea lava lea auala - e fa'alagolago i le tagata lava ia a e tete'e le tulafono a le Atua. O le ta'iala lea sa taumafai Satani e fa'amalosia i le lagi; o lea fo'i sa pulea ai Kaino i le faia o lana taulaga. PP 123

(2) O Ā FA'AILOGA O LO'O FA'AAOGĀ I NEI FUAI'UPU E FA'AMATALAINA AI LE AFAFINE O SIONA - LE EKALEZIA MONI A KERISO?

"Ou te fa'aumatia le tama fafine a Siona, o lē ua matagofie ma le fa'apelepeleina." Ieremia 6:2

"Ua alu ane fo'i iā te a'u le tasi o ia agelu e to'afitu o ē sa i ai ipu e fitu na tutumu i mala e fitu e gata ai, ua tautala mai fo'i o ia iā te a'u, ua fa'apea mai, Sau ia, 'ou te fa'aali atu iā te 'oe le fa'ato'anofotane, o le faletua lea o le Tama'i mamoe." Fa'aaliga 21:9

MAU E TAU I AI: Fa'aaliga 22:17; 12:6, 13, 14, 17; Isaia 62:5

I le Feagaiga Tuai ma le Feagaiga Fou o lo'o fa'aaogā le vāfeagai i le fa'aipoipoga e fa'asino i le so'otaga pa'ia i le vā o Keriso ma Ōna tagata, o le 'au fa'aolaina na Ia fa'atau i le tau o Kalevario. Ua Ia fetalai, "'Aua e te fefe,... Auā o Lē na faia 'oe o lau tane lea, o Ieova o 'au o Lona igoa lea; o Lē na fa'atauina 'oe, o le Pa'ia o Isara'elu lea" (Isaia 54:4, 5). Ma, "Le fanau liliu 'ese e, inā fo'i mai ia, o lo'o fetalai mai ai Ieova;... 'Ou te ave'a outou" (Ieremia 3:14). MB 64 (27)

(3) O LE Ā LE IGOA O LO'O FA'AAOGĀ E FA'AMATALAINA AI LE SO'OFA'ATASIGA O EKALEZIA UA FULITUA (O FAFINE 'ELE'ELEA), O LO'O TAUMAFAI E FAUSIA A LATOU LAVA "'OLO" FA'ALEAGAGA?

"Ua tusia fo'i i lona muāūlu le igoa, O Le mea lilo, Papelonía le 'a'ai tele, o le tinā o fafine talitane ma mea e 'inosia i le lalolagi." Fa'aaliga 17:5

MAU E TAU I AI: Fa'aaliga 14:8; 18:2, 10, 21

E ui ina o lo'o fa'aailoa mai pea o Papelonía o le sui lea, mai augā tupulaga o vaega o ekalesia ua fulitua, o "Papelonía le 'a'ai tele" i le tusi o Fa'aailga e tu'ufa'atasia ai, i se va'aiga fa'apitoa, ekalesia uma ua fulitua i le taimi o le i'uga. I le Fa'aaliga 17:18, e ta'ua Papelonía o "lea 'a'ai tele" (Fa'aaliga 16:19; 18:18). Iinei e ta'ua Papelonía o le "a'ai tele" ona o le mata'upu lea o lo'o fa'aailoa ai taumafaiga tele mulimuli a Satani ina ia mautinoa o le a fa'amaoni iā te ia le aigā tagata e ala i le ekalesia. O "Papelonía le 'a'ai tele" o le igoa lea, e ala mai le Agaga Pa'ia, o lo'o ta'u ai le so'otaga sautuatoa a le Pope, o ekalesia Porotesano ua fulitua, ma le talitonuga e ola pea le agaga.

O le 'upu "Papelonía" e iloga ai lava le fa'alapotopotoga ma o latou ta'ita'i, a e lē o ni ta'ito'atasi. O lo'o ta'ua latou o "vai e tele" (Fa'aaliga 17:1, 15), ma o "ē nonofo i le lalolagi" (Fa'aaliga 17:2, 8). 7 BC 851, 852

Ua mulimuli le tele o lotu Porotesano i le fa'ata'ita'iga leaga a Roma i lona nonofo fa'apouliuli ma tupu o le lalolagi. Ua fa'apenā lotu Porotesano ia ua 'avea ma lotu a le malō i le tele o atunu'u; ua fa'apenā fo'i isi lotu Porotesano i lo latou sa'ilia o le vi'iga mai le lalolagi. Ua fetau lelei i nei lotu uma le 'upu "Papelonía" po o le fenumia'i, auā ua latou fai mai o le Tusi Pa'ia le fa'avae e tasi o a latou a'oa'oga, a e fa'auta i le tele o lotu 'ese'ese ua vaevaeina i ai i latou. E tofua lava le lotu ma ōna talitonuga ma āna a'oa'oga. GC 383 (319-320)

(4) O LE Ā LE IGOA E FA'AILOA AI LE AMIO O LO'O FA'AMATALAINA AI "PAPELONIA LE 'A'AI TELE" ONA O MEA LEAGA UMA O LO'O IA FAIA?

"Ua tusia fo'i i lona muāūlu le igoa, O Le mea lilo, Papelonía le 'a'ai tele, o le tinā o fafine talitane ma mea e 'inosia i le lalolagi." Fa'aaliga 17:5

MAU E TAU I AI: Fa'aaliga 14:8; 16:19

Ua ta'ua Papelonía o le "tinā o fafine talitane". O lona uiga o lana fanau o le fa'atusa lea o ekalesia uma o lo o pipi'i ma mulimuli i āna a'oa'oga ma āna uputu'u, ma ua latou mulimuli i lana amio o le fultua i le 'upu moni ma le finagalo o le Atua, ona o lona manatu i le nonofo fa'apouliuli ma le lalolagi. O le folafolaga o le pa'ū o Papelonía i le fe'au o le Fa'aaliga 14, e lē taumate e fa'asino tonu lea i ekalesia na amata mai o mamā, a ua pa'u'ū ma faita'aga. O lo o mulimuli mai lenei fe'au i le lapata'iga e fa'atatau i le fa'amasinoga. O lona uiga o le taimi o le i'uga e 'alagaina ai lenei fe'au. O lona uiga e lē na o le ekalesia Roma e fa'atatau i ai lenei fa'a'upuga, auā o le ekalesia Roma ua fia selau tausaga o i ai i le tulaga pa'ū ma le faita'aga.

A e lē gata i lea, o lo o i le matā'upu 18 o Fa'aaliga se vala'au i le fanau a le Atua ina ia latou ō 'ese mai Papelonía. Ua fa'ailoa mai i lenei mau e to'atele le fanau a le Atua o lo o i totonu pea lava o Papelonía. O ā ekalesia o lo o i ai le to'atele o le 'au Kerisiano i le asō? E lē taumatea o le to'atele o lo o i totonu o Lotu Porotesano 'ese'ese. GC 382, 383 (319)

I le lalolagi o lo'o ta'u mai o tagata Kerisiano, e to'atele ua liliu'ese mai a'oa'oga manino o le Tusi Pa'ia a e fausia se talitonuga mai matematega fa'aletagata ma mea fa'afagogo e fa'afiafia ai, ma fa'asino i le 'olo ua latou fauina e 'avea ma auala e a'e ai i le lagi. Ua fiafia tagata e fa'alogi i 'upu matagofie e a'oa'o mai ai o le tagata agasala e lē oti, e mafai ona maua le fa'aolataga e ui ina lē usita'i i le tulafono a le Atua. Pe a talia e so'o o Keriso tulaga na tu'u mai e le Atua, o le a so'ofa'atasia ai i latou; peita'i a si'itia a'e ia maua lea le poto fa'aletagata i lo o Lana Afioga Pa'ia, o le a i ai fevaevaeā'iga ma finauga. O lo'o tonu le fa'aaogāina o le 'upu "Papelonía" mo talitonuga 'ese'ese e tupu ai le fenumiā'i, o le valo'aga (Fa'aaliga 14:8; 18:2) lea e aofia ai ekalesia e fiafia i le lalolagi o aso fa'ai'u. PP 124

(5) O Ā ISI IGOA E LUA O LO'O FA'AAOGĀINA E FA'AILOA AI UIGA O "PAPELONIA LE 'A'AI TELE, O LO'O TU'U MAI I LE TUSI PA'IA?

"Na 'ou iloa fo'i le fafine ua onā i le toto o le 'au pa'ia ma le toto o ē na molimau iā Iesu; ua 'ou iloa atu iā te ia, ona 'ou matuā ōfo tele ai lea." Fa'aaliga 17:6

MAU E TAU I AI: Fa'aaliga 18:24; 19:2; Tanielu 7:21-25

O lona sefulu ma le tolu o senituri, na fa'atūina ai loa e le pule fa'apope lana mea faigaluega aupito sili ona mata'utia, na ta'ua o le Inikuisisi. O le Inikuisisi o le Fa'amasinoga sauā lea na fa'afeagai ma ē na tete'e i le ekalesia. Na galulue fa'atasi le ali'i o le pōuliuli ma ta'ita'i o le pulega fa'apope. Na pulea e Satani ma āna agelu mafaufau o nei tagata amioleaga a'o faia a latou fono fa'alilolilo. Peita'i latou te le'i iloa sa tū lotoloto i ai fo'i i ia fono se agelu a le Atua, na ia tusitusia uma a latou fa'ai'uga pi'opi'o ma le mata'utia na fai. Na ia tusia le tala atoa

o ia fa'asalaga - o lo latou mata'utia e lē mafai e mata o tagata ona vā'ai i ai. Ua 'ōnā Papelonía tele i le toto o le 'au pa'ia. Na vala'au a'e i le Atua tino ua saeia ma fa'ataugāina o le miliona ma miliona o le 'au maturo, auā le tauimasui a le Atua ia o'o ifo i luga o lenei pule sauā.

Ua aoao nei le pule sauā a le pope i le lalolagi. Na usita'i tupu ma ali'i sili i malelega a le epikopō Roma. Peisea'i ua i lalo ifo o lana pule le taunu'uga o tagata uma, e lē gata i le lalolagi nei, a'o lo latou taunu'uga fo'i e fa'avavau. Ua faitau selau tausaga o faia pea lava a'oa'oga a Roma, ma usita'i i ai tagata e aunoa ma se fesili. O ana sauniga na faia ma le āva e tatau ai, ma sa tausia e le to'atele o tagata ona aso fa'apitoa. Na maualuga le mamalu o ana faife'au, ma e leai se mea na latou matitiva ai. Talu mai lava nā aso, e le'i o'o le Ekalesia Roma i se tulaga e sili atu lona maoa'e nai lo mamalu maualuga ma fa'aaloaloga na ia maua i lea vaitaimi. GC 59, 60 (37, 38)

(6) O AI O LO'O SA'ILI LUSIFELO, LE POPE, MA ĀNA 'AU O I LE LALOLAGI INA IA SI'ITIA MAUALUGA A'E AI I LATOU I LO O IA?

"O 'oe fo'i sa e fa'apea ifo i lou loto, 'Ou te alu a'e i le lagi, 'ou te si'itia i luga lo 'u nofoāli'i ia sili i fetū a le Atua, 'ou te nofo fo'i i le mauga o le fa'apotopotoga i le itū i matū; 'ou te alu a'e i luga o mea maualuluga i luga a'e o ao; ma te tutusa ma Lē Silisili 'ese." Isaia 14:13, 14

"'Aua ne'i fa'asesē se tasi iā te outou i se togafiti e tasi; auā e lē o'o mai lenā aso, se'ia mua'i ona taunu'u o le tete'a 'ese, ma ia fa'aalia mai o le tagata o le agasala, o le tagata lea o le malaia, o lē tete'e atu, ma fa'amaua luga e ia iā te ia e sili i mea uma lava ua ta'uatuaina, ma mea uma ua ifo i ai tagata, o lea ua ti'eti'e ai o ia i le malumalu o le Atua, peisea'i o le Atua o ia, o lo'o fa'aali mai o ia, o le Atua lava o ia." II Tesalonia 2:3, 4

MAU E TAU I AI: Isaia 37:23; Esekielu 28:2, 6, 9; Tanielu 7:8

O le "tupu o Papelonía" moni o le a ia faoa le pule a atua 'ese - o le pule aoao lea - i luga o mea uma o le lalolagi. Ona o Satani o le tupu o Papelonía fa'aleagaga o le a fa'apea ona ia taumafai e pulea fonofaipule a le lagi, ina ia pule i le atulaulau a le Atua. 4 BC 171

(7) O LE Ā LE FA'AMATALAGA FA'ALE-TUSI PA'IA O LE 'UPU FĀIFĀI MA O LO'O TA'U MAI PEA E FA'AAOGĀ E LE TA'ITA'I O LE "TINĀ" LE EKALESIA UA FULITUA?

"Ua tali mai Iutaia iā te Ia, ua fa'apea mai, E lē se galuega lelei matou te fetogi ai 'Oe, a o le 'upu leaga; auā o 'Oe o le tagata, a ua e fai 'Oe ma Atua." Ioane 10:33

"Na a'u fia iloa fo'i le uiga o nifo e sefulu ua i lona ulu, atoa ma le tasi ua tupu a'e, ua pa'u'ū ai nifo e tolu i ona luma; o le nifo fo'i lea sa i ai mata, ma le gutu o lo'o tautala a'i 'upu fa'asausili, o lona tino mai fo'i ua sili ona tele i nisi uma." Tanielu 7:20

MAU E TAU I AI: Tanielu 7:8, 11; Fa'aaliga 13:5, 6

I tusiga fa'ale-ekalesia, sa tusia e ōna lava ta'ita'i, o lo'o fa'atumulia i 'upu fāifāi ma le fa'amaua luga a le pope. O ni fa'aa'oa'oga nei mai se galuega tele e fa'atatau i le malamalama i so'o se mea, sa tusia lava e se tasi ta'ita'i Katoliko Roma i le seneturi e 18:

"O le Pope e matuā maualuga lona mamalu ma e matuā si'itiaina, o ia e lē na o se tagata, peita'i e fa'apei o le Atua, ma le sui o le Atua..."

"O le Pope e fa'apaleina i se paleali'i sautuatuolu, e fa'aailoa atu o ia o le tupu o le lagi ma le lalolagi ma mea o i lalo ifo. ..."

"O le Pope e pei o ia o le Atua i le lalolagi, o le tupu to'atasi o le 'au fa'atuatua a Keriso, o le tupu o tupu, e tele lona mana, ua tu'u iā te ia e Lē Silisili 'ese le pule e fa'atonu ai e lē na o mea o le lalolagi a e fa'apea fo'i ma le malō fa'alelagi. ..."

"E matuā mata'utia le tele o le pule ma le mana a le Pope, o lea e mafai ai e ia ona suia, fa'amatala, pe fa'aliliuina e o'o lava i tulafono a le Atua. ..."

"E mafai e le Pope ona sui o tulafono a le Atua, ona o lona mana e lē o se tagata lea a e o le Atua, ma e galue o ia e fai ma sui o le Atua i le lalolagi e mafai ai i lana pule ona fusi mai pe 'ave'ese fo'i ana mamoe."

"So'o se mea o lo'o ta'u mai e faia e le Ali'i le Atua lava ia, ma le Fa'aola, e fai fo'i e lona sui, pe a ia lē faia se mea e tete'e i le talitonuga."

("Upu si'i mai a Lucius Ferraris, "Papa II," Prompta Bibliotheca, Vol. VI, pp. 25-29). 4 BC 831

(8) O Ā IGOA E LUA UA TU'UINA I LE TA'ITA'I O LE EKALESIA O LO'O TA'UA O LE "TINĀ O FAFINE TALITANE" O LO'O TAUMAFAI E FA'AEAINA IA LAVA E PEI O LE ATUA?

"'Aua ne'i fa'asesē se tasi iā te outou i se togafiti e tasi; auā e lē o'o mai lenā aso, se'ia mua'i ona taunu'u o le tete'a 'ese, ma ia fa'aalia mai o le tagata o le agasala, o le tagata lea o le malaia,... o lona sau fo'i e pei o le galuega a Satani, i le mana uma, ma fa'aailoga, ma vavega pepelo." II Tesalonia 2:3, 9

MAU E TAU I AI: II Tesalonia 2:3-10; I Ioane 2:18; Fa'aaliga 13:18

Na valo'ia mai e le aposetolo o Paulo i lana tusi lona lua i tagata Tesalonia, le pa'ū 'ese tele na i'u atu ai i le fa'atūina o le pule fa'apope. Fai mai Paulo, a'o lumana'i le aso o le Ali'i, o le a muamua ona to'u'ulu 'ese se to'atele, "ma fa'aali mai le tagata o le agasala, o le tagata lea o le malaia, o le tete'e atu, ma fa'amaualugaina e ia iā te ia e sili i mea uma lava ua ta'u- atuaina, ma mea uma ua ifo i ai tagata. O lea ua ti'eti'e ai o ia i le malumalu o le Atua, peisea'i o le Atua lava o ia." Ua lē gata i lea a ua lapata'i mai le aposetolo i ōna tagata ma fa'apea mai, ua amata nei lava ona galue "le mea lilo a le amioleaga" (II Tesalonia 2:3, 4, 7). Na mamao i le lumana'i le ati o le va'ai a le aposetolo, ma sa ia iloa ai le ofi mālie mai i totonu o le ekalesia o a'oa'oga sesē, e saunia ai le ala mo le tuputupu a'e o le pule fa'apope. GC 49 (28)

(9) O LE Ā LE MEA O LO'O I LE LIMA O LE EKALESIA UA FULITUA MA UA TAUMAFAI IA FAIA I MALŌ UMA?

"Ua 'ofu le fafine i le 'ie pāuli ma le mūmū, ua teuteu fo'i i auro, ma ma'a tāua, ma penina, ua i lona lima le ipu auro, ua tumu i mea e 'inosia ma le leaga o lana faita'aga;" Fa'aaliga 17:4

"O le tasi agelu fo'i ua alu atu nai le fata faitaulaga, ua iā te ia le pule i le afi, ua 'alaga fo'i ia ma le leo tele i lē ua i ai le selesaito ma'ai, ua fa'apea atu, Inā fa'ao'o atu ia lau selesaito ma'ai, inā sala ia i fuifui vine o le vine o le lalolagi, auā ua otatā ōna fuifui vine." Fa'aaliga 14:8

MAU E TAU I AI: Fa'aaliga 19:2; Ieremia 51:7

A e le'i o'o ina fa'ai'uina le galuega o le fulitua, o le a i ai se fenumiā'i o fa'atuatuāga. O le a lē ,manino manatu e fa'ataata i le mea lilo a le Atua. o le a fa'aleagaina le 'upu moni, ma o le a aumaia i totonu mea uma e taufa'afoliga. O le a ufiufi 'upu moni manino o le Afioga a le Atua e matematega uma fa'aletagata. Ua tu'u mai mea sesē a e lē o 'upu moni ina ia tatau ona ifo uma i ai. O mea moni faigofie fa'aleagaga e tanumia i lalo o tū ma aganu'u. Pe a tatou liliu 'ese mai le mau o le Afioga a le Atua, o le a tatou i lalo loa o le fa'asalaga ua tu'uina i luga o Papelonía; ua tatou feinu i le uaina o āna mea 'inosia. Mar 192

(10) E PEI O ŌNA PŌ O KERISO, O LE Ā LE MEA O LE A TU'U ATU, E TĀUA I LO O POLOĀ'IGA A LE ATUA E LE EKALESIA UA FULITUA O ASO O LE I'UGA, MA O LE A FA'ALĒAOGĀINA AI TAPUĀ'IGA O LO'O LATOU FAIA?

"Ona tali atu lea o Ia iā te i latou, ua fa'apea atu, Ua tatau lelei le valo'aga a Isaia iā te outou tagata pepelo, e pei ona tusia, Ua vivi'i mai lenei nu'u iā te A'u i o latou laugutu, a o latou loto ua taumamao iā te A'u. E tapua'i fua mai i latou iā te A'u i lo latou fai ma matā'upu o poloa'iga a tagata. Auā ua outou tu'ua le poloa'iga a le Atua, a e taofi i uputu'u a tagata, o le fufuluina o ipu ma ipu e inu ai, atoa fō'i ma nisi mea fa'apenā e tele ua outou faia." Mareko 7:6-8

MAU E TAU I AI: Mataio 15:3-9; Kolose 2:8

Ua faia e sui a Satani le lalolagi ma tulaga mo maimoāga o mea mata'utia e lē mafai e se gagana ona fa'amatalaina. O lo'o faia pea taua ma le fa'amaligi toto e malō o lo'o ta'ua o Kerisiano. Ua o'o mai fa'ai'uga mautinoa ona ua fa'alēaogā tulafono a le Atua. O fete'ena'iga tele o lo'o feagai ai nei e lē o se fa'afitauli i le vā o tagata ma tagata. O le tasi itū o lo'o tula'i mai ai le Ali'i o le ola, o le sui fa'amaoni o le tagata; o le isi e tū mai ai le ali'i o le pogisā ma agelu sa pa'u'ū i lalo o lana puleaga.

O le a i ai se fete'ena'iga malosi i le vā o ē o lo'o fa'amaoni i le Atua ma i latou e tauēmu i Āna tulafono. Ua so'olima fa'atasi le ekalesia ma le lalolagi, ma ua lē toe fa'aaloalogia le tulafono a le Atua. Ua a'oa'oina e ta'ita'i fa'aleagaga poloā'iga a tagata. E fa'apei o ōna pō o Noa, o le a fa'pea le taimi o le i'uga o le lalolagi. Mata o le fa'ateleina o le lē fa'amaoni ma le agasala o le a tosina ai ē tausi le tulafono a le Atua e so'ofa'atasi ma pule o le lalolagi e fa'alēaogā ia mea? O ē fa'amaoni moni o le a lē gauā'i atu i tā'iga leaga. Latou te lē tauēmu pe fāifāi i mea ua fa'apa'iaina e le Atua. E o'o mai le tofotofoga i tagata ta'ito'atasi uma. E na o le lua itū. O fea le itū o le a e i ai? *TMK 211*

(11) O LE Ā LE OLĒGA A LE ATUA I Ē LOTO FA'AMAONI A E UA TA'ITA'I SESĒ I AGANU'U MA TALITONUGA SESĒ A LE TINĀ O PAPELONIA MA ŌNA MAU EKALESIA TAMAFAFINE UA FULITUA?

"Ua 'ou fa'alogofa'i i le tasi leo mai le lagi, ua fa'apea mai, Lo'u nu'u e, ia outou ō 'ese iā te ia, ina ne'i fa'atasia outou i āna agasala, ina ne'i tofusia fo'i outou i ōna mala." Fa'aaliga 18:4

MAU E TAU I AI: Ieremia 51:6-8, 45; Isaia 48:20; II Korinito 6:17, 18

Se'i toetiiti lava i le taimi e o'o mai ai le i'uga, a e o le a i ai lava isi -pe to'atele fo'i - o tagata o le Atua e le'i fa'alogofa i le vala'au e ō i fafo mai Papelonía (le ekalesia sesē, o ōna tamafafine, ma le fenumiā'i o ōna talitonuga sesē e fa'avae i luga o aganu'u). *7 BC 861*

I le galuega mulimuli mo le lapata'iina o le lalolagi, e lua vala'au manino e faia i ekalesia. O le fe'au a le agelu lona lua e fa'apea: "Ona mulimuli atu ai lea o le tasi agelu, ua fa'apea atu, Ua pa'ū, ua pa'ū Papelonía o le 'a'ai tele, auā ua ia fa'ainu i nu'u uma i le uaina o le to'asā i lana faita'aga" (Fa'aaliga 14:8). Ma i le 'alaga leo tele i le fe'au a le agelu lona tolu, "Ona mulimuli atu ai lea iā te i la'ua o lona to'atolu o agelu, ua fa'apea atu ma le leo tele, 'Ai se tasi e ifo i le manu fe'ai ma lona fa'atagata, ma talia le fa'aailoga i lona muā'ulu po o lona lima" (F. 9), e fa'alogoina ai se leo mai le lagi o fa'apea mai, "Lo'u nu'u e, ia outou ō 'ese iā te ia, ina ne'i fa'atasia outou i āna agasala, ina ne'i tofusia fo'i outou i ōna mala; auā ua pa'i atu āna agasala i le lagi, ua manatua fo'i e le Atua āna amioleaga" (Fa'aaliga 18:4, 5).

O afea o le a o'o atu ai āna agasala i le lagi? Pe a fa'alēaogāina le tulafono a le Atua i le fa'atūina o tulafono fa'alemalō. Ona o'o mai lea i tagata o le Atua o Lona avanoa e fa'aali atu ai po o ai le pule o le lagi ma le lalolagi. A o fa'avevesiina vaega mai lalo e se malosi fa'aSatani, o le a auina mai e le Atua le malamalama ma le mana i Ōna tagata, ina ia ta'u atu ai le tala lelei o le 'upu moni i le lalolagi atoa. *Mar 189*

O'U MANATUNATUGA MA TALI
(Mafai tali e sili atu i le tasi pe a tatau)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'īmau pe ana ou lē iloa
Z = Se isi mea

'Ou te _____ e uiga i 'upu alofa na fa'aaogā e Keriso e fa'atatau i tamaiti - o Lana fa'ato'anofotane ma le ekalesia moni, ma o "fafine" 'ele'elea o ekalesia ua fulitua o lo'o fausia a latou "'olo" e fa'avae i luga o talitonuga sesē.

'Oi te ----- o le 'upu "Papelonía" e fa'asino tutusa ma le amiolētonu ma le fenumiā'i; ma le ala e fa'aaogāina ai e le Afioga a le Atua lea 'upu e fa'amatala ai le tele o ekalesia i nei aso fa'ai'u o le tala fa'asolopito o le lalolagi. Ua 'ou _____ nei ua 'ou iloa lenei 'upu moni mai le Tusi Pa'ia.

Mai 'upu faifai ma lona ta'u mai o ia o le Atua, ua 'ou _____ o le Pope o le ūlu o le pule fa'amanu fe'ai, ma o le "atali'i o le malaia" ma le "tagata o le agasala" na lapata'i mai Paulo o le a sau.

E ala i le alofa tunoa o le Atua, 'ou te _____ lē inu i le uaina o lana faita'aga ma mea leaga o āna talitonuga sesē, o tū ma aganu'u.

'Ou te _____ e alofa le Atua iā te a'u ma ua tu'u mai lava lapata'iga ina ia 'ou lē fa'asesēina ai ma i'u i le malaia.

Ua 'ou _____ e fa'atatau i Lona toe afio mai ma le 'ave'esea o agasala uma ma puapuagā mai le lalolagi.

MANATU

FA'AOPOOPO

TATALO MANA'OMIA



Lapata'iga a le Agelu Lona Tolu 'Alo 'Ese Mai le Fa'aailoga a le Manu Fe'ai

Lesona 12

'UPU A LE FA'ATONU: O le agelu lona lua e fa'ailoa le "fafine" amioleaga o Papelonia e aofia ai le tinā o ekalesia ua fultua ma lana fanau. O aso nei toetoe lava o fa'apotopotoga Kerisiano uma, e tusa ai ma le valo'aga (Fa'aaliga 13:3), ua mulimuli i le fa'atusa o lo latou tinā e ala i le talia o āna a'oa'oga ia o lo'o tete'e i tulafono e fa'avavau a le Atua.

O le fe'au a le agelu lona tolu ua tu'uina mai e aofia ai le lapata'iga e matuā uigā ma e mata'utia le i'uga ua ta'ua mai i le Tusi Pa'ia. O le lapata'iga o le a fa'amalamalamaina ai tagata uma i matā'upu tāua e aofia i le tauiviga mulimuli o le finauga tele. O tagata uma o le a faia se fa'ai'uga poto, o le a filifili ai i o latou i'uga e fa'avavau. E tusa ai ma Lona finagalo alofa ma le fa'apalepale ua tu'uina atu e le Atua lenei fe'au ina ia leai se tasi o Lana fanau i le lalolagi e lē iloa.

(1) O LE Ā LE TASI IGOA MO LE "TINĀ" O FA'APOTOPOTOGA O "PAPELONIA" FA'ALEAGAGA UA LAPATA'I TATOU E LE ATUA IA 'AUA TATOU TE IFO I AI?

"Ona mulimuli atu ai lea iā te i la'ua o lona to'atolu o agelu, ua fa'aapea atu ma le leo tele, 'Ai se tasi e ifo i le manu fe'ai ma lona fa'atagata, ma talia le fa'aailoga i lona muaulu po o lona lima." Fa'aaliga 14:9

MAU E TAU I AI: Fa'aaliga 16:2; 17:7; 20:4, 10

Ua fa'amatalaina mai i le matā'upu 13 (fuai'upu 1-10) se isi manu fe'ai "e pei o se nameri." O le manu fe'ai lea na tu'u i ai e le tarako "lona malosī, ma lona nofoali'i, ma le pule tele." Ua talitonu le to'atele o Porotesano o le fa'atusa lenei o le pule fa'apope, le pule lea na ia maua le malosī, ma le nofoali'i, ma le pule sa 'u'uina e le taupulega tuai a Roma. O 'upu nei ua fa'amatalaina mai ai le manu fe'ai lea ua pei o se nameri: "Ua avatu fo'i iā te ia le gutu e tautala ai i 'upu fa'asausili ma 'upu faifai. Ua tautala fo'i lona gutu i 'upu faifai i le Atua, ua ia 'upu leaga i Lona suafa, ma Lona falefetafa'i, atoa ma ē ua nonofo i le lagi. Ua tu'uina atu fo'i iā te ia e pule i itu'aiga uma, ma gagana 'ese'ese ma nu'u" (Fa'aaliga 13:5-7). Ua foliga tutusa lelei lava lenei valo'aga ma le fa'amatalaga o le nifo itiiti (Tanielu 7:8, 20), ma o nei fa'amatalaga e lua ua fa'asino tonu i le pule fa'apope. GC 439 (365)

(2) O LE Ā LE "NUMERA" O LE TAGATA O LE TA'ITA'I O LE PULE FA'ALE MANU FE'AI?

"O le mea lenei ua i ai le poto. O lē ua i ai le mafau'fau inā faitau ia o ia i le faitau aofa'i o le manu fe'ai; auā o le faitau aofa'i lea o le tagata; o lona faitau aofa'i fo'i, E ono selau ma le onogafulu ma le ono." Fa'aaliga 13:18

MAU E TAU I AI: Fa'aaliga 15:2

O le numera na o ia lava e lē mafai ona iloa ai le manu fe'ai ona e tele igoa e mafai ona fa'aopoopo ma maua ai le 666. Peita'i talu ai ona o le manu fe'ai ua uma ona fa'ailoa mai i le Tusi Pa'ia (va'ai i matā'upu fa'aopoopo), o le numera 666 e ao ina i ai se feso'ota'iga ma lenei pule. Ana leai se manū e leai se mafua'aga ua ala ai ona tu'uina atu ai e Ioane le fa'amatalaga o lo'o i lefuai'upu e 18, i le taimi lea i le fa'amatalaina o le valo'aga.

O le fa'amatalaina na maua tonu i le vaega taimi o le Toe Fuata'iina o le 666 e fetau lelei ma le Vicarius Filii Dei, o le uiga "o le sui o le Ālo o le Atua," o se tasi o suafa o le pope o Roma (Va'ai i le igoa o lo'o i se tasi o ōna paleali'i). O fainumera e fa'atele i mata'itusi o lenei suafa e maua ai le aofa'iga e fa'apea:

Vicarius Filii Dei

V=5; I=1; C=100; A=0; R=0; I=1; V (U=V)= 5; S=0; F=0; I=1; L=50; I=1; I=1; D=500; E=0; I=1
AOFa'I= 666

[O le "0" o lona uiga e leai se numera fa'aRoma e tu'uina i lea mata'itusi.] 7 BC 823

(3) O AI E MAUA MAI AI E LE MANU FE'AI LONA MALOSI, NOFOĀLI'I, MA LE PULE TELE?

"O le manu fe'ai fo'i na 'ou iloa, e pei o le nameri, o ōna vae fo'i e pei o vae o le urosa, ma lona gutu e pei o le gutu o le leona. Ua tu'uina atu fo'i iā te ia e le tarako lona malosī, ma lona nofoāli'i, ma le pule tele." Fa'aaliga 13:2

MAU E TAU I AI: Fa'aaliga 20:2

O lo o amata i le Fa'aaliga 12 se fa'asologa o valo'aga ua latou fa'aaogāina ia fa'atusa. Ua amata mai i le tarako lea na sa'ili na te fasiotia Keriso i Lona fanau mai. O le tarako o Satani lea (Fa'aaliga 12:9); o ia lea na fa'aosoina Herota na te fasiotia le Fa'aola. Peita'i o le malō o Roma ua 'avea ma sui fa'apitoa o Satani, ma o le malō lea o Roma na tete'e ma fa'asauā iā Keriso ma Ōna tagata i ulua'i senituri o le ekalesia Kerisiano, ma o le malō lava fo'i lea o Roma na mafiafia ai le pogisā o mea fa'apaupau. O le tarako la o le fa'atusa lea o Satani, ma o le fa'atusa fo'i o Roma fa'apaupau. GC 439 (365)

(4) I LE VALO'AGA A Tanielu E FA'ATATAU I LE TAIMI O LE I'UGA, O LE Ā LE MEA UA TA'UINA MAI IĀ I TATOU O "IA," LE TA'ITA'I O LE PULE FAI 'UPU FAIFAI I LE SILISILI 'ESE MA E TA'UA O LE MANU FE'AI, O LE A "MANATU" E FA'ALILIU?

"Na te faia 'upu i lē Silisili 'Ese, ma fa'aumatia le 'au pa'ia a Lē Silisili 'Ese, e manatu o ia e fa'aliliu i tausaga ma tulafono; e tu'uina atu fo'i i latou i lana pule se'ia mavae le tausaga, ma tausaga, ma le vaeluagalemū o le tausaga." Tanielu 7:25

MAU E TAU I AI: II Tesalonia 2:3, 4

O le agelu muamua o le Fa'aaliga 14 ua vala'auina tagata ia "Matata'u i le Atua, ma avatu iā te Ia le vi'iga," ma ia ifo iā te Ia o Lē na Foafoa le lagi ma le lalolagi. Ina ia faia lea mea, e ao ina usiusita'i i Āna tulafono....Afai e aunoa ma le usiusita'i i Āna tulafono, e leai se tapuā'iga e fīafīa i ai le Atua; "Auā o lenei lava le alofa i le Atua, ia tatou tausi i Āna poloā'iga" (I Ioane 5:3). RC 62

A e ua valo'ia manino mai o le tagata o le agasala e fa'amaualugaina e ia iā te ia e sili i mea uma lava ua ta'u-atuaina, ma mea ua ifo i ai tagata, ma e "MANATU O IA E FA'ALILIU I TAUSAGA MA TULAFONO" (II Tesalonia 2; Tanielu 7:25). E lē o fa'apea mai e mafai ona ia suia; peita'i e manatu o ia e faia; pe o le a pei ona fa'apea mai le faitauina e le Katoliko, "O le a manatu o ia e mafai lava e ia ona suia taimi ma tulafono." E lē o taimi ma tulafono a tagata e mantu o ia e sui, auā o mea na e mafai ona ia suia, e pei fo'i ona suia e isi pule; peita'i o se gaoioiga fa'amaualuga e lē manuia. ARSH April 3, 1855

Ua taumafai le pule fa'apope na te suia le tulafono a le Atua. Ua na 'ave'esea le poloa'iga lona lua lea e fa'asā ai le ifo i fa'atagata ma fa'atusa, a ua suia le poloa'iga lona fā ina ia fa'amamaluina ai le tausiga o le ulua'i aso o le vaiaso e sui a'i le aso fitu le Sapatu moni. A ua fai mai ta'ita'i pope ua ala ona latou 'ave'esea le poloa'iga lona lua ona e lē mana'omia, auā o lo o aofia i le poloa'iga muamua, ma ua latou fai mai latou te lē o suia le tulafono, ma o lo o tumau pea lava le poloa'iga e pei ona finagalo i ai le Atua. E lē o le liliuga lea ua valo'ia mai e le perofeta. O le liliuga lea e ta'ua iinei o se liliuga ua mafaufauina ma fuafuaina lelei. "E manatu o ia e fa'aliliu i tausaga ma tulafono." O le suiga o le poloa'iga e fā ua fetautu tonu lava ma 'upu o le valo'aga. Ua latou fai mai o le pule a le ekalesia ua latou faia ai lenei suiga. Ua manino iinei le si'itia a'e e le pule fa'apope o ia lava i luga a'e o le Atua. GC 446 (372-373)

O SE 'UPU: O le poloa'iga e fā na o le pau lenā o le tulafono e aofia ai le taimi. Va'ai i le Esoto 20:8-11.

(5) O LE Ā LE UIGA MUAMUA LAVA A LE "TASI MANU FE'AI" LEA E SO'OFA'ATASI MA LE ULUĀ'I MANU FE'AI E SAUĀINA LE 'AU FA'ATUATUA A LE ATUA?

"Na a'u iloa fo'i le tasi manu fe'ai ua alu a'e nai le fanua, ua i ai fo'i ōna nifo e lua pei o nifo o se tama'i mamoe, a ua tautala ia pei o se tarako." Fa'aaliga 13:11

"Ua i ai fo'i ōna nifo e lua e pei o nifo o se tama'i mamoe". O nifo po o seu e pei o seu o se tama'i mamoe ua fa'ailoa mai ai ni uiga talavou, ma ua fa'ailoa mai ai se mafaufau e le'i 'ano'anoa, ma ua fa'ailoa mai ai fo'i se amio filemū. Ua fetautu lelei lava lenei fa'amatalaga ma le malō o Amerika ina ua fa'aali atu i le perofeta lona "alu a'e" i le 1798. E to'atele Kerisiano na sosola i Amerika ina ia latou maua ai se lafitaga mai sauāga na faia e tupu ma le aufailotu i Europa. E to'atele nisi o lenei 'au Kerisiano na latou naunau ina ia fa'atūina se faigāmalō e fa'atūina i luga o le fa'avae o le sa'olotoga i mea tau tapua'iga ma āiā tatau a tagata.

Na fa'amauiina o latou talitonuga i le pepa ta'uta'ua ua fa'aigoaina o le Fa'asilasilaga o le Tūto'atasi. O lea pepa ua fa'ailoa mai ai le manatu maoa'e e fa'apea, "na faia tutusa tagata uma" ma sa tu'uina iā i latou le āiā tatau latou te maua ai le "ola, ma le sa'olotoga, ma latou sa'ilia ai le fīafīa." Ua fa'amautūina fo'i i le Tulafono Fa'avae o le malō o Amerika le āiā tatau a tagata latou te pulea ai i latou lava, pe afai e faia le tiute o faipule filifilia, o le faia lea ma le fa'atinoina o tulafono.

Ua tu'uina mai fo'i i le Tulafono Fa'avae a Amerika le āiā tatau a tagata ta'ito'atasi latou te tapua'i ai e tusa ai ma o latou talitonuga. E lua ni poutū tetele na fa'avaeina ai le malō o Amerika - o le āiā tatau a tagata latou te pulea ai la latou lava faigāmalō e ala i o latou sui ma faipule; atoa ma le āiā tatau a tagata latou te tapua'i ai e

tusa ai ma o latou talitonuga. O nei poutū e lua ua 'avea o le fa'apogai o le malosi ma le tamao'aiga o le malō o Amerika. O le malo lenei ua fai ma lafitaga, ua 'avea fo'i o le fa'amoemoe ma le fa'aola mo le to'atele o Kerisiano mai malō 'ese'ese o le lalolagi, o ē ua so'ona sauāina e pule o malō po o le aufailotu i o latou atunu'u. E miliona ma miliona ua latou maua so latou mapusaga ma so latou saogalemū i Amerika. Ua 'avea nei le lūnaite Setete o se tasi o malō ua sili ona malosi i le lalolagi. GC 441 (368-369)

(6) O LE Ā LE UIGA LONA LUA O LENEI MANU FE'AI E PEI O LE TAMA'I MAMOE?

"Na a'u iloa fo'i le tasi manu fe'ai ua alu a'e nai le fanua, ua i ai fo'i ōna nifo e lua pei o nifo o se tama'i mamoe, a ua tautala ia pei o se tarako." **Fa'aaliga 13:11**

MAU E TAU I AI: Fa'aaliga 20:2; 12:17

Peita'i na tautala e pei o se tarako lenei manu na i ai ōna seu e pei o se tama'i mamoe. "Ua faia fo'i e ia le pule uma a le ulua'i manu fe'ai e fai ma ōna sui, ma ua ia fa'amalosia ai le lalolagi ma ē uma ua nonofo ai ina ia latou ifo i le ulua'i manu fe'ai, le manu fe'ai lea ua toe lelei lona foa fa'apea a mate ai. ...Ua ia poloa'iina fo'i i latou ua nonofo i le lalolagi, ina ia latou faia se fa'atagata i le manu fe'ai lea na manu'a i le pelu a ua ola." Fa'aaliga 13:11-14. GC 441 (369)

(7) E FA'APEFEA ONA FA'AMATALA MAI E LE TUSI PA'IA LE FANAU A EKALLESIA UA FULITUA A E FA'ATA'ITA'I I TAPUĀ'IGA MA AMIOGA FA'AMALOSI A LE MANU FE'AI?

"Ona mulimuli atu ai lea iā te i la'ua o lona to'atolu o agelu, ua fa'apea atu ma le leo tele, Ai se tasi e ifo i le manu fe'ai ma lona fa'atagata, ma talia le fa'aailoga i lona muāūlu po o lona lima,..." **Fa'aaliga 14:9**

MAU E TAU I AI: Fa'aaliga 14:11; 13:11, 14, 15

E tu'ufa'atasia loa ekalesia i le lūnaite Setete, ma fusia fa'atasi i latou e ala i ni a'oa'oga ua latou tasi uma i ai, ma latou lolo'u maia le malō na te fa'amalosia a latou poloa'iga ma lagolagoina a latou faigātulafono, o le taimi lenā ua faia ai loa e ekalesia Porotesano i Amerika le fa'atagata o le pule fa'a-Roma. O le mea o le a soso'o ai loa o le faia lea o fa'asalaga fa'alemalō iā i latou uma o ē lē usita'i i nei poloa'iga....

O le fa'atagata i le manu fe'ai o le fa'atusa lea o lotu Porotesano pa'u'ū 'ese, i le vaitaimi o le a latou sa'ilia ai le fesoasoani a le malō ina ia fa'amalosia ai a latou poloa'iga. GC 445 (371)

Peita'i, o le ā le uiga o le "fa'atagata i le manu fe'ai"? A e fa'apefea fo'i ona faia lea fa'atagata? Ua faia le fa'atagata e le manu fe'ai e lua ōna nifo, ma ua faia o se fa'atagata i le manu fe'ai. Ua ta'ua fo'i o le fa'atagata o le manu fe'ai. Afai tatou te fia iloa le faiga o le fa'atagata, atoa ma foliga o le fa'atagata, e ao ona tatou su'esu'e lelei i uiga o le manu fe'ai - o le pule fa'apope lea. [Va'ai i mata'upu fa'aopoopo e mafai ai ona su'esu'e loloto.] GC 443 (370)

(8) O LE Ā LE MEA E AVATU E LE MANU FE'AI I LONA "FA'ATUSA" INA IA ŌNA MAUA LE MALOSI E "TAUTALA" FA'ASAGATAU MA SAUĀINA TAGATA FA'ATUATUA I LE ATUA?

"Ua tu'uina atu fo'i iā te ia na te avatua le mānava i le fa'atagata o le manu fe'ai, ina ia tautala le fa'atagata o le manu fe'ai, ma ia faia ina ia fasiotia i latou uma o ē lē ifo atu i le fa'atagata o le manu fe'ai." **Fa'aaliga 13:15**

MAU E TAU I AI: Fa'aaliga 13:14

O nifo po o seu e pei o ni seu o se tama'i mamoe, a ua tautala e pei o se tarako, o fa'atusa ia o le 'ese'ese mamao o fa'a'upuga a lea malō ma ana fa'agaioiga e fai. O le "tautala" a lea malō ua fa'asino lea i fa'agaioiga a le Fono

Faitulafono fa'apea ma le pule fa'afa'amasino. O ia fa'agaioiga o le a 'avea ai o se pepelo fa'ai'uga lelei uma ma āiā tatau ua fai ma tulafono fa'avae o lea malō. Fai mai le valo'aga o le a “tautala e pei o se tarako”, ma “o le a faia fo'i e ia le pule uma a le ulua'i manu fe'ai”. O nei 'upu ua valo'ia manino mai ai ni uiga pūlepūletutū ma le agaga o sauāga, e pei ona fa'aalia e malō uma ua fa'atusaina i le tarako, fa'apea ma le manu fe'ai lea ua foliga o se nameri. “Ua ia fa'amalosia ai le lalolagi ma ē uma ua nonofo ai ina ia latou ifo i le ulua'i manu fe'ai”. O lea fa'a'upuga ua ta'u mai ai o le a fa'aaogā e lenei malō lona malosi na te fa'amalosia ai tagata uma ina ia latou usiusita'i i le ulua'i manu fe'ai; ma o lea usita'i o le ifo atu lava lea i le pule fa'apope.

O ni fa'agaioiga fa'apea o le a 'ese'ese mamao ma Tulafono Fa'avae o le malō o Amerika; o le a lē talafeagai fo'i ma le fa'autauta na fa'atūina ai āiā tatau ma le sa'olotoga o tagata; o le a lē talafeagai fo'i ma poutū o le Fa'asilasilaga o le Tuto'atasi o Amerika, fa'apea ma ōna tulafono fa'avae. O le fa'autauta o muā'au ma ulua'i tamā o Amerika na latou taumafai ai ina ia 'aia ne'i fa'aaogāina e le ekalesia le malosi ma le pule a le malō, auā o le mea masani e tupu mai ai o uiga pūlepūletutū ma sauāga. Fai mai fa'a'upuga o le Tulafono Fa'avae a le Malō o Amerika: “E lē faia e le Fono Faitulafono a Amerika se tulafono e fa'atūina ai se lotu, pe fa'asāina ai fo'i se lotu. E lē fa'alagolago fo'i le tofiga o se tasi i se ofisa o le malō o Amerika i lana lotu.” Fa'ato'ā mafai lava ona fa'aaogā le pule fa'alemalō e fa'amalosia ai le tausiga o se mea fa'alelotu, pe afai ua solia fa'aaliali e se tasi se isi o nei āiā tatau ua 'avea ma poutū o le sa'olotoga o tagata o le malō. Peita'i ua manino lelei le fa'atusa ua aumaia i le valo'aga, e ta'u mai ai le lē ō gatasi o ni fa'agaioiga fa'apea a le malō o Amerika ma lana Tulafono Fa'avae. O lea fa'atusa, o se manu fe'ai lea ua i ai ni nifo (seu) e pei o nifo o se tama'i mamoe (e filemū ma lē gaoiā), a ua tautala o ia e pei o se tarako.

“Ua poloa'iina fo'i i latou ua nonofo i le lalolagi ina ia latou faia se fa'atagata i le manu fe'ai.” Ua manino ona fa'aalia maiinei o se itu'aiga faigāmalō e 'u'u e lima o tagata le pule ma le malosi latou te faia ai tulafono. Tasi lenei o molimau manino ua tatou iloa ai o le Iunaite Setete lea ua tautala i ai le valo'aga. GC 442 (369-370)

(9) I LE LAPATA'IGA MULIMULI MA LE MATUĀ MATA'UTIA UA TU'UINA MAI E LE AGELU LONA TOLU, O LE Ā LE UIGA O LE TAPUĀ'IGA UA TA'U MAI I Ē E FA'ATUATUA I LE ATUA IA 'AUA NE'I LATOU TU'UINA ATU I LE "MANU FE'AI" PO O LONA "FA'ATUSA"?

"Ona mulimuli atu ai lea iā te i la'ua o lona to'atolu o agelu, ua fa'apea atu ma le leo tele, Ai se tasi e ifo i le manu fe'ai ma lona fa'atagata, ma talia le fa'aailoga i lona muā'ulu po o lona lima,..." Fa'aaliga 14:9

MAU E TAU I AI: Fa'aaliga 14; Mataio 4: 9; Luka 4:7; Isaia 47:10

E le'i fa'amamuluina lava e le Ekalesia Roma lenei pule. E talia loa e le lalolagi ma ekalesia Porotesano le sapatina ia fa'atūina, a e te'ena ai le Sapati o le Tusi Pa'ia, o lo latou talia lava lea o lana pule. Atonu e fa'apea mai ekalesia Porotesano ua latou tausia le Aso Sā ona o le mea lava lea na sau ai a latou ekalesia i le amataga, ma o le mea fo'i lea na ui mai ai muā'au ma ulua'i tamā o le galuega. Afai o la latou tali lenā, o lona uiga ua latou fulitua ma lafoa'i i le fa'avae autū na pogai ai lo latou vavae'ese mai Roma. O lea fa'avae autū - "o le Tusi Pa'ia, ua na o le Tusi Pa'ia lava le ta'iala o lotu Porotesano.” Ua iloa lelei lava e le pule fa'apope ua nonofo lava le 'au Porotesano latou ma 'ōlegia i latou e ala i lo latou lē fia va'ai fa'alelei i le mea moni. A o faifaimalie mai pea le taliaina e tagata o le poloa'iga e fa'amalosia ai le Ulua'i Aso, ua 'ata'ata malie lava le pule fa'apope auā ua ia mautinoa e toe i'u uma atu lava le lalolagi o tagata Porotesano i lalo ifo o le fu'a a Roma.

Fai mai ta'ita'i Roma: “Tusa lava po o ā a latou 'upu e fai mai, ua fa'ailoa e le 'au Porotesano lo latou āva ma lo latou migao i le pule a le Ekalesia Roma, e ala i lo latou fa'amamaluina o le Aso Sā.” (Mgr. Segur, *Plain Talks About the Protestantism of Today*, p. 213.)

O le fa'asaga o ekalesia Porotesano e faia tulafono e fa'amalosia ai le tausiga o le Ulua'i Aso, o lo latou fa'amalosia lava lea o le ifo atu i le pule fa'apope po o le manu fe'ai. O le pule fa'apope na poloa'iina ai le tausiga o le Aso Sā e sui ai le Sapati Aso Fitu. O i latou uma ua latou malamalama i le uiga moni o le poloa'iga e fā, a ua latou fa'amamaluina pea le sapatise'e e sui a'i le Sapati moni, o i latou uma ia ua latou ifo atu i le pule na

faia lea poloa'iga. O le taimi e tãpã ai e ekalesia Porotesano le pule a le malō e fai fa'amalosi ai le tausiga o se tulafono fa'alelotu, o le taimi lava lea ua latou faia ai se fa'atagata i le manu fe'ai. O lona uiga, o le fa'amalosia o tulafono mo le tausiga o le Aso Sã i Amerika, o le fa'amalosia lava lea o le ifo atu i le manu fe'ai ma lona fa'atagata. GC 448-449 (374-375)

(10) A O'O INA FA'AMALOSIA E ALA I LE TULAFONO LE TAPUĀ'IGA I LE ULUA'I ASO O LE VAIASO SĀ, O LE Ā LE MEA O LE A MAUA E I LATOU O Ē LOTO MALILIE, PE ONA O SAUĀGA, O LE A FILIFILI E IFO I LE MANU FE'AI MA LONA FA'ATAGATA?

"Ona mulimuli atu ai lea iā te i la'ua o lona to'atolu o agelu, ua fa'apea atu ma le leo tele, Ai se tasi e ifo i le manu fe'ai ma lona fa'atagata, ma talia le fa'aailoga i lona muāūlu po o lona lima,..." Fa'aaliga 14:9

MAU E TAU I AI: Fa'aaliga 14:11; 13:15-17; 16:2; 19:20

O le tupua o le sapati ua fa'atūina e pei o le tupua auro sa fa'atūina i le fanua laugatasi o Tura, ma e pei o Nepukanesa le tupu o Papelonina ina ua na faia le poloa'iga o i latou uma o ē lē fa'apa'uū ma ifo i lenei tupua o le a fasiotia, e fa'apenā le poloa'iga o le a faia iā i latou uma o ē lē fa'aaloalo i le matā'upu o le Ulua'i Aso o le a fa'asalaina ma fasiotia. O le a fa'apea ona solia i vae o tagata le Sapati o le Ali'i. A e ua fetalai mai le Ali'i, "O i talofa i e pule i pulega leaga, o e tusi foi i tusi faasaua" (Isaia 10:1). L & M 8, Ms 7a, 1896

E ioe tagata Katoliko Roma o le liliuga o le Sapati o se mea na faia e la latou ekalesia. Ua latou fai mai fo'i ua talia e ekalesia Porotesano le pule a le ekalesia Katoliko Roma, e ala i lo latou tausia o le Aso Sã. O lo o ta'ua fo'i lenei mea i le tusi fesili a le ekalesia Katoliko (*Catholic Catechism of Christian Religion*). O lo o i ai se fesili po o le fea aso e ao ona fa'amamaluina ma tausia e fa'aailoa ai le usita'i i le poloa'iga e fã. Fai mai le tali o lo o i ai: "O le Aso To'ona'i le aso na fa'apa'iaina i le taimi o le tulafono tuai. Peita'i ua faia e le ekalesia le Ulua'i Aso e sui a'i le Aso To'ona'i, e ala i le fa'atonuga a Iesu Keriso ma le ta'ita'iga a le Agaga o le Atua. O le mafua'aga lenā ua tatou tausia ma fa'apa'iaina ai le ulua'i aso a e lē o le aso fitu. Ua 'avea nei le Aso Sã o le aso o le Ali'i."

A fesiligia tagata Katoliko po o le ā se molimau po o se fa'aailoga o le pule a le Ekalesia Katoliko, ona tali mai lea o a latou tagata tusitala ma fai mai: "Ua va'aia le fa'aailoga o le pule a le ekalesia i lona liliuina o le Sapati i le Aso Sã. Ma ua ioe ma talia e ekalesia Porotesano le pule a le ekalesia e ala i lo latou tausia o le Aso Sã. Ua fa'apenā ona latou talia o le pule a le ekalesia e suia ai aso pa'ia ma aso fa'aailogaina. O le pule fo'i lea na te poloa'iina ai le tausiga o nei tulafono; o se agasala fo'i pe a lē tausia ia poloa'iga". (Henry Tuberville, *An Abridgement of the Christian Doctrine*, p. 58.) O le ā ea la le uiga o le suiga o le Sapati? O le tali - o le molimau lea po o se fa'aailoga o le pule a le Ekalesia Roma - "o le fa'aailoga o le manu fe'ai". GC 447-449 (374)

(11) O FEA E TALIA AI LE FA'AILOGA O LE MANU FE'AI?

"Ona mulimuli atu ai lea iā te i la'ua o lona to'atolu o agelu, ua fa'apea atu ma le leo tele, Ai se tasi e ifo i le manu fe'ai ma lona fa'atagata, ma talia le fa'aailoga i lona muāūlu po o lona lima,..." Fa'aaliga 14:9

MAU E TAU I AI: Fa'aaliga 13:16; 20:4

O le ekalesia ua tu'ua le talitonuga a e o le a so'ofa'atasi ma pule o le lalolagi ma seoli e tu'uina i le muāūlu po o le lima le fa'aailoga o le manu fe'ai, ma manumalō ai i le fanau a le Atua ina ia ifo i le manu fe'ai ma lona fa'atagata. Latou te sa'ili ma ūna'i i latou ia lafoā'i lo latou agaga fa'amaoni i tulafono a le Atua ma gaua'i atu ma le āva i le pope. Ona o'o mai ai lea o le taimi o le a tofotofoina ai loto o tagata; auā o le fa'apotopotoga a ē ua fulitua o le a fa'amalosia ē fa'amaoni i le Atua ia ta'utino o le a latou fa'afitia le tulafono a le Ali'i, ma tete'e i le 'upu moni o Lana Afioga. O i inā o le a tu'u 'ese'ese ai le auro mai le otaota, ma o le a iloa lelei ai ē amio atua, o ē fa'amaoni ma lotomau, ma ē lē fa'amaoni ma lē tumau fa'amaoni, o le otaota ma mea 'i'ila fa'afoliga. Mar 204

O le Sapati o le fa'ailoga a le Atua; o le fa'amaufa'ailoga lea o Lana tulafono. Na fa'atonu le Ali'i e ala i Lana perofeta, "Ia fusifusi le mau, ma fa'amaufa'ailoga le tulafono i O'u so'o" (Isaia 8:16). O le poloa'iga e fā o lo o i ai le fa'amaufa'ailoga o le tulafono a le Atua. Ua na o lea le poloa'iga mai le sefulu ua tatou va'ai ai i le suafa atoa ma le tofi o Lē na tu'uina mai le tulafono. Ua ta'u mai ai o Ia o Lē na foafoaina le lagi ma le lalolagi, ma o le mafua'aga lea ua Ia fa'asāina ai ni tapua'iga i nisi atua, ua na o Ia lava. A 'ave'esea le poloa'iga e fā, e leai se mea o tusia i le isi iva poloa'iga e ta'u mai ai po o ai e ōna le pule na tu'uina mai ai le tulafono. Peita'i ua 'ave'esea le fa'amaufa'ailoga o le tulafono, ina ua suia le Sapati e le pule fa'apope. Ua vala'auina le fanau a le Atua ina ia latou toe lāgā le tausiga o le Sapati, e ala i lo latou fa'aeaina o le Sapati o le poloa'iga e fā, ina ia toe o'o i lona tulaga e 'avea ai o le ma'a fa'amanatu o le galuega foafoa a le Atua, ma le fa'ailoga o Lana pule. E lē taliaina e le Atua le tapuā'iga e fai fa'amalosia; o Āna 'au'aua e fa'amaufa'ailogaina i o latou muāūlu. GC 452 (377)

(12) E FA'APEFEA ONA MAUA LE FA'AILOGA O LE MANU FE'AI?

"Ua fetalai atu fo'i o Ia iā te i latou, Ua lelei lo outou fa'aleaogāina le poloa'iga a le Atua, ina ia outou taofi a outou uputu'u." **Mareko 7:9**

MAU E TAU I AI: Galuega 4:19; 5:29; I Samuelu 15:24; Mareko 7:7-9; Fa'aaliga 18:3

Pe a te'ena le fa'amaufa'ailoga a le Atua - pe afai o le malamalama o le 'upu moni na tu'uina atu iā te 'oe, ma fa'ailoa ai le Sapati o le poloa'iga e fā, ma fa'aalia ai e leai se fa'avae i le Afioga a le Atua ma le tausia o le Ulua'i Aso, a e peita'i o lo'o e pipi'i pea i le sapati sesē, o lo'o e tete'e i le tausiga o le Sapati pa'ia ua ta'ua e le Atua " o Lo'u aso pa'ia," ua e talia loa le fa'ailoga o le manu fe'ai. O āfea e tupu ai lenā mea? Pe afai e te usiusita'i i le tulafono fa'alemalō o le a o'o mai, e poloa'iina ai 'oe e taofi uma galuega e faia i le Ulua'i Aso o le vaiasosā ma tapua'i ai i le Atua, a e ua uma ona e iloa e leai se 'upu i le Tusi Pa'ia e fa'ailoa mai ai o le Ulua'i Aso o se aso fa'apitoa, peita'i e pei lava o isi aso e fai ai galuega, o lea ua e loto malie e maua le fa'ailoga o le manu fe'ai ma te'ena le fa'amaufa'ailoga a le Atua. Ev 235

(13) O LE Ā LE MEA E FAIA E LE ATUA PE AFAI, I LE TAIMI O LO TATOU LĒ MALAMALAMA, NA TATOU SOLI AI LANA TULAFONO, MA O LE Ā LA TATOU MEA E FAI INA UA TATOU ILOA LE 'UPU MONI?

"Na fa'apalepale le Atua i ōna pō o le vālea; a o lo'o fetalai mai nei i tagata uma i nu'u uma lava ia salamō." **Galuega 17:30**

MAU E TAU I AI: I Timoteo 1:13; Hosea 4:6; Iakopo 4:17; Eperu 10:26

E to'atele Kerisiano fa'amaoni i ekalesia 'ese'ese, e o'o lava i le Ekalesia Katoliko, o lo o latou tausia ma le fa'amaoni le Aso Sā ma le manatu o le Sapati lava lea na poloa'iina mai e le Atua. E talia e le Atua lo latou agaga usita'i fa'amaoni. Peita'i a o'o i le taimi e fa'amalosia ai tulafono mo le fa'amamaluina o le Aso Sā, ma ua malamalama le lalolagi i le tiute o le tagata e fa'atatau i le Sapati moni o le Atua, so'o se tasi loa na te solia le tulafono a le Atua i lea taimi a e tausia se poloa'iga na faia e Roma, ua fa'amamamua e lea tagata le usita'i i le pule fa'apope, i luga a'e o le Atua. Ua fa'ailoa e lea tagata lona āva ma lona migao iā Roma, fa'apea ma le malō po o le ekalesia ua latou fa'amalosia le fa'amamaluina o le aso na fa'atūina e Roma. Ua ifo atu lea tagata i le manu fe'ai ma lona fa'atagata. A'o fa'apenā ona te'ena e tagata le aso na tu'uina mai e le Atua e fai ma fa'ailoga o Lona mana foafoa, a ua latou fa'amamaluina le aso ua filifilia e Roma e fai ma fa'ailoga o lana pule, o le a fa'apenā loa ona latou talia o le fa'ailoga o lo latou fa'amaoni iā Roma, "o le fa'ailoga lea o le manu fe'ai". E manino lelei loa ma malamalama tagata i le uiga o le Sapati moni o le Atua, fa'apea ma le sapati na fa'atūina e Roma, ma ua fai ma le iloa a latou filifiliga e usita'i ai i le poloa'iga a tagata, o i latou loa o le a latou faia pea le soliga o le tulafono a le Atua i lea taimi, o le a latou maua "le fa'ailoga o le manu fe'ai." GC 449 (375)

Ua tumu le ipu o lana amioleaga, ma ua o'o mai le taimi o lona fa'asalaga. Peitai o lo o i ai pea i Papelonía nisi o le fanau a le Atua; e ao ona vala'au ia ò 'ese mai i latou ia a o le'i o'o mai le to'asā o le Atua, ne'i fa'atasia i latou i āna agasala, ma tofusia i latou i ōna mala. O le pogai lea o le fa'agaioiga lea ua fa'atusa mai i le agelu mai le lagi, le agelu lea ua malamalama ai le lalolagi i lona pupula, le agelu lea na 'alaga ma le leo tele ma folafolaina mai agasala a Papelonía. O le 'alaga fo'i lenei na sau ai ma le vala'au: "Lo'u nu'u e, ia outou ò 'ese iā te ia". O le tu'ufa'atasiga o le 'alaga a le agelu lenei ma le fe'au a le agelu lona tolu e maua mai ai le toe lapata'iga e tu'uina atu i le lalolagi. GC 604 (503)

O'U MANATUNATUGA MA TALI (Mafai tali e sili atu i le tasi pe a tatau)

A = Talitonu ma Talia	N = Ua o'otia ai a'u
B = Lagona le Fenumia'i	O = Lagona le lē Malie
C = Naunau ia Malamalama Lelei	P = Ua Fa'amalamalamaina a'u
D = Lē Tāua	Q = Lagona se Lu'iga
E = Lagona le Mamafa tele	R = Ua fa'ate'ia a'u
F = Ou te Fa'afetai	S = Lagona le Mata'u
G = Lagona le Lototele	T = Lotomalie
H = Ua 'ou To'amalie	U = Lē Talia
I = Lagona le Loto Popole	V = Tatalo
J = Ua 'ou Fiafia	W = Naunau ia Fa'aaogā i Lo'u Olaga
K = Lagona le lē Fiafia	X = Ia Fa'asoa atu i isi
L = Ua 'ou Ofo	Y = Ma'imau pe ana ou lē iloa
M = Lagona le Filemū	Z = Se isi mea

'Ou _____ mai le Tusi Pa'ia o le tinā o fa'apotopotoga a Papelonía - o le fenumiā'i fa'aleagaga - o le Pope. O le fa'apotopotoga lea na tula'i mai i le malosí, le nofoāli'i, ma le pule na 'u'umia muamua e le malō o Roma anamua, o lē na maua lona malosí mai iā Satani, le tarako.

'Ou te _____ e fa'atatau i le feso'ota'iga o le Tanielu 7:25, o lo'o fa'apea mai, "Na te faia 'upu i Lē Silisili 'ese," ma "e manatu o ia e fa'aliliu i tausaga ma tulafono." Ua 'ou _____ talu ai onei 'upu fa'amaua'uga ua fa'aaogāina e le Pope ma o latou fa'apotopotoga, o 'upu faifai lava lea.

'Ou te _____ o le matā'upu atoa e fa'atatau i le finauga tele, o le a fa'ai'u i le fa'aalia i le fa'amaoni e ala i le tapuā'iga. O lenei matā'upu ua latalata ona aumaia i luma ma o pulega tau tapuā'iga ua fulitua ma ē tete'e o le a la'asia le laina ma 'avea o le "fa'atusa o le manu fe'ai" i le una'iina o pulega fa'alemalō ina ia fa'amalosia le aso fa'afoliga e tapua'i ai.

'Ou te _____ ua saunia nei lapata'iga fa'avalō'aga i le Tusi Pa'ia ia taofia ai le fa'asesēina ma le fa'aumatiaina o a'u. O lo'u fa'anaunauga ia sa'ili pea ma aga'i i luma le malamalama i nei 'upu moni o le Tusi Pa'ia ina ia mafai ona 'ou lapata'i i nisi e fa'atatau i faigatā fa'aleagaga o le a o'o mai.

'Ou te _____ mo le Agaga Pa'ia o le Atua ia na fa'atumu ma ta'ita'i a'u. O la'u tatalo, e ala i Lona alofa tunoa, o le a mafai ona 'ou tula'i mo le mea tonu e ui ina sauāina, ma ia tausia Āna poloa'iga ma 'alo'ese mai le fa'aailoga o le manu fe'ai.

MANATU

FA'APOPO

TATALO MANA'OMIA



O le Fa'amaufa'ailoga a le Atua

Lesona 13

'UPU A LE FA'ATONU: A o le'i tapunia le faitoto'a o le alofa tunoa, o le a o'o atu i le lalolagi atoa le fe'au a agelu e to'atolu o le Fa'aaliga 14. O le a filifili tagata ta'ito'atasi po o ai o le a latou tū fa'amaoni ma tapua'i i ai. O le filifiliga o le usiusita'i i le Atua ma Āna poloa'iga, po o le usita'i i le Manu fe'ai ma tū masani a tagata. I lea lava taimi o ē mulimuli i le 'upu moni o le a maua le "Fa'amaufa'ailoga a le Atua" ma o ē liliu 'ese o le a maua le "fa'aailoga o le manu fe'ai." O le a leai se tū fa'alēogalua; o tagata uma o le a i le vaega a le Atua pe o le isi itū.

E tāua le malamalama i le taimi o le a maua ai le fa'aailoga o le manu fe'ai. E leai se tasi o le a maua le fa'aailoga se'ia pasia le tulafono fa'alemalō "o le fa'atusa o le manu fe'ai" ma fa'amalosia ai le tapua'i i so'o se aso vaganā le aso na ta'u fa'apitoa mai e le Atua i le poloa'iga e fā - le aso fitu o le Sapatu lea o le Ali'i lo tatou Atua (Esoto 20:8-11; Mareko 2:28). O le a ta'ita'ia i lenei lesona ia malamalama atili ai i le fa'amaufa'aailoga a le Atua, ma pe fa'aapefa le mafai ona tatou maua, ina ia mafai ai ona tatou 'alo'ese mai le fa'aailoga o le manu fe'ai.

(1) O LE Ā LE MEA O LE A FA'ASA'OLOTOINA I TATOU MAI TAUFUA'ASESĒ A LE MANU FE'AI MA LONA FA'ATUSA, MA FA'AALI MAI IĀ I TATOU PE FA'APEFEA ONA 'ALO'ESE MAI LE FA'AUMATIĀGA E O'O MAI PE A TALIA LONA FA'AILOGA?

"E iloa fo'i e outou le mea moni, e tu'u sa'oloto fo'i outou e le 'upu moni." **Ioane 8:32**

MAU E TAU I AI: Salamo 119:151, 152; 117:2; 91:4; Ioane 17:17

Ia 'a'ua ne'i manatu se tasi, fa'apea leaga e lē mafai ona latou fa'amatala le uiga o fa'a'ailoga uma o i le Fa'aaliga, o le a leai se aogā e latou te su'esu'e ai i lenei tusi a o taumafai ia iloa le uiga o le 'upu moni o lo'o aofia ai. O Lē na fa'aalia mai mea lilo iā Ioane o le a tu'uina i lē e sa'ili ma le fa'amaoni ia 'upu moni ina ia tofo ai i mea fa'alelagi. O i latou o ē tatala atu o latou loto ia maua le 'upu moni o le a mafai ona malamalama i ō a'oa'oga, ma o le a maua le fa'amanuiāga ua ōfo iā i latou o ē "fa'alologologo i 'upu o lenei valo'aga, ma tausi i mea ua tusia ai" (Fa'aaliga 1:3). AA 584

(2) O LE Ā LE FA'ANAUNAUGA A LE ATUA MO LANA FANAU FA'ALELALOLAGI?

"Auā o le mea lelei lea ma le mālīe i luma o lo tatou Fa'aola le Atua, o Lē finagalo ina ia fa'aolaina o tagata uma lava, ma ia o'o ina iloa lelei le 'upu moni." I Timoteo 2:3, 4

MAU E TAU I AI: Hosea 4:6; Kolose 1:10; Ioane 3:21

O le a fa'apenā ona fa'aaliali a'e agasala a Papelonía. O i'uga mata'utia o le fa'amamaluina e le malō o poloa'iga a le ekalesia, o le lofia o le ekalesia i fa'agaioiga fa'ataulaitu ma talitonuga i feso'ota'iga i le vā o tagata ola ma ē ua oti, o le vave o le fa'atupulā'ia o le malosi ma le pule a le ekalesia pope e aunoa ma le iloa e le to'atele - o le a fa'aaliali a'e ia mea uma. O lapata'iga uigā nei o le a fāgua ai le to'atele. E afe ma afe o le a fa'afofoga i mea latou te le'i fa'alogu muamua i ai. O le a latou maofa a'o latou fa'alogu o Papelonía o le ekalesia lea ua pa'ū talu ai āna amiolētonu ma āna a'oa'oga sesē, atoa ma lona te'ena o le 'upu moni na 'auina atu iā te ia mai le lagi. GC 606 (505)

(3) O LE Ā LE POGAI E TATAU AI ONA 'AVE I LE ATUA, MA NA O LE ATUA LAVA, LA TATOU TAPUĀ'IGA?

"Le Ali'i e, e tatau lava 'Oe ina ia tu'u atu iā te 'Oe le vi'iga, ma le fa'ane'ene'ega, ma le mana; auā na E faia mea uma lava, ona o Lou finagalo fo'i e i ai i latou ma ua faia." Fa'aaliga 4:11

MAU E TAU I AI: I Nofoā'iga Tupu 16:25-34; Salamo 96:1-13; Iopu 9:4-10

O Lē na foafoaina le atulaulau, e na o Ia lava e 'ave i ai le tapuā'iga moni. E leai se tagata, po o se agelu e tatau ona tapuā'i i ai. O le avanoa ma le aiā lea e na o le Atua e tatau i ai. O Lē foafoaina mea uma o se tasi o tulaga fa'apitoa o le Atua moni pe a fa'atusa atu ma atua pepelo. 7 BC 828

Ua vala'auina tagata i le Fa'aaliga 14 latou te tapua'i atu i Lē na foafoaina mea uma lava. Ua aliali mai fo'i i le valo'aga se vasega o tagata ua latou tausia poloa'iga a le Atua talu ai lea fe'au sautuatu. E i ai se tasi o ia poloa'iga ua ta'u manino mai ai le Atua o Ia o le na foafoaina mea uma. Fai mai le poloa'iga e fā: "O le aso fitu o le sapati lea iā Ieova lou Atua: ...auā na faia e Ieova i aso e ōno o le lagi ma le lalolagi, atoa ma le sami, ma mea uma lava o i ai. Ona malōlō ai lea o Ia i le aso fitu. O le mea fo'i lea na fa'amanuia ai e Ieova le aso sapati, ma na fa'apa'iaina ai" (Esoto 20:10, 11). Na fetalai fo'i le Ali'i e fa'ataata i le Sapati ma ua Ia ta'ua le Sapati "o le fa'a'ailoga, ina ia iloa ai e outou, o A'u lava o Ieova lo outou Atua" (Esekielu 20:20). A o le ā le mafua'aga? "Auā o aso e ōno na fai ai e Ieova le lagi atoa ma le lalolagi; a'o le aso fitu, na Ia malōlō ai, ma mapu ai" (Esoto 31:17).

"Ua 'avea le Sapati o se fa'amanatu tāua o le foafoāga ona ua fa'amanatu mai ai le mafua'aga moni e ao ai ona avatu i le Atua le tapua'iga - auā o Ia o Lē Foafoa, a'o i tatou o mea na faia e Ōna 'a'ao. Ua fa'apenā ona 'avea le Sapati o le fa'avae o tapua'iga uma i le Atua; e leai se isi fa'amanatu, e leai fo'i se isi sauniga ua sili atu ona manino ai o le a'oa'oga o lenei 'upu moni, nai lo le Sapati. O le Atua o Lē Foafoa, a'o i tatou o mea na faia e Ōna 'a'ao. O le mafua'aga moni lea e ao ai ona ifo ma tapua'i tagata uma i le Atua ma avatu iā te Ia le vi'iga. O le pogai tonu lenā ua tatou faia ai tapua'iga i le Atua, ma ua aofia ai so'o se tapua'iga a e lē na o tapua'iga e faia i le aso fitu. E tumau pea e lē mavae lenei a'oa'oga tāua, ma ua ao ona lē fa'agaloina" (J N Andrews, *History of the Sabbath, chapter 27*). Na fa'atūina e le Atua le Sapati i Etena ina ia fa'amanatu mai ai pea i mafaufau o tagata

lenei 'upu moni. Afai ua ala ona faia o tapua'iga i le Atua ona o Ia o Lē Foafua, afai e tumau pea lea mafua'aga mo le faia o tapua'iga i le Atua, o lona uiga e tumau fo'i le Sapati e 'avea o Lona fa'ailoga ma Lona ma'a fa'amanatu. Ana tausia le Sapati i le lalolagi atoa, semanū ua ta'ita'iina atu manatu o tagata ina ia ifo ma tapua'i i Lē na faia mea uma, ma o le a fa'apenā ona lē maua ai i le lalolagi o se tagata ifo i tupua, po o se tagata e lē talitonu i le Atua po o Lana afioga. O le tausiga o le Sapati o se fa'ailoga lea o le fa'amaoni o le tagata i le Atua moni, o Lē “na faia le lagi ma le lalolagi, atoa ma le sami ma puna o vai.” O lona uiga e lē mafai ona fa'ataunu'uina le fe'au lea ua fa'atunuina ai tagata latou te ifo i le Atua ma tausi Āna poloa'iga, e lē mafai ona taunu'u lenei fe'au se'ia vaganā ua i ai se vala'au fa'apitoa i tagata latou te tausi i le poloa'iga e fā. GC 437 (364-365)

(4) O LE FA'AMAUFUA'AILOGA O TA'TA'I UMA E AOFIA AI O LATOU IGOA, O LE SUAFA, MA LATOU PULEAGA. E FA'APEFEA ONA FA'AMATALAINA MEA E AOFIA I LE FA'AMAUFUA'AILOGA A LE ATUA O I LE POLOA'IGA E FĀ, MA O LO'O FA'ALEOINA I LE FE'AU LAPATA'I I ASO FA'AI'U O LE LALOLAGI?

"Auā na faia e Ieova i aso e ōno o le lagi ma le lalolagi, atoa ma le sami, ma mea uma lava o i ai, ona malōlō ai lea o Ia i le aso fitu; o le mea fo'i lea na fa'amanuia ai e Ieova le aso Sapati, ma na fa'apa'iaina ai." Esoto 20:11

"Ua fa'apea atu ma le leo tele, Ia outou matata'u i le Atua, ma avatu iā te Ia le vi'iga, auā ua o'o mai le itu aso o Lana fa'amasinoga; ma ia outou ifo i Lē na faia le lagi, ma le fanua, ma le sami, atoa ma puna o vai." Fa'aaliga 14:7

MAU E TAU I AI: Salamo 115:15; 146:5, 6; Galuega 4:24

O le Sapati o le mea fa'amanatu po o le FA'AILOGA o le mamalu fa'aletupu o le Atua ma le pule na FOAFOA ai lagi ma le lalolagi. O le fa'amaufua'ailoga a se tupu o le mea fa'amanatu po o le FA'AILOGA o lona mamalu fa'aletupu ma le mana, ma le aiā pule i le malō. E fa'apea fo'i le Sapati o le FA'AILOGA po o le FA'AMAUFUA'AILOGA a le Tupu e Fa'avavau, le fa'ailoga o le mamalu ma le mana fa'aletupu o Ieova, ma le aoao o Lana puleaga. O le mea lea, o le poloa'iga e fā e aofia ai le ato'atoa o le igoatusi ma le fa'amaufua'ailoga o le Mamalu o le Lagi. E aofia ai le igoatusi ma le fa'amaufua'ailoga o le tulafono a le Atua. O le fa'avae a le malō pa'ia a le Atua ma vaega tau i talitonuga sa fa'amauiina ma fa'amaonia e ala i le tulafono e fā, o lo'o fa'asino mai ai Ia lava ma ta'u mai ai le igoa, o Lona suafa mamalu fa'aletupu, ma le FA'AILOGA po o le fa'amaufua'ailoga lava o le mea e tasi. ARSH Sept 16, 1852

E lē o tu'uina mai le Sapati o se mea fou a e sa fa'avaeina i le taimi ole foafoāga. E fa'asino i le Atua o Lē na faia lagi ma le lalolagi, e fa'ailoa ai le Atua moni e 'ese mai atua pepelo. O lea o le Sapati o le fa'ailoga o le tagata e fa'amaoni i le Atua. O le poloa'iga e fā, e pau lea o le tasi mai le sefulu o lo'o maua ai le igoa ma le suafa o Lē na aumaia lle Tulafono, e na o Ia o lo'o fa'aalia o Lana pule na tu'u mai ai le tulafono. O lea la e aofia ai iinei le fa'amaufua'ailoga a le Atua. FEP 212

(5) O LE Ā LE ASO FA'APITOIA NA FAIA AI E LE ATUA LONA SAPATI, FA'ATONU TATOU IA MALŌLŌ AI, TU'U I AI LE FA'AMAUFUA'AILOGA O LANA PULEAGA, MA TA'U MAI I TAGATA UMA NA IA FAIA IA FA'AMAMALUINA I VAIASO SĀ UMA TA'ITASI, E FAI MA FA'AMANATUGA O IA LĒ NA FOAFOA I TATOU?

"O le aso fitu o le sapati lea iā Ieova lou Atua; 'aia e te fai ai se galuega e tasi, o 'oe, ma lou atali'i, ma lou afafine, o lau 'au'auna tane, ma lau 'au'auna fafine, o āu manu fo'i, ma le tagata 'ese o lo'o mau ma 'oe. Auā na faia e Ieova i aso e ōno o le lagi ma le lalolagi, atoa ma le sami, ma mea uma lava o i ai, ona malōlō ai lea o Ia i le aso fitu; o le mea fo'i lea na fa'amanuia ai e Ieova le aso Sapati, ma na fa'apa'iaina ai." Esoto 20:10, 11

MAU E TAU I AI: Esekielu 31:17; Esekielu 20:20; Mareko 2:28

O le ā le agasala? - "o le agasala o le solitulafono lava lea" (I Ioane 3:4). Ua ta'uleagaina e le Atua Papelonía, "auā ua ia fa'ainu i nu'u uma i le uaina o le to'asā i lana faita'aga" (Fa'aaliga 14:8). O lona uiga ua ia tu'u'ese le poloā'iga e tasi e fa'asino i le Atua moni, ma ia toso fa'amalepe i lalo le Sapati, o le mea fa'amanatu a le atua o le foafoāga.

Sa faia e le Atua le lalolagi i aso e ōno ma malōlō i lona fitu, na fa'apa'ia lea aso, ma tu'u 'ese mai isi aso uma, e pa'ia mo Ia lava (F. 11 vaega mulimuli), ina ia tausia e Ōna tagata mo augātupulaga uma. Peita'i, o le ali'i o le agasala, ua fa'aea ia lava i luga a'e o le Atua, ua nofo i le malumalu o le Atua, ma fa'aali mai o ia o le Atua, ma manatu e na te suia taimi ma tulafono. O lenei malosi, ua manatu ai e na te fa'amaonia ai e lē na o na tutusa ma le Atua, a e i luga a'e o le Atua, ma na suia ai le aso malōlō, ua tu'u le ulua'i aso o le vaiaso sā i le tulaga e tataua ona i ai le aso fitu. Ma ua fa'apea ai le lalolagi Porotesano ona latou 'avea lenei tama fanau a le pope ma ta'ua fo'i e ia o le aso pa'ia. O le mea lenei e ta'ua i le Afioga a le Atua o lana "faita'aga" (Fa'aaliga 14:8). *Letter 98, July 10, 1900*

(6) I LE FA'AI'UGA O LE VAIASO O LE FOAFOĀGA, O Ā MEA E TOLU NA FAIA E LE ATUA E MANINO AI NA TU'U'ESE LE ASO FITU MAI ISI ASO E ŌNO, MA E LE'I TU'UINA SE FA'ATONUGA E SUIA AI MAI LE KENESE E O'O I LE FA'AALIGA?

"Ua fa'auma e le Atua i le aso fitu lana galuega na faia e Ia; ona malōlō ai lea o Ia i le aso fitu i Lana galuega uma na faia e Ia. Ona fa'amanuia atu lea e le Atua i le aso fitu, ma na fa'asāina ai; auā na malōlō ai o Ia i Lana galuega uma lava na faia e le Atua ma na saunia." Kenese 2:2, 3

MAU E TAU I AI: Esoto 20:11; 16:26; Teuterenome 5:14; Eperu 4

Na fa'atūina ma fa'apa'iaina e le Atua Foafoa le Sapati ina ua Ia mālōlō ai ma fa'amanuia i ai. Na tausia le Sapati e Atamu i le vaitaimi a'o le'i agasala o ia i Etena; na tausia e Atamu le Sapati i fafo o Etena ina ua pa'ū o ia ma tuli'esea i Etena. Na tausia le Sapati e le 'au pateriaka uma - na amata mai iā Apelu se'ia o'o iā Noa, ma Apera'amo, ma Iakopo. Na mōu mālīe atu le malamalama o le Atua ma Lana tulafono mai le nu'u filifilia a o latou nofo pologa i Aikupito. Peita'i na toe lavea'iina e le Ali'i Lona nu'u, ma e maoa'e ma mata'utia se va'aiga ina ua tu'uina mai e le Atua Lana tulafono i Lona nu'u a o latou potopoto, ina ia latou iloa ai Lona finagalo, ma latou usita'i ai iā te Ia e fa'avavau.

Talu mai lava lenā aso se'ia o'o mai i le asō, o lo o i ai pea lava i le lalolagi le malamalama'aga o le tulafono a le Atua, ma o lo o tausia pea lava le Sapati o le poloā'iga e fā. E ui ina fa'amanuiaina faiga a le "tagata o le agasala" na te solipalaina ai le aso pa'ia o le Atua, peita'i, na o'o lava i le vaitaimi o le matuā malosi o lana pule, a e to'atele le 'au fa'amaoni na latou lalafī solo i āna i mauga ma mea tu'ufua i le vaomatua, ma latou tausī ai i le Sapati ma le fa'amaoni. Talu mai lava le vaitaimi o le galuega o le Toe Fuata'iga, e tofu lava le augātupulaga ma nisi na latou fa'amaoni i le tausiga o le Sapati. E tele taimi na faia ai le molimau a lenei 'au fa'amaoni i le tele o puapuagā ma sauāga ma tauēmuga; peita'i, e le'i motu le laina o le 'au fa'amaoni o ē na tau'aveina le molimau e uiga i le tumau e fa'avavau o le tulafono a le Atua, atoa ma le tiute pa'ia o le tagata e tausia ai le Sapati, le ma'a fa'amanatu o le foafoāga a le Atua. *GC 453 (378-379)*

(7) INA UA MAVAE LE FA'ASATAUROINA O KERISO, O LE Ā LE MEA NA FAIA E ŌNA SO'O I LE SAPATI E TUSAI MA LE POLOĀ'IGA?

"Ua na 'ave ifo ai, ona aui lea i le 'ie lino, ona tu'u ai lea i le tu'ugamau na foa i le papa, e le'i tu'u ai lava se tasi. O le aso lea o le sauniga, ua latalata le Sapati. Ua mulimuli atu fo'i fafine ē na ō mai ma Ia mai Kalilaia, ua latou va'ava'ai i le tu'ugamau, ma le tu'uina ai o Lona tino. Ua latou toe fo'i atu, ua sauni mea manogi ma suāu'u manogi; ua latou malōlō fo'i i le Sapati, e tusa ma le poloā'iga." Luka 23:53-56

MAU E TAU I AI: Mataio 27:62; 28:1; Mareko 15:42; 16:2

Mulimuli ane ua mālōlo Iesu. O le aso umi o le fa'alumaina ma le sauāina ua mae'a. A o fa'aulufale mai e toe 'ave o le lā le Sapati, ua mālōlō filēmū le Ālo o le Atua i le tu'ugamau o Iosefa. Ua mae'a Lana galuega, o Ōna 'a'ao ua mālōlō i le filēmū, ua mālōlō o Ia i itūlā pa'ia o le aso Sapati. DA 769 (603)

O lo'o ta'u fa'apitoa mai e Luka le Aso Faraile, le aso o "sauniuniga" (F 54), le aso Sapati (F. 54, 56), ma le "ulua'i aso o le vaiaso" (Luka 24:1). E le mafai ona fesiligia le fa'asologa o nei aso po o latou igoa e iloga ai. Sa fa'asatauroina Keriso i le Aso Faraile, mālōlō i le tu'ugamau i le Sapati (Aso To'ona'i), ina ua fa'ataunu'uina le galuega o le fa'aolataga, ma na toe tū a'e i le aso na soso'o ai, le aso muamua o le vaiaso (Aso Sā). 5 BC 879

"Ua latou mālōlō fo'i i le Sapati, e tusa ma le poloā'iga; peita'i o le ulua'i aso o le vaiaso..." O lenei fa'aliliuga ua ta'u manino mai ai le fa'amamaluina o le Sapati aso fitu e nei ulua'i so'o Kerisiano. O le mea mulimuli sa latou faia i le Aso Faraile o le saunia o "mea manogi ma suā'u manogi" (Luka 23:56). Na latou teu'ese mea uma e "tusa ma le poloā'iga," ma na le'i toe faia le latou galuega alofa se'ia o'o i le tafa o ata i le taeao o le ulua'i aso. O le 'ese'esega o le pa'ia o le Sapati ma le uiga fa'alelalolagi o le Uluā'i Aso ua fa'amamafaina i le tala lelei o lo'o ta'u manino mai mo Kerisiano o ōna pō nei. 5 BC 880, 881

(8) O LE Ā LE ASO O LE VAIASO O LE A "Ō MAI AI TAGATA UMA LAVA E IFO" I LE ATUA I LE LALOLAGI FOU?

"Auā e pei ona tumau i O'u luma o le lagi fou ma le lalolagi fou 'Ou te faia, ua fetalai mai ai Ieova, e fa'apea ona tumau o ā outou fanau ma lo outou igoa. O lea masina fa'ato'ā va'aia, ma lea masina fa'ato'ā va'aia, o lea Sapati ma lea Sapati e ō mai ai tagata uma lava e ifo mai i O'u luma, ua fetalai mai ai Ieova." Isaia 66:22, 23

MAU E TAU I AI: Isaia 40:8; 55:11; Mataio 24:35

O le Sapati e lē mo na o Isara'elu, peita'i e mo le lalolagi. Na ulua'i fa'a'iloa i le tagata i Etena, ma e pei o i si vaega o Poloā'iga e Sefulu, e lē mafai ona fa'alēaogāina. O le tulafono lea o le isi ona vaega o le poloā'iga e fā, na fa'a'iloa mai e Keriso, "E mavae atu le lagi ma le lalolagi, a e lē mavae atu lava se iota po o sina fasi mata'itusi o le tulafono" (Mata. 5:18). O le umi e tumau ai le lagi ma le lalolagi, e tumau pea fo'i le Sapati, o se fa'a'iloga o le mana o Lē na foafoaina mea uma. Pe a toe va'aia le matagofie o Etena i le lalolagi, o le aso mālōlō pa'ia o le Atua o le a fa'amamaluina e mea uma o i lalo o le lā. "O lea Sapati ma lea Sapati," e ō mai uma i latou o nonofo i le lalolagi fou "e ifo mai i O'u luma, ua fetalai mai ai Ieova" (Isa. 66:23). DA 283 (209)

(9) O LE Ā LE MEA O LO'O FETALAI MAI LE ATUA, I LE AMATAGA O LE POLOĀ'IGA E FĀ, IA FAIA E MEA NA IA FOAFOA E FA'ATATAU I LE SAPATI ASO FITU, O LEA UA GALO E LE TO'ATELE O LE LALOLAGI, UA LĒ AMANA'IAINA, PE O LO'O LĒ ILOA E LATOU?

"Ia e manatua le aso Sapati e te fa'apa'iaina." Esoto 20:8

MAU E TAU I AI: Teuterenome 5:12-14; Eperu 4:1-11

Sa taumafai le pope e suia le aso mālōlō mai le aso fitu i le ulua'i aso. Ua manatu lava ia e suia le poloā'iga na tu'uina mai ia manatua ai e le tagata Lē na faia o ia. Ua manatu ia e sui le poloā'iga e aupito sili le tāua o le sefulu ma 'avea ai ia ia tutusa ma le Atua, po o le sili a'e le maualuga i lo le Atua. O le Atua e lē ma-suia, o le mea lea o Lana tulafono e mautū; peita'i ua si'itia a'e e le pope ia lava i luga a'e o le Atua, ina ua ia sa'ili e sui Āna poloā'iga e lē masuia, e pa'ia, e tonu, ma lelei. Ua ia solipala le aso na fa'apa'ia e le Atua, ma ua tu'u i lona tulaga, mai lana lava pule se tasi o aso e galulue ai. Ua mulimuli nei le malō atoa i le manu fe'ai, ma ua latou gaoia mai le Atua i vaiaso ta'itasi uma Lana taimi pa'ia. Ua solia e le pope ma fa'amalepe le tulafono pa'ia a le Atua. EW 65

O pule fa'aekalesia, ua 'aufa'atasi atu i le lagi e ala i talitonuga, ma ta'u mai e uiga pei o se tama'i mamoe, o le a fa'aali mai i a latou amioga e iā i latou le loto o le tarako, ma e una'iina ma pulea e Satani. O le a o'o mai le taimi e lagona ai e tagata o le Atua le lima o sauāga ona e latou te tausi le Sapati aso fitu. Ua taumafai pea Satani e

sui le Sapati ma le fa'amoemoe ia fa'ataunu'u lana fuafua e fa'ato'ilalo fuafuāga a le Atua. O lo'o ia sa'ili e fa'ato'ilalo poloa'iga a le Atua a e fa'amalosia tulafono fa'aletagata i le lalolagi.

O le ali'i o le agasala, na manatu e suia taimi ma tulafono, ma o lo'o ia fa'amafatiaina pea tagata o le Atua, o le a faia tulafono e fa'amalosia ai le tausia o le ulua'i aso o le vaiaso. Peita'i e tatau i tagata o le Atua ona tū malosi mo Ia, ma o le a galue pea le Ali'i mo i latou, e fa'aali manino atu ai o Ia o le Atua o atua uma. *MS 14, 152*

(10) O Ā ALA E FĀ O LO'O TA'ITA'ISESĒ AI, PE O ILOA PE O LE LĒ AMANA'IA, E TA'ITA'I KERISIANO A LATOU SO'O E FA'ALĒAOGĀ LE SAPATI MONI O LE POLOĀ'IGA E FĀ?

"Ia outou, ne'i fa'atagataotauaina outou e se tasi i le poto lē aogā e fa'asesē ai, e tusa ma le uputu'u a tagata, e tusa ma matā'upu muamua a le lalolagi, a e lē tusa ma matā'upu a Keriso." **Kolose 2:8**

MAU E TAU I AI: Mareko 7:7-9, 13; Mataio 15:3

Ua ō atu nei tagata i a latou faife'au ma fesili i ai pe moni nei mea uma. Peita'i o le a fai mai i ai e le 'aufailotu ni valo'aga o 'upu lamolemole ma 'upu suamalie, e fa'anofo ai i latou ma fa'afilemū ai o latou mafaufau ua fāgua nei. Peita'i e to'atele o le a lē fa'amalieina i latou i' upu a tagata, ma ua latou fai i a latou faife'au po o fea ni mau o le Tusi Pa'ia e fa'amaonia ai a latou 'upu. O mea fa'apea o le a oso ai loa le to'atama'i o le 'aufailotu e pei lava o le 'au Faresaio anamuā, ona ua lē talia e nisi le 'upu ua latou fai atu ai. Ua fa'apenā loa ona ta'uleagaina e lenei 'aufailotu le fe'au ma latou fai mai o lea fe'au e pogai mai iā Satani. Ua latou fa'aosoa fo'i le 'au amioleaga latou te 'upu leaga ma sauāina ē na folafolaina lenei fe'au. *GC 607 (505)*

O le matā'upu fa'apitoa o le a te'ena o lona fā o Poloā'iga e Sefulu. E i ai i tagata Kerisiano se talitonuga matuā tāua le tausia o tulafono e iva, peita'i i tausaga amata ina ua fa'atū a'e ekalesia Kerisiano, sa amata ai ona tu'u'ese le Sapati aso fitu a e sui ai le tausiga o le ulua'i aso o le vaiaso, e fai ma aso e tapua'i ai (Va'ai i le Tanielu 7:25).

Ua tu'u mai e Kerisiano tapua'i-Aso Sā o nei ōna pō 'alofaga e fa'atatau i le ala ua latou tausai ai le ulua'i aso o le vaiaso a e lē o le aso fitu, ma le pogai ua lē amana'ia ai le Sapati o le amataga. Ua fai mai isi ua fa'alēaogāina Poloa'iga e Sefulu atoa ma tulafono uma o le Feagaiga Tuai; o isi ua fa'apea o le taimi o le poloa'iga e fā e na o se sauniga a e tatau ona tapua'i i so'o se aso e tasi mai aso e fitu.

Ua leva ona ta'ua pea e le ekalesia Roma na suia i lana pule fa'aleatua le fa'apa'iaina o le aso lea ua sui i ai. Peita'i sa taumafai lava i nai tausaga ua mavae e fa'atāua le pule a Keriso ma le 'au aposetolo. Ona e leai se fa'amaoniga o nei talitonuga mai le Tusi Pa'ia, e lē taliaina e i latou o lo'o fa'alagolago i le Tusi Pa'ia, ma e na o le Tusi Pa'ia e fa'atuatua i ai. *7 BC 832*

(11) E FA'APEFEA ONA FA'AMATALA E KERISO LE TĀUA O TAPUĀ'IGA MAI IĀ I LATOU O LO'O A'OA'O MAI FA'ATALITONUGA POLOĀ'IGA A TAGATA?

"E tapua'i fua mai i latou iā te A'u i lo latou fai ma matā'upu o poloā'iga a tagata." **Mareko 7:7**

MAU E TAU I AI: Galuega 4:19; I Samuelu 15:24

E fa'apei ona tu'uina le la'au e iloa ai le lelei ma le leaga i ogātonugalemū o le Fa'ato'āga i Etena, e fa'apea le tulafono o le Sapati i le ogātononu o Poloā'iga e Sefulu. E fa'atatau i le fua o le la'au e iloa ai le lelei ma le leaga, sa faia ai se puipuiga fa'apea, "'Aua ma te 'a'ai ai, 'aua fo'i ma te papa'i atu i ai, ne'i mā oti" (Kenese 3:3). Na fetalai le Atua e uiga i le Sapati, Ia e lē fa'aleaga i ai, a e ia tausai ia pa'ia. "Ia e manatua le aso Sapati e te fa'apa'iaina" (Esoto 20:8). E pei ona fai le la'au e iloa ai le lelei ma le leaga e tofotofo ai le usiusita'i o Atamu, e fa'apea le poloā'iga e fā ona 'avea ma tofotofofa ua tu'u mai e le Atua e fai ma fa'amaoniga o le loto fa'amaoni o Ōna tagata uma. *OHC 343*

O le Sapati o le mata'upu fa'apitoa lea o le a iloiloina ai tagata uma po o le fea itū ua latou fa'amaoni i ai; o le mata'upu lea ua fa'asintonu nei i ai le finauga tele. E faia loa lenei iloiloga, ona va'aia loa lea o le 'ese'esega i le vā o e 'au'auna i le Atua ma i latou o ē tete'e iā te Ia.

O le tausiga o le sapati sesē o le a fa'ailoa ai le usita'i i le poloa'iga a le malō, o le a fa'ailoa ai le tete'e i le poloa'iga e fā, ma fa'ailoa ai fo'i le fa'amaoni o le tagata i le pule ua tete'e i le Atua. Peita'i o le tausiga o le Sapati moni o le a fa'ailoa ai le usita'i i le tulafono a le Atua, ma fa'ailoa mai ai fo'i le fa'amaoni o le tagata i Lē na foafoaina mea uma. O le vaega muamua latou te maua le fa'ailoga o le manu fe'ai talu ai lo latou gaua'i i le pule fa'alelalolagi; peita'i o le vaega lona lua ua latou filifilia le aso ua fai ma fa'ailoga o le pule fa'alelagi, ma ua latou maua le fa'amaufa'ailoga a le Atua. GC 605 (503)

(12) O LE Ā LE MEA E FAI LE SAPATI MA FA'AILOGA?

"Na 'Ou avatu fo'i iā te i latou O'u Sapati, e fai ma fa'ailoga iā te A'u ma i latou, ia latou iloa ai o A'u o Ieova Lē fa'apa'iaina i latou." Esekielu 20:12

MAU E TAU I AI: Esekielu 20:20; Esoto 31:13, 17

Na fetalai Keriso mai le ao fa'aniutū e fa'atatau i le Sapati: "Tou te tausi lava i O'u sapati, auā o le fa'ailoga lea iā te A'u ma outou, e o'o i a outou tupulaga amulī, ina ia iloa ai, o A'u nei o Ieova, o Lē fa'apa'iaina outou" (Esoto 31:13). Ua tu'uina mai le Sapati i le lalolagi o se fa'ailoga o le Atya na faia mea uma ma o Ia Lē na fa'apa'iaina mea uma. O le mana na faia mea uma o le mana lava lea e toe fa'afouina ai le agaga i Lona lava fa'atusa. Mo i latou o ē tausi le aso Sapati, o le fa'ailoga lea o le fa'apa'iaina. E ō gatasi le fa'apa'iaina ma le Atua, e uiga fa'atasi ma Ia. E maua lea e ala i le usiusita'i i ta'iala o Lona uiga o lo'o tu'u mai, ma o le Sapati o le fa'ailoga o le usiusita'i. O lē usiusita'i ma le loto atoa i le poloa'iga e fā o le a usiusita'i i le tulafono atoa. O ia lea e fa'apa'iaina e ala i le usiusita'i. 6 T 350

Ua sa'ili pea tagata e fausia mea 'ese'ese. Ua latou 'ave se aso e le'i fa'apa'iaina e le Atua, ma ua tu'u i ai avanoa pa'ia. Ua latou ta'u mai o lea aso e pa'ia, peita'i e lē 'avea lea ma mea ua maua ai sina pa'ia itiiti. Latou te lē fa'amamaluina le Atua ona ua talia a'oa'oga fa'aletagata ma tu'u i le lalolagi se aso sapati Kerisiano e lē o i ai le "Auā ua fa'apea mai le Ali'i" e fai ma pule. Mar 238

O le a faia lava ma oli'olisaga tele, iā i latou o ē ua talia le Sapati e 'avea o se fa'ailoga o le mana foafoa ma le mana laveā'i o Keriso. E fiafia i latou e fa'atasi ma Keriso i lea aso. O le Sapati e fa'asinoia i latou i galuega o le foafoāga e 'avea ma fa'amaoniga o Lona mana mata'utia i le fa'aolataga. A o fa'amanatu mai ai le tō'esea o le filemū i Etena, a e ta'u mai ai fo'i le filemū o le a toe fa'afo'i mai e ala i le Fa'aola. Ma o le a toe ta'u mai ai i mea uma na Ia foafoa Lana vala'au, "Ia outou ō mai iā te A'u, o outou uma o ē tigāina ma mafatia i 'avega, o A'u fo'i e malōlō ai outou" (Mataio 11:28). Mar 244

(13) O LE Ā LE FA'AILOGA FA'APITO A O LANA PUIPUIGA O LE A MAUA E I LATOU O Ē TUMAU LE FA'ATUATUA I LE ALI'I?

"Ua fai atu fo'i iā te i latou 'aia ne'i latou fa'aleaga i vao iti o le fanua, po o se mea lauolaola e tasi, po o se la'au e tasi; tau lava o tagata ua lē i ai i o latou muāūlu le fa'amaufa'ailoga a le Atua." Fa'aaliga 9:4

MAU E TAU I AI: Fa'aaliga 7:2, 3; 14:1; 22:4; Esekielu 9:4; Eperu 10:16

O le a tu'u le fa'amaufa'ailoga a le Atua soifua i luga o i latou uma e amio fa'apei o le uiga o Keriso. E pei o le lomiga o le fa'amaufa'ailoga i le ga'o, e fa'apea fo'i le lomiga o le loto e le Agaga o le Atua ma tumau ai le fa'atusa o Keriso. O le usiusita'i i ta'iala o poloā'iga a le Atua e fausia ai le amio ia pei o le uiga fa'ale-Atua.

Pe a uma ona fa'amaufa'ailogaina tagata o le Atua i o latou muāulu - e lē o fa'aailoga e mafai ona va'aia e mata, peita'i o le fa'amaoni i le 'upu moni, i le mafaufau ma le fa'aleagaga, ina ia lē toe mafai ona fa'agaoioi 'ese - pe a uma loa ona fa'amaufa'ailogaina tagata o le Atua ma saunia mo le lulūina, o le a o'o mai loa. E moni o lea ua amataina nei mea; ua o'o mai nei i le lau'ele'ele fa'amasinoga a le Atua. *FLB 287*

(14) E FA'APEFEA LE MAFAI ONA MAUA LE FA'AMAUFUA'AILOGA A LE ATUA MA 'ALO'ESE MAI LE FA'AILOGA O LE MANU FE'AI?

"O le mea lenei ua i ai le onosa'i o le 'au pa'ia; o le mea lenei ua i ai ē ua tausi i poloa'iga a le Atua ma le fa'atuatua iā Iesu." Fa'aaliga 14:12

MAU E TAU I AI: Fa'aaliga 14:5; 12:17; 22:13; 3:10, 11

Ua mavae atu le lapata'iga i ē ifo i le manu fe'ai ma lona fa'atagata, ona fai mai lea o le valo'aga: "O le mea lenei ua i ai ē ua tausi i poloa'iga a le Atua, ma le fa'atuatua ia Iesu." Ua tu'u fa'afeagai mai e le valo'aga i latou o ē tausi i poloa'iga a le Atua ma i latou o ē ifo i le manu fe'ai ma lona fa'atagata, ma talia lana fa'aailoga. O lona uiga o i latou o ē tausi i le tulafono a le Atua, ma i latou o ē soli i le tulafono a le Atua, o mea ia o le a iloa ai ē tapua'i i le Atua, ma ē ifo i le manu fe'ai. *GC 446 (372)*

O le fa'amaufa'aailoga a le Atua o Lana Sapati, a e o le fa'aailoga o le manu fe'ai o lona tete'e lea i ai; e tausia le "aso o le lā" e fai ma sapati fa'afoliga. Ua fa'apea mai le Fa'aaliga 14:9-12, o latou e lē maua le fa'aailoga o le manu fe'ai e latou te tausia poloā'iga a le Atua; ma o le Sapati e i le tulafono e fā; latou te tausi le Sapati a le Ali'i; e iā i latou Lana fa'amaufa'aailoga. E fa'aalia iinei le tāua o lenei fa'aailoga, o le poloā'iga e fā ona pau lea o le tulafono e iloa ai le 'ese'esega o le Atua Lē na foafoa ma atua sesē. *GC 1888 691*

O le fa'afitauli o le a o'o mai pe a taumafai Papelonía fa'afoliga e fa'amalosia ona tapua'i i le "aso o le lā" (Sunday) e ala i tulafono taule malō ma sa'ili ia fa'asalaina latou uma e lē usita'i. O le matā'upu lenei ua fa'amatalaina i le Fa'aaliga 13:12-17. I lenei itulā pogisā o ē pi'imau i le Tusi Pa'ia o le a latou lē tu'u'eseina le tausiga o le Sapati moni. *7 BC 832, 833*

O le ā lau mea o lo'o e faia, uso e, mo le galuega tele o le sauniuniga? O ē o lo'o ō gatasi ma le lalolagi o le a fausia i latou i fa'avae fa'alelalolagi, ma saunia ai mo le fa'aailoga o le manu fe'ai. O i latou e lē o fa'atuatua i a i latou lava, o ē ō mai ma le loto maulalo i luma o le Atua ma fa'amamā o latou agaga e ala i le usita'i i le 'upu moni, - o i latou ia o le a maua le fa'avae fa'alelagi, ma sauni ai o le fa'amaufa'aailoga a le Atua i o latou muāulu. Pe a o'o ina fa'amalosia lea tulafono, ma ua fa'amauiina le fa'aailoga, o le a tumau lo latou uiga fa'amaoni ma e leai se ponā e o'o i le fa'avavau. *Mar 240*

**O'U MANATUNATUGA MA TALI
(Mafai tali e sili atu i le tasi pe a tatau)**

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

'Ou te _____ na faia a'u e lo'u Ali'i ma e na o Ia le Atua moni, o Ia 'ou te tapuā'i i ai. 'Ou te _____ na Ia tu'u Lana fa'amaufa'ailoga i le ogātotonu o Āna poloa'iga e fai ma fa'amanatuga i vaiaso ta'itasi, o Ia Lē na faia i tatou, Lē e toe fa'afouina, ma o Ia Lē e fa'apa'iaina a'u.

Ua 'ou _____ o le a osofa'ia e Satani lenei poloa'iga ona o se mea fa'amanatu i le Ali'i ma le fa'aailoga o le tapua'iga moni ma le fa'aailoga o la tatou so'otaga ma Ia.

'Ou te _____ talu ai sa tu'uina e le Atua le Sapati aso fitu ii le taimi o le foafoāga, auā sa tausia e Āna 'au pateriaka, na tausia e Iesu, tausia e Ōna so'o a e le'i maliu ma ina ua mavae ona maliu o Ia, o lo'o ta'u mai iā i tatou ia "Manatua" i Lana tulafono e lē masuia e fa'avavau, ma o le a tatou tausia i le lalolagi fou, 'ou te _____ e tausi i ai i le asō.


'Ou te _____ ua taumafai le Pope ia suia le aso pa'ia o le Ali'i ma o lea e ta'ua mai i le Fa'aaliga 12:17. Ua 'ou _____ i itulā mulimuli o le lalolagi, o le a 'avea le aso e tapua'i ai ma matā'upu e iloa ai le tapuā'iga pe moni pe sesē.

'Ou te _____ ia 'ou fa'amamaluina Lē na faia a'u e ala i le talia o Lana fa'amaufa'aailoga i lo'u muāūlu ma 'ou
'alo'ese mai le fa'aailoga o le manu fe'ai. 'Ou te _____ e iā te a'u le avanoa e usita'i ai ma aofia ai i le
fa'apotopotoga a tagata o le Atua o aso o le i'uga ma tau'ave Lana fa'amaufa'aailoga, ma 'avea o se 'avefe'au e
fa'asoa atu lenei 'upu moni tāua i isi.

MANATU

FA'AOPPOPO

TATALO MANA'OMIA



Ua Tapunia le Fa'amasinoga ma le Taimi Tele o Puapuagā

Lesona 14

'UPU A LE FA'ATONU: A o fai fa'asolo nei lesona, e tāua ona iloa o nisi o nei mea e tutupu i taimi 'ese'ese, o isi e tutupu fa'atasi, ma o nisi e tutupu fa'asolosolo ta'itasi. Pe a amataina le taimi o puapuagā, o le taimi lea ua mae'a ona to'ulu o le uāga mulimuli fa'apea le 'alaga leo tele a agelu e to'atolu, ua uma ona ta'u atu ai mo le taimi mulimuli le fe'au e ala i le 'au fa'amaoni a le Atua. Ua tataui nei ona toe fa'amalōlōina le manu'a o le manufe'ai e ala i le tu'u fa'atasia o 'au a le ekalesia ma le malō. O le a fa'ailoa lenei mea e ala i le fa'amalosia o le aso o tapuā'iga lea e lē talafeagai ma le tulafono a le Atua. O le fa'amalosia o le tausiga o le Uluā'i Aso - le Sapati fa'afoliga, o le a fa'ateteleina se'ia fa'amalosia e ala i tulafono fa'alemalō.

Ua fa'amatalaina e le Tusi Pa'ia i le Fa'aaliga 13:17 le vaega muamua o le tulafono, le fa'aleagaina o le tulafono a le Atua, o le a fa'amalosia e fa'atatau i le fa'aaogāina o mea tau i 'olua. E to'atele ē o le a gauā'i i lenei fa'apologaina, peita'i o le a lē mafai e lenei fa'atigā ona fuli'esea i latou e fa'amaoni i le Atua ina ia mulimuli i fa'atonuga a tagata.

I lenei lava taimi, o tigā o le lalolagi e ala i mala e tutupu ma le amioleaga o tagata, o le a fa'ateteleina e lē mafai ona fa'atusatusaina. O le to'atele ua fulitua i a latou talitonuga o le a fa'asesē e Satani ina ia tu'ua'i le pogai o nei fa'amasinoga i se tama'i fa'alapotopotoga o tagata e lē o tosina ia tausi le Uluā'i Aso.

O le a ulufafo Keriso mai le malumalu ma fa'ailogaina ai le fa'ai'uga o le fa'amasinoga ma tapunia ai le alofa tunoa. O le taimi nei ua mautū ai le i'uga o tagata uma ta'ito'atasi. O le a to'esea le puipuiga a le Atua mai iā i

latou o ē ua te'ena Ia ma o le a fa'atagaina e agi "matagi" o taua. Ona amataina loa lea o mala mulimuli e fitu pei ona fa'amatala mai i le Fa'aaliga.

A o le'i tapunia le alofa tunoa ma le amataga o mala e fitu, o le taimi lea ua tatau ai le uma ona pasia tulaga amata o le tulafono e fa'atatau i le Uluā'i Aso. O lenei "mea inosia" o se taumafaiga a le ali'i o le agasala ma āna 'au e suia le tulafono pa'ia a le Atua a e tu'u i ai a latou aganu'u masani ma fa'atonuga a tagata. Ona o le a tete'e e le 'au fa'amaoni a le Atua le fa'atonuga ia ifo i le manufe'ai ma lona fa'atusa, o le tulafono fa'alemalō o le a fa'amalosia ai le fa'aaogā fa'atatau o mea tau 'olua ma o le a fa'ateleina ai fa'asalaga e ala i le totogi o sala ma le fale puipui o ē tete'e i ia tulafono.

A o fa'ateleina le mafatia o le 'au amioleaga mai mala o lo'o si'omia ai latou, o le a una'ia le Fa'atusa o le Manufe'ai - o le to'atele lea o tagata ekalesia - ta'ita'i o malō e faia ma pasia tulafono e fa'aaogāina ai le tau fa'afefe - o le sala lea i le oti mo i latou uma e lē 'au fa'atasi i ai. O le fuafuāga o le tu'u o le fefe i loto o ē fa'atuatua i le Atua ma aumai i latou ia ō gatasi ma le lalolagi. O le a na o sina manuia itiiti o le a maua i lea fuafuāga, ma e to'atele i latou o ē sa fa'amaoni a e o le a fuli'ese mai le Atua a e liliu i tagata. Ina ia fa'asao o latou ola, o i latou e lē tumau iā Keriso e ala i Lana Afioga ma le tatalo, o le a ifo ma tapua'i usiusita'i i le manufe'ai.

(1) O LE Ā LE FA'AILOGA O LE A FA'AI'UINA LE FA'AMASINOGA MA LE AMATAGA O LE "TAIMI TELE O PUAPUAGĀ?

"O ōna pō fo'i ia e tula'i ai Mekaeli, o le Ali'i sili, o Lē na te tula'i ona o tagata o lou nu'u; e o'o mai fo'i aso vale, e leai sona tusa talu ona fa'ato'ā tupu o nu'u, ua o'o i ia lava aso; o ōna pō fo'i ia e lavea'iina ai Ōu tagata, o i latou uma o ē ua tusia i le tusi." **Tanielu 12:1**

MAU E TAU I AI: Tanielu 9:12-14; Ieremia 30:7

E mae'a loa le fe'au a lona tolu o agelu, ona tapunia loa lea o le galuega o le alofa tunoa mo le lalolagi solitulafono. Ua mae'a le galuega a le fanau a le Atua. Ua latou maua le uāga mulimuli ma le fa'afouga mai le Agaga o le Ali'i, ma ua saunia nei i latou auā le itūaso o le tofotofoga ua ta'atia mai nei i o latou luma. Ua fo'i atu i le lagi se tasi o agelu ma le fe'au ua mae'a lana galuega i le lalolagi. Fai mai ua mae'a le iloiloga mulimuli o le lalolagi; o ē uma ua fa'amaoni i poloa'iga a le Atua ua latou maua nei le fa'amaufa'ailoga a le Atua soifua. Ona mae'a ai lea o le galuega fautua a Keriso i le malumalu i le lagi. Ua sisi'i a'e Ōna 'a'ao ma folafola mai i se leo tele, "Ua mae'a." Ona to'ese lea o paleāli'i o le 'au agelu uma a'o tu'uina mai e Keriso le folafolaga fa'ai'u: "O lē amiolētonu ia amiolētonu pea o ia, o lē 'ele'elea ia 'ele'elea pea o ia, o lē amiotonu ia amiotonu pea o ia, o lē pa'ia ia pa'ia pea o ia" (Fa'aliga 22:11).

Ua maua nei le i'uga o tagata ta'ito'atasi uma - o nisi mo le ola, o nisi mo le fa'afanoga e fa'avavau. Ua faia e Keriso le togiola mo Ōna tagata, ma ua soloi'esea a latou agasala. Ua maua nei le faitauaofa'i o tagata o Lona malō; ua fa'atali nei le tu'uina atu o le malō iā i latou o sulī o le fa'aolataga; ma o le a 'avea loa Iesu o Tupu o tupu ma Ali'i o ali'i (Fa'aaliga 17:14).

A'o tu'ua e Keriso le malumalu, sa ufitia tagata uma o le lalolagi i le pogisā. O le taimi mata'utia lea o le a ola ai le 'au amiotonu i luma o le silafaga a le Atua e aunoa ma se fautua. Ua 'ave'esea nei le 'a'ao taofiofi o le Atua na i luga o le 'au amioleaga, ma o le a pulea ato'atoa loa e Satani le 'au amioleaga. Ua tapunia nei le faitoto'a o le alofa tunoa o le Atua. Ua te'ena e le lalolagi Lona alofa tunoa, ua latou fa'atauēmu i Lona agalelei, ma ua latou solipala i Lana tulafono. Ua tumu nei le ipu o soligatulafono a le 'au amioleaga - ua fai ma a latou masani le te'ena o le galuega a Lona Agaga, ma ua 'ave'esea loa Lona Agaga a e tu'ufau atu ai i latou i la latou faitalia. Ua leai nei se 'a'ao puipui o le Agaga o le Atua e lavea'iina ai i latou mai le ti'apolo. O le taimi lea o le a fa'asaga ai loa Satani e fai lana toe galuega tele o le fa'ao'o mai o le puapuagā tele i le lalolagi. *GC 613 (510-511)*

(2) E O'O MAI I LENEI TAIMI, O LE Ā LE MEA O LO'O TAOFIOFI E LE ATUA IA TU'UINA I AI, MO I LATOU E FILIFILI I AI, SE TAIMI IA MAUA AI LANA FA'AMAUFUA'AILOGA?

"Ua mavae atu ia mea, ona a'u iloa ai lea o agelu e to'afā o tutū mai i itū e fā o le lalolagi, o taofi i matagi e fā o le lalolagi, ina ia lē agi atu le matagi i le fanua, po o le sami, po o se la'au e tasi." **Fa'aaliga 7:1**

MAU E TAU I AI: Fa'aaliga 7:3

O lo'o tatou tutū nei i le faitoto'a o mea tetele ma le ofoofogia o le a tutupu. O lo'o fa'ataunu'uina valo'aga. O lo'o tusia i tusi o le lagi tala fa'asolopito e 'ese ma le ofoofogia - mea ua ta'u mai e tatau ona tutupu ina ua lata le aso tele o le Atua. Ua i se tulaga femēmēā'i le lalolagi. Ua faitaga'i malō uma, ma o lo'o sauniuni mo taua i vā o malō. Ua vave tele lava le taimi e o'o mai ai le aso o le Atua. Peita'i e ui ina o lo'o sauniuni malō uma e fa'apopototo 'au mo le taua tele, a e o lo'o tumau pea le fa'atonuga i agelu ina ia latou taofiofi matagi mai itū e fā se'ia fa'amaufa'ailogaina 'au'auna a le Atua i o latou muāulu. **1 SM 221**

Ua lē toe taofia nei e agelu a le Atua matagi malolosi o le amioleaga a tagata, ua tu'ufau nei mea uma e fai la latou faitalia. O le taimi lea o le a o'o ai le lalolagi i ni puapuagā e sili atu lona mata'utia i puapuagā na o'o ia Ieruselema anamua.

Na o se agelu e to'atasi na fasia ulumatua uma a Aikupito ma fa'atumulia ai le nu'u i le tagi auē. E to'atasi fo'i le agelu na ala mai ai le fa'a'umatiāga na fai ma fa'asalaga, ina ua faia e Tavita le agasala i lona faitauina o le aofa'i o le nu'u o le Atua. O le mana fa'a'umatia lea na fa'aaogāina e agelu a le Atua ina ua latou usita'i i Lana poloa'iga, o le mana fa'a'umatia lava fo'i lea o le a fa'aaogāina e agelu leaga pe a fa'atagaina i latou e le Atua. Ua tutū nei 'au a agelu leaga e fa'atalitali le taimi e fa'ataga atu ai i latou e le Atua, ona fai ai loa lea o la latou galuega tele o le fa'afanōga ma le fa'a'umatiāga. **GC 614 (511)**

(3) O LE Ā LE MEA O LE A TUPU PE A TULA'I LOA MIKAELE MA FA'ASA'OLOTO "MATAGI E FĀ" O LE FA'AUMATIĀGA?

"O ōna pō fo'i ia e tula'i ai Mekaeli, o le Ali'i sili, o lē na te tula'i ona o tagata o lou nu'u; e o'o mai fo'i aso vale, e leai sona tusa talu ona fa'ato'ā tupu o nu'u, ua o'o i ia lava aso; o ōna pō fo'i ia e lavea'iina ai Ōu tagata, o i latou uma o ē ua tusia i le tusi." **Tanielu 12:1**

MAU E TAU I AI: Fa'aaliga 9:14, 15

"Ua fai atu fo'i iā te i latou 'aua ne'i latou fa'aleaga i vao iti o le fanua, po o se mea lauolaola e tasi, po o se la'au e tasi; tau lava o tagata ua lē i ai i o latou muāulu le fa'amaufa'ailoga a le Atua. Ua tu'uina atu iā te i latou 'aua ne'i fasiotia i latou, tau lava ina fa'atigāina i masina e lima; o latou tigā fo'i e pei o le tigā o le tagata pe a tuia e le akarava. O ōna pō ia e sa'ili ai e tagata le oti, a e latou te lē maua; e naunau fo'i i latou ina ia oti, a e sola 'ese le oti iā te i latou." (Fa'aaliga 9:4-6)

Ua lata ona o'o mai le taimi o puapuagā i o tatou luga; ma e mana'omia ia tatou iloa se mea e fai e lē o tatou iloa nei, a e o lo'o paiē le to'atele ia latou maua. O le tele o taimi e sili atu le mafatia ona o le popole i mea o le a tupu i lo o le taimi e o'o mai ai le puapuagā; peita'i e lē fa'atusaina lea i le faigatā o lo'o i o tatou luma. E lē mafai ona fa'amatalaina le mata'utia o le a o'o i ai. **Mar 275**

(4) O LE Ā LE 'UPU O LO'O FA'AAOGĀ E LE TUSI PA'IA E FA'AMATALAINA AI MALA E FITU E TUPU MAI ONA UA TU'U FA'ASA'OLOTO "MATAGI E FĀ"?

"Na 'ou iloa fo'i i le lagi le tasi fa'ailoga tele e ofo ai, o agelu e to'afitu ua i ai mala e fitu e gata ai; auā e fa'ai'uina ai le to'asā o le Atua." **Fa'aaliga 15:1**

O lo'o tu'u mai pea e le Atua i tagata le avanoa tāua e suia ai le pogisā i le malamalama, le sesē mo le 'upu moni, le agasala mo le amiotonu; peita'i e lē fa'atalitali pea Lona alofa tunoa ma le onosa'i. O lo'o fa'apotopoto ao o le lagi, ua sauni mo le afā o lo'o fotu mai. Ua lata ona pa'ū mai le afi o le to'asā o le Atua, ma o le a amataina ona fa'asala tagata fai amioleaga, o le a lē toe i ai se avanoa e liliu 'ese ai se'ia o'o ina fa'ai'uina. O le a Ia tula'i mai loa e fa'asala tagata uma o le lalolagi ona o a latou agasala, ma "ina ia fa'asalaina... le lalolagi ona o a latou amioleaga; e fa'aalia fo'i e le 'ele'ele lana toto, na te lē toe ufitia fo'i lana fasi" (Isaia 26:21). E na o i latou e tutūmai o ē ua fa'apa'iaina e ala i le 'upu moni o le alofa o le Atua. O le a nātia i latou ma Keriso se'ia fa'ai'uina ma ua mavae le fa'atafunaiina. *MS 122, Aug 1899*

O nei mala e lē tupu i le atulaulau atoa, ona e lē fa'aumatia ai tagata uma o le lalolagi. O fa'asalaga uma o lo'o tu'uina i luga o tagata ola a e le'i tapunia le alofa tunoa, ua tu'u fa'atasi mai ma le alofa mutimutivale. O lo'o puipuia le tagata agasala e le toto o Keriso ina ia ia lē maua le ato'atoa o lana fa'asalaga e tatau ai; peita'i pe a o'o mai le fa'amasinoga mulimuli, o le a sasa'a ifo le to'asā ma e leai se alofa tunoa e fefiloi mai ai. *FLB 340*

(5) O LE Ā LE ISI ALA O LO'O FA'AMATALAINA AI E LE TUSI PA'IA MALA MULIMULI E FITU?

"Na 'ou lagona fo'i le leo tele mai le malumalu, ua fa'aapea atu i agelu e to'afitu, Ō ia, inā liligi atu ipu o le to'asā o le Atua i le lalolagi." **Fa'aaliga 16:1**

MAU E TAU I AI: Fa'aaliga 15:7, 8; 17:1; 21:9

O le agalelei o le Atua ma Lona fa'apalepale, o Lona onosa'i ma le alofa mutimutivale ua leva ona tu'u mai i Ōna tagata, o le a lē fa'alavelave i le fa'asalaina o le tagata agasala e tete'e ma lē usita'i iā te Ia. E lē o le tagata e fa'atonuina le Atua - o ia lē amioleaga ua te'ena le tulafono a le Atua, e pau le fa'amagaloga e na te maua ona o le taulaga ofoofogia na Ia faia e ala i le tu'uina o Lona Ālo Pele e maliu mo le tagata agasala, auā e lē mafai ona suia Lana tulafono. Na taumafai lava le Atua e tausi ia pa'ia ma fa'aeaina le uiga o Lana tulafono, a e ala i le amio poto a le ti'āpolo, ua ia fa'asesē ai le tagata e sui le alofa mutimutivale o le Atua i le fetu'u, ia tatau loa ona fa'amafatia i latou i le fa'asala.

Ona ua maliu Keriso, ua latou talitonu ua sa'oloto nei e soli le tulafono pa'ia a le Atua, lea e ta'usalaina ai le tagata agasala, ma ua faitio ai i Lana pule malosi ma le fa'asalaga ua faigatā. Ua latou fa'aleoina 'upu o lo'o faia e Satani i le to'atele, ina ia fa'afilemū ai o latou loto fuatiaifo a o fouvale i le Atua. *MS 5, 1876*

(6) O LE Ā LE MALA MUAMUA O LE A PA'Ū I LUGA O I LATOU E FILIFILIA LE FA'AILOGA O LE MANUFE'AI?

"Ona alu atu ai lea o lē muamua, ua liligi ifo lana ipu i le fanua; ona o'o lea o le papala leaga e tigā ai tagata ua i ai le fa'ailoga o le manu fe'ai, atoa ma ē ua ifo i lona fa'atagata." **Fa'aaliga 16:2**

E mae'a loa le galuega fa'afautua a Keriso i le malumalu i le lagi, ona liligi mai loa lea o le ipu e lē suia o Lona to'asā i luga o ē ifo i le manu fe'ai ma lona fa'atagata ma talia lona fa'ailoga (Fa'aaliga 14:9, 10). O le a sili atu le mata'utia ma le to'atele o tagata e 'aafia i mala o aso o le i'uga, nai lo mala na o'o iā Aikupito. O fa'a'upuga nei a Ioane i le Fa'aaliga e fa'atatau i nei mala: "Ona o'o lea o le papala leaga e tigā ai i tagata ua i ai le fa'ailoga o le manu fe'ai, atoa ma ē ua ifo i lona fa'atagata" (Fa'aaliga 16:1). *GC 627 (521)*

O i latou ua lapata'i ma a'oa'i e le Atua ma tu'uina i ai le malamalama tele, peita'i ua latou lē fa'atonuina o latou ala ma mulimuli i le malamalama, o le a 'ave'esea le puipuiga fa'alelagi mai iā i latou, lea sa fa'asaoina i latou mai le pule sauā a Satani. O le a tu'u atu i latou e le Atua ia mulimuli i a latou lava filifiliga ma fautuāga mai lo latou lava poto. O le a tu'usa'oloto i latou ma o le a to'esea le puipuiga a le Atua, ma o le a lē toe i ai se talipupuni mai galuega a Satani. *Letter 14, Aug 8, 1883*

(7) ONA O LE A LĒ IFO Ē FA'AMAONI I LE ATUA IĀ SATANI MA POLOĀ'IGA A TAGATA, O LE A FA'APEFEA LE TALI A SATANI, MA O LE Ā LE MEA O LE A IA FAIA IĀ I LATOU IA?

"Ua ita fo'i le tarako i le fafine, ona alu atu ai lea o ia e tau le taua ma i latou ua totoe o lana fanau, o ē ua tausi i poloa'iga a le Atua, ma ua taofi le mau iā Iesu Keriso." **Fa'aaliga 12:17**

MAU E TAU I AI: Fa'aaliga 12:12; I Peteru 5:8

E pei lava ona fa'aosoina e Satani Esau e fa'asagatau iā Iakopo, o le a fa'apea fo'i ona ia fa'aosoina le 'au amioleaga latou te fa'aumatia le fanau a le Atua i le taimi o puapuagā. E pei lava ona faia ana moliga e fa'atatau i le agasala a Iakopo, o le a fa'apenā fo'i ona faia o ana moliga e fa'atatau i le fanau a le Atua. Ua iloa e Satani a mafai ona fasiotia uma le 'au fa'amaoni to'aitiiti lea o lo o fa'ataute'e mai pea i lana pule, ona ato'atoa ai lea o lona manumalō. *GC 618 (514-515)*

O le a so'ofa'atasi le pule e pei o le tama'i mamoe ma le tarako e si'i taua iā i latou e tausi poloā'iga a le Atua ma e i ai le mau a Iesu Keriso. Ma e so'ofa'atasi Satani ma Porotesano ma Pope Roma, e galulue fa'atasi ai e pei o ia le atua o lenei lalolagi, e fa'atonu i tagata e pei o latou tagata o lona malō, ina ia fa'aaogā ma pule ai e fai so'o se mea e mana'o i ai. Pe a lē loto malie tagata e solipala poloā'iga a le Atua, o le a fa'aalia loa le agaga moni o le tarako. O le a tu'uina i latou i fale puipui, aumai i luma o faipule ma ta'ita'i, ma fa'asala i le totogi tupe. "Ua faia fo'i e ia ona ia fa'ailogaina o tagata uma, o tagata nu'u atoa ma ali'i, o ē mau'oa ma ē matitiva, o ē sa'oloto ma ē pologa, ia fa'ailogaina i latou i o latou lima taumatau, po o latou muāulu" (Fa'aaliga 13:16). *Mar 191*

(8) O LE Ā LE "IPU O LE TO'ASĀ" LONA LUA MA LE TOLU O LE A SASA'A IFO I LUGA O LE 'AU AMIOLEAGA?

"Ua liligi fo'i e lona to'alua o agelu lana ipu i le sami; ona liu toto ai lea e pei o le toto o le tagata oti; ona mamate ai lea o mea ola uma o i le sami. Ua liligi fo'i e lona to'atolu o agelu lana ipu i vaitafe ma puna o vai; ona liu toto ai lea." **Fa'aaliga 16:3, 4**

MAU E TAU I AI: Fa'aaliga 8:8; Esoto 7:19-21

O le sami e fa'aaogāina e fai ma alatele mo fēmalagaa'ina i vā o nu'u ma malō 'ese'ese. Ua ta'u mai o lenei mala, e ala i le fa'alavelaveaina o faigāmalaga ma fefa'ataua'iga i le vā o malō, ua fuafua e fa'aali mai ai i se fa'aailoga ua lē fiafia le Atua e fa'atatau i le fuafuāga a Satani e fa'atasi malō uma o le lalolagi i lalo o lana puleaga.

I ōna pō o le Tusi Pa'ia o "vaitafe ma puna o vai" sa fa'aaogāina lava mo mea e tatau o aso ta'itasi, e i ai le vai inu, e fa'amamā ma ta'e'ele ai, ma le fa'asūsūina o le lau'ele'ele. O le mala lona lua, atonu e i'u ai i le fa'amotuina o femalagaa'ina. O le mala lona tolu o le a fa'afuase'i ma e pito sili atu le mata'utia. *7 BC 840*

(9) O Ā UIGA O FA'AILOGA O MALA TOTO O LE A TU'UINA I LUGA O LE MANU FE'AI MA I LATOU O Ē TAU'AVE LONA FA'AILOGA?

"Auā na latou fa'amaligiina le toto o tagata pa'ia ma perofeta, i le ua e avatu ai iā te i latou le toto e inu ai; auā ua tatau lea mo i latou." **Fa'aaliga 16:6**

MAU E TAU I AI: Fa'aaliga 6:10; 17:6; 19:2; 13:10

“Ona liu toto ai lea o le sami, e pei o le toto o le tagata oti, ona mamate ai lea o meaola uma o i le sami”. Ua liu toto ai fo'i vaitafe ma puna o vai. E mata'utia na'uā nei mala; peita'i ua ioe le lagi ma le lalolagi i le amiotonu o le Atua. Fai mai le agelu a le Atua: “Le Ali'i e, ua tonu Āu fa'amasinoga. ...Auā na latou fa'amaligiina le toto o tagata pa'ia ma perofeta, o lea ua E avatu ai iā i latou le toto e inu ai, auā ua tatau lea mo i latou” (Fa'aaliga 16:2-6). O lo latou ioe atu ina ia fa'asalaoti le fanau a le Atua, ua latou nofosala ai nei i le toto o le fanau a le

Atua; ua pei ai lava o latou lima na fa'ao'oina le salaoti i le fanau a le Atua. Na fa'apenā fo'i i le taimi o Keriso ina ua Ia fetalai ua nofosala tagata Iutaia na ola i Lona vaitaimi, i le toto o tagata pa'ia uma na fa'amaligiina talu mai aso o Apelu; auā na iā i latou le agaga fasiotitagata lava lea e tasi na ulufia ai ē na fasiotia le 'au perofeta.
GC 628 (521)

Tatou te iloa ua ta'u mai o mala o fa'agaoioiga e o sa'o mai le Atua, ma e aogā mo i tatou. E matuā talafeagai le fa'asalaga mo le solitulafono. E tatau le fa'asalaga ua tu'uina atu nei i ē amioleaga; e lē na o se mea ua so'ona faia e le Atua.

O nei fa'asalaga mata'utia ua tu'u i luga o i latou o ē ua te'ena le alofa tunoa o le Atua, auā e fa'amaoni le Atua fa'apea Lana afioga - o lo'o Ia fa'ataunu'uina mea na Ia folafola mai e fai (Fa'aaliga 14:9-11). O Ia e amiotonu, po o le fai mea tonu, ma o lo'o Ia aumai le fa'asalaga iā i latou o ē ua fa'asagatau i le Lagi. *7 BC 840, 841*

(10) O LE Ā LE MAUALUGA O LE TULAGA O LE TULAFONO O LE ULUĀ'I ASO O LE A PASIA E TETE'E AI TAGATA O LE ATUA?

"Ua tu'uina atu fo'i iā te ia na te avatua le mānava i le fa'atagata o le manu fe'ai, ina ia tautala le fa'atagata o le manu fe'ai, ma ia faia ina ia fasiotia i latou uma o ē lē ifo atu i le fa'atagata o le manu fe'ai." **Fa'aaliga 13:15**

MAU E TAU I AI: Mataio 24:9, 10; 10:21, 22; Ioane 16:2

Ua 'avea nei mala ma mea ua matuā faitai ai le 'au amioleaga i ē amiotonu; ua manatu latou ua tatou aumaia fa'amasinoga a le Atua i o latou luga, ma o le a taofia ia mala pe a mafai ona latou to'esea tatou mai le lalolagi. Ua alu loa le fa'atonuga e fasioti le 'au pa'ia, a e o le a latou 'alalaga a'e i le ao ma le pō mo se laveā'iga. O le taimi lenei o puapuagā o Iakopo. *Mar 258*

E lē tatau ona matata'u tagata o le Atua. E lē mafai ona sopo'ia e Satani lona tuā'oi. O le a puipua e le Ali'i Ōna tagata. E na te fa'ataua manu'anua o Āna 'au'auna ona o le 'upu moni, e pei ua faia lea iā te Ia lava. Pe a uma ona faia le filifiliga mulimuli, pe a ua filifili tagata uma i le itū e i ai, mo Keriso ma poloā'iga, po o le 'au fulitua, o le a tula'i loa le Atua i Lona mana, ma o le a taofia e fa'avavau gutu o i latou o ē sa fai 'upu faifai e tete'e ai iā te Ia. O pule uma na i le itū tete'e o le a maua a latou fa'asalaga (Jeremia 25:30-33). *Mar 191*

(11) OLE Ā LE FAUTUA NA TU'U MAI E IESU I TAGATA KERISIANO I IUTAIA MA O LE A TĀUA FO'I MO I TATOU INA UA I AI MA FA'AMALOSIA LE TULAFONO E FA'ATATAU I LE SALAOTI?

"O ē o i Iutaia i ia ōna pō, ia latou sosola i mauga." **Mataio 24:16**

MAU E TAU I AI: Mataio 24:17-22; Luka 21:20-22; Jeremia 6:1

Ua faia nei le poloa'iga e ta'ita'i o atunu'u Kerisiano 'ese'ese o le lalolagi, e fa'atagaina ai le 'au amioleaga latou te fa'ao'o le oti i ē o lo'o fa'amaoni pea i le tausiga o poloa'iga uma a le Atua. Ua sosola nei le fanau a le Atua mai 'a'ai 'ese'ese ma nu'u, ma ua latou feiloa'i nei i ni kamupani laiti i le vao, po o vaega tu'ufua o le atunu'u. E to'atele o le a maua so latou lafitaga i āna ma luga o mauga. E pei lava ona faia e tagata Kerisiano i 'auvaemauga o le Pietimoni i Italia, o le a fa'apenā fo'i ona 'avea luga o mauga ma lafitaga o le fanau a le Atua (Isaia 33:16).
GC 626 (520)

(12) O LE Ā LE MEA O LE A TUPU I Ē AMIOLEAGA PE A SASA'AINA E LE AGELU LE"IPU" LONA FĀ E FA'AMATALA MAI AI LE MALOSI O LE LĀ?

"Ua liligi fo'i e lona to'afā o agelu lana ipu i le lā; ua tu'uina atu i ai ia mū ai tagata i le afi." **Fa'aaliga 16:8**

MAU E TAU I AI: Fa'aaliga 8:12, 13; Luka 21:25

O le lā e fa'amafanafana ma fa'afiafiaina ai tagata, e pulea le ola o la'au, ma isi gasologa o mea o le foafoāga e mana'omia mo le tausiga o le olaga i le lalolagi. A o le taimi nei, ua aumai se vevela ma se malosī e sili atu ua mafatia ai ma fa'aumatia ai ola. E ui ina puapugātia tagata mai lenei vevela mata'utia, a e sili atu le mata'utia o le ōge ma le ogevai e o'o i le lalolagi. 7 BC 841

(13) O LE Ā LE MEA O LE A AUMAIA E LE MALA LONA LIMA I LUGA O PAPELONIA, O LE FA'AILOGA O LONA TULAGA FA'ALEAGAGA?

"Ua liligi fo'i e lona to'alima o agelu lana ipu i le nofoāli'i o le manu fe'ai; ona fa'apōuliuligia lea o lona malō; ona latou feati ai lea o latou laulaufaiva ona o le puapuagā." Fa'aaliga 16:10

MAU E TAU I AI: Isaia 8:22; Esoto 10:21-23

O le nofoāga o le manu fe'ai o lona maota lea. Ua muā'i fa'aailoa mai nei o le manu fe'ai o le pope i lona tulaga ua fa'afouina, e lē o lona itū fa'aleagaga a e o se pule fa'alelalolagi e pule ai i isi malō o le lalolagi.

E vaganā ai se vaega to'aititi o lo'o tete'e pea i lana puleaga, ua faia e Satani le lalolagi ma ōna tagata ia pule ai, ma e ala i le pope ua toe tūla'i mai, ua ia sa'ili ia na pulea le atoa o le aigā tagata. O lea ua foliga mai, mo le taimi o tupu ai lenei mala, o lo'o si'omia le lalolagi i le pōuliuli. A o tau tagotago ma le lē salamō tagata mo se malamalama i le lalolagi o lo'o pogisā fa'aleagaga (Fa'aaliga 16:8, 9), e auina mai e le Atua i o latou luga le pogisā fa'aletino, ma o le fa'aailoga o le pō fa'aleagaga o le a si'omiaina le lalolagi. 7 BC 841, 842

(14) O LE Ā LE MEA O LE A LĒ FAIA E TAGATA AMIOLEAGA, O Ē O LO'O TU'U'UPU FAIFAI I LE ATUA ONA O MALA?

"Ua mū fo'i tagata i le mū tele, ona latou faifai lea i le suafa o le Atua e Āna le pule i ia mala; a ua lē salamō i latou e avatu ai le vi'iga iā te Ia.... Ua latou faifai fo'i i le Atua o le lagi ona o latou puapuagā atoa ma o latou papala, ua lē salamō fo'i i latou i a latou amio." Fa'aaliga 16:9, 11

MAU E TAU I AI: Isaia 1:4-6; Ierremia 5:3, 4; Salamo 95:8

I luga o le lau'ele'ele atoa o lo'o i ai se taumafaiga malosī mo se ala ia tau fa'a'itiitia ai le puapuagātia ma naunauta'iga ua o'o mai e ala i mala muamua e fā, ma ia fa'atali'ese ai nisi malaia o lo'o tau fōu mai. O le fa'anoanoāga e pogai o le lalolagi. O le fuafuāga ia sola'ese mai mafatiāga ona o mala, a e ia ūlu atu i se tulaga moni e lelei ai ma le Atua. E pei ona masani ai Satani, na te fa'atalitonu ē nonofo i le lalolagi o latou e sesē i le fai fa'apalepale o tagata filifilia a le Atua, a e lē ona o latou o tagata agasala.

Ua lē fa'aailoa atu o latou e agasala a e ua tu'uā'i le leaga o le malaia ua latou o'o i ai i luga o ē o lo'o tumau le fa'amaoni i le Atua. Ma le matuā fa'atu'i'ese lava, ua latou tete'e pea e gaua'i i le fīngalo o le Atua, a e fa'aalitino mai ai o latou uiga moni - o 'au'auna fa'amaoni a Satani. O le te'ena o le salamō ua fa'amaonia ai o latou e matuā tete'e ato'atoa i le Atua. O i latou o lo'o puapuagātia mai mala ua lē mafai ona ta'u tonu mai o latou e sesē a e sa'o le Atua, e ui ina fa'afeagai ma fa'asalaga mata'utia. O ia mea e fai ma ala e ta'ita'iina ai le tagata salamō fa'amaoni ia suia ōna ala (Isaia 26:9, 10). E fa'amaonia ai o latou loto ua matuā fa'ama'a'aina ma e lē toe mafai i ai se mea a le alofa tunoa po o se fa'asalaga mata'utia. 7 BC 841

O'U MANATUNATUGA MA TALI
(Mafai tali e sili atu i le tasi pe a tatau)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

'Ou te _____ ua fa'aalia āu'ili'ili e le Atua taimi mulimuli o le lalolagi, ina ia mafai ona 'ou sola'ese mai taufa'asesē tetele a Satani, le manu fe'ai, ma lona fa'atusa.

Ua 'ou _____ o lo'o tupu ma fa'ateteleina fa'ailoga i le lalolagi ma o lo'o tatou tutū i le faitoto'a o nei mea mata'utia, ma ua latalata lava le afio mai o Keriso.

'Ou te _____ ua lata mai le aso o le a tula'i ai Keriso i le malumalu i le lagi, fa'aailoa mai ua mae'a le fa'amasinoga ma ua tapunia le alofa tunoa, ma o le a amataina le taimi o puapuagā. Ua 'ou _____ o le a sa'oloto lo'u loto mai le uiga fouvale ma o le a 'ou fa'atasi ai ma i latou o ē e ta'ua o lo'o "amiotonu pea"!

'Ou te _____ pe a fa'asa'olotoina matagi o taua, o le a tosina e Satani āna 'au fa'alelalolagi e sa'ili ma fa'aumatia le 'au fa'atuatua. O le a talitonu tagata amioleaga o ē amiotonu ua pogai mai ai fa'amasinoga o lo'o latou puapuagātia ai.

'Ou te _____ e leai se mea o le a tatau ona 'ou fefe ai, ona o le a 'ou mau le puipuiga a le Atua mai lima o ē amioleaga.


""Ou te _____ o le a fa'atumulia a'u i Lona Agaga i aso ta'itasi ma saunia fa'aleagaga ia tumau pea le fa'atuatua e ui i mea tetele ua lata ona o'o mai.

'Ou te _____ mo le aso o Lona afio mai, ma ina ia 'ou i ai i parataiso a e lē toe puapuagātia mai aūga a le agasala!

MANATU

FA'APOPOO

TATALO MANA'OMI



O le Mala Lona Ōno ma le Taufa'asesē Sili a Satani

Lesona 15

'UPU A LE FA'ATONU: I lenei taimi, ua tula'i mai ai Mikaele ma na 'alagaina le fa'ai'uga o le fa'amasinoga i le malumalu. Ua tapunia le alofa tunoa ma o le aigātagata uma ua latou maua le "Fa'aailoga o le Manu fe'ai" po o le "Fa'amaufa'aailoga a le Atua." Ua to'esea e le Atua Lana puipuiga mai ē amiolētonu, ma ua fa'asa'oloto e Āna agelu pa'ia "Matagi e Fā" o fetauā'iga. Ua fa'aaogā e Satani ma āna agelu leaga le avanoa e fa'asaga ai e matuā fa'aleagaina le lalolagi, ma ua o'o mai fa'asalaga o mala muamua e lima.

O lo'o puipuiina pea le 'au amiotonu, peita'i o i latou e le'i ta'u mai o ni Kerisiano ma ē ua ta'u mai o Kerisiano, a e ua latou te'ena lea mana, ua i lalo nei o puleaga a nei mala. Ua latou iloa o lo'o i le itū sesē o le finauga tele ona o lo'o puapuagātia latou mai nei fa'asalaga. Ona ua manatu ua leai se aogā mo se isi taumafaiga, ua amata loa ona latou taliu'ese mai le manu fe'ai ma lona fa'atusa.

I le taumafaiga mulimuli e tosina mai nisi i lana fuafuāga, ua fa'apotopoto loa e Satani āna 'au o le pogisā i se tulaga e sili le mata'utia mo se osofa'iga o āna taufa'asesē fa'aleagaga. O le a fa'aaogā e Satani le taufa'asesē sili e ala i lona fa'aali mai ma ta'u mai o ia o Keriso. Ona ua ia fa'aali mai i se foliga mamalu, o uiga tausa'afia, ma āna fa'aailoga ma vavega ofoofogia, e na te taufa'asesē ai motu o tagata.

Na te ta'u mai o ia ma lona "tamā" ua suia le Sapati aso fitu o le poloā'iga e fā i le ulua'i aso o le vaiaso. E na te fa'aailoa mai o mala o fa'asalaga a le Atua i le lalolagi ona o se vaega fouvale e to'aitiiti o le a lē usiusita'i i le poloa'iga ua suia. Fai mai o ia, pe a fa'aumatiaina lenei vaega, o le a to'esea loa e le Atua nei mala. O le a fa'asaga loa lenei to'atelle mai ekalesia uma ua fulitua ina ia una'i pule fa'alemalō e faia se tulafono e fasioti ai le

vaega to'aitiiti o lo'o fa'amaoni pea i le Atua, ina ia taofia ai le femēmēā'i ma le mafatia. Ua lata nei ona amataina le "taua o le aso tele o le Atua" (Fa'aaliga 16:14).

(1) O LE Ā LE MEA O LE A TUPU I LE "VAI" (FA'AALIGA 17:15) I LE TAIMI O LE MALA LONA ŌNO, LE FA'AILOGA O LE TŌ'ESEA MA LE LĒ TOE LAGOLAGOINA O PAPELONIA E TAGATA?

"Ua liligi fo'i e lona to'aōno o agelu lana ipu i le vaitafe tele o Eufirate; ona mate ai lea o lona vai, ina ia saunia le ala o tupu mai nu'u e alu a'e ai le lā." Fa'aaliga 16:12

MAU E TAU I AI: Fa'aaliga 17:1, 15; Salamo 65:7

(2) O AI AGAGA LEAGA E TOLU O LE A TAUTALAINA MEA TAUF'AASESĒ I LENEI TAU MA MULIMULI I LE VĀ O LE LELEI MA LE LEAGA?

"Ona ou iloa ai lea o agaga leaga e toatolu e pei o rane ua o mai mai le gutu o le tarako, ma le gutu o le manu feai, atoa ma le gutu o le perofeta pepelo." Fa'aaliga 16:13

MAU E TAU I AI: Fa'aaliga 20:10; 19:20

Ua leva ona fai sauniuniga a Satani mo lana toe osofa'iga e fa'asesēina ai le lalolagi. Na fa'ata'atia le fa'avae o lana galuega i 'upu na ia fai atu ai iā Eva i le fa'ato'aga: "Lua te lē oti lava....O le aso lua te 'a'ai ai, e pupula ai o oulua mata; ona 'avea āi lea o oulua e pei ni atua o lo o iloa le lelei ma le leaga" (Kenese 3:4, 5). Na faifaimalie mai āna sauniuniga mo lenei osofa'iga tele, lana toe osofa'iga o le a fa'asesēina ai le lalolagi e ala i fa'ailoga ma vavega e faia e agaga leaga. E le'i fa'ataunu'uina ato'atoa āna fuafuluāga ma āna fāufauga; peita'i o le a tauālugaina āna fa'agaioiga uma i le taimi o le i'uga. Fai mai le perofeta: "Ona 'ou iloa ai lea o agaga leaga e to'atolu e pei o rane, ...auā o agaga ia o temoni, ua latou ō atu i tupu o le lalolagi ma le atulaulau uma, e fa'apotopoto iā te i latou i le taua i le aso tele o le Atua e Ōna le malosi uma lava" (Fa'aaliga 16:13, 14). O le a fa'asesēina ai le lalolagi atoa i lenei fa'asesēga tele, se'i vaganā i latou na taofia e le mana o le Atua, e ala i lo latou fa'atuatua i Lana afioga. Ua fa'apenā ona o'o ifo i tagata i ōna pō nei le manatu fa'alēpopole; ua latou manatu ua leai se mea e āfāina ai i latou. Fa'ato'ā tete'i lava i latou nei pe a liligiina ifo le to'asā o le Atua. GC 561 (469)

O agaga leaga e tolu - o le "tarako," le "manu fe'ai," ma le perofeta pepelo, o uiga fa'apaupau, po o talitonuga i agaga e ola pea fa'anei ōna pō, o le pope, ma ekalesia Porotesano ua fulitua. O agaga leaga e tolu e foliga mai o le fa'ailoga pe o le fa'aaliga mai o nei mea leaga e to'atolu o pule tau tapuā'iga, pe a tu'ufa'atasi e fa'avaeina ai "Papelonia le 'a'ai tele" o aso e gata ai. 7 BC 844

(3) O Ā MEA O LE A FAIA E NEI SUI O LE PŌULIULI E FA'ASESĒINA AI MA TOE FA'ALILIU MAI LE TO'ATELE O TAGATA?

"O lona sau fo'i e pei o le galuega a Satani, i le mana uma, ma fa'ailoga, ma vavega pepelo." II Tesalonia 2:9

MAU E TAU I AI: Mataio 24:24; Fa'aaliga 16:14

O le a faia i le vānimonimo se fa'aaliga o ni va'aiga mata'utia ua faia e le mana fai vavega o temoni. O le a ō atu agaga o temoni i ta'ita'i o malō ma le lalolagi uma ina ia fa'amausalīina ai i latou i le fa'asesēga, ma una'iina ai i latou ina ia tutū fa'atasi ma Satani i lana fouvalega i le faigāmalō a le Atua. O vavega nei o le a fa'asesēina ai tagata nu'u o malō fa'apea ma o latou ta'ita'i. O le a tutū mai nisi ma fai mai o i latou o Keriso; o le a latou tau'aveina le suafo o le Fa'aola ma latou manana'o ina ia ifo ma tapua'i atu tagata iā i latou. O le a latou faia ni vavega ofoofogia ma fa'amālōlō i ma'i; o le a latou fai mai fo'i ua latou maua ni fa'aaliga fa'apitoa mai le lagi. Peita'i o nei mea ua latou fa'aigoa o fa'aaliga, e 'ese'ese mamao ma molimau a le afioga a le Atua. GC 624 (518)

O i latou o ē sa'ili i vavega e fai ma fa'aailoga o le ta'ita'iga mai le lagi o le a aga'i tonu lava i mea taufa'asesē. Ua ta'u mai i le Afioa Pa'ia o le a galue le fili e ala i ōna sui na ō 'ese mai le fa'atuatūāga, ma o le a foliga mai o lo'o latou faia vavega, e o'o lava i le alu ifo o le afi mai le lagi i le va'aiga a tagata. E ala mai "pepelo ofoofogia" o le a fa'asesēina e Satani, pe a mafai, le 'au filifilia a le Atua. 3 SM 408

(4) O LE Ā LE FA'ATUSA O LE A SUI I AI E SATANI IA LAVA I LANA TAUF'AASESĒGA MULIMULI MA AUPITO MATA'UTIA?

"E lē se mea fo'i lea e ōfo ai, auā o Satani lava, ua liua o ia e ia ma agelu o le malamalama." II Korinito 11:14

MAU E TAU I AI: Kalatia 1:8; Fa'aaliga 12:9

O le a tauāluga e Satani lana galuega tele o le taufa'asesē, e ala i lona sau ua foliga mai o ia o Keriso. Ua leva ona tulimata'i le ekalesia i le afio fa'alua mai o le Fa'aola; o lona afio mai o le taunu'uga lea po o le o'oo'oga o o latou fa'amoemoe uma. O lea la o le a sau nei Satani ua foliga mai o ia o Keriso ua afio fa'alua mai. O le a faia e Satani lenei mea i itū 'ese'ese o le lalolagi. O le a sau o ia i se pupula matagofie, ua fa'afetaui uma lava ona foliga i foliga o le Ālo o le Atua e pei ona tu'uina mai e Ioane i le Fa'aaliga (Fa'aaliga 1:13-15). O le mamalu ma le matagofie ua si'osi'omia mai ai o ia e leai sona tusa; fa'ato'ā vā'ai lea o mata o tagata i se va'aiga fa'apea. Ua fa'alogoina le 'alaga manumalō ua fa'apea mai: "Ua afio mai Keriso! O Keriso lenei ua afio mai!"

Ua fa'apa'u'ū fāō tagata ma ifo fiafia iā te ia, a ua sisi'i a'e ōna lima ma ua ia fa'amanuia iā i latou e pei lava ona fa'amanuia Iesu i Ōna so'o a'o soifua o Ia i le lalolagi. O si ōna leo mālū ua pei o se pese lelei i le fa'alogo a tagata. O le a tautala mai o ia i se leo mālū ma se si'uleo alofa. O le a tautala o ia i ni 'upu moni fa'alelagi e pei lava ona fetalai i ai le Fa'aola; o le a ia fa'amalōlōina ma'i. Ona faia loa lea o lana folafolaga ma fai mai ua suia le Sapati i le Aso Sā, ma ua faia loa lana poloa'iga ina ia fa'apa'ia uma tagata i le aso ua ia fa'apa'iaina. Ua fa'aauau lana folafolaga ma fai mai o i latou uma o ē fa'ama'a'a pea ma tausia le aso fitu, o i latou ia ua 'upuvale i lona igoa ona ua latou lē usita'i i āna agelu ua 'auina mai iā i latou ma le malamalama ma le 'upu moni. O le tauāluga lenei o le galuega tele taufa'asesē a Satani. E miliona ma miliona o le a talitonu i ai, e pei lava ona talitonu tagata Samaria i vavega fa'ataulaitu a Simona ma ua latou 'alalaga ma fai mai: O le fa'aaliga lava lenei o le mana ofoofogia o le Atua (Galuega 8:10). GC 624 (518, 519)

(5) I LANA TAUF'AASESĒGA MULIMULI, O AI O LE A TAUMAFAI SATANI MA LE TO'ATELE E TAUF'AASESĒ?

"Auā e tutū mai Keriso pepelo, ma perofeta pepelo, latou te faia fo'i fa'aailoga tetele ma vavega, ina ia fa'asesē ai i ē ua filifilia lava, pe afai e mafai ai." Mataio 24:24

MAU E TAU I AI: Mataio 24:5, 11; Ieremia 14:14

Ua lata lava le taimi o le a galue ai Satani e fai vavega ia fa'amaonia ai i mafaufau le talitonuga o ia o le Atua. O le a tula'i mai i luga o le 'upu moni tagata uma o le Atua, e pei ona tu'u mai e le fe'au a le agelu lona tolu. O ata matagofie uma, o vavega uma sa faia, o le a tu'u mai ina ia fa'asesē ai, pe a mafai, e o'o lava i le 'au filifilia. E pau le fa'amoemoe o le 'u'umau lea i fa'amaoniga ua mautinoa ai le 'upu moni i le amiotonu. Ia ta'u atu pea lava pea nei fa'amaoniga se'ia fa'ai'uina le tala fa'asolopito o lenei lalolagi. MS 61, 1906

(6) O LE Ā LE IGOA O LO'O TU'UINA MAI I LE TUSI PA'IA MO LE TAUA MULIMULI I LE VĀ O LE LELEI MA LE LEAGA?

"Auā o agaga ia o temoni e fai fa'aailoga, ua latou ō atu i tupu o le lalolagi ma le atu laulau uma, e fa'apotopoto iā te i latou i le taua i le aso tele o le Atua e Ōna le malosi uma lava." Fa'aaliga 16:14

(7) O LE Ā LE IGOA FA'A-EPERU O LO'O TA'UA AI SO'O LENEI MEA E TUPU ONA O LE NOFOĀGA E FAI AI?

"Na ia fa'apopototo fo'i iā te i latou i le mea ua igoa i le 'upu Eperu o Amaketo." Fa'aaliga 16:16

O le a tauina le taua o Amaketo. Ia lē maua mai se tasi o i tatou o moe i lenā aso. Ia tatou mataāla, ia pei tatou o taupou popoto le i ai o le suāu'u i fagu ma a tatou lamepa. Ia i o tatou luga le mana o le Agaga Pa'ia ma o le Ta'ita'i o le 'au a le Ali'i o le a tula'i mai i le ūlu o agelu o le lagi e ta'ita'iina le taua.

E i ai mea o lo'o i o tatou luma e muā'i tutupu. O le a ilia pū; e sasa'a ifo ipu i luga o ē nonofo i le lalolagi. O nei va'aiga ofoofogia ua i o tatou luga ma o nei mea o le a fa'ailoa ai o lo'o fa'atasi ai Ia, Lē o lo'o fa'atonutonuina gaoioiga uma, o Lē o lo'o fa'atasi ai i le savaliga mo Ia i augātupulaga uma, ma o Ia Lē na ta'utino mai o le a i ai ma Ōna tagata i a latou fa'afitāuli uma se'ia o'o lava i le i'uga o le lalolagi. O le a Ia fa'amaonia Lana 'upu moni; o le a mautinoa le manumalō i le fa'ai'uga. O le a Ia tu'uina i Lana 'au fa'amaoni le sogasogā ma le mana ia fuafua lelei ai, ina ia iā i latou le fa'amoemoe ma le lototele ma le malosi mo gaoioiga pe a fa'ateteleina a o lata mai lea taimi. 3 SM 426

(8) PE A O'O INA TU'UFA'ATASIA E SATANI LE 'AU AMIOLEAGA I LENEI TAU MA LE FA'AMOEMOE E FA'AUMATIA LE 'AU "FILIFILIA MA Ē FA'AMAONI," O AI O LO'O LATOU FA'ASAGATAU I AI?

"Latou te tau le taua ma le Tama'i Mamoe, a e manumalō le Tama'i Mamoe iā te i latou, auā o le Ali'i ia o ali'i ma le Tupu o tupu; o ē ua iā te Ia fo'i ua vala'auina i latou, ma filifilia, ma fa'amaoni." Fa'aaliga 17:14

MAU E TAU I AI: Mataio 25:40

Ua latalata ona tauina lea o le taua o Amaketo. O le ta'ita'i o le 'autau a le lagi e la'ei i 'ofu tau o lo'o tusia ai le suafa, Tupu o tupu ma le Ali'i o ali'i, e ti'eti'e latou i solofanua papa'e, e o'ofu i 'ie vavae papa'e ma e mamā. Ua tusi Ioane e fa'apea: "Na a'u iloa atu le lagi ua avanoa, fa'auta fo'i, o le solofanua sinasina, o Lē ti'eti'e ai fo'i ua igoa Ia o le Fa'amaoni ma le Moni, o le amiotonu fo'i na te fa'amasino ai ma tau ai le taua; ua pei o le mumū o le afi Ōna fofoga, ua i Lona ao fo'i paleali'i e tele; ua iā te Ia le suafa ua tusia e lē iloa e se tasi ua na o Ia lava; ua ofu fo'i o Ia i le ofu ua fufui i le toto; ua fa'asuafaina o Ia, O le Lokou o le Atua. O 'au fo'i o i le lagi ua mulimuli atu iā te Ia i luga o solofanua sisina, ua 'o'ofu i latou i le 'ie vavae sinasina ma le mamā. Ua alu atu fo'i le pelu ma'ai nai i Lona fofoga, ina ia taia a'i e Ia o nu'u; e pule fo'i o Ia iā te i latou i le to'oto'o u'amea; e soli fo'i e Ia le soligāvine o le to'asā mamafa o le Atua e Ōna le malosi uma lava. Ua iā te Ia fo'i le suafa ua tusia i Lona ofu ma Lona vae, O LE TUPU O TUPU, MA LE ALI'I O ALI'I" (Fa'aaliga 19:11-16).

(9) O Ā UIGA E LUA A LE 'AU FA'AMAONI A LE ATUA O LE A PUIPUIA AI I LATOU IA LĒ MAUA LE FA'AILOGA O LE MANU FE'AI MA MALA, MA O LE POGAI O LE FUAFUĀGA A LE 'AU AMIOLEAGA E FA'AUMATIA I LATOU?

"O le mea lenei ua i ai le onosa'i o le 'au pa'ia; o le mea lenei ua i ai ē ua tausi i poloa'iga a le Atua ma le fa'atuatua iā Iesu." Fa'aaliga 14:12

MAU E TAU I AI: Fa'aaliga 12:17; 22:14; I Ioane 2:3-6; I Ioane 5:3

O lo'o mataāla pea leoleo fa'alelagi i la latou galuega i autafa o le 'au fa'amaoni. Ua i ai se poloa'iga ua atofaina ai le taimi e fa'ao'o ai le oti i le 'au fa'amaoni i poloa'iga a le Atua. Peita'i o le a i ai nisi o le vaega a le fili o le a latou taumafai e fa'ao'o le oti i le fanau a le Atua a'o le'i o'o mai le taimi e pei ona atofaina i le poloa'iga. Peita'i e leai se tasi o 'au a le fili o le a mafai ona sopo atu i talatu o le mea ua tutū ai leoleo fa'alelagi. O le a fa'alavelave nisi o le fili a'o taumafai le fanau a le Atua e sosola 'ese mai 'a'ai tetele ma nu'u. Peita'i na pa'u'ū

ma leai se aogā o a'u'upega na si'i a'e e fasiotia ai i latou. Ua fa'apenā ona puipua e agelu le fanau a le Atua. *GC 631 (523)*

**(10) O LE Ā LE FETALAIGA A KERISO E FA'ATATAU I LE I'UGA PE A LĒ
FA'APU'UPU'UINA LE TOE TAIMI FA'AI'U O LE TALA FA'ASOLOPITO O LE LALOLAGI?**

“A lē fa'apu'upu'uina fo'i ia aso, e lē fa'aolaina se tasi; a e fa'apu'upu'uina ia aso ona o ē ua filifilia.”
Mataio 24:22

MAU E TAU I AI: Mareko 13:20; Fa'aaliga 2:10

O se mea tigā iā i latou le fa'atuai mai o le lavea'iga; peita'i o le tali sili lenei mo a latou talosaga. A'o latou taumafai e fa'atalitali ma onosa'i ma fa'amoemoe i le Ali'i, o le umi o lo latou fa'atalitali o le a fa'amalosia ai lo latou fa'atuatua, ma tupu ai le fa'amoemoe ma le onosa'i - o mea nei e le'i lava ona latou atina'e i le vaitaimi o lo latou olaga fa'a-Kerisiano. Ae ui i lea, o le a fa'apu'upu'uina lea vaitaimi ona o le va'ai alofa i le 'au fa'amaoni. “O le 'a lē faia ea e le Atua le amiotonu mo Lana 'au filifilia, o ē ua 'alalaga atu iā te Ia i le ao ma le pō? ... 'Ou te ta'u atu, o le a fa'avave ona faia e Ia le mea e tusa ai mo Lana fanau” (Luka 18:7, 8). O le a manatunisi o le a tuai ona o'o mai o le i'uga; peita'i o le a vave o'o mai. O le a aoina le saito ma fusifusia mo le falesaito o le Atua; a'o le a fusifusia fo'i le titania e tafu ai le afi o le fa'afanoga. *GC 630 (523)*

**(11) E FA'APEFEA ONA TA'UINA E LE TUSI PA'IA LE MEA NA TUPU IĀ IAKOPO, MA O LE A
FA'APEA FO'I ONA O'O I TAGATA O LE ATUA A O TULILOA MA SA'ILIA I LATOU E PEI O
MEA OLA A 'AU A SATANI?**

“Auē! auā o le aso tele lea, e leai sona tusa; o ōna pō lava ia o le puapuagā o Iakopo; a e fa'aolaina ai o ia.”
Ieremia 30:7

MAU E TAU I AI: Ieremia 30:10; Salamo 34:19; Roma 11:26

O le a fa'apenā loa ona o'o atu le fanau a le Atua i se vaitaimi o le puapuagā tele ma sauāga. Na fa'aigoa e Ieremia lea vaitaimi o le taimi o puapuagā o Iakopo. “Auē! auā o le aso tele lea, e leai sona tusa; o ōna pō lava ia o le puapuagā o Iakopo; a e fa'aolaina ai o ia” (Ieremia 30:7).

Ua fa'atusaina le puapuagā o le fanau a le Atua i le puapuagā o Iakopo, i le pō na ia fa'atauanau atu ai i le Atua i le tatalo mo le lavea'iga mai lima o Esau (Kenese 32:24-30). *GC 616 (513)*

E ui lava ua si'osi'omia le fanau a le Atua e fili sauā ua manana'o ina ia fasiotia i latou, e lē o le pogai lea o lo latou puapuagā. Ua latou puapuagatia ona o lo latou lē mautinoa po ua atoa lo latou salamō i a latou agasala uma. Auā afai e i ai ni agasala latou te le'i salamō ai, ona lē fa'ataunu'uina ai lea iā i latou le folafolaga a le Fa'aola ua fa'apea mai: “Ou te tausia fo'i 'oe i le itūaso o le tofotofoga o le a o'o mai i le lalolagi uma” (Fa'aaliga 3:10). Ma'imau pe ana ua latou mautinoa ua fa'amagaloina i latou, semanū ua latou lē toe fefefe i sauāga po o le oti. A e afai latou te lē manumalō, ma o'o ai le oti iā i latou ona o ni leaga i o latou olaga, ona o'o mai ai lea o le luma i le suafa pa'ia o le Atua. *GC 619 (515)*

**(12) I LENEI TAUA TELE MULIMULI, O LE Ā LE FOLAFOLAGA E MAFAI ONA TAPA I AI I
LATOU O Ē FA'AALI LE ALOFA E ALA I LE USIUSITA'I I LE ATUA?**

“Ona ua naunau mai o ia iā te A'u, o le mea lea 'Ou te fa'aolaina ai o ia; 'Ou te fa'amamalu iā te ia ona ua iloa e ia Lo'u igoa. E vala'au mai o ia iā te A'u, ona 'Ou tali atu ai lea iā te ia; o A'u, 'Ou te iā te ia i le puapuagā; 'Ou te lavea'iina o ia, ma 'Ou fa'atupuina lona mamalu.” **Salamo 91:14, 15**

MAU E TAU I AI: Salamo 91:1-13; 18:1-15; Sakaria 2:8

(13) O Ā ALA E LUA O LE A MAFAI AI ONA MANUMALŌ Ē FA'AMAONI PEA I LE ATUA MAI OSOFA'IGA MATA'UTIA A SATANI?

“A ua latou manumalō iā te ia ona o le toto o le Tama'i mamoe, ma le 'upu a la latou mau, ua latou lē fa'apelepeleina fo'i lo latou ola ua o'o i le oti.” Fa'aaliga 12:11

MAU E TAU I AI: Fa'aaliga 12:12; 3:21; Ioane 16:33

A'o silasila mai le Atua i le fa'asologa mai o augātupulaga uma o le lalolagi, sa taula'i Ōna fofoga i le vaitaimi o puapuagā o Ōna tagata, le taimi e tutū fa'atasi ai malō o le lalolagi ina ia fa'aumatia i latou. O le a fa'amata'uina i latou i le oti. Peita'i o le Atua, o Lē na vaeluaina le Sami 'Ula'ula mo Isara'elu, o le Atua lava lea o le a fa'ailoa mai Lona mana mo lo latou lavea'iga. “E fai fo'i i latou Ma'u 'olua tāua, ua fetalai mai ai Ieova o 'au i le aso ua ou tofia. 'Ou te alofa fo'i iā te i latou, e pei ona alofa o le tagata i lona atali'i ua 'au'auna iā te ia” (Malaki 3:17).

Afai e fa'aumatia le ola o le fanau a le Atua i le taimi lenei, o le a lē 'avea lo latou toto masa'a o se fatu ua lūlūina e maua mai ai se seleselega e pei o le toto o le 'au maturo. O le a lē 'avea lo latou fa'amaoni o se molimau e liliu ai nisi i le 'upu moni, auā ua te'ena fa'afia e le loto ma'a'a o le 'au amioleaga le galuega o le alofa tunoa o le Atua, se'ia o'o ina tu'ua ai loa i latou e le Agaga o le Atua. A tu'uina nei le 'au amiotonu i lima o o latou fili, o se manumalō lava lea o le ali'i o le pouliuli. Fai mai le faisalamo: “Auā Na te fa'alafi iā te a'u i le mealilo i Lona fale apitaga i le aso vale. Na te natia fo'i a'u i le mealilo i Lona falefetafa'i” (Salamo 27:5). Ua fetalai mai Keriso: “Inā ō mai ia, lo'u nu'u e, inā ulu atu ia i o outou āfeāfe, ma pupuni o outou faitoto'a. Ia outou lalafi mo sina taimi pu'upu'u, se'ia mavae atu le to'asā. Auā fa'auta, o lo o afio mai Ieova ai le mea o afio ai o Ia, ina ia fa'asalaina ē o nonofo i le lalolagi ona o a latou amioleaga” (Isaia 26:20, 21). E matagofie ma mamalu le lavea'iga o i latou na fa'atalitali ma le onosa'i mo Lona afio mai, i latou ua tusia o latou igoa i le tusi o le ola. GC 634 (525)

(14) O LE Ā LE I'UGA O I LATOU O Ē, ONA O LE FOUVALE PEA MA LE LOTO FA'APITO MO LO LATOU LAVA LELEI, UA LATOU MAUA LE FA'AIOGA O LE MANU FE'AI?

“Ona mulimuli atu ai lea iā te i la'ua o lona to'atolu o agelu, ua fa'apea atu ma le leo tele, Ai se tasi e ifo i le manu fe'ai ma lona fa'atagata, ma talia le fa'aioiga i lona muāūlu po o lona lima, e inu lava ia i le uaina o le to'asā o le Atua, ua liligiina atu e lē suia i le ipu o Lona to'asā, e puapuagātia fo'i ai i le afi ma le teiō i luma o le 'au agelu pa'ia ma luma o le Tama'i mamoe.” Fa'aaliga 14:9, 10

MAU E TAU I AI: Fa'aaliga 19:20; 16:19; Salamo 11:6; Mataio 13:41, 42

O lo o i totonu o le fe'au a le agelu lona tolu se lapata'iga ua sili lona mata'utia i lapata'iga uma ua tu'uina mai i tagata ola. O se agasala mātuiā tele lea o le a liligiina ifo ai le to'asā o le Atua e lē filogia i le alofa tunoa. Peita'i o le a lē tu'ua i le pogisā tagata e uiga i lenei matā'upu tāua. E tu'uina atu i le lalolagi le lapata'iga e fa'atatau i lenei agasala a'o lumana'i ai le liligiina mai o le to'asā o le Atua, ina ia malamalama tagata uma i le mafua'aga o lea fa'asalaga, ma latou maua ai se avanoa latou te liliu 'ese ai. Fai mai le valo'aga, o le a alagaina le fe'au a le ulua'i agelu “i atunu'u uma ma itu'aiga ma gagana 'ese'ese”. O le a fa'apenā fo'i le lautele o le alagaina atu o le fe'au a lona tolu o agelu, auā o se vaega o le fe'au sautuatu e tasi. Fai mai le valo'aga o le a alagaina i se leotele ma o le a alagaina e se agelu o lo o lele i le taulotoa'iga o le lagi. O lona uiga o le a fa'alogo i ai le lalolagi atoa. GC 449 (375)

Peita'i e leai se tasi o le a o'o i ai le to'asā o le Atua se'i vaganā ua ia te'ena le 'upu moni e ui lava ua manino lelei i ai lona loto ma lona mafaufau. E to'atele latou te le'i maua se avanoa latou te fa'alogo ai i 'upu moni fa'apitoa mo le taimi nei. E le'i fa'amaninoina atu iā i latou le uiga moni o lo latou tiute e fa'atatau i le poloa'iga e fā. E silafia e le Atua mea uma; Na te faitauina mea uma o lo o i loto ta'ito'atasi. So'o se tasi ua naunau na te fia iloa le 'upu moni, e lē tu'ua e le Atua lea tagata ina ia fa'aseseina i matā'upu ua mafua ai nei le finauga tele.

O le a manino tagata uma e fa'atatau i le fa'amamaluina o le Aso Sā ma le tausiga o le Sapati o le Atua, ina ia fai ai ma le malamalama a latou filifiliga po o le fea e ao ona latou usita'i i ai. GC 605 (503)

(15) O Ā FOLAFOLAGA E MAFAI ONA TAPA I AI TAGATA FA'AMAONI A LE ATUA PE A LATOU FA'ATUATUA PEA IĀ TE IA I LE TAIMI O PUAPUAGĀ?

“O lo'o mai iā Ieova le fa'aolataga o ē amiotonu; o Ia lava lo latou malosī i ōna pō o le puapuagā. E fesoasoani fo'i Ieova iā te i latou, ma lavea'i iā te i latou; e lavea'iina lava i latou e Ia ai tagata amio leaga, na te fa'aolaina fo'i i latou, auā ua latou fa'atuatua iā te Ia.” Salamo 37:39, 40

MAUE TAU I AI: Salamo 27:9; 46:1-2; Isaia 33:2, 16

Ana mafai ona pupula mata o tagata i le va'aiga fa'alelagi, semanū ua latou va'aia agelu malolosi ua laulaututū i autafa o i latou ua fa'amaoni pea i le 'upu moni a le Atua. Ua va'ava'ai agelu i lo latou puapuagā, ua latou fa'alogo fo'i i a latou fa'atoga. O lo o latou fa'atali nei mo le fetalaiga mai lo latou Ta'ita'i ina ia mafai ai ona latou fa'avaveina 'ese lenei 'au fa'amaoni mai lo latou faigatā. Peita'i e ao ona latou onosa'i teisi pea. E ao ona inu le fanau a le Atua i le ipu, ma papatisoina i latou i le papatisoga o tofotofoga. GC 630 (523)

E na o i latou o ē ua fa'asoa i mafatiāga o le Ālo o le Atua, ma ua tutū a'e mai puapuagā mata'utia, ua fa'amamāina o latou la'e i le toto o le Tama'i Mamoe, o le a mafai ona fa'afiafiaina i latou i le mamalu e lē mafa'amatalaina ma le matagofie e lē mafa'atusaina o le lagi. 1 T 155

**O'U MANATUNATUGA MA TALI
(Mafai tali e sili atu i le tasi pe a tatau)**

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

‘Ou te _____ ua lata ona tapunia le faitoto’a o le alofa tunoa, ma o le a o’o mai loa mea e tutupu i le taimi e ta’ua o puapuagā o Iakopo.

‘Ou te _____ o Keriso o la’u Fautua ma _____ o le a faitauina a’u, e ala i Lona alofa tunoa, o se tasi o Lana ‘au fa’amaoni i lenā aso fa’apitoa.

Ua’ou _____ o le a matuā ita Satani iā i latou o ē tausi poloā’iga a le Atua, e iā i latou le mau a Iesu, ma e lē ifo iā te ia lea. ‘Ou te _____ o le a ia auina maise osofa’iga o mea fa’afoliga tauSatani i lana toe taumafaiga tele mulimuli e taufa’asesē le lalolagi.

‘Ou te _____ o Satani o le a sau lava ia ma ta’u mai o ia o Keriso. O āna taufa’asesē tetele o le a tu’uina mai i fa’aologa ma vavega, ma ua ‘ou _____ e pau lo’u puipuiga mai nei taufa’asesē pe a ‘ou tumau i le ‘upu moni o le Afioga a leAtua.

‘Ou te _____ o le a i ai le “taua o lea aso tele o le Atua” e ta’ua o Amaketo, e lē o manino ma malamalama lona uiga moni. ‘Ou te _____ o le a tulituli tagata fa’amaoni a le Atua e pei o manu ta’a vao. Ua ‘ou _____ atonu o le tupu nei mea mata’utia iā te a’u, peita’i ‘ou te _____ e moni folafolaga a le Atua, ma o le a fa’amaoni o Ia e lavea’i a’u mai lima o le ti’āpolo ma lavea’i a’u i le saogalemū o Lona malō.

A o lenei taimi, ‘ou te _____ pe a vala’au a’u ina ia sauāina pe tu’u atu fo’i lo’u ola ona o Lona suafa, o le a tu’uina mai e le Atua le malosi ma le filemū e lavatia ai so’o se tulaga, ma ‘ou te _____ o le a Ia fa’atasi pea ma a’u i mea uma.

MANATU	FA’AOPOOPO	TATALO MANA’OMIA



O le Mala Lona Fitu ma le Taua o Amaketo

Lesona 16

UPU A LE FA'ATONU: I lenei taimi ua mae'a atu mala muamua e ōno sa fa'atupuina puapuagā mata'utia i luga o le 'au amioleaga. Ma le ita tele, o le a latou u'una'i ta'ita'i o le malō e fa'amalosia le tulafono e fasiotia ai ē lē usita'i i a latou fa'atonuga ma ta'u o latou ua pogai ai puapuagā. I lea taimi ua sosola le 'au fa'amaoni a le Atua i vaomatua pe ua tu'uina i le falepuipui. Ua uma ona saunia le aso e fasiotia ai i latou, ma sauni fo'i e tuliloaina 'au'auna fa'amaoni a le Atua o lo'o i ai pea i fafo.

O le finagalo malie o le Atua ua o'o i le mea e gata ai, ma ua fa'alogoina Lona si'ufofoga i le atulaulau ma le lalolagi a o fa'apea mai, "Ua mae'a" (Fa'aaliga 16:17). O le a lūlūina le lagi, e ta'alili mea uma o le foafoāga i Āna fetalaiga, ma o le a fese'eta'i le lalolagi i le vāvāō. Ua o'o nei i le taimi e fa'ataunu'uina ai le "taua o lenā aso tele o le Atua, Lē Ōna le malosi uma lava" (Fa'aaliga 16:14), e fa'ailogaina ai le fa'ai'uga o le tala fa'asolopito. O le a tula'i mai le Atua e 'au ma Ōna tagata, ma ua o'o i le itulā o le a fa'aali mai ai Keriso i le lagi i Lona mamalu.

(1) ONA OLE A LĒ TAPUĀ'I LE 'AU FA'AMAONI A LE ATUA I LE MANU FE'AI, O LE Ā LE ULUA'I TULAFONO O LE A TAUMAFAI LE MANU FE'AI MA ĀNA 'AU E TAU FA'AMALOSI?

Ua tu'uina atu fo'i iā te ia na te avatua le mānava i le fa'atagata o le manu fe'ai, ina ia tautala le fa'atagata o le manu fe'ai, ma ia faia ina ia fasiotia i latou uma o ē lē ifo atu i le fa'atagata o le manu fe'ai." Fa'aaliga 13:15

MAU E TAU I AI: Fa’aaliga 17:6; Mareko 13:12, 13; Ioane 16:2

Pe a to’esea le puipuiga a tulafono fa’aletagata mai ē fa’amamalu tulafono a leAtua, o le a i ai fo’i i lea taimi i atunu’u ‘ese’ese se fa’agaoioiga ia fa’aumatia ai i latou. A o latalata i le taimi ua ta’u mai e le tulafono, o le a taupulepulevale tagata uma e tutuli’ese le ‘au fa’amaoni. Ua fa’atatauina se osofa’iga e fa’aumatia ai i se pō e tasi, o le a fa’afilemū ai leo o ē tete’e a e tumau fa’amaoni.

O le a sau le fa’atonuga e tatau ona latou fa’agalo le Sapati o le poloa’iga e fā, a e fa’amamalu le Ulua’i Aso, a leai o le a to’esea o latou ola; peita’i o le a lē gaua’i atu i latou ma solipala le Sapati a le Ali’i, ina ia tausi le a’oa’oga a le pope. O le a si’omia i latou e Satani ma āna ‘au amioleaga, ma fa’amalie ai o latou loto ona e foliga mai o le a leai se auala e mafai ona saogalemū ai i latou. Mar 269

(2) O LE Ā LE MEA O LE A FAIA E LE ATUA A O IA SILASILA IFO O LO’O TULITULI FA’AMANU’AIVAO LANA ‘AU FA’ATUATUA E PEI O I LATOU O TAGATA AMIOLEAGA ONA O LO LATOU FA’AMAONI IĀ TE IA?

E fa’afa’alogoia e Ieova Lona si’ufofoga silisili, e fa’aali fo’i e Ia le fa’apa’ū ifo o Lona ‘a’ao, ma le tele o Lona to’asā, ma le mū o le afi ‘ai tele, o le lolo, ma le afā, ma le uato ‘a.’” Isaia 30:30

MAU E TAU I AI: Salamo 2:5; 46:6, 7; Iopu 37:1-5

O lo o fa’atoga atu pea le fanau a le Atua mo Lana puipuiga. O nisi o i latou o lo o i ana o falepuipui, o nisi fo’i ua lalafi i nofoāga tu’ufua i le vaomatua ma atumauga. Ua i ai i lea taimi i so’o se itū o le atunu’u ni vaega’au o lo’o una’iina e ‘au a agelu leaga, auā le sauni atu mo le galuega tele o le fa’afanoga. O le taimi lenei, i le ituaso o le fa’atumutumuga o le leaga, o le a tula’i mai ai le Atua o Isara’elu mo le lavea’iga o Lana fanau filifilia. Ua fetalai mai le Ali’i: “Tou te pepese fo’i e pei ona fai i le pō o le tausamiga pa’ia; tou te oli’oli fo’i e pei o ē ua ō atu i le mauga o Ieova, o le Papa o Isara’elu. E faia fo’i e Ieova ina ia fa’alogo mai le lalolagi uma i Lona si’ufofoga silisili, ma latou vā’ai i le o’o mai o Lona a’ao i le taimi o Lona to’asā. O le a va’aia le mū o le afi tele, o le lolo, ma le afā, ma le uato’a” (Isaia 30:29, 30). GC 635 (526)

(3) PE A FA’ALOGOINA LE “SI’UFOFOGA TELE” O LE ATUA, O Ā ‘UPU O LE A ‘ALAGAINA MAI LE MALUMALU O I LE LAGI A O AMATAINA LE MALA LONA FITU?

“Ua liligi fo’i e lona to’afitu o agelu lana ipu i le matagi; ona tūlei mai ai lea o le si’ufofoga tele mai le malumalu o i le lagi mai le nofoāli’i, ua fa’aapea mai, Ua uma ona fai.” Fa’aaliga 16:17

MAU E TAU I AI: Fa’aaliga 21:6; Ioane 19:30

O le valuapō o le a fa’aali mai ai e le Atua Lona mana mo le lavea’iga o Ōna tagata. Ua mū toto’a le susulu mai o le lā. O le a ta’alise ona tutupu mai o fa’aailoga ma mea ofoofogia. Ua vā’ai atu le ‘au amioleaga ma le mata’u ma le maofa tele; peita’i o lo o tepa a’e ma le ‘oli’oli le ‘au amiotonu i fa’aailoga o le lavea’iga o i latou. O mea uma o le foafoāga ua foliga mai ua suia lo latou ala. Ua lē toe tatafe vaitafe. Ua ō a’e ao pogisā ma le fa’amālumalu ma ua fetu’ai solo le tasi ma le isi. Ua va’aia i totonugalemū o le lagi fa’amālumalu se avanoa manino, o lona mamalu e lē mafai ona fa’amatalaina. O inā ua sau ai le si’ufofoga o le Atua e pei o le ta’alili o vai e tele ua fa’aapea mai: “Ua mae’a” (Fa’aaliga 16:17). GC 636 (527)

E fa’atagaina e le Atua ‘au a le amioleaga ia aga’i atu pea i le tulaga ia fa’ataunu’u ai le latou fuafuāga e fa’aumatia tagata o le Atua. Ina ua o’o mai le taimi e fa’amalosia ai le fa’atonuga o le oti ma ō atu le ‘au amioleaga ma le ‘alaga o le manumalō ia fa’aumatia le ‘au pa’ia, a e fa’alogoia loa le si’ufofoga o le Atua o fetalai, “Ua mae’a.” O ‘upu nei e fa’ai’u ai le taimi o puapuagā o Iakopo, e laveā’i ai le ‘au pa’ia, ma amata ai le mala lona fitu.

Mai ‘upu o le Fa’aaliga 16:17 ua ta’u mai ai le taimi e fa’aalia ai le fa’ataunu’uga o le mealilo o le agasala, pe a fa’aalia le uiga moni o le so’ofa’atasiga o le ekalesia ma le malō o lo’o i F 13, 14, ma le 19. 7 BC 846

(4) O LE A FA’APEFEA ONA TALIINA E LELALOLAGI LE ‘ALAGA TELE A LĒ NA FAIA MEA UMA, MA O LE Ā LE I’UGA O LE A TUPU I ‘A’AI AMIOLEAGA A MALŌ O LE LALOLAGI?

“Ona tutupu ai lea o leo, ma faititili, ma uila, sa i ai fo’i le mafui’e tele, e lē fa’apea ona tele se mafui’e ua tele na’uā talu ona i ai o tagata i le lalolagi. Ua vaetoluina fo’i le ‘a’ai tele, ua pa’u ū fo’i ‘a’ai o nu’u; ua manatua Papelonía le ‘a’ai tele i luma o le Atua, ina ia tu’uina atu iā te ia o le ipu o le uaina o Lona to’asā mamafa.”
Fa’aaliga 16:18, 19

MAU E TAU I AI: Fa’aaliga 6:12, 13; Isaia 13:13

O lenā si’ufofoga ua lūlūina ai le lagi ma le lalolagi. Ua i ai fo’i le mafui’e tele, “e lē fa’apea ona tele se mafui’e ...talua ona i ai tagata i le lalolagi” (Fa’aaliga 16:18). O le lagi ua foliga mai ua tatala e pei o se tusi ma toe tapunia, ma toe tatala ma toe tapunia. Ua peisea’i ua fe’emo mai ai le pupula o le nofoāli’i o le Atua. O atumauga ua lūlūina e pei o se ū i le matagi, a’o papa ua mavaevae ma fa’ata’ape’apeina solo. Ua i ai fo’i le gogolo e pei o se afā ua fotua’i mai. GC 636 (527)

A o tu’ufa’atasia le uila mai le lagi ma le afi mai le lalolagi, o le a mumū mauga e pei o se ogāūmu, ma o le a matuā fa’atafeina le ma’a ua liu suāvai mai maugamū, ua fa’atumulia ai fa’ato’āga ma fanua, o nu’u ma ‘a’ai. O le a fa’atumulia alia e ma’a vevela ma fa’apupunaina ai vaitafe, e papā solo ma fa’asalalau ma’a vevela i luga o le lau’ele’ele. O le a mātūtū vaitafe ma vaituloto. O le a ta’alili le lalolagi; o le a i ai mafui’e mata’utia i itū uma ma papā maugamū. PP 110

(5) E FA’APEFEA ONA FA’AMATALAINA E LENEI FUAI’UPU MEA MATA’UTIA O LE A O’O I MAUGA MA ATUMOTU O LE LALOLAGI?

“Ua sosola fo’i motu uma, o mauga fo’i ua lē iloa.” **Fa’aaliga 16:20**

MAU E TAU I AI: Fa’aaliga 6:14; Ieremia 4:24-29; Luka 21:25, 26

O le sami fo’i ua matuā sōusou na’uā. Ua fa’alogoina fo’i le i’i o le afā tele fa’apei o le leo o temoni i le galuega o le fa’afanōga. O le fogā’ele’ele atoa ua fegaioia’i e pei o le fafati mai o galu o le sami. O ona laufanua ua mavaevae. O ōna fa’avae fo’i ua foliga mai ua matuā lepetia uma lava. Ua gogoto ifo atumauga latou. O motu sa ainā ua lē toe va’aia. O ‘a’ai ma taulaga sa fa’apei o Sotoma i le amioleaga ua lilofia nei i le moana sausau. Ua manatua Papelonía le ‘a’ai tele i luma o Ieova, “ina ia tu’uina atu iā te ia o le ipu o le uaina o Lona to’asā mamafa.” E tusa ma le selau pauna le mamafa o matāua ta’itasi o le uato’a ua pa’u’ū ifo nei mai le lagi ma faia ai la latou galuega o le fa’afanōga. (Fa’aaliga 16:19, 21). GC 636 (527)

(6) A O GATETE MA PĀPĀ FA’AVAE O LE LALOLAGI E PEI O MAUGAMŪ, O LE Ā LE MEA O LE A FAIA E LE AFI O LE A MUMŪ I TULAGA UMA O LE LALOLAGI MA MEA SA FAUSIA I LE MIMITAFALE O LE TAGATA?

“A e sau le aso o le Ali’i pei o se gaoi i le pō, e mavae’eseina ai le lagi ma le gogolo tele, e te’a ‘ese’ese ai fo’i o mea na fai a’i ina ua mū; o le lalolagi fo’i ma galuega o i ai e susunuina lava. O lenei, o le a te’a ‘ese’ese nei mea uma, pe fa’apefea la outou amio e tataua ai i le amio lelei ma le amio Atua; o lo’o fa’atalitali ma naunau atu ia aulia mai le aso o le Atua, e te’a ‘ese’ese ai le lagi ina ua mū, e liu suāvai fo’i o mea na fai a’i ina ua mū?” **II Peteru 3:10-12**

MAU E TAU I AI: Ioelu 1:15; Salamo 46:6

O le lalolagi o le a felafolafoa'i ma taumalua e pei o se tagata ua afāina i le inu 'ava malosi, ma o le a tō'esea pei o se faleō'o. O mea sa fai ai o le a mū, ma o le a ta'ata'aia le lagi e pei o se tusita'ai....O le manifi o le lalolagi o le a māvaevae ina ua pāpā mea na faia ai o lo'o i lalo o le 'ele'ele. O nei mea, pe a fa'asa'oloto loa, o le a 'ave'esea oloa sa fa'aputuina i tausaga e tele e tagata lē taupulea mai ē matitiva....O lo'o i lumana'i le afi mata'utia tele, o lea o le a tafi'esea uma galuega lē aogā o le olaga i se pō ma le ao. *Mar 283*

(7) O LE Ā LE VAEGA MATA'UTIA O LE A SOSO'O MAI O LE MALA LONA FITU E PA'Ū I LUGA O LE 'AU AMIOLEAGA?

“Ua tō mai fo'i ai le lagi i luga o tagata le uato'a latetele, e pei o le taleni ona mamafa; ona faifai ai lea o tagata i le Atua ona o le mala o le uato'a, auā ua matuā tele lea mala.” Fa'aaliga 16:21

MAU E TAU I AI: Fa'aaliga 8:7; 11:19; Salamo 18:13

O le finagalo o le Atua na Ia fa'atagaina ai mea o le foafoāga e fa'ato'ilalo le malosi o Ōna fili – “o le afi ma le uato'a, o le kiona ma le ausa; o le matagi e afā ai, o lo'o faia Lana afioga” (Salamo 148:8). Ina ua taumafai sā Amorī fa'apaupau e tete'e fuafuāga a le Atua, na Ia tula'i mai ma lafo ifo i lalo “ma'a tetele mai le lagi” (Iosua 10:11) i luga o fili o Isara'elu.

Ua ta'u mai iā i tatou o le a tauina se taua tele i taimi fa'ai'u o le tala fa'asolopito o le lalolagi, pe a “ua tatalaina e Ieova Lana mea e teu ai a'u'upega, ua na au mai ai a'u'upega o Lona to'asā...” (Jeremia 50:25). Ua fesili Ia, “Ua e ūlu atu ea i mea e teu ai le kiona? Ua e va'aia ea fo'i mea e teu ai le uato'a? O mea ia ua 'Ou tu'u ma ōna pō o le puapuagā, ma le aso e tau ai le taua” (Iopu 38:22, 23). *PP 509*

E tusa ma le selau pauna le mamafa o matāua ta'itasi o le uato'a ua pa'u'ū ifo nei mai le lagi ma faia ai la latou galuega o le fa'afanoga (Fa'aaliga 16:19, 21). O 'a'ai tetele o le lalolagi ua olopalaina lava. O maota mamalu sa fa'aaluina ai e ali'i sili o le lalolagi lo latou tamao'aiga ina ia maua ai lo latou lava vi'iga ua matuā olopalaina lava ma fa'atafunaina i o latou luma. O pā ma faitoto'a o falepuipui ua lepetia i lalo, a'o tagata o le Atua, o ē sa saisaitia ai i inā ona o lo latou fa'atuatua, ua fa'asa'olotoina nei. *GC 636 (527)*

(8) O LE Ā LE TALI A LE 'AU AMIOLEAGA I LE MALA E “MATUĀ MATA'UTIA TELE” O LE MALA O LE UATO'A?

“Ua tō mai fo'i ai le lagi i luga o tagata le uato'a latetele, e pei o le taleni ona mamafa; ona faifai ai lea o tagata i le Atua ona o le mala o le uato'a, auā ua matuā tele lea mala.” Fa'aaliga 16:21

MAU E TAU I AI: Fa'aaliga 16:9, 11; Isaia 8:21, 22

O le a latou 'upu faifai i le Atua. Ua fa'atolu nei ona fetu'u le Atua e i latou o lo'o 'a'afia i mala, o lea ua fa'aalia ai a latou 'upu e fa'ailoa le matuā 'ino'ino i le Atua, e ui ina o lo'o pa'u'ū mai Āna fa'asalaga mata'utia. *7 BC 848*

(9) O LE Ā LE TALI MAI LOTO O Ē LĒ SAUNI, O LO'O FEMĒMĒĀ'Ī, MA LE MOTU O TAGATA O LO'O FEVESIA'I A O LŪLŪINA “FA'AVAE O LE LAGI?”

“E i ai fo'i fa'aailoga i le lā, ma le masina, ma fetū; o i le lalolagi fo'i le atuatuvaletu o nu'u i le femēmēā'i; e ū fo'i le sami ma le sousou; e oti fo'i tagata i le matata'u ma le fa'atalitali i mea e o'o mai i le lalolagi; auā e lūlūina 'au a le lagi.” Luka 21:25, 26

MAU E TAU I AI: Mika 7:4; Isaia 22:5; 13:13, 14

O lo'o tu'uina mai i le fa'ai'uga o le fuai'upu le pogai ua matuā tupu ai le mata'u i loto o tagata ma oti ai, ona ua lūlūina “au o le lagi.” O lenei va'aiga ua fa'ailoa mai e tupu i le taimi o le mala lona fitu. I luga o lenei va'aiga o le a va'ai atu le 'au amioleaga ma le mata'u tele ma ua mea. (Fa'aaliga 16:21). 5 BC 863

O afā, mafui'e, asiosio, afi, ma le pelu o le a fa'atafuna'ina ai mea uma i so'o se mea, se'ia o'o ina fa'amata'uina loto o tagata ma oti ai ona o mea o le a aumaia i luga o le lalolagi. Tatou te lē iloa le vā lalata o tatou ma le ola e fa'avavau. Tatou te lē o iloa pe ua lata ona tapunia le alofa tunoa mo i tatou. 4 T 52, 53

(10) O FEA O LE A SA'ILI AI E LE 'AU AMIOLEAGA SE LAFITAGA MAI LE MALAIA O LO'O LATOU FA'AFESĀGA'I, MA O LE Ā LE TAGI O LE A SAU MAI O LATOU LAUGUTU?

“O tupu fo'i o le lalolagi, ma ali'i sili, ma ē ua tamao'aiga, ma ta'ita'i o 'au e ta'ito'aafe, ma ē ua malolosi, ma pologa uma, atoa ma tama a le 'ele'ele uma ua latou lalafi i ana ma papa o mauga; ua latou fai atu fo'i i mauga ma papa, Mafuli mai ia iā te i matou, ma tanuma'i i matou ai le silafaga a Lē ti'eti'e i le nofoāli'i, ma le to'asā o le Tama'i mamoe; auā ua o'o mai le aso tele o Lona to'asā, o ai fo'i sē na te mafaia ona tū atu?”
Fa'aaliga 6:15-17

MAU E TAU I AI: Isaia 2:10, 19; Hosea 10:8; Luka 23:30

Ua lē toe i ai ni 'upu fa'aulaula ma ua fa'afilemūina laugutu pepelo. O le vevesi ma le pisaō o mea tau o le taua, “ma le ofu ua liloia i le toto” (Isaia 9:5), ua ffilemū. E pau le mea ua fa'alogoia o le leo o faigā talosaga, o le tagilotulotu ma le tagi auē. O le tagi mai laugutu sa fa'atauemu: “ua o'o mai le aso tele o Lona to'asā, o ai fo'i sē na te mafaia ona tū atu?” (Fa'aaliga 6:17). Ua tatalo le 'au amioleaga ina ia tanumia i latou i lalo o papama'a o mauga ona e lē fia fesāga'i ma fofoga o Lē sa latou agaleagaina ma te'ena. Mar 295

O lo o ufitia pea le lagi i ao mafiafia; peita'i o le a va'aia i lea taimi ma lea taimi le susulu mai o le lā ua peisea'i o fofoga tauimasui o Ieova. Ua mata'utia le fe'emo mai o uila ua peisea'i o ni afimumū ua li'o ai le lalolagi. A'o ta'alili mai pea le pā o faititili taufa'amata'u, ua fa'alogoia fo'i ni leo e 'ese ma le mata'utia ua ta'u mai ai le i'uga o ē amioleaga. E le'i malamalama uma i ai le to'atele i nei 'upu ua ta'u mai, peita'i ua matuā manino lelei i ai le 'au a'oa'o taufa'asesē. O ē e le'i leva nei lava ona latou 'upuvale ma taufāifai, ma maoa'e lo latou fa'asauā i ē tausi poloa'iga a le Atua, ua lofitūina nei i latou ma fa'agateteina i le fefe ma le mata'u tele. Ua sili a'e i le ta'alili o faititili le leotele o la latou uiō. Ua ioe ma ta'utino atu nei temoni i le silisili 'ese o Keriso, ma ua latou tetemū i Ōna luma, a'o ē amioleaga ua 'ai'oi atu nei mo le alofa tunoa, ma fa'apa'u'ū fāō i le matata'u tele. GC 637-638 (528)

(11) E UI INA SP'OMIA I LATOU A O FA'ATAFUNA'INA LE LALOLAGI MA LATOU VA'AIA LE MATA'U TELE MAI LE 'AU AMIOLEAGA, AISEĀ O LE A LĒAI AI SE FEFE MAI Ē FA'ATUATUA?

“O Ieova e fai ma 'olo maualuga mo le ua faasauaina, o le 'olo maualuga i ona po e i ai le puapuaga.”
Salamo 9:9

MAU E TAU I AI: Salamo 46:7; 62:7, 8; Fa'ata'oto 18:10

E fa'apea ona fa'aumatia e le Atua ē amioleaga mai le lalolagi. Peita'i o le a Ia puipua le 'au amiotonu a o tupu nei mea, e pei ona faia iā Noa i totonu o le va'a. O le Atua lo latou lafitaga, ma o le a latou fa'atuatua pea i Lana tausiga i lalo o Ōna apa'au. Ua fa'apea mai le faipese, “Auā o 'Oe, Ieova e, o lo'u malu 'Oe, na e faia Lē Silisili 'ese ma mea e te nofo ai; e lē o'o iā te 'oe se mea leaga, e lē tāitāi ane fo'i se mala i lou fale 'ie” (Salamo 91:9, 10). Ma “Auā na te fa'alilo iā te a'u i Lona fale apitaga i le aso vale; na te natia a'u i le mea lilo i Lona fale fetafa'i; na te fa'ae'etia a'u i le papa” (Salamo 27:5). Ua folafola mai le Atua, “Ona ua naunau mai o Ia iā te a'u, o le mea lea 'Ou te fa'aolaina ai o ia; 'Ou te fa'amamalu iā te Ia ona ua iloa e ia Lo'u igoa” (Salamo 91:14). PP 110

Ua lata lava ona amataina mo i tatou le taimi o puapuagā e tatou te le'i iloa muamua; o le a tatou mana'omia se atamai e lē o iā i tatou i lenei taimi; ma o le to'atele o le a lē fia amana'ia ina ia maua mai. O le tele o taimi e sili atu le faigatā o sauniuniga i lo o le mea ina ua o'o mai; peita'i e lē o le tonu lea o le malaia o lo'o i o tatou luma. E lē mafai ona fa'amatalaina le mata'utia e o'o i ai lenei mea o le a tupu.

I le taimi nei, a o faia e le Fa'aola le togiola mo i tatou, e tataua ona tatou sa'ili ina ia tatou ato'atoa iā Keriso. O le ta'ita'iga a le Atua o le a'oga e a'oa'oina ai tatou i le loto maulalo ma le uiga fa'amaulalo o Iesu. O lo'o tu'u pea i o tatou luma e le Ali'i le ala, e lē ina ia filifili ai mea e faigofie ma ia fa'amalie ai lava tatou, a e o fuafuāga e moni ma lelei mo le olaga. E lē tataua ona tatou lē amana'ia pe tulei i tua lenei galuega ona e matuā fa'aumatiaina ai o tatou agaga. *Mar 275*

(12) O AI O LE A FA'ASAOINA MAI LENEI "TAIMI O PUAPUAGĀ"?

"O ōna pō fo'i ia e tula'i ai Mekaeli, o le ali'i sili, o Lē na te tula'i ona o tagata o Lo'u nu'u; e o'o mai fo'i aso vale, e leai sona tusa talu ona fa'ato'ā tupu o nu'u, ua o'o i ia lava aso; o ōna pō fo'i ia e lavea'iina ai ōu tagata, o i latou uma o ē ua tusia i le tusi." **Tanielu 12:1**

MAU E TAU I AI: Fa'aaliga 17:14; 20:12, 15; 21:27

E galo ea i le Atua Lana fanau i lenei itulā faigatā? Na galo ea iā te Ia le fa'amaoni o Noa ina ua o'o mai Lona to'asa i le lalolagi i le taimi o le lolo? Na galo ea iā te Ia Lota ina ua sau le afi mai le lagi ma fa'aumatia ai Sotoma ma Komoro? Na galo ea iā te Ia Iosefa a'o si'osi'omia o ia e Aikupito ifo i tupua? Na galo ea iā te Ia Elia a'o tuliloaina o ia e le ita o Iesepela? Na galo ea iā te Ia Ieremia a'o i ai o ia i le ana pogisā ma le mālūlū o le falepuipui? Na galo ea iā te Ia talavou e to'atolu i totonu o le ogāumu 'a'asa, po o Tanielu i le lua o leona?

Atonu e lafo i latou e o latou fili i falepuipui; peita'i, e lē mafai e pā o le falepuipui ona taofia le feso'ota'iga i le vā o i latou ma Keriso. Ua silafia e Keriso o latou vaivaiga uma, ua masani fo'i o Ia ma tofotofoga uma; e auina mai fo'i e Ia Āna agelu i nei ana pogisā o le falepuipui, e aumai iā i latou le malamalama ma le mapusaga mai le lagi. O le a 'avea le falepuipui o se maota, auā ua nonofo ai nei i latou o ē tamao'aiga i le fa'atuatua. O le a malamalama pā o le falepuipui, e pei lava o le mea na o'o iā Paulo ma Sila a'o fai a la talosaga ma vi'iga i le valuāpō i le falepuipui i Filipi. *GC 626, 627 (520)*

(13) O LE Ā LE MEA TELE MA LE FA'AI'UGA E TUPU O LE A TAPUNIA AI LE MALA LONA FITU?

"Ona iloa ai lea i le lagi o le fa'ailoga o le Atali'i o le tagata; ona taufaitagitū'i ai lea o itū 'aiga uma o le lalolagi; latou te iloa atu fo'i le Atali'i o le tagata ua sau i ao o le lagi ma le mana ma le mamalu tele." **Mataio 24:30**

MAU E TAU I AI: Fa'aaliga 1:7; Galuega 1:11; Tanielu 7:13

O le a ta'ua o le fa'aali mai i le mamalu o le Atua ma lo latou Fa'aola o Iesu Keriso. E sili atu le mamalu o Lona afio mai i lo o mea uma ua va'ai i ai mata. O Lona fa'aali mai i ao o le lagi o le a sili atu i lo o so'o se mea ua mafauina pe fuafuaina. O le a ato'atoa le 'ese'esega i le uiga maulalo o Lona ulua'i afio mai. Na afio mai o Ia o le Ālo o le Atua soifua, peita'i sa fa'aliloina Lona mamalu e ala i ofu o le aigātagata. I lea taimi sa afio mai Ia e leai se fa'aaloaloga tauletupu fa'alalolagi, e le'i fa'aalitinoina le mamalu; peita'i i Lona afio fa'alua mai o le a afio mai ma Lona lava mamalu ma le mamalu o le Tamā, ma e fa'afeaoina e 'au agelu pa'ia a le lagi. I luga o Lona ao sa i ai le paletuitui, o le a i ai se pale e i totonu o le paleali'i. O le a lē 'ofu Ia i 'ofu o le loto maulalo sa tu'u i ai e le 'au tauemu iā te Ia. E afio mai o Ia e la'ei i 'ofu talaloa sinasina ma e tusia ai Lona suafa, "Tupu o tupu, ma le Ali'i o ali'i."

Na afio mai Keriso i le tino tagata e ‘avea ma sui o le Atua. E ui ina tino tagata, o Ia o le Ālo o le Atua, ma sa tu’u mai le avanoa i le lalolagi ia va’ai ai pe fa’apefea le latou faiga o le Atua. Na fetalai Keriso, ”O lē ua va’ai mai iā te A’u, ua va’ai o ia i le Tamā” (Ioane 14:9). Peita’i pe a afio fa’alua mai, o le a lē lilo Lona itū Atua. O le a afio mai Ia e tasi ma le Atua, o Lona lava Ālo pele, o le Ali’i o le lagi ma le lalolagi. O Ia fo’i o le Fa’aola o Ōna tagata. O Lē aumaia le ola. E va’aia fa’atasi le mamalu o le Tamā ma le Ālo....Ona susulu mai lea o Ia i “luma fo’i o ōna toea’ina ma le mamalu” (Isaia 24:23). *HP 357*

O’U MANATUNATUGA MA TALI (Mafai tali e sili atu i le tasi pe a tatau)

A = Talitonu ma Talia
B = Lagona le Fenumia’i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa’afetai
G = Lagona le Lototele
H = Ua ‘ou To’amalie
I = Lagona le Loto Popole
J = Ua ‘ou Fiafia
K = Lagona le lē Fiafia
L = Ua ‘ou Ofo
M = Lagona le Filemū

N = Ua o’otia ai a’u
O = Lagona le lē Malie
P = Ua Fa’amalamalamaina a’u
Q = Lagona se Lu’iga
R = Ua fa’ate’ia a’u
S = Lagona le Mata’u
T = Lotomalie
U = Lē Talia
V = Tatalo
W = Naunau ia Fa’aaogā i Lo’u Olaga
X = Ia Fa’asoa atu i isi
Y = Ma’imau pe ana ou lē iloa
Z = Se isi mea

Ua ‘ou _____ o le a sau le aso e o’o mai ai mala, o le a to’esea le puipuiga mai tulafono fa’aletagata, ma o le a ‘ou feagai ai ma le tofotofoga tele, o lo’u famaoni lea i le Atua e ala i le tapua’i e pei ona Ia fa’atonu mai.

‘Ou te _____ e manino lelei le Tusi Pa’ia e fa’atatau i le lūlūina o le lalolagi atoa, o le a solofa ifo mauga, o atumotu o le sami o le a lē toe va’aia; peita’i ua ‘ou _____ e fa’amaoni lo’u Atua ma o le a Ia lavea’i ‘au mai ia malaia.

I le itulā e aupito sili ona faigatā, ‘ou te _____ o le a fa’aailoa e le Atua ua fa’ai’uina o’u puapuagā ma o le a Ia tula’i mai e fa’asao iā te a’u. Ua ‘ou _____ o le a Ia lavea’i a’u mai le lima o le fili e pei ona Ia lavea’iina Lana ‘au fa’amaoni o aso anamua.

‘Ou te _____ ia tumau pea lo’u fa’amaoni i le Atua ma Āna fa’anaunauga ina ia ‘avea a’u o se tasi o ē o le a tepa a’e i le lagi a o vavae’ese epei o se ‘ie tā’ai, ma fa’afeiloa’i Ia i Lona afio mai, o Ia o le “Tupu o tupu, ma le Ali’i o ali’i”!

MANATU

FA’AOPOPO

TATALO MANA’OMIA



E Fa'afelea, o Afea, ma o Fea o le a Toe Afio Mai ai Keriso

Lesona 17

'UPU A LE FA'ATONU: I lenei lava taimi, ua mae'a ona liligi ifo o le mala mulimuli, ua matuā fa'aleagaina lava le lalolagi, ma ua femēmēa'i i latou uma o lo'o nonofo ai. Ua matuā matata'u ē ua lē iloa, ma o le a oti ai tagata a o fa'atalitali i mea e tutupu mai. O lo'o sa'ilia e le Manu fe'ai, o lona fa'atagata, ma ōna so'o e fa'aumatia ē ua latou talitonu o le pogai o latou puapuagā. O lo'o matata'u fo'i le 'au amiotonu, peita'i e lē ona o le mafua'aga lea e tasi. E ui ina o lo'o soloi ifo le lalolagi i itū uma, a e fa'apopoleina o latou loto i le manatu o lo'o i ai pea se agasala o le a mafai ona vavae'ese ai i latou mai lo latou Fa'aola. O lo'o lata mai lava le afio mai o Keriso ma ua fa'afiafiaina ai i latou, peita'i o lo'o masalosalo pea pe o le a mafai ona latou tulala'i atu i Ōna luma.

O lenei lesona e fa'asino lea i le mea ua a'oa'o mai e leTusi Pa'ia o le a tupu i le toe afio mai o Keriso. O le ā le mea o le a tupu i ē o lo'o i ai le fa'ailoga o le manu fe'ai? A o le ā le mea o le a faia e i latou ua fa'amaufa'ailogaina e le Atua? O le ā le tulaga e afio mai ai Keriso? O le talitonuga a le to'atele e fa'afea, o le a afio mai Keriso e 'ave fa'alilolilo Ōna tagata. E lē o tu'u mai e leTusi Pa'ia se avanoa tatou te tau matemate ai. O le a tatou va'ai manino i āna a'oa'oga.

(1) O LE Ā LE MEA E TUPU O LE FOAFOĀGA O LO'O FA'ATUSATUSA I AI E LENEI FUAI'UPU LE PUPULA MATAGOFIE O LE AFIO MAI O KERISO?

“Auā e pei ona ‘emo mai o le uila i sasa’e, ma malamalama atu i sisifo; e fa’apea fo’i ona sau o le Atali’i o le tagata.” Mataio 24:27

MAU E TAU I AI: Luka 17:24; Salamo 97:4-6; Sakaria 9:14; Iopu 37:3-5

(2) O LE Ā LE TAGI FA’AVAUVAU A LE ‘AU AMIOLEAGA A O AFIO MAI KERISO I AO?

“Ua latou fai atu fo’i i mauga ma papa, Mafuli mai ia iā te i matou, ma tanuma’i i matou ai le silafaga a Lē ti’eti’e i le nofoāli’i, ma le to’asā o le Tama’i mamoe; auā ua o’o mai le aso tele o Lona to’asā, o ai fo’i sē na te mafaia ona tū atu?” Fa’aaliga 6:16, 17

MAU E TAU I AI: Luka 23:30; Hosea 10:8; Ieremia 8:3

Ua mata’utia le fe’emo mai o uila ua peisea’i o ni afimumū ua li’o ai le lalolagi. A’o ta’alili mai pea le pā o faititili taufa’amata’u, ua fa’alogoina fo’i ni leo e ‘ese ma le mata’utia ua ta’u mai ai le i’uga o ē amioleaga. E le’i malamalama uma i ai le to’atele i nei ‘upu ua ta’u mai, peita’i ua matuā manino lelei i ai le ‘au a’oa’o taufa’asesē. O ē e le’i leva nei lava ona latou ‘upuvale ma tau’āifai, ma maoa’e lo latou fa’asauā i ē tausi poloa’iga a le Atua, ua lofitūina nei i latou ma fa’agateteina i le fefe ma le mata’u tele. Ua sili a’e i le ta’alili o faititili le leotele o la latou uiō. Ua ‘ioe ma ta’utino atu nei temoni i le silisili ‘ese o Keriso, ma ua latou tetemū i Ōna luma, a’o ē amioleaga ua ‘ai’oi atu nei mo le alofa tunoa, ma fa’apa’u’ū fāō i le matata’u tele. GC 638 (528)

(3) PE A TOE AFIO MAI KERISO, O FEA O LE A FA’AALI MAI AI O IA MA LE MANA MA LE MAMALU TELE?

“Fa’auta, o lo’o afio mai o Ia ma ao, e iloa atu fo’i o Ia e mata o tagata uma, atoa ma ē na tu’ia o Ia; e taufaitagitu’i fo’i itu ‘aiga uma o le lalolagi ona o Ia. E moni, Amene.” Fa’aaliga 1:7

MAU E TAU I AI: Fa’aaliga 14:14; Tanielu 7:13; I Tesalonia 4:17; Galuega 1:11

Ua lata ona fa’aalia mai lea o se ao pogisā itiiti i le itū i sasa’e, e tusa o le ‘afa o le alofilima o se tagata. O le ao lea o lo’o si’omia le Fa’aola, ma e foliga mamao mai o lo’o ufitia i le pogisā. O le a iloa e tagata o le Atua o lea le fa’aailoga o le Atali’i o le tagata. E mata’ia e i latou lenei ao a o aga’i mai pea i le lalolagi, ma va’aia le pupula o fa’ateteleina, se’ia o’o ina suia ma ‘avea o se ao pa’epa’e, o lona fa’avae e pei o se afi ‘a’asa, ma e i ōna luga a’e le nuanua o le feagaiga. O Iesu o lo’o ti’eti’e mai ai, o le ta’i’au manumalō. Mar 288

E lē gata i lea, o le a lē fa’atagaina e le Atua Satani ina ia sau i ao o le lagi e pei o le afio mai o Keriso. Ua tu’uina mai e le Fa’aola lapata’iga i Ōna tagata e fa’atatau i lenei itū, ma sa Ia valo’ia manino mai mea o le a iloa tonu ai Lona afio mai. GC 625 (519)

(4) E TO’AFIA MATA O LE A VA’AIA O IA MA O AI O LE A FA’AVAUVAU ONA UA LATOU LĒ SAUNI?

“Fa’auta, o lo’o afio mai o Ia ma ao, e iloa atu fo’i o Ia e mata o tagata uma, atoa ma ē na tu’ia o Ia; e taufaitagitu’i fo’i itu ‘aiga uma o le lalolagi ona o Ia. E moni, Amene.” Fa’aaliga 1:7

MAU E TAU I AI: Fa’aaliga 6:15-17; Mataio 24:30

O lo’o fa’amatala manino iinei lefa’aali mai o le Ali’i, e va’aia i le tino, e mata uma, i le mamalu tele. E lē auina mai e Keriso se sui, pe afio mai tauleagaga. E afio mai o Ia lava i Lona tino tagata. O Iesu lava lea na afio a’e i le lagi o lea fo’i o le a toe afio ifo mai le lagi. A e le’i afio a’e i le lagi na Ia folafola mai Lona toe afio mai (Ioane 14:3). Sa ta’utino i le ekalesia ina ua afio a’e o Ia i le ao, o Ia lava lea o le a toe afio mai i lea lava tulaga, e pei ona tusia, “O Iesu lenā, ua ‘aveina a’e nai iā te outou i le lagi, e fa’apea ona toe afio mai o Ia, pei o Lona

afio atu i le lagi na outou va'ava'ai i ai" (Galuega 1:9-11). O lo'o toe ta'u mai e Paulo nei ta'utinoga ma isi mea e fa'atautau i le fa'ataunu'uina. 7 BC 248

(5) O Ā UIGA FA'ALE-TUSI PA'IA E TOLU E FA'ATATAU I LE TOE AFIO MAI O KERISO O LE A TU'U'ESEA AI LE TALITONUGA O IA O LE A AFIO MAI FA'ALILILO?

"O lo'o afio mai lo tatou Atua, ua lē tu'ua Lona si'ufofoga; ua ma'ama'ai le afi i Ōna luma; o lo'o si'osi'omia fo'i o Ia i le afā tele lava." Salamo 50:3

MAU E TAU I AI: Salamo 50:4-6

O le a leai se mea fa'alilolilo e fa'atautau i le toe fo'i mai o Iesu. E leai se tasi o le a lē iloa Lona toe afio mai, ona o le a va'aia o Ia e mata uma. E leai se avanoa ua tu'u mai e Keriso mo se 'ave a'e fa'alilolilo, mo se afio mai e lē mailoa, po o se isi lava manatu sesē e tu'u mai e perofeta fa'atagā amioatua ma ua tele le fia ma'elegā. O le a va'aia e tagata uma Iesu a o "afio ifo i ao o le lagi" (Mataio 24:30; 16:27; 26:64; Mareko 8:38; 14:62; Galuega 1:11; Fa'aaliga 1:7). O le a leai se sesē o lenei va'aiga. Pe a afio mai Iesu, o le a iloa e tagata uma le uiga o lea mea e tupu, e lē tau fa'amalamalamaina. 5 BC 501

(6) O LE Ā LE MEA O LE A TUPU I LAGI MA MEA O I LE LALOLAGI A O LATOU MOLIMAUINA LE MAMALU O LE TOE AFIO MAI O KERISO?

"A e sau le aso o le Alii pei o se gaosi i le po, e mavaeeseina ai le lagi ma le gogolo tele, e te'a eseese ai foi o mea na fai a'i ina ua mu; o le lalolagi foi ma galuega o i ai e susunuina lava." II Peteru 3:10

MAU E TAU I AI: Salamo 50:3; 97:3-5; Ioelu 1:15

I le aso o le Ali'i, ina ua lata le afio mai o Keriso, o le a 'auina mai e le Atua le uila o Lona to'asā mai le lagi, ma o le a tu'ufa'atasia ai ma le afi o lo'o mumū i le lalolagi. O le a mū mauga e pei o se ogāumu, o le a tafe mai ai alavai e matuā 'a'asa lava ma e fa'aumatia ai fanua ma fa'ato'aga, o nu'u ma 'a'ai; o le a masa'a mai ma'a ma papa'ele vevela i vaitafe o le a fa'apupunaina suāvai ma fa'asalalau ai ma'a i luga o le lau'ele'ele. O le a ta'alili le lalolagi, ma o le a pāpā maugamū ma lūlūina le 'ele'ele mai mafui'e mata'utia. O le a mātūtū vaitafe uma ma aunoa ma se suāvai. O le a fa'amalaiaina e le Atua le 'au amioleaga o le lalolagi se'ia o'o ina fa'aumatiaina ai i latou. O le a taumalua le lalolagi e pei o se tagata onā ma o le a to'esea e pei o se fale. O le a mumū vaega uma o le 'ele'ele, ma o le a ta'ata'aia fa'atasi le lagi atoa e pei o se tusita'ai. Mar 283

(7) O LE Ā LE TALI O LE A TU'U MAI E MAUGA MA MOTU O LE SAMI I LE TOE AFIO MAI O KERISO?

"Ua mavae atu foi le lagi pei o se tusi ua taaia, o mauga ma motu uma foi ua aveeseina i mea sa i ai." Fa'aaliga 6:14

MAU E TAU I AI: Fa'aaliga 16:20; Isaia 34:4; Ieremia 51:25

Pe a afio mai Keriso o le a gatete le lalolagi i Ōna luma, ma o le a ta'aia le lagi e pei o se tusita'ai, ma o mauga ma motu uma o le a 'ave'esea mai o latou tulaga. "O lo'o afio mai lo tatou Atua, ua lē tu'ua Lona si'ufofoga; ua ma'ama'ai le afi i Ōna luma; o lo'o si'osi'omia fo'i o Ia i le afā tele lava. E vala'au Ia i le lagi i luga, atoa fo'i ma le lalolagi, i le fa'amasinoina o Lona nu'u. Inā fa'apotopoto mai ia iā te A'u O'u tagata amio Atua, o ē ua osia le feagaiga ma A'u i le taulaga. E ta'ua fo'i e le lagi Lana amiotonu; auā o le Atua o Ia lava le fa'amasino" (Salamo 50:3-6). I le va'aiga i le aso tele o le Atua, o le a mafai ona tatou iloa ai e pau lo tatou saogalemū o le a maua pe a tatou ō 'ese mai le agasala ma mea leaga uma. O i latou e faia pea le agasala o le a i ai fa'atasi ma ē ua ta'usalaina ma o le a fa'aumatiaina. FW 116

(8) O Ā FA'AILOGA E LUA O LE A FA'ALOGOINA E ILOA AI UA TOE AFIO MAI KERISO?

"Auā e afio ifo mai le lagi le Ali'i lava, ma le 'alaga, ma le leo o le agelu sili, ma le pū a le Atua; e muamua fo'i ona toe tutū mai o ē ua oti o iā Keriso." **I Tesalonia 4:16**

MAU E TAU I AI: Sakaria 9:14; I Korinito 15:52; Fa'aaliga 1:10

(9) O LE Ā LE VALO'AGA NA TU'U MAI E KERISO, O LE A FA'AMAONIA MO I LATOU NA I AI I LONA FA'AMASINOFA FAI FA'AULAULA MA INA UA FA'ASATAUROINA E AUNOA MA SE ALOFA?

"Ona fetalai atu ai lea o Iesu ia te ia, O lea lava; ou te fai atu foi ia te outou, E mulimuli ane tou te iloa ai le Atalii o le tagata e nofo i le itu taumatau o le e ona le mana, e sau foi o ia i ao o le lagi." **Mataio 26:64**

MAU E TAU I AI: Mataio 25:31; Mareko 14:62; Fa'aaliga 1:7

Ua lē magagana nei i latou o ē sa tauemu i Lana fa'aaliga o Ia o le Ālo o le Atua. Ua i ai fo'i Herota lea sa fa'atauemu i Lona tofi mamalu fa'atupu, ma sa ia fa'atonuina ai fitafita lē migao e fa'apale iā Keriso i le pale o tauemuga. Ua i ai fo'i le 'au lēpopoi ia na latou fa'a'ofu iā te Ia i le ofu pa'uli, ma fa'ae'e i Lona ao pa'ia le pale tuitui, ma tu'uina atu i Lona a'ao le to'oto'o o le fa'atauemu, ma ifoifo atu i Ōna luma i ni uiga fa'atauemu ma le lē migao. O ē fo'i sa fepō ma feanu i le Perenise o le ola ua liliu 'ese nei o latou mata mai le sisila a Ōna fofoga. Ua latou fia sosola 'ese mai le malosi o Lona mamalu. O i latou fo'i na tutu'ia Ōna a'ao i fao, atoa ma le fitafita o lē na tutu'i Lona itū i le tao, ua latou vā'ai atu nei ma le mata'u ma le fefe tele i tulaga-manu'a na latou faia. GC 643 (532)

E i ai lava taimi e lāgāina ai le loto fuatiaifo i olaga o i latou uma o ē te'ena le 'upu moni, pe a fa'amanatu mai e le mafaufau se olaga fa'a'ole'ole, se olaga e mafatia ai le loto; peita'i e lē aogā ona e lē o se salamō moni lea lagona. A e pe fa'aapefa ona fa'atusatusa atu o nei lagona i le salamō o lenā aso “pe a o'o mai lo outou fefe pei se afā, pe a o'o mai fo'i lo outou malaia pei se asiosio!” (Fa'ata'oto 1:27). O ē sa fia fa'aumatia iā Keriso atoa ma Ōna tagata fa'amaoni ua latou molimauina nei le mamalu ua fa'ae'eina atu iā i latou. A'o latou matata'u ma tetemū, sa latou fa'alogoina leo o le 'aupā'ia i le 'alaga o le 'oli'oli ua fa'apea mai: “Fa'auta, o lo tatou Atua lenei, sa tatou fa'atalitali iā te Ia, ua Ia fa'aolaina fo'i i tatou” (Isaia 25:9). GC 644 (533)

(10) O LE Ā LE A'OA'OGA FA'AFATA'OTO SA FA'AAOGĀ E LE TUSI PA'IA E FA'ATUSA I AI LE FA;ATE;IA O I LATOU NA TE'ENA KERISO INA UA TAUNU'U MAI LENĀ ASO?

"A e sau le aso o le Ali'i pei o se gaoi i le pō, e mavae'eseina ai le lagi ma le gogolo tele, e te'a 'ese'ese ai fo'i o mea na fai a'i ina ua mū; o le lalolagi fo'i ma galuega o i ai e susunuina lava." **II Peteru 3:10**

MAU E TAU I AI: Mataio 24:42, 43; I Tesalonia 5:2; Fa'aaliga 16:15

O le fe'au a le Atua i le asō mo ē o lo'o nonofo i le lalolagi e fa'apea, "O le mea lea ia outou nofo sauni ai; auā o le itū aso tou te lē manatunatu ai e sau ai le Atali'i o le tagata" (Mataio 24:44). O tulaga o mea o le lalolagi, a e maise 'a'ai tetele o malō, ua ta'u mai i leo tetele e pei o faititili, ua o'o mai le itulā o le fa'amasinoga a le Atua ma ua lata le i'uga o mea uma fa'alelalolagi. Ua tatou tutū nei i le faitoto'a o le mala e aupito faigatā o lenei olaga. O le a o'o i le taimi e ō fa'asoso'o ma fa'avavave mai ai fa'amasinoga a le Atua - o le afi, lolovai, ma mafui'e, fa'apea ma taua ma le toto o le a fa'amasa'aina. O le a tatou lē ōfo ai i lenei taimi ona o mea e tele ma le mata'utia o le a tutupu; o le a lē toe mafai e le agelu o le alofa tunoa ona fa'amālumālu i ē lē salamō. PK 278

O lē e naunau ia fa'asaoina e tatau ona lelei ma le Atua a e le'i o'o mai le aso o le Ali'i, auā o le a lē toe i ai se avanoa e toe salamō ai i lenā aso tele. 7 BC 615

(11) E UI INA TATOU VA'AIA FA'AILOGA E ILOA AI UA LATA LE TOE AFIO MAI O KERISO, O LE Ā LE MEA E LĒ O ILOA E SE TASI E FA'ATATAU I LE TAIMI O LE A TUPU AI LEA MEA OFOFOGIA TELE?

"A o lea aso ma lea itū aso e lē iloa e se tasi, e le iloa lava e agelu i le lagi, ua na o Lo'u Tamā lava." **Mataio 24:36**

MAU E TAU I AI: Mataio 24:42, 43; 25:13; Sakaria 14:7-9

E lē o fa'aalia mai le aaso tonu o le afio fa'alua mai o Keriso. Sa fetalai Iesu, E leai se tasi e iloa le aso po o le itulā. Peita'i na Ia tu'u mai fo'i fa'aailoga o Lona afio mai, ma fa'apea mai, "E fa'apea fo'i outou, pe a outou iloa ia mea uma, tou te iloa ai, ua latalata Ia, ua i faitoto'a lava" (Mataio 24:33). Na ōle atu o Ia iā te i latou, pe a va'aia fa'aailoga o Lona afio mai, "A afua ona faia o ia mea, ia tepa a'e outou, ma ia ea i luga o outou ūlu; auā e latalata ina fa'aolaina outou" (Luka 21:28). Ma sa fa'apea ona tusi mai le aposetolo e uiga i nei mea, "A o outou, le 'au uso e, tou te lē o i le pouliuli, ia maua mai ai outou e lenā aso, pei o se gaoi. O tagata o le malamalama outou uma lava, ma tagata o le ao; tatou te lē o i le pō ma le pouliuli" (I Tesalonia 5:4, 5). Ona e tatou te lē o iloa le itulā e afio mai ai Keriso, e tatau ai ona tatou ola toto'a ma le malū, ma le amioatua i le lalolagi o nei ōna pō, "O fa'atalitali atu i le fa'atuatuāga e manuia ai, o le fa'aalia lea o le pupula o le Atua silisili, o lo tatou Fa'aola o Iesu Keriso lea" (Tito 2:13). *RC 258*

E fa'atasi ma le mataāla, latou te galulue fo'i ma le fa'amaoni. Ona ua latou iloa o le Ali'i ua i faitoto'a, o lo latou ma'elegā e fa'avaveina ai le galulue fa'atasi ma le poto fa'ale-Atua mo le fa'aolataga o agaga. O i latou ia o le 'au fa'atuatua ma 'au'auna popoto, o ē e avatu i le aiga o le Ali'i "mea e 'ai i ōna itū aso" (Luka 12:42). O lo'o latou ta'u atu le 'upu moni ua tatau, a e maise mo le taimi nei. E pei o Enoka, Noa, Aperamo, ma Mose na latou ta'u atu le 'upu moni i o latou lava taimi, e fa'apea fo'i 'au'auna a Keriso i nei ōna pō ona latou avatu lapata'iga fa'apitoa mo lo latou tupulaga. *DA 634 (495)*

(12) O LE Ā LE MEA O LE A TU'UINA E KERISO I LONA TOE AFIO MAI I TAGATA TA'ITO'ATASI E FA'ATATAU I LE FA'AMAONIGA O LO LATOU ALOFA MO IA MA O LATOU USO A TAGATA?

"Auā e sau le Atali'i o le tagata fa'atasi ma Āna agelu i le mamalu o Lona Tamā; ona tauia lea e Ia e ta'itasi e tusa ma lana galuega." **Mataio 16:27**

MAU E TAU I AI: Mataio 25:31-46; Fa'aaliga 22:12; Efeso 2:10

Ua tu'u mai e le Fa'aola i o tatou luma le va'aiga o le fa'amasinoga mulimuli pe a tu'uina le tau i iā i latou o i Lona itū taumatau, ma le fa'asalaga iā i latou o i Lona itū tauagavale. Ua latou fa'aailoa mai o le 'au amiotonu ua lē mautonu i le pogai ua latou maua ai le tau i lelei. Sa fa'atasi Keriso i totonu o latou loto; sa fa'atumuina i latou e Lona Agaga, ma e le'i taumafai e faia se mea i lo latou lava malos; na latou galulue mo Keriso e ala i Āna 'au pa'ia, ma o lea ua latou maua mautinoa ai le tau. Peita'i latou te le'i tepa taula'i i se tau i o le a latou maua, ma e le'i galulue i latou ona ua fuafua i se i'uga fa'apea. O lea mea sa latou faia ona o le alofa iā Keriso ma o latou uso a tagata, ma o Keriso ua ta'u mai o Ia e ō gatasi ma le aiga tagata o lo'o puapuagātia, ma e Na te silafia o mea uma o lo'o faia ma le fa'apalepale ma le alofa mutimutivale i tagata, o lo'o faia lava lea iā te Ia. *Mar342*

(13) O LE A LE MEA UA LAPATA'I MAI IA "AVEA AI" I TATOU, INA IA LE FA'ATE'IA AI TATOU I LE TOE AFIO MAI O KERISO?

"O le mea lea ia outou nofo sauni ai; auā o le itū aso tou te lē manatunatu ai e sau ai le Atali'i o le tagata." **Mataio 24:44**

MAU E TAU IAI: Mataio 24:10; Luka 12:40; Fa'aaliga 19:7; 22:7

A fa'apea e fa'aali mai nei i le asō Keriso iao o le lagi, e mata o ai o le a sauni e fetaia'i ma Ia? Pea fa'apea e 'aveina a'e tatou i le lagi i le tulaga o lo'o tatou i ai nei, mata o le a tatou sauni e so'ofa'atasi ma le 'au pa'ia a le Atua, e nonofo fa'atasi ma le aigā tupu, o tatou o fanau a le Tupu o le lagi? O ā āu sauniuniga ua faia mo le fa'amasinoga? Ua e lelei ea ma le Atua?...O lo'o e sa'ili e fesoasoani atu i nisi, i lou aiga, i ōu tuā'oi, o ē tou te feiloā'i i tulaga 'ese'ese a e latou te lē tausi i poloā'iga a le Atua?

Ia manatua o mea e te iloa e leai se aogā pe a e lē fa'atinoia i lou olaga o aso ta'itasi. E silafia e le Atua po o e tausi ma le fa'amaoni Lana tulafono. E Na te silafia mea o lo'o tatou faia, o tatou manatunatugama tatou 'upu e tautala ai. Ua tatou sauni ea e feiloa'i ma le Tupu? Pe a afio mai o Ia i ao o le lagi, ma le mana ma le mamalu tele, o le a mafai ea ona tatou fa'apea atu, "Fa'auta, o lo tatou Atua lenei; sa tatou fa'atalitali iā te Ia, ua Ia fa'aolaina fo'i i tatou; o leova lava lenei, sa tatou fa'atalitali iā te Ia; tatou te fiafia ma 'oli'oli i Lana fa'aolataga" (Isaia 25:9)? Mo i latou e mafai ona fai atu fa'apea, o le a fetalai mai i ai Keriso, "Ō mai i luga nei. Sa outou alolofa iā te A'u a o O'u i lenei lalolagi. Na outou fiafia e fai Lo'u finagalo. Ua mafai nei ona outou ulufale mai i le 'A'ai Pa'ia ma talia le paleali'i o le ola e fa'avavau."

'Ou te ōle atu iā te outou uso ma tuafafine, ia galulue pea ma le fa'amaoni ina ia mautinoa ai le paleali'i o le ola e fa'avavau. O le a maua le tau'i ona ua aogā le taumafaiga, aogā le fete'ena'iga....Ona o lo'o tatou taufetuli i le tautu'uga, o le a maua e tagata uma le tau'i o lo'o ōfo mai – o le paleali'i o le ola e fa'avavau. Ua e sauni e fa'apea atu, "'Ou te mana'o i lea pale; ia 'ou maua e ala i le fesoasoani mai o le Atua. Ia 'ou naunau e taofimau i le 'upu moni, ina ia 'ou va'aia le Tupu i Lona matagofie." *Mar 298*

O'U MANATUNATUGA MA TALI (Mafai tali e sili atu i le tasi pe a tatau)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

Ua 'ou _____ e lē o fa'aalia mai i le Tusi Pa'ia leaso tonu po o le itulā o le a toe afio mai ai Keriso. 'Ou te _____ e fa'aali mai lava e le Ali'i fa'ailoga ia tatou iloa ai ua lata mai lava Lona afio mai. 'Ou te _____ le tulaga tonu o le a toe afio mai ai o Ia, o le a 'ou lē fa'atasi ai ma le to'atele o le a fa'asesēina.

'Ou te _____ e mautinoa mai le Tusi Pa'ia o le a leai se mea i le lagi po o le lalolagi o le a mafai ona fa'aliloina le toe afio mai o Keriso ma le mamalu, ma o lenei va'aiga ofoofogia o le a molimauina e mata uma.

‘Ou te _____ o lo’o a’oa’o mai fo’i e le Tusi Pa’ia o le afio mai oKeriso o le a matuā leo tele lava. O le a fa’alogoina i le lalolagi atoa le si’ufofoga o Keriso, ma o le a fafaguina ē o lo’o momoe i tu’ugamau e le pū a le Atua.

Ua ‘ou _____ o lo’o fa’aalia mai e le Tusi Pa’ia o le taimi o le afio mai o Keriso o le a pei o se gaoi e\sau i le pō iā i latou e lē o sauni, peita’i o lenei va’aiga o le a lē o se mea e fa’alilolilo.

‘Ou te _____ o le ‘ave a’e fa’alilo o le ‘au amiotonu e lē o a’oa’oina i le Tusi Pa’ia. ‘Ou te _____ o se talitonuga faigatā auā e lagona ai fa’apea ua saogalemū a e o se lagona sesē i letagata agasala e lē o salamō ona e manatu ai o le taimi lea e mafai ai ona suia ōna ala. Ona e lē taunu’u se ‘ave olaina fa’alilolilo, ma ua mae’a filifiliga o le fa’amasinoga, o le a tapunia fo’i mo i latou le faitoto’a o le fa’aolataga.

‘Ou te _____ o le a ‘ou lē fefe i le fa’amasinoga po o le afio mai o lo’u Fa’aola. O lo’o’ou tepa taula’i ma le fiafia mo lenā aso matagofie ma le ofoofogia!

MANATU	FA’AOPOOPO	TATALO MANA’OMIA



O le Mamalu o le Toe Afio Mai o Keriso Ma Ua Lavea'iina i Tatou

Lesona 18

‘UPU A LE FA’ATONU: Ua taunu’u mai le taimi na matuā fa’amoemoe i ai le atoa o le atulaulau, a e maise le ‘au fa’amaoni a Keriso! I le itulā vaeluagapō o le lalolagi, pe a taulamaina tagata o le Atua e le ‘au amioleaga, pe a foliga mai ua leai se fa’amoemoe mo le lavea’iina o i latou, a e o’o loa i le taimi o le fa’aolataga. O le a va’aia i le vānimonimo le fa’ailoga mautinoa o le toe afio mai o le Ālo o le Atua.

E lē toe fo’i mai le Ali’i ia fa’alilolilo ma e lē pei o se’au’auna loto maulalo, e lē o se tasi o le a tu’ufeānu i ai ma sasaina e tagata sauā. E afio mai o Ia ma Āna agelu uma ma mamalu uma o le Leona a Iuta, le Tupu o tupu ma le Ali’i o ali’i! E toe tutū a’e fo’i le ‘au amiotonu mai tu’ugamau. O le a va’aia e mata uma le mamalu o le a fa’ataunu’uina o le folafolaga sa fa’atalitali i ai i lea taimi umi. O le a ‘ave a’e e agelu ē o lo’o soifua pea ia feiloā’i ma lo latou Fa’aola pele i le vānimonimo. E molimauina ma le mata’u tele e le ‘au amioleaga le toe afio mai o Keriso ma latou alalaga atu i mauga ia solo ifo i o latou luga ina ia nātia i latou mai fofoga o Lē sa latou te’ena. E toe fa’atutū a’e ē na oti, tu’u atu tau, e maua le tino e lē pala ma le ola fou e le ‘au amiotonu, a e maua e le ‘au amioleaga le mea na latou naunau i ai ma fa’aumatia ai e le pupula o le mamalu o Keriso. O le a latou momoe i le moe o le oti e fa’atalitali ai mo le toe tū fa’alua ma le fa’amasinoga mulimuli (Fa’aaliga 20).

(1) A O MOLIMAUINA E LE ‘AU FA’ATUATUA LE MAMALU O LE FA’AALI MAI O LO LATOU FA’AOLA, O LE Ā LA LATOU ‘ALAGA O LE A FA’ALOGOINA O LE MANUMALŌ?

“O lea aso e fa’apea ai, Fa’auta, o lo tatou Atua lenei; sa tatou fa’atalitali iā te Ia, ua Ia fa’aolaina fo’i i tatou; o Ieova lava lenei, sa tatou fa’atalitali iā te Ia; tatou te fiafia ma ‘oli’oli i Lana fa’aolataga.” Isaia 25:9

MAU E TAU I AI: Ioelu 2:32; Isaia 25:8; Fa’aaliga 19:6, 7; Salamo 46:1-3

Ua salalau ta’itasi ē sa lalafi ona o le tete’e o le tagata i le tulafono a le Atua. Sa sauāina i latou e pule uma fa’alelalolagi. Na salalau i latou i lafitaga o āna ma lua o le ‘ele’ele ona o le lima sauā o latou fili, a e na tumau le latou fa’amaoni ma usita’i pea i tulafono a leAtua. Peita’i e o’o mai le fa’aolataga i tagata o leAtua.... Mai lua ma āna o le lalolagi, ma mea sa fai ma lafitaga mo tagata o le Atua, o le a vala’auina mai ai i latou e fai ma Āna molimau, e fa’amaoni ma e tonu. *Mar 290*

E i ai se avanoa i totonu o ao ua susulu mai ai se fetū ua sautuafā lona pupula. O lea fetū ua va’aia ai e le ‘au fa’amaoni lo latou fa’amoemoe ma lo latou ‘oli’oli; peita’i o lea fetū ua va’aia ai ma le mata’u e le ‘au amioleaga le to’asā o le Atua. O ē na latou tu’uina atu i latou uma mo Keriso ua saogalemū nei i latou, ua natia i le mealilo o le malu o le Ali’i. Ua tofotofoina i latou, ma ua fa’aalia ai i luma o le lalolagi ma ē tauēmu lo latou tūtūmau ma le fa’amaoni i Lē na maliu mo i latou.

O se fesuia’iga ofoofogia ua o’o nei iā i latou o ē na taofimau i lo latou fa’amaoni tusa lava po o le oti. Ua fa’afuase’i ona lavea’iina o i latou mai le sauā mata’utia o ē ua liua e pei o temoni. O o latou foliga sesega na va’aia ai le atuatuvaale ma le popole, ua pupula mai nei i le maofa ma le fa’atuatua, ma le alofa. O o latou leo ua alu a’e ai le pese o le manumalo: “O le Atua o lo tatou malu Ia ma lo tatou malosi; e fai o Ia ma fesoasoani silisili i puapuagā. O le mea lea tatou te lē fefefe ai, pe a fa’aliliuina le lalolagi, ma lūlūina mauga i totonu o le sami; pe a ta’alili ma sousou ōna suāasami, ma fa’agateteina ai mauga i lona maua luga” (Salamo 46:1-3). *GC 638 (529)*

(2) O LE Ā LE LEO MALOSI MA LE MĀLIE O LE A FA’ALOGOINA I LE ATULAULAU ATOA A O AFIO IFO KERISO E LAVEĀ’I LE ‘AU FA’AMAONI?

“E fa’afa’alogoina e Ieova Lona si’ufofoga silisili, e fa’aali fo’i e Ia le fa’apa’ū ifo o Lona ‘a’ao, ma le tele o Lona to’asā, ma le mū o le afi ‘ai tele, o le lolo, ma le afā, ma le uato ‘a.” Isaia 30:30

MAU E TAU I AI: Iopu 37:4, 5; Salamo 29:3-5; Fa’aaliga 1:15

Ua fa’alogoina e tagata o le Atua i lea taimi se si’ufofoga mālīe ma le manino ua fa’apea mai, “Tepa a’e i luga.” Ua latou tetepa a’e i le lagi, ona latou va’aia ai lea o le nuanua o le folafolaga. Ua mavae atu le ao uliuli ma le pogisā lea sa ufitia ai le vānimonimo, ma ua latou pulato’a atu i le lagi fa’apei o Setefano. Na latou va’aia le mamalu o le Atua, atoa ma le Atali’i o le tagata o lo o i Lona nofoāli’i. *GC 636 (527)*

(3) O LE Ā LE SUAFA MAMALU FA’A-TUPU O LE A TA’UA AI KERISO INA UA TOE AFIO MAI I LONA MAMALU TELE E FA’ATŪ LONA MALŌ I LE LALOLAGI?

“Ua iā te Ia fo’i le suafa ua tusia i Lona ofu ma Lona vae. ‘O Le Tupu o tupu, ma le Ali’i o ali’i.’” Fa’aaliga 19:16

MAU E TAU I AI: Fa’aaliga 17:14; Tanielu 2:47; Fa’ata’oto 8:15, 16

E leai se gagana fa’aletagata e mafai ona fa’aātaina lelei le va’aiga o le afio fa’alua mai o le Atali’i o le tagata i ao o le lagi. E afio mai o Ia i Lona Ia lava mamalu, ma le mamalu o le Tamā, fa’apea ma agelu pa’ia. E afio mai o Ia ma e la’ei i le ofu talaloa o le malamalama, lea lava na la’ei ai o Ia mai le fa’avavau. E fa’atasi ai agelu uma i Lona afio mai. E to’a afe ma afe o le a fa’afeaoina o Ia a o i Lona ala. *Mar 292*

A o tau lata mai le ao ola, e va'aia e mata uma le Ali'i o le Ola. O le a leai se pale tuitui e fa'aleagaina le ao pa'ia; peita'i o le a va'aia le paleali'i mamalu o lo'o ti'eti'e i Lona ao pa'ia. O Ōna fofoga e sili atu le pupula i lo o le malamalama o le lā i le aoauli. "Ua iā te Ia fo'i le suafa ua tusia i Lona ofu ma Lona vae. 'O Le Tupu o tupu, ma le Ali'i o ali'i'" (Fa'aaliga 19:16). *Mar 288*

(4) O AI O LE A FA'AFEAOINA KERISO INA UA FA'AALI O IA MAI LE LAGI MA O LO'O NOFOIA LONA NOFOĀLI'I?

"Pe a sau le Atali'i o le tagata i Lona mamalu, ma le 'au agelu pa'ia uma fa'atasi ma Ia, ona ti'eti'e ai lea o Ia i Lona nofoāli'i mamalu. Mataio 25:31

MAU E TAU I AI: Fa'aaliga 5:11; Mareko 8:38; Luka 9:26

Ole a afio mai Keriso i Lona Ia lava mamalu, i le mamalu o Lona Tamā, ma i le mamalu o le 'au agelu pa'ia. E tau mano ma mano, ma afe ma afe e lē mafaitaulia agelu, o fanau ma atali'i matagofie ma le manumalō a le Atua, e sili atu le matagofie ma le mamalu, o le a fa'afeaoina Ia i Lona ala. O le a i luga o Lona ao le paleali'i mamalu na suia ai le pale tuitui – o le paleali'i i totonu o se pale. O le a suia le 'ofu pāuli tuai, a e ole a Ia la'ei i se ofu e matuā sili atu le sinasina pa'epa'e, "E leai fo'i se tagata tā'ofu i le lalolagi na te mafaia ona fa'asinasina fa'apenā" (Mareko 9:3). *Mar 291*

(5) O LE Ā LE TULAGA MATAGOFIE O LE A VALA'AUINA AI E KERISO LE 'AU AMIOTONU O LO'O MOMOE INA IA TUTŪ A'E MAI O LATOU TU'UGAMAU 'ELE'ELEA?

"Auā e afio ifo mai le lagi le Ali'i lava, ma le 'alaga, ma le leo o le agelu sili, ma le pū a le Atua; e muamua fo'i ona toe tutū mai o ē ua oti o iā Keriso." I Tesalonia 4:16

MAU E TAU I AI: Mataio 24:30, 31; Isaia 27:13; Sakaria 9:14

A'o lūlūina pea le lalolagi, a'o 'emo uila ma ta'alili faititili, sa fa'alogoina le si'ufofoga o le Ālo o le Atua ua vala'au i le 'aupa'ia na momoe. Ua Ia silasila atu i tu'ugamau o le 'au amiotonu, ona sisi'i a'e lea o Ōna 'a'ao i le lagi ma Ia vala'au: "Ala mai ia, ala mai ia, ala mai, outou o ē o momoe i le efuefu o le 'ele'ele, inā ala mai ia!" O le a fa'alogoina lea si'ufofoga e ē ua oti i tulu'iga uma o le lalolagi, ma o ē fa'alogo i lea si'ufofoga o le a ala mai i latou. O le a va'aia ma fa'alogoina i le lalolagi atoa le toe tutū mai o le 'au amiotonu e matuā to'atele na'uā mai atunu'u uma, ma itu'aiga, ma gagana, atoa ma nu'u. Ua latou ō mai mai le falepuipui o le tu'ugamau, ua 'o'ofu i le mamalu o le ola e fa'avavau, ma ua latou 'alalaga mai, "Le oti e, o fea o i ai lou tui? Le tu'ugamau e, o fea o i ai lou manumalō?" (1 Korinito 15:55). O le 'au amiotonu o lo o ola, ma le 'au pa'ia na fa'atutūina mai ua 'au fa'atasi nei o latou leo i le 'alaga fiala o le manumalō. *GC 644 (533)*

(6) O AI LE ISI VAEGA TAGATA O LE A VALA'AUINA FO'I IA TUTŪ A'E MAI TU'UGAMAU E MOLIMAUINA LE AFIO MAI O LE TUPU O TUPU MA LE ALI'I O ALI'I?

"Fa'auta, o lo'o afio mai o Ia ma ao, e iloa atu fo'i o Ia e mata o tagata uma, atoa ma ē na tu'ia o Ia; e taufaitagitu'i fo'i itū 'aiga uma o le lalolagi ona o Ia. E moni, Amene." Fa'aaliga 1:7

MAU E TAU I AI: Sakaria 12:10; Ioane 19:37

Ua matala tu'ugamau, ma "E to'atele fo'i o ē momoe i le efuefu o le 'ele'ele latou te ala mai, o isi i le ola e fa'avavau, a o isi i le fa'alumaina ma le 'inosia e fa'avavau" (Tanielu 12:2). O i latou uma na maliliu o tumau le fa'atuatua i le fe'au a le agelu lona tolu, o le a tutū a'e mai tu'ugamau ua fa'amamaluina, e fa'alogo i le feagaiga o le filemū a le Atua, ma i latou fo'i o ē sa tausī Āna tulafono. "E iloa atu fo'i o Ia e mata o tagata uma, atoa ma ē na tu'ia o Ia" (Fa'aaliga 1:7), o ē na tauēmu ma fa'atauva'aina mafatiāga o Keriso, ma ē na aupito sili ona

tete'e i Lana 'upu moni ma Ōna tagata, o le a fa'atutū a'e ina ia va'aia o Ia i Lona mamalu ma vā'ai i le fa'aaloaloga e tu'u i ē fa'amaoni ma usiusita'i. IC 30

(7) O LE Ā LE MEA O LE A TUPU I Ē AMIOTONU O LO'O MOMOE INA UA ILIA LE PŪ?

“E fa'afuase'i lava, o le 'emo o le mata, pe a ilia le pū fa'a'uma; auā e ilia lava, e toe tutū mai ai ē ua oti ma le ola pea, e liua fo'i i tatou.” I Korinito 15:52

MAU E TAU I AI: I Korinito 15:42-44; I Ioane 3:2

O Lē aumaia le ola, o le a vala'au a'e i le uluā'i toetū ē na Ia fa'atauina, ma se'ia o'o i lenei itulā o le manumalō, pe a ilia le pū mulimuli ma o le a tutū mai e fa'avavau le motu o le 'au fa'atuatua, o le a saogalemū pea le 'au pa'ia o lo'o momoe ma o le a leoleoina e pei o ma'a tāua, e silafia e le Atua o latou igoa. E ala i le mana o le Fa'aola o lo'o mau ma i latou a o ola ma sa latou fa'asoa i le uiga Atua, e toe tutū a'e i latou mai le oti.

Na fetalai Keriso, “E o'o mai le aso e fa'alogo ai i Lona leo o i latou uma ua i tu'ugamau, ma latou ō mai ai” (Ioane 5:28). O lea si'ufofoga o le a fa'alogoina i fanua o lo'o i ai ē ua maliliu; ma o le 'au pa'ia uma o lo'o momoe iā Iesu o le a ala a'e ma ō 'ese mai falepuipui o le oti. O le a fa'aalia uiga na maua mai i le amiotonu o Keriso, o le a tutū a'e fa'atasi i se tulaga e aupito mao'a'e.

O le tulaga manumalō a le 'au pa'ia na momoe o le a matagofie le mamalu i le taeao o le toetū.... O le a tula'i atu ai Lē na toetū a'e. O latou manatu mulimuli lava sa fa'ataua lea i le oti ma le tu'ugamau, peita'i ua latou 'alalaga mai nei, “Le oti e, o fea o i ai lou tui? Le tu'ugamau e, o fea o i ai lou mauumalō?” I Korinito 15:55). Mar 300

(8) O LE Ā LE MEA O LE A TUPU I TINO FA'ALELALOLAGI MA AGAGA E LĒ OLA PE A O LE 'AU FA'AMAONI PE A FA'ALOGOINA LE PŪ MULIMULI?

“Na te liua o tatou nei tino ua leaga, ina ia faia ia fa'ataua i Lona tino matagofie, e tusa ma le mana na te mafaia ai ona fa'ato'ilaloina o mea uma iā te Ia lava.” Filipi 3:21

“Auā e tataua ona 'ofu o lenei tino i'u vale i le tino ola pea, ia ofu fo'i lenei tino oti i le tino lē oti lava.” I Korinito 15:53

MAU E TAU I AI: II Korinito 5:2-4; Efeso 4:24

O le a ō mai i latou uma mai o latou tu'ugamau i le tino fa'apei lava ona latou ulu atu ai i ai. E mamalu ma tino 'ese le tū mai o Atamu i le to'atele o ē ua fa'atutūina mai. O lona maualuga e itiiti ifo teisi nai lo le Ālo o le Atua. E tele na'uā se 'ese'esega o le maualuga o Atamu ma tagata o augātupulaga uma na mulimuli mai iā te ia; ua fa'aioa mai ai le tulaga pa'ū maualalo tele o le aiga tagata. A e ui i lea e tutū mai uma le 'au amiotonu i le malosia fa'afouina ma le tino talavou e fa'avavau. Na foafoaina le tagata i le amataga ia foliga i le Atua, ia lē gata i le amio, a e fa'apea fo'i i ōna foliga fa'aletino. Toetoe lava a talepeina 'ato'atoa e le agasala foliga o le Atua i le tagata; peita'i na afio mai Keriso Na te toe fa'afouina le mea ua lepetia e le agasala. O le a Na liua o tatou tino leaga ina ia toe foliga i Lona tino matagofie. O le tino oti ma le i'uvale, le tino na fa'amātāgāina e le agasala, ua fa'afouina nei, ua ato'atoa ma matagofie, e lē toe oti lava. O ila uma fo'i ma pona ma vaega lē ato'atoa ua tu'ua i le tu'ugamau. Ua toe fa'atagaina nei le tagata i le la'au o le ola, ma o le a tutupu a'e le 'au fa'aolaina se'ia o'o ina latou 'ausia le tulaga na i ai le fanau a tagata i le amataga (Malaki 4:2). O le a 'ave'esea mea uma na fa'amanatu mai ai le mala o le agasala, a e tutū mai ai le 'au fa'amaoni i le “matagofie o le Alii lo tatou Atua”, i le mafaufau, i le tino ato'a ma le agaga, e fa'aalia ai le foliga ato'atoa o lo latou Ali'i. E, le ofoofogia o le fa'aolataga! Ua leva ona laugaina, ua leva fo'i ona fa'amoemoe i ai, sa mafaufau pea fo'i i ai ma le naunauta'i, a e le'i ato'atoa lava ona malamalama i ai. GC 644 (533-34)

(9) O AI O LE A FA'APOTOPOTO MAI ITŪ UMA O LE LALOLAGI E TOE FA'ATASI AI MA LE FIAFIA MO LE MALAGA I LE LAGI?

“E ‘a’auina atu fo’i e Ia o Āna agelu ma le leo tele o le pū, latou te fa’apopototo fo’i i ē ua filifilia e Ia mai matāmatagi e fā, e amata i le tasi tulu’iga o le lagi, e o’o i le tasi tulu’iga.” Mataio 24:31

MAU E TAU I AI: Isaia 11:12; 43:6, 7; Mareko 13:27

O le tele o taimi o a tatou fa’amoemoe maiinei e lē manuia. E to’esea mai iā i tatou se tasi e pele ona o le oti. E tatou te tapunia fa’amoe o latou mata mo le tu’ugamau, ma fa’ata’atia’ese latou mai la tatou va’aiga, peita’i e fa’amalosia ma si’itia a’e o tatou agaga ona o le fa’amoemoe. E lē tu’u ‘ese’eseina i tatou e fa’avavau, peita’i o le a toe feiloā’i ma i latou e pele o lo’o momoe iā Iesu. O le a toe fo’i mai i latou mai le lau‘ele’ele a le fili. O le afio mai Lē e aumaia le ola. E fa’afeaoina o Ia e agelu pa’ia e lē mafaitaulia. E Na te tatalaina filifilimau a le oti, motusia noataga a le tu’ugamau, o le a tutū mai ē pele sa fa’apagotāina i le soifua malolōina ma le matagofie o tino e lē toe pala.

A o ala mai tama meamea i tino fou e lē pala mai o latou moega i le ‘ele’ele, o le a felelei atu i lima o latou tinā. E toe feiloā’i fiafia i latou ma o le a lē toe fa’amavae. 2 SM 259, 260

Ia sa’ili pea e le tinā ‘upu moni uma, ma teuina se ‘oa i le lagi, pe a afio mai Lē Ōna le ola e aumai ē sa fa’apagotāina i fale puipui o le oti, o tamā, tinā, ma fanau o le a feiloā’i, o le a lē toe fa’atofā aiga ina ua motusia filifili sa noatia ai, o le a lē toe to’esea lava se tasi. 1 T 654

(10) OLE Ā LE MEA O LE TUPU I LE ‘AU FA’ATUATUA O LO’O OLA PEA I LE TOE AFIO MAI O KERISO?

“Ona fa’afuase’i lea ona ‘aveina a’e o i tatou o ē ola ma totoe, fa’atasi ma i latou i ao, ina ia fetaia’i ma le Ali’i i le vā nimonimo; ona tatou fa’atasi pea lava lea ma le Ali’i.” I Tesalonia 4:17

MAU E TAU I AI: II Tupu 2:11; Fa’aaliga 11:12

E fa’afuase’i lava ona liua o le ‘au amiotonu o lo o ola, e pei o le ‘emo o le mata. Ua liua i latou i le tino fa’alelagi i le si’ufofoga o le Atua, ma ua ‘aveina a’e nei i latou fa’atasi ma ē na fa’atutūina mai tu’ugamau, ina ia fetaia’i ma lo latou Ali’i i le vānimonimo. “E ‘a’auina atu fo’i e Ia o Āna agelu...latou te fa’apopototo...i ē ua filifilia e Ia mai matāmatagi e fā, e amata i le tasi tulu’iga o le lagi e o’o atu i le tasi tulu’iga” (Mataio 24:31). GC 645 (534)

(11) O AI O LE A TATOU MAUA LE AVANOA E FEILOĀ’I I AI A O LATOU ‘AVEINA A’E TATOU E FETAIA’I MA LE ALI’I I LE VĀNIMONIMO?

“E ‘a’auina atu fo’i e Ia o Āna agelu ma le leo tele o le pū, latou te fa’apopototo fo’i i ē ua filifilia e Ia mai matāmatagi e fā, e amata i le tasi tulu’iga o le lagi, e o’o i le tasi tulu’iga.” Mataio 24:31

MAUE TAU I AI: Mataio 13:41; 25:31; Eperu 1:14

Se’iloga e tatou te va’aia le lelei na’uā o le Atua i le malamalama o le ola e fa’avavau ona tatou fa’ato’ā iloa mautinoa lea le tausiga ma le galuega e faia e Āna agelu mo i tatou. O nei agaga ola mai le lagi e i ai sa latou vaega tāua e faia i olaga o tagata. Ua fa’aali mai latou i la’ei pupula e pei o le uila ‘emo; ua ō mai latou pei o tagata i ‘ofu o tagata faimalaga. Ua latou talileleia le fa’aaloalo i aiga o tagata ‘ese’ese; ma latou ta’ita’i faigamalaga a ē e malaga a ua pogisā. Ua latou tete’e fuafuāga a lē fia fa’aleagamea ma fa’aui’ese taumafaiga a lē fa’atautala.

E ui ina e lē o iloa e ta'ita'i o lenei lalolagi, peita'i sa fa'atasi ai agelu e fai ma fofoga fetalai i le tele o a latou fonono. Sa va'aia i latou e mata o tagata, ma fa'alogo taliga o tagata i a latou talosaga. I totonu o falefono ma maota fa'amasino, sa fai ma molimau 'avefe'au mai le lagi mo ē o lo'o sauaina ma fa'apupuagatia. Ua latou fa'ato'ilalo fuafuaga ma taofia mea leaga sa tau aumai sesē e fa'amafatiaina ai le fanau a le Atua. O le a fofola mai i luma o tagata e a'oa'oina i a'oga fa'alelagi nei mea uma.

O le a malamalama lelei le 'au fa'aolaina i le galuega a agelu i o latou olaga. O le agelu sa puipuia ia mai lona la'itiiti, o le agelu sa va'aia ona ala uma, ma ufiufi lona ulu mai faigatā; o le agelu sa fa'atasi ma ia i le vanu o le ata o le oti, lē na fa'aioa lona nofoaga malōlō, lē na muamua e feiloa'i ma ia i le taeao o le toetū – o le a fa'aapefea le talanoaga ma ia, ma iloa ai le tala fa'asolopito o le fesoasoani fa'alelagi i olaga ta'ito'atasi, o le galulue fa'atasi i galuega uma mo le aigātagata! *Mar 314*

(12) O LE Ā LE MEA O LE A TUPU I LE 'AU FA'AOLAINA MA Ē O LE A LĒILOA I LE TOE AFIO MAI O KERISO I LONA MAMALU?

“O ia ona pō e i ai i le vao o tagata e to'alua, e 'avea lē tasi, a e tu'ua lē tasi. E olo fa'atasi fafine e to'alua i le mea e olo a'i saito, e 'avea le tasi, a e tu'ua le tasi.” Mataio 24:40, 41

MAU E TAU I AI: I Tesalonia 4:16, 17; Luka 17:34-36; Mataio 13:27-30

O le a'oa'oga e ta'ua o le “to'esea fa'alilolio,” fa'apea e 'ave'esea ai le 'au pa'ia mai lenei lalolagi a e le'i o'o ina va'aia le toe afio mai o Keriso, e lē o ta'ua lea i le Tusi Pa'ia. O ona fautua e fa'asino i fetalai a Keriso (Mataio 13:39-41) ina ia fa'amaonia ai. Peita'i e lē o a'oa'oina mai nei mea i ia fuai'upu. O le “afio mai” a le matā'upu e 24 (M. 24) e fa'atatau lea i le fa'aali mai o Keriso. I lenei afio mai, “O itu aiga uma o le lalolagi; latou te iloa atu fo'i le Atali'i o le tagata ua sau i ao o le lagi ma le mana ma le mamalu tele”(Mataio 24:30). O mea uma o lo'o ta'u mai ai le afio mai e “fa'alilolilo” o Keriso, e fa'aioa mai lea e keriso pepelo (Mataio 24:24-26).

Ua fa'aioa mai e Iesu le uiga o ē e “ave a'e” ma ē o le a “tu'ua.” O ē totoe o'au'auna amioleaga ia, latou te lē faia pea mea e manana'o ai ina ua fa'apea ua mavae le taimi e ta'ua o le 'ave a'e fa'alilolilo, a e o le a fa'a gataina latou ma tu'u i ai lo latou tofi fa'atasi ma le 'au fa'afiaamionu. *5 BC 504*

(13) I LONA TOE AFIO MAI, O LE A FA'APEFEA ONA FILIFILIA E KERISO PE O AI I LATOU O LE A 'AVEINA MA O AI O LE A TU'UA?

“Afai tou te alofa mai iā te A'u, ia outou tausi mai i A'u poloa'iga.” Ioane 14:15

MAU E TAU I AI: Ioane 14:21-24; 15:10; Fa'aaliga 22:14

O le lē tausia o poloa'iga a le Atua o le lē alofa lea iā te Ia. E leai se tasi o le a tausia le tulafono a le Atua vagana ai pe a alofa iā te Ia, le Ālo pele e to'atasi o le Tamā. Pe afai e latou te alolofa iā te Ia, o le a latou fa'aalia lea alofa e ala i le usiusita'i iā te Ia. O i latou uma e alolofa iā Keriso, o le a alofa fo'i i ai le Tamā, ma o le a fa'aalitinoina mai i ai Ia lava iā i latou. I so'o se faigatā ma puapuagā e o'o mai iā i latou o le a i ai pea lo latou fesoasoani iā Iesu Keriso. *TDG 142*

O le a afio mai le Ali'i i le mana ma le mamalu tele. O le a faia loa Lana galuega o le tu'u'ese'ese o le 'au amiotonu ma ē amioleaga. Peita'i e lē mafai ona tu'uina se suāu'u i fagu a ē e leai ni a latou fagu. Ona fa'ataunu'uina lea o fetalai a Keriso, "O ia ona pō e i ai i le vao o tagata e to'alua, e 'avea le tasi, a e tu'ua le tasi. E olo fa'atasi fafine e to'alua i le mea e olo a'i saito, e 'avea le tasi, a e tu'ua le tasi" (Mataio 24:40, 41). O ē amiotonu ma le 'au amioleaga e galulue fa'atasi lava i latou i galuega o le olaga. Peita'i e faitauina e le Atua le amio; e silafia e Ia le fanau e usiusita'i, ē e fa'aaloalo ma alolofa i Āna poloa'iga. *TMGW 234*

(14) O LE Ā LE FA'AMAONIGA MONI O LO TATOU ALOFA, USIUSITA'I MA LE FA'AVAE O LE TAU E TATOU TE MAUA?

"Ona tali atu ai lea o le Tupu, e fa'apea atu iā te i latou, E moni, 'Ou te fai atu iā te outou, auā na faia e outou i le tasi o ē aupito itiiti o O'ū uso nei, o A'ū lea na outou faia i ai." Mataio 25:40

MAU E TAU I AI: Mataio 25:34-46

I le aso o le fa'amasinoga, o latou uma o ē na fa'amaoni i aso ta'itasi i o latou olaga, o ē sa iloa vave a latou galuega e tataua ona fai ma faia loa, e lē'i manatu latou i se vi'iga pe ose tau e maua, o le a fa'alogo i nei 'upu, "Ō mai ia, o outou ua fa'amanuiaina e Lo'ū Tamā, ia fai mo outou tofi le malō ua saunia mo outou a o le'i fa'avaeina le lalolagi" (Mataio 25:34). E lē vi'ia i latou e Keriso mo ni galuega fa'agae'etia loto sa latou faia, mo se poto maoa'e sa fa'aalia, po o se tupe tele na foa'i atu. A e ona o le faia o mea laiti e lē amana'ia, o lea e tauia ai i latou. Ua fetalai mai o Ia, "Na 'Ou fia 'ai, ona outou avane ai lea ni mea 'Ou te 'ai ai;... auā na faia e outou i le tasi o ē aupito itiiti o O'ū uso nei, o A'ū lea na outou faia i ai" (Mataio 25:35, 40).

O'U MANATUNATUGA MA TALI (Mafai tali e sili atu i le tasi pe a tataua)

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole
J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū

N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u
S = Lagona le Mata'u
T = Lotomalie
U = Lē Talia
V = Tatalo
W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'imau pe ana ou lē iloa
Z = Se isi mea

'Ou te _____ i le vaeluagapō, pe a foliga mai ua leai lava se fa'amoemoe, o a'u o le a i ai i ē e fa'asaoina, o i latou o lo'o fa'atali ma mata'i mo le avanoa e va'aia i le vāteatea, o le a fa'afeao e agelu ma fa'aalia ai le Tupu o tupu ma le Ali'i o ali'i!

'Ou te _____ e va'ai i fofoga o Iesu ma 'ou fa'atasi ai ma i latou o lo'o 'alalaga, "Fa'auta, o lo tatou Atua lenei; sa tatou fa'atalitali iā te Ia, ua Ia fa'aolaina fo'i i tatou!" (Isaia 25:9).

Ua 'ou _____ e fa'alogo i Lona si'ufofoga matagofie o lo'o fa'aleoina i itū uma o le lagi a o Ia afio ifo e avatu a'u e ma te fa'atasi ma Ia e fa'avavau.

'Ou te _____ o le a vala'auina e le Ali'i, i lenā aso, ma Lona si'ufofoga mālie ma le leo o le pū, ē o lo'o momoe ia tutū mai i le ola e fa'avavau.

'Ou te _____ o le a 'ou toe fa'atasi ma ē pele iā te a'u, a o fa'apotopotoina i tatou e agelu i ao, fa'atasi ai ma Keriso lo'u Fa'aola.

'Ou te _____ o le a 'ou fa'aalitinoina lo'u alofa i le Atua ma lo'u alofa i uso a tagata e ala i galuega alofa i aso ta'itasi.

'Ou te _____ ia 'ou va'ai i "ē aupito itiiti o o'u uso nei" ma fai mo i latou e pei ona 'ou faia iā Iesu.



O le Tau i o Ē Amiotonu

Lesona 19

(1) O Ā 'UPU FA'AMANUIA O LE A FA'AFEILOA'I AI LE 'AU FA'ATUATUA O Ē O MAUA MAI O LO'O TULIMATA'I MA LE MATAĀLA MA GALULUE NAUNAUTA'I E SAUNIUNI MO LONA TOE AFIO MAI?

"Ona fai atu ai lea o lona Ali'i iā te ia, Ua lelei ia, le 'au'auna lelei e, ma le fa'amaoni, ua e fa'amaoni i nai mea itiiti, 'Ou te tofia 'oe e pule i mea e tele; inā ulufale mai ia i le fiafia o lou Ali'i." Mataio 25:21

MAU E TAU I AI: Luka 12:37; II Timoteo 4:7, 8; Mataio 24:45-47

"Na a'u iloa, fa'auta fo'i, ua tū mai le Tama'i Mamoe i le Mauga o Siona, ua fa'atasi fo'i ma Ia tagata e selau afe ma afe e fā sefulu ma le fā o afe, ua tusia le suafa o Lona Tamā i o latou muāūlu" (Fa'aaliga 14:1). I lenei lalolagi o latou mafaufau ua fa'apa'iaina mo le Atua; ua latou 'au'auna iā te Ia ma le poto fa'apea ma le loto atoa; ma o lenei ua Ia mafai ona tusia Lona suafa "i o latou muāūlu." Ma "latou te fai ma tupu fo'i e fa'avavau fa'avavau lava" (Fa'aaliga 22:5). Latou te lē o i totonu ma o mai i fafo e pei o latou o lo'o tau sa'ili se nofoāga. O i latou e i le vaega ua fetalai mai i ai Keriso, "O mai ia, o outou ua fa'amanuiaina e Lo'u Tamā, ia fai mo outou tofi le malō ua saunia mo outou a o le'i fa'avaeina le lalolagi" (Mataio 25:34). Ua ta'uleleia i latou o Lana fanau ma fetalai atu, "Inā ulufale mai ia i le fiafia o lou Ali'i" (F. 21). AA 590

(2) O LE Ā LE TAU I E LĒ TATAU ONA MAUA A E O LE A 'AVE'ESEA MAI LE 'AU AMIOTONU?

"E fa'aumatia e Ia le oti e fa'avavau; e soloi'esea fo'i e le Ali'i o Ieova o loimata i mata uma lava; e fa'ate'a'eseina fo'i e Ia le gao o Lona nu'u i le lalolagi uma lava; auā ua fetalai mai ai Ieova." Isaia 25:8

MAU E TAU I AI: Isaia 60:15; 61:7; 30:26

Ua ō mai suli o le Atua mai fale malepelepe ma pa'usisi sa nofosala ai, mai falepuipui palapalā ma le pogisā, mai fata na fausia mo lo latou fa'asalaga, mai mauga, mai toāfa, mai āna o le 'ele'ele ma āna i le sami. Na matitiva ma sauāina ma fa'atāugāina i latou i le lalolagi. E miliona ma miliona na ō ifo i le tu'ugamau ma le fa'alumaina ona o lo latou tūtūmau ma le mausalī, ma lo latou lē fia gaua'i atu i fa'asesēga a Satani. O fa'ai'uga o fa'amasinoga a le lalolagi na 'avea ai i latou o ni pagotā aupito sili ona leaga. A'o nei, "o le Atua o Ia lava le fa'amasino" (Salamo 50:6). Ua fa'alēaogāina nei fa'ai'uga a le lalolagi. "E fa'ate'a'eseina fo'i e Ia le gao o Lona nu'u i le lalolagi uma lava" (Isaia 25:8). "E igoa fo'i latou, O le nu'u pa'ia; o ē ua fa'atauina e Ieova" (Isaia 62:12). Ua tofia fo'i e Ia "e foa'iina atu iā i latou le matagofie e sui a'i le lefulefu, o le u'u o le 'oli'oli e sui a'i le fa'anoanoa, o le 'ofu e fai ai vi'iga e sui a'i le loto fa'avaivai" (Isaia 61:3). Ua lē toe tautevateva i latou, pe puapuagātia, pe fa'ata'ape'apeina, pe toe sauāina. E afua atu nei ona latou fa'atasi pea lava pea ma le Ali'i. GC 650 (537)

(3) UA FA'APEFEA ONA FA'AMATALA MAI E LENEI FUAI'UPU LE LĒ MAFAI ONA MALAMALAMA LE MAFAUFAU O LE TAGATA I LE MATAGOFIE O MEA O LO'O TEUINA MO I LATOU E ALOLOFA IĀ TE IA?

"E pei ona tusia, O mea e le'i va'aia e mata, e le'i lagona fo'i e taliga, e le'i o'o fo'i i le loto o se tagata, o mea ia ua saunia e le Atua mo i latou o ē alofa iā te Ia." I Korinito 2:9

MAU E TAU I AI: Isaia 64:4; Salamo 31:19; Mataio 25:34

Ua fefefe le to'atele latou te taliaina se a'oa'oga e foliga mai ai e fa'aletino le tofi e fa'avavau o le 'au fa'aolaina. O le mea lea ua latou sa'ilia ai ni fa'amalamalama'aga fa'aleagaga o le nu'u ua tatou tulimata'i atu nei i ai e fai mo tatou aiga e fa'avavau. Na fetalai Keriso i Ōna so'o o le a afio o Ia i le lagi Na te saunia ai ni maota mo i latou i le lagi. O le a lē pogisā ē savavali i le afioga a le Atua e fa'atatau i le aiga fa'alelagi o le 'au fa'aolaina. Peita'i, e le'i vā'ai mata o tagata, pe fa'alogi fo'i o latou taliga, e le'i o'o ifo fo'i i o latou loto le maoa'e o mea ua saunia e le Atua mo i latou o ē alolofa iā te Ia (I Korinito 2:9). E lē mafai e gagana a tagata ona fa'amatalaina le tau i o ē amiotonu. Na o le 'au fa'aolaina lava o le a latou malamalama i ai. E lē mafai e le mafaufau fa'aletagata ona malamalama i le mamalu ma le pupula o le Parataiso a le Atua.

"E nonofo fo'i lo'u nu'u i le mea e manuia ai, ma fale e saogalemū ai, ma mapusaga e filemū ai". "E lē toe maua ai se fa'asauā i lou lau'ele'ele; e lē toe fa'atafunaina fo'i pe lepetia mea i lou nu'u. O le a e fa'aigoaina ōu pā o le Fa'aolataga, a'o ōu puipui o le Vi'iga". "Latou te faia fale ma latou mau ai; latou te totō tovine ma latou 'a'ai i o latou fua. Latou te lē fai fale ina ia mau ai nisi; latou te lē totō fo'i ina ia 'a'ai ai nisi. E uma lava i ē ua filifilia e A'u o mea na faia e o latou lima" (Isaia 32:18; 60:18, 65:21, 22).

"E lē aogā fo'i iā te i latou se lamepa, po o le malamalama o le lā; auā o le Ali'i le Atua Na te fa'amalamalamaina i latou" (Fa'aaliga 22:5). O le a i ai se malamalama e sili mamao atu i le susulu o le lā, peita'i e lē sesega pe tiga ai mata. O le a fa'amalamalamagia le 'A'ai Pa'ia i le pupula matagofie o le Atua ma le Tama'i Mamoe. O le a fa'apenā ona savavali le 'au fa'aolaina i le malamalama o le aso e fa'avavau e aunoa ma se lā. GC 674, 675 (559, 560)

(4) E TO'AFIA I LATOU O LE A MANUMALŌ E ALA I LE TOTO O LE TAMA'I MAMOE MA O Ā LA'EI O LE A 'OFUINA A O LATOU TUTŪ I LUMA O LONA NOFOĀLI'I?

*"Ua mavae atu ia mea, ona 'ou iloa lea, fa'auta fo'i i le motu o tagata e to'atele mai atu nu'u uma, ma aiga, ma nu'u, ma gagana 'ese'ese, e lē ma faitaulia e se tasi, o lo'o tutū i latou i luma o le nofoāli'i ma luma o le Tama'i mamoe, ua 'o'ofu i latou i 'ofu sisina, ua i ai fo'i lau pama i o latou lima." **Fa'aaliga 7:9***

MAU E TAU I AI: Fa'aaliga 7:10-14; 5:11

O i latou ia na ō mai nai le puapuagā tele;” na latou ui mai i le taimi o puapuagā e leai sona tusa talu ona fa'ato'ā tupu o nu'u; na latou 'onosa'i i le tigā o le taimi o puapuagā o Iakopo; sa latou tutū e aunoa ma se fautua i le taimi na liligi mai ai le to'asā mulimuli o le Atua. A e peita'i ua lavea'iina i latou, auā ua “tā o latou 'ofu ma ua fa'asinasinaina o latou 'ofu i le toto o le Tama'i Mamoe.... Ua leai fo'i se pepelo i o latou gutu auā ua lē pōnā i latou i luma o le Atua.... O le mea lea ua latou i luma ai o le nofoāli'i o le Atua, ua latou 'au'auna fo'i iā te Ia i Lona malumalu i le ao ma le pō; o Lē ti'eti'e fo'i i le nofoāli'i e mau ma i latou.” Ua latou va'aia le lalolagi ua fa'atafunaina i ōge ma fa'ama'i, o le lā fo'i ua mū ai tagata i le mū tele, ma ua latou onosa'i i nei puapuagā uma, o le fia'ai atoa ma le fiainu. A e peita'i, “Latou te lē toe fia'a'ai, e lē toe fiainu fo'i, e lē ogotia i latou i le lā, po o se tasi vevela; auā o le Tama'i Mamoe o lo'o i luma o le nofoāli'i Na te fafaga iā i latou, ma ta'ita'i iā te i latou i puna o vai ola; e solo'i'eseina fo'i e le Atua o loimata uma nai o latou mata” (Fa'aaliga 7:14 -17) *GC 648 (537).*

(5) O Ā MEA O LE A TU'UINA I LUGA O ŪLU O Ē ALOLOFA IĀ TE IA?

*"Amu'ia le tagata o lē onosa'i i le fa'aosoosoga; auā a uma ona tofotofoina e maua e ia le pale o le ola, ua folafolaina mai e le Ali'i i ē alolofa atu iā te Ia." **Iakopo 1:12***

MAU E TAU I AI: II timoteo 4:7, 8; Fa'aaliga 2:10; I Peteru 5:4

A'o le'i ūlu atu i latou i le 'a'ai a le Atua, ua tu'uina atu e le Fa'aola i ē na mulimuli iā te Ia o fa'ailoga o le manumalō, ma fa'ae'eina atu iā i latou fa'ailoga mamalu o lo latou tulaga fa'atupu. Ua fa'atulagaina agelu atoa ma le 'aupa'ia i se fa'atāfāfā e si'omia ai lo latou Tupu, o Lē o lo o tula'i i le mamalu ma le maualuga e sili a'e i lo agelu ma le 'aupa'ia. O le pupula atu o Ōna fofoga iā i latou ua fa'atumulia lea i le alofa mutimutivale. E lē mafaitaulia le fa'apotopotoga o le 'au fa'aolaina; ua taula'i atu uma nei la latou va'ai iā te Ia; ua va'aia e mata uma Lona mamalu, o fofoga ia ma Lona tino sa sili ona fa'atāugāina nai lo se isi lava tagata. Ua fa'ae'e atu nei e le 'a'ao taumatu o Iesu le paleāli'i mamalu i luga o ūlu o le 'au manumalō. Ua ta'ito'atasi i latou ma le paleāli'i ua tusia ai lona lava “igoa fou” (Fa'aaliga 2:17), ma 'upu ua tusia ai, “e Pa'ia Ieova.” *GC 645 (534)*

Ua latou tutū nei i luma o le nofoāli'i ua 'o'ofu i ni 'ofu sisina e sili atu ona tautele i lo ni 'ofu na 'o'ofu ai ē aupito sili ona mamalu o le lalolagi. Ua fa'apaleina fo'i i latou i paleāli'i e sili atu ona pupula i lo ni paleāli'i na fa'ae'eina atu i tupu o le lalolagi. O aso o le tigā ma le tagi auē ua fa'ai'uina nei e fa'avavau. O le Tupu o le mamalu ua Na solo'i'esea loimata uma i o latou mata; ua 'ave'esea fo'i mafua'aga uma o le fa'anoanoa. A'o talotalo atu a latou laupama, ua latou 'alalaga a'e i le pese o le fa'amanū, e manino, e mālīe, ma e ō gatasi vaega uma; na taufai alalaga leo uma se'i o'o ina fa'atumulia itū uma o le lagi i lea vi'i, “O i ai le fa'aolataga i lo tatou Atua o Lē ti'eti'e i le nofoāli'i, atoa ma le Tama'i Mamoe.” O ē uma fo'i o nonofo i le lagi ua latou tali mai e fa'apea: “Amene, ia i lo tatou Atua le fa'amanū, ma le vi'iga, ma le poto, ma le fa'afetai, ma le mamalu, ma le mana, ma le malosi e fa'avavau fa'avavau lava” (Fa'aaliga 7:10, 12). *GC 650 (538)*

(6) MA LE FA'ATA'ITA'IGA A TOEA'INA E LUASEFULU FĀ E MULIMULI AI, O LE Ā LE MEA O LE A FAIA E LE 'AU FA'AOLAINA I O LATOU PALEĀLI'I?

*"Ona fa'apa'ū ai lea o toeā'ina e to'aluafulu ma le to'afā i luma o Lē ti'eti'e i le nofoāli'i, ma ifo atu i Lē soifua e fa'avavau e fa'avavau lava, ma lafo o latou pale i luma o le nofoāli'i, o lo'o fa'apea atu, Le Ali'i e, e tatau lava 'Oe ina ia tu'u atu iā te 'Oe le vi'iga, ma le fa'ane'ene'ega, ma le mana; auā na E faia mea uma lava, ona o Lou finagalo fo'i e i ai i latou ma ua faia." **Fa'aaliga 4:10, 11***

MAU E TAU I AI: Fa'aaliga 4:4; 5:14; I Korinito 9:25

E lē mafai ona tatou malamalama 'ato'atoa i le tau o lo tatou togiola se'ia o'o ina ua tutū fa'atasi le 'au fa'aolaina ma le Fa'aola i luma o le nofoāli'i o le Atua. A o fa'atumuina i tatou i le mamalu o le aiga tumau i le lagi, ona tatou manatua lea o Iesu sa tu'ua nei mea uma ona o i tatou; e lē gata ina tu'ua e Ia maota i le lagi, a e peita'i mo i tatou fo'i sa Ia maliu mai ai ma le lē mautinoa pe i'uvale ma malaia ai e fa'aavavau. O le a lafoina o tatou paleali'i i Ōna 'a'ao, ma si'i a'e le vi'iga, "Ua tatau lava le Tama'i Mamoe na fasia ina ia tu'uina atu iā te Ia le mana, ma le 'oa, ma le poto, ma le mālōsi, ma le fa'ane'ene'ega, ma le vi'iga, ma le fa'amanū" (Fa'aaliga 5:12).
DA 131 (83-84)

(7) O LE Ā LE MEA O LE A SOLOI'ESEA E LE ATUA MAI O TATOU MATA, MA O LE Ā FO'I I'UGA E FĀ O LE AGASALA O LE A TATOU LĒ TOE O'O LAVA I AI?

"E sōloi'esea fo'i e le Atua loimata uma i o latou mata; e leai fo'i se toe oti, po o se fa'anoanoa, po o se auē, e leai fo'i se toe puapuagā; auā ua mavae atu mea muamua." **Fa'aaliga 21:4**

MAU E TAU I AI: Fa'aaliga 7:17; Isaia 25:8

O le tigā e lē mafai ona i ai i le si'osi'omaga o le lagi. I le aiga o le 'au fa'aolaina o le a lē toe i ai nii loimata, leai ni solo fa'anoanoa o maliu, ma leai ni fa'aailoga o le fa'anoanoa. "E lē fai mai fo'i se tasi ua mau ai, 'Ou te ma'i; e fa'amagaloina agasala a le nu'u e nonofo ai" (Isaia 33:24). E tasi le tai o le fafia o le a tafe ma fua loloto atili ai e fa'avavau. AG 361

O leo uma e ta'itasi ma 'alalaga, "Ua tatau lava le Tama'i Mamoe na fasia" (Fa'aaliga 5:12). Ona o le tigā o Lona agaga Na te silafia ai Lana fanau ma ua malie a i o Ia. E te manatu ea e i ai se tasi o le a fa'aaogā sona taimi e fa'amatala ai ōna tofotofoga ma fa'afitauli mata'utia? "E lē toe manatua mea na muamua, e lē alu a e fo'i i le loto" (Isaia 65:17). "E sōloi'esea fo'i e le Atua loimata uma i o latou mata" (Fa'aaliga 21:4). 3 SM 431

(8) E NA O AI I LATOU UA I AI LE AVANOA FA'APITOA ED PEPESI I LE PESE O LE LAVEĀ'IGA UA TA'UA O LE "PESE A MOSE"?

"Ua latou pepese fo'i e peiseā'i o se pese fou i luma o le nofoāli'i, ma luma o mea ola e fā, ma le 'au toea'ina; e lē mafaia fo'i e se tasi ona a'oa'o i lea pese, na o le selau afe ma afe e fā sefulu ma le fā o afe o ē ua fa'atauina nai le lalolagi." **Fa'aaliga 14:3**

MAU E TAU I AI: Fa'aaliga 14:4, 5; 12:11; 22:14

E i ai se aso ua toeitiiti o'o mai i o tatou luga o le a va'aia ai mea lilo a le Atua, ma fa'amaonia ai le tonu o Ōna ala; o le amiotonu, o le alofa tunoa, ma le alofa le fa'avae o Lona nofoāli'i. Pe a mae'a le taua fa'alelalolagi, ma fa'apotopoto le 'aupa'ia i le aiga, o la tatou autū muamua o le pese a Mose, le 'au'auna a le Atua.

O le autū lona lua o le pese a le Tama'i Mamoe, o le pese o le alofa tunoa ma le fa'aolataga. O lenei pese e sili atu lona leo tele, e maualuga, ma e matagofie, e pei o si'ufotoga fetalii'i i le lagi. O lea pese ua usuina e fa'atatau i le tausiga a le Atua, o feso'ota'iga ma avanoa fa'apitoa 'ese'ese, o lenei ua va'aia e aunoa ma le 'ie pupuni i le vā o mea tau le tulafono, o valo'aga, ma le tala lelei.

O le tala fa'asolopito o le ekalesia i le lalolagi ma le ekalesia ua fa'aolaina i le lagi e ogātonu ai le satauro o Kalevario. O le autū lenei, o le pese lenei, - o Keriso i mea uma lava - i vi'iga o le fa'afetai e fa'alogoina i le lagi mai le afe ma le sefulu o afe, e mano ni mano e lē mafaitaulia le fa'apotopotoga o ē ua fa'aolaina. Ua pepese fa'atasi uma i lenei pese a Mose ma le Tama'i Mamoe. O lenei pese e fou, auā e le'i usuina muamua i le lagi.
TMGW 433

(9) ONA O TATOU O FANAU A LE TUPU, O LE Ā SE MEA UA IA SAUNIA MAI LE FA'AVAEINA O LE LALOLAGI E FAI MO TATOU TOFI?

"Ona fai atu ai lea o le Tupu i ē o i Lona itū taumatau, Ō mai ia, o outou ua fa'amanuiaina e Lo'u Tamā, ia fai mo outou tofi le malō ua saunia mo outou a o le'i fa'avaeina le lalolagi." Mataio 25:34

MAU E TAU I AI: Eperu 11:10; Fa'aaliga 21:2; Tanielu 2:44

Ua i luma nei o le fa'apotopotoga o le 'au fa'aolaina le 'a'ai pa'ia. Ua tatalaina e Iesu faitoto'a penina o le 'a'ai, ma ua ulu atu nei i ai le nu'u o ē sa tausi i le mea moni. Ua latou va'aia nei le parataiso a le Atua, le aiga o Atamu a'o le'i agasala. Ona o'o mai ai lea o lenā si'ufofoga e sili ona mālīe i lo leo uma ua fa'alogoina e taliga, ua fa'apea mai: "Ua i'u nei la outou finauga. Ō mai ia, outou ua fa'amanuiaina e Lo'u Tamā, ia fai mo outou tofi le malō ua saunia mo outou a'o le'i fa'avaeina le lalolagi."

O le alofa e lē mafa'amatalaina ua fa'aulufaleina ai nei e Iesu le 'au fa'amaoni i le fiafia o lo latou Ali'i. Ua 'oli'oli le Fa'aola ona ua va'aia i le malō o le lagi o agaga na Ia lavea'iina e ala i Ōna puapuagā ma Lona fa'alumaina. O i latou fo'i ua togiolaina o le a 'auai i Lona fiafia, auā ua latou va'aia i le 'au fa'aolaina, i latou na aumaia iā Keriso e ala i a latou talosaga, a latou galuega atoa ma a latou taulaga ofo sa faia ma le alofa fa'amaoni. A'o latou vagavagaia le nofoāli'i sinasina tele, na fa'atumulia i latou i le 'oli'oli e lē mafa'amatalaina ina ua latou va'aia ē na latou aumaia iā Keriso, ma latou iloa ai ua aumaia e lē tasi isi, ua ta'ita'ia mai fo'i ē i latou nei nisi agaga, ua aumaia uma lava i le taulaga o le filemu. O inā ua latou lafoina ai i lalo o latou palealii i 'a'ao o Iesu ma fa'amanū atu iā te Ia e fa'avavau. GC 646, 647 (534, 535)

(10) O LE Ā LE ITŪ'AIGA NOFOĀGA O LO'O SAUNIA E KERISO I LONA MALŌ MO TAGATA TA'ITO'ATASI UMA O I LATOU O Ē ALOLOFA IĀ TE IA?

"E tele mea e nonofo ai i le maota o Lo'u Tamā; ana leai, po ua 'Ou fai atu iā te outou; 'Ou te alu e sauni se mea e nonofo ai outou. Afai fo'i 'Ou te alu ma sauni se mea e nonofo ai outou, 'Ou te toe sau, 'Ou te talia fo'i outou ia fa'atasi ma A'u; ina ia i ai outou i le mea 'Ou te i ai A'u." Ioane 14:2, 3

MAU E TAU I AI: II Korinito 5:1; Eperu 11:10, 16

A o fiafia lagona ina o tosina i le matagofie o le lalolagi, ma mafaufau ai i le lalolagi o le a o'o mai, o le a lē iloa ai le pagātia o le agasala ma le oti; o le a lē toe i ai i foliga o mea na foafoaina le ata o le fetu'u. Fa'ataga lau va'aiga fa'alemaufau ma iloa ai le ata o le aiga o le 'au fa'aolaina, ma manatua o le a sili atu le matagofie i lo o mea e mafai ona e manatu i ai. I mea alofa 'ese'ese a le Atua o le foafoāga ua tatou va'aia ai na o sina vaega itiiti lava o le pupula o Lona mamalu. E pei ona tusia, "O mea e le'i va'aia e mata, e le'i lagona fo'i e taliga, e le'i o'o fo'i i le loto o se tagata, o mea ia ua saunia e le Atua mo i latou o ē alofa iā te Ia" (I Korinito 2:9). Mar319

Fa'afetai i le Atua! O maota nei o lo'o tatou tepataula'i i ai. E lē o maota fa'alelalolagi iinei, ona o le a lulūina latou i lalo i mafui'e malosī e lē o toe mamao; peita'i o maota na fa'alelagi na afio a'e Keriso e sauni mo ē fa'atuatua. E leai so latou aiga iinei. O tatou e na o ni tagata faimalaga, o tagata 'ese iinei, o lo'o aga'i i le nu'u e sili atu lona lelei. Tau ina ia fesoasoani mai le Atua ia tatou manumalō i le fa'amanuiāga o le ola e fa'avavau. HP 354

(11) O FEA UA TU'UINA AI E KERISO, I FA'AIOGA O MANU'A O LE SATAURO, FA'AMANATUGA O LONA ALOFA TELE MO I TATOU UMA TA'ITO'ATASI?

"E galo ea i le fafine lana tama ua susu, na te lē alofa i le tama a lona lava manava? ai lava e galo iā te i latou, a e lē galo lava 'oe iā te A'u. Fa'auta, ua 'Ou taia lou fa'atusa i 'O'u alofilima; e tumau ōu pā i O'u luma." Isaia 49:15, 16

MAU E TAU I AI: Ioane 20:25; 19:37

Na fa'asilia e le aposetolo Keriso i luma o òna uso, o Ia lea na foafoaina mea uma ma o Ia fo'i na galuea'iina lo latou fa'aolataga. Na Ia fa'ailoa mai o 'a'ao e taofia lalolagi i le vāteatea, ma fa'avasegaina i o atou fa'asologa ma fa'atulaga gaoioiga o mea uma o le atulaulau a le Atua, o 'a'ao ia na tutu'iina i fao i le satauro mo i latou. AA 471

Na o le tasi lava le mea o le a fai ma faamanatu o le leaga o le agasala - o tulaga manu'a ia o le a tau'aveina e faavavau e lo tatou Faaola, o faailoga o Lona maliu i le satauro. O tulaga manu'a i Lona ao, ma Lona itu, faapea ma Ona lima ma Ona vae, ona pau ia o faailoga o le a totoe mai o le galuega sauā na faia e le agasala. GC 674 (558)

(12) O LE Ā LE MEA O LE A TAUMAFAI LE 'AU PA'IA IA MATUĀ MALAMALAMA I AI I LE GASOLOGA O TAIMI E FA'AVAVAU INA IA FA'ATUMULIA AI I LATOU I LE TUMU ATO'ATO A O LE ATUA?

"Ia fa'avaeina i le alofa, tou te mafai ai ona iloa lelei e outou atoa ma le 'au pa'ia uma, o le uiga o le lautele, ma le umi, ma le loloto, ma le mauuluga, ia iloa fo'i le alofa o Keriso ua silisili 'ese e lē mailea, ia fa'atutumuina outou i le tumu uma lava o le Atua." Efeso 3:18, 19

MAU E TAU I AI: Efeso 1:18-21; Roma 11:33; Isaia 55:9

O le a 'avea le satauro o Keriso o le pese ma le autū o su'esu'ega uma a le' au fa'aolaina i le ola e fa'avavau. O le a latou iloa le Keriso na fa'asatauroina pe a latou vā'ai atu i le Keriso ua fa'amamaluina. O le a lē mafai lava ona fa'agaloina o lenei mea: o Lē e Òna le mana na foafoaina ai ma fa'agaioia ai lalolagi e lē mafaitaulia i le aoao o le vāteatea, o Ia lava lea na fa'amaulalo o Ia e Ia lava, ina ia si'itia a'e ai le tagata ua pa'ū. O le a lē galo iā i latou sa Ia tau'aveina le luma ma le masiasi o le agasala, ma sa ufiufiina ai fofoga o Lona Tamā, se'ia o'o ina momomo ai Lona finagalo i le ōi o le lalolagi ua fano, ma nutimomoia ai Lona soifua i luga o le satauro i Kalevario. O Ia lea o le Ālo pele o le Atua, le Silisili 'Ese o le lagi, o Lē sa fiafia kerupi ma serafi latou te ifo i ai. O Lē na faia le atulaulau uma, le Fa'amasino o mea uma lava, ua tu'u'esea e Ia Lona mamalu ma fa'amaulalo iā te Ia ona o le alofa i le tagata; o le a 'avea lava pea lenei mata'upu o se mea e fa'atupuina ai le maofa atoa ma le fia vivi'i a'e o atulaulau uma o le foafoāga atoa a le Atua.

O le mea na latou lē malamalama ai e fa'atatau i le satauro, ua 'avea nei lea mata'upu ma fa'amalamalama'aga o isi mea uma na latou lē malamalama ai. O uiga o le Atua sa fa'atumulia ai i tatou i le mata'u ma le fefe, ua matagofie mai nei ma ua tatou tosina atu i ai talu ai le malamalama ua susulu mai Kalevario. Ua va'aia nei o le alofa tunoa o le Atua, ma Lona fa'apalepale, ma Lona alofa fa'amātua, e ō gatasi lava ia uiga ma Lona pa'ia, ma Lana amiotonu, atoa ma Lona mana. A'o tatou va'aia le matalasi, le mauuluga ma le fa'aeaina o Lona nofoāli'i, ua tatou va'aia fo'i Lona alofa i òna fa'aaliga 'ese'ese, ona tatou maua ai lea o se malamalama'aga fou o le fa'a'upuga “Lo Matou Tamā e.” GC 651, 652 (538-539)

**O'U MANATUNATUGA MA TALI
(Mafai tali e sili atu i le tasi pe a tatau)**

A = Talitonu ma Talia
B = Lagona le Fenumia'i
C = Naunau ia Malamalama Lelei
D = Lē Tāua
E = Lagona le Mamafa tele
F = Ou te Fa'afetai
G = Lagona le Lototele
H = Ua 'ou To'amalie
I = Lagona le Loto Popole

J = Ua 'ou Fiafia
K = Lagona le lē Fiafia
L = Ua 'ou Ofo
M = Lagona le Filemū
N = Ua o'otia ai a'u
O = Lagona le lē Malie
P = Ua Fa'amalamalamaina a'u
Q = Lagona se Lu'iga
R = Ua fa'ate'ia a'u

S = Lagona le Mata'u
T = Lotomalie
U = Lē Talia
V = Tatalo

W = Naunau ia Fa'aaogā i Lo'u Olaga
X = Ia Fa'asoa atu i isi
Y = Ma'ima'u pe ana ou lē iloa
Z = Se isi mea

O a'u _____ ona o le alofa, ua fa'ailoa mai e le Ali'i nei valo'aga e fa'atatau i taimi mulimuli o le lalolagi i Lana afioga.

E ui lava o mea e ao ona tutupu muamua a e le'i afio mai o Ia e pāū, e mata'utia, ma e mafua ai ona 'ou _____, o a'u _____ e lē tatau ona 'ou fefe, ma ua uma ona lapata'iina a'u ina ia mafai ai ona 'ou sauni.

O a'u _____ ona e i ai le tofi fa'apitoa e ta'ua ai o Lona atali'i/afafine, ma o a'u _____ e i ai le avanoa e aofia ai i Āna 'avefe'au e fa'asoa lenei fe'au o le taimi o le i'uga i isi tagata.

'Ou te _____ ia tu'uina ato'atoa lo'u loto, manatu, agaga, ma mea uma ina ia mafai ai ona 'avea a'u atoa mo Lona alofa ma Lana galuega.

O a'u _____ ina ia tumau lo'u fa'atuatua ma fa'aalia pea lo'u alofa mo Ia i le tausia o Āna poloa'iga tusa lava pe o le ā le tau.

O lo'o ou tulimata'i atu i lenā aso e maua ai le meaalofo o le tino fou ma le ola pea e fa'avavau. 'Ou te _____ o le a vave afio mai le Ali'i Iesu, ma laveā'i a'u mai lenei lalolagi leaga.

O a'u _____ e 'avea Ia o le Ali'i ma ta'ita'i o lo'u olaga. 'Ou te fa'anaunau ia aofia fa'atasi ma i latou o ē pepese i le Pese a Mose i se aso i le lagi.

MANATU

FA'AOPOOPO

TATALO MANA'OMIA

FA'ASINO O TUSIGA

O FALE LOMITUSI

PPPA = Pacific Press Publishing Association (Monutain View, CA)
RHPA = Review and Herald Publishing Association (Washington D.C.)
SPA = Southern Publishing Association (Nashville, TN)

AA= Acts of the Apostles (PPPA) - O Galuega a le 'Au Aposetolo
AG= God's Amazing Grace (RHPA) - O le Alofa Ofoofogia o le Atua
ARSH= Advent Review and Sabbath Herald (RHPA)
#BC= (#) SDA Bible Commentary (RHPA) - (#)Aofa'iga o Fa'amatalaga o le Tusi Pa'ia
COL= Christ's Object Lessons (RHPA) - A'oa'oga Fa'afa'ata'oto a Keriso
CS= Christian Service (RHPA) - O le Galuega Fa'a-Kerisiano
DA= Desire of Ages (PPPA) - Fa'anaunauga o Tupulaga
EW= Early Writings (RHPA) _ O Ulua'i Tusiga
Ev= Evangelism (RHPA) - O le Galuega Fa'atala'i
FE= Fundamentals of Christian Education (SPA) - Fa'avae o A'oa'oga Fa'a-Kerisiano
FLB= Faith I Live By (RHPA) O le Fa'atuatua 'Ou te Ola ai
FW= Faith and Works (SPA) - O le Fa'atuatua ma Galuega
FEP= From Eternity Past (PPPA) - Mai Taimi ua Mavae
GC= Great Controversy (PPPA) - O le Finauga Tele
HP= In Heavenly Places (RHPA) I Nofoāga Fa'alelagi
IC= The Impending Conflict (PPPA) -O le Taua ua Fa'amālumālu Mai
LDE= Last Day Events (PPPA) - O Mea e Tutupu i Aso Fa'ai'u
LHU= Lift Him Up (RHPA) - Ia Si'itia A'e o Ia
Mar = Maranatha (RHPA) - Maranata
MB= Thoughts From the Mount of Blessings (PPPA) - Manatu Mai le Mauga o Fa'amanuiāga
#MCP= (#) Mind, Character, and Personality (SPA) - (#) O le Mafaufau, le Amio, ma le Uiga
ML= My Life Today (RHPA) - O Lo'u Ola i le Asō
MS #=(#) Manuscript -- O Tusiga (#)
OHC= Our High Calling - (HPA) - Lo Tatou Vala'au Maoa'e
PK= Prophets and Kings (PPPA) - O Perofeta ma Tupu
PP= Patriarchs and Prophets (PPPA) - O Pateriaka ma Perofeta
RC= Reflecting Christ (RHPA) Fa'aatina Keriso
RH= Review and Herald (RHPA) nusipepa
SC= Steps to Christ (PPPA) - O La'asaga iā Keriso
SL= The Sanctified Life (RHPA) - O le Olaga ua Fa'apa'iaina
SP= Spirit of Prophecy (RHPA) - O le Agaga o Valo'aga
#SM= (#) Selected Messages (RHPA) - O Fe'au ua Filifilia
ST= The Signs of the Times Nusipepa - O Fa'ailoga o Taimi
#T= (#) Testimonies for the Church (PPPA) - (#) O Molimau mo le Ekalesia
TDG= This Day with God (RHPA) - O le Asō ma le Atua
TMGW= Testimonies to Ministers and Gospel Workers - Molimau i Faife'au ma 'au Faigaluega o le Talalelei
TMK= That I May Know Him (RHPA) - Ina ia 'ou Iloa o Ia
UL= The Upward Look (RHPA) - O le Tapa A'e i Luga

O LE ŌFO MO 'OE

La'u uo e, e i ai se mea o i lenei lalolagi agasala e sili atu le aogā o le a e lē maua ai le ola e fa'avavau fa'atasi ma lou Fa'aola pele, Lē na faia 'oe? O le asō o lo'o Ia tu'u mai se ōfo mo 'oe, e ala i le mana o Lona Agaga. Atonu ua leva ona 'avea 'oe ma se Kerisiano, pe atonu fo'i e te le'i talia lava le meaalofo o lo'o ōfo mai e Iesu mo 'oe. A e o la'u ōlega ia 'aia ne'i e lē talia lenei avanoa ua tu'u mai.

O lo'o fa'aloloa mai pea 'a'ao o Lē na tu'ua le mamalu o le lagi ina ia fa'asao 'oe. O lo'o tu'itu'i mai pea Ia i le faitoto'a o lou loto. O le asō ua tu'u mai mo lou fa'aolataga (II Korinito 6:2), e te talia ea Lana ōfo? E pei ona tatou maua mai i lenei su'esu'ega, o le taimi ua pu'upu'u ma ua lata lava Lona toe afio mai. Ia 'aia ne'i maua mai 'oe o lē o sauni. E leai lava se 'oa po o se agasala e pele ma sili atu le aogā a o le a e lē maua ai le mea tautele na totogi e Keriso mo 'oe.

I lenā aso fiafia mulimuli, e na o le lua vaega o tagata. O i latou o ē sa fa'a'iloa le alofa e ala i le usiusita'i ato'atoa iā te Ia, ma ē le'i fa'apea. O fea le vaega o le a e tū ai?

Afai o lo'o e tū fa'aleogalua ma lē mautinoa lou fa'amaoni i le Atua, 'ou te lapata'i atu e uiga i mailei e lua a le ti'āpolo mo 'oe. Muamua o le a tu'u i lou mafau'au "O a'u e leai so'u lelei," pe "E mana'omia ia fa'amamā muamua la'u amio." O le mea moni, o 'oe e leai lava sou lelei ma e lē mafai ona e fa'amamā 'oe lava ia. Ma o le moni e leai se mea e mafai lava e 'oe ona e faia mo 'oe, a e na maliu Keriso mo 'oe, o Ia e mafai ai so'o se mea. O le olēga aupito tāua lea e maua ai le alofa tunoa ma le pogai e mafai ai.

Pe o le ā lava agasala o lou olaga, ua Ia ōfo mai le fa'amagaloga ma le ola fou. O lo'o Ia vala'au mai ia e sau nei i le tulaga o lo'o e i ai. Ia e sau ma ōu vaiva'iga, tu'inaanau ma agasala uma, fa'aaogā se taimi ia e iloa ai Ia. Afai e te faia fa'apea, o le a Ia aumaia mo 'oe le filemū, ma e ala i Lona Agaga ma le alofa tunoa, o le a Ia suia 'oe mai totonu (Mataio 11:28-30). Pau lau galuega o le tu'u atu o 'oe i le Atua, sa'ili iā te Ia, ma 'alo"ese mai le ti'āpolo (Iakopo 4:7). E mafai lea i le taumafai e 'alo"ese mai fa'aosoosoga (Roma 13:14). Ia manatua lelei lenei mea a o e malaga, e lē o lau fa'afitauli e aupito sili le fetaia'i ma fa'aosoosoga, a o lou so'otaga ia tumau i le Atua. Ia e fa'atasi ma Ia i taimi ta'itasi uma, ma o le a Ia suia ōu fa'anaunauga ma ta'ita'i lau faigamalaga aga'i i le aiga ua Ia saunia mo 'oe.

E i ai la'asaga fa'avae i le ulua'i taliaina o Ia, pe o le toe fa'afou o lau ta'utinoga iā te Ia. O la'asaga nei e fā o le fa'aolataga.

TALIA

E tāua le iloa e tatou uma ta'ito'atasi ma talia o tatou o tagata agasala. O lo'o ta'u manino mai e le Tusi Pa'ia o tatou uma ua agasala ma ua lē o'o i le vi'iga mai le Atua (Roma 3:23). O lo'o fa'amanino mai fo'i e le Tusi Pa'ia le ōfo i tagata uma o ē o le a taliaina le fa'amagaloga ma le fa'aolataga (Ioane 6:37; II Peteru 3:9).

TALITONU

E tatau ona tatou talitonu o Iesu o le Ālo o le Atua, ma o Lona toto e i ai le mana e fa'amamā ai a tatou agasala uma lava (Galuega 16:31; Ioane 3:16). A e afai e vaivai lou fa'atuatua, o le a Ia fesoasoani fo'i iā te 'oe i lea mea. E pei ona ōle atu le tamā ia fa'amalōlō lona atali'i, e mafai ona e tatalo fa'apea, "Le Ali'i e, ua 'ou fa'atuatua; ia e fesoasoani i lo'u lē fa'atuatua" (Mareko 9:24).

TA'UTA'U ATU

E tatau ona tatou fa'aali atu a tatou agasala, ia ōle atu i le Atua ia tu'u iā i tatou se loto salamō e 'ino'ino ai i ia mea, ma le malosi e mafai ai se suiga (I Ioane 1:9). O se fa'aa'oa'oga o le salamō moni ua tu'uina mai lea e le

Tupu o Tavita i le Salamo 51. A ua uma ona ta'uta'u atu, tusa po o e lagona se suiga pe leai, e tatau ona tatou filifili e talitonu ua Ia faia le mea na Ia ta'utino mai ai.

FILIFILI

O lo'o tu'itu'i mai Iesu i le faitoto'a o tatou loto (Fa'aaliga 3:20); e tatau ona tatou filifili e fa'ataga mai Ia i totonu e mafuta ai ma 'avea ai ma le Ali'i o tatou olaga. Pe a tatou faia fa'apea, e 'avea loa tatou ma atali'i/afafine o le Atua (Ioane 1:12).

Pe a e talia Keriso, e lē o le uiga ua fa'apea o 'oe ua ato'atoa, pe fa'apea o lou olaga ua pa'ia. O le sa'o, e matuā mamao ma lea mea, a e o lo'o fa'apea mai, "Le Ali'i e, 'ou te iloa 'ou te lē mafai ona 'ou ola i se olaga pa'ia, a e fa'amolemole ia fa'atasi mai i totonu iā te a'u, ma e ala i Lou malosi, ia E faia fa'apea iā te a'u." O la'asaga o lo'o ta'u mai i luga e o'o ai i le ta'uamiotonuina. O le la'asaga mulimuli e fa'aauau pea i la tatou savaliga ma le Ali'i ma le fa'atagaina o Ia e suia i tatou. O le galuega lenei o le fa'apa'iaina, ma o se galuega e faia pea i le olaga atoa o le tagata (Philipians 1:6).

A o fa'aaoga lo tatou taimi ia tatou iloa lelei ai lo tatou Ali'i, la tatou Uō, ma le Fa'aola, o le a Ia fa'ailoa mai a tatou agasala ma galuea'iina ai Lona mana i o tatou olaga, ona maua ai lea o se suiga. O le a tatou ino'ino i mea sa tatou fiafia i ai, ma fiafia i mea sa muā'i lē fiafia i ai. O la tatou vaega o le sa'ili lea o Ia (Teuterenome 4:29) e ala i le fa'aavanoa o le taimi e su'esu'e ai Lana Afioga ma le tatalo, ona tatou mautinoa lea o Lana ta'utinoga o le a tatou "maua" Ia.

E tūa ona tatou iloa o tatou uma e fanau mai ma se natura fa'aletino. O naunauta'iga o le loto e tete'e i mea fa'aleagaga. I le amataga o la tatou faigamalaga, atonu e tatou te lē maua se fiafia i le faitauina o le Afioga a le Atua. Ua fa'amalieina o tatou lagona uma e ala i mea fa'afiafia ma tu'inaanau fa'alelalolagi. Peita'i a tatou sa'ili pea iā te Ia, o le a fa'afiafia i tatou ina ua tatou maua Ia ma 'upu moni o lo'o Ia naunau e tu'u iā i tatou e ala i Lana Afioga.

Uō e, 'ou te vala'aulia nei 'oe e ōle atu iā te Ia ia fai lenei vavega i totonu iā te 'oe. E pau le mea e fai o sau tatalo fa'atauānu ina ia amata nei la'asaga iā te 'oe. Ia e faia lenei tatalo lē leoa i lou loto pe leo tele fo'i.

"Le Tamā e o i le lagi, ua 'ou iloa ma talia o a'u o se tagata agasala ma e mana'omia le Fa'aola. 'Ou te talitonu o Iesu o le Ālo o le Atua, ma o Lona toto maligi e i ai le mana e fa'amagalo ai agasala. 'Ou te ta'uta'u atu agasala ma 'ou te ōle iā te 'Oe ina ia fa'amamā mai a'u amiolētonu uma lava. Ua 'ou iloa o Ōu ala e sili atu i lo o'u ala; 'ou te tatala atu le faitoto'a o lo'u loto iā te 'Oe, ma 'ou te ōle atu ia E fa'atasi mai i totonu iā te a'u. Fa'amolemole ia 'avea 'Oe ma le Ali'i o lo'u olaga. O la'u tatalo lea i le suafa o Iesu, Amene."